

কিশোর থ্রিলার
তিন গোয়েন্দা

ভলিউম ৪৪

রকিব হাসান





ছত্রিশ টাকা

ISBN 984-16-1441-3

প্রকাশক

কাজী আনোয়ার হোসেন

সেবা প্রকাশনী

২৪/৪ সেগুনবাগিচা, ঢাকা ১০০০

সর্বস্বত্ত্ব প্রকাশকের

প্রথম প্রকাশ: ২০০১

প্রচ্ছদ পরিকল্পনা: রনবীর আহমেদ বিপ্লব

মুদ্রাকর

কাজী আনোয়ার হোসেন

সেগুনবাগান প্রেস

২৪/৪ সেগুনবাগিচা, ঢাকা ১০০০

যোগাযোগের ঠিকানা

সেবা প্রকাশনী

২৪/৪ সেগুনবাগিচা, ঢাকা ১০০০

দুরালাপন: ৮৩১ ৪১৮৪

জি.পি.ও. বক্স: ৮৫০

E-mail: Sebaprok@citechco.net

পরিবেশক

প্রজাপতি প্রকাশন

২৪/৪ সেগুনবাগিচা, ঢাকা ১০০০

শৌ-রুম

সেবা প্রকাশনী

৩৬/১০ বাংলাবাজার, ঢাকা ১১০০

প্রজাপতি প্রকাশন

৩৮/২ক বাংলাবাজার, ঢাকা ১১০০

Volume-44

TIN GOYENDA SERIES

By: Rakib Hassan

প্রত্নসন্ধান

৫-৬৮

জবরদখল

১৩০-২০০



প্রত্নসন্ধান

প্রথম প্রকাশ: ২০০০

‘কিসের জন্যে খুঁড়ছে বললে?’ আগ্রহী হয়ে উঠল কিশোর পাশা। হাতের বইটা সরিয়ে রাখল একপাশে।

‘গুপ্তধন,’ আবার একই কথা বলল রবিন। ‘ডেভিল’স রিজে প্রত্নতাত্ত্বিক খোঁড়াখুঁড়ি চালাতে গেছে ইউনিভার্সিটি। জায়গাটা চেনো?’

‘চিনি,’ মুসা জবাব দিল। ‘এখান থেকে পশ্চিমে, তাই না?’

‘হ্যাঁ।’

ঘাসে ঢাকা একটা মাঠের মধ্যে বিশাল ফোঁড়ার মত উঁচু হয়ে থাকা একটা টিবি। কমেটকে নিয়ে দৌড়াতে গিয়ে দেখেছি। শুনেছি ওখানে ভূতের আনাগোনা আছে।’

মাথা ঝাঁকাল রবিন, ‘হ্যাঁ, ওইটাই। মাঝখানে একটা মাটির গম্বুজকে ঘিরে মাঠ। ওই গম্বুজের মত জায়গাটা নাকি কাহুয়া ইনডিয়ানদের কবরস্থান। সত্তর-আশি বছর আগে একবার খোঁড়া হয়েছিল, কিছু পাওয়া যায়নি। তখন তো শুধু বেলচার ওপর নির্ভর করতে হত, মিস করাটা স্বাভাবিক; এখন আধুনিক সব যন্ত্রপাতির সঙ্গে যুক্ত হয়েছে কম্পিউটার। ধারণা করা হচ্ছে বিশিষ্ট কাউকে কবর দেয়া হয়েছে ওখানে, কোন কাহুয়া সর্দার-টর্দার হবে।’ হাঁ করে তাকিয়ে থাকা দুই বন্ধুর দিকে তাকিয়ে হাসল সে। ‘আজ সকাল থেকেই খোঁড়া শুরু করার কথা ওদের।’

‘তুমি জানলে কি করে?’ জিজ্ঞেস করল কিশোর।

‘কেরির কাছে। ওই সম্পর্কে স্কুল ম্যাগাজিনে লিখতে অনুরোধ করেছে। ছবি দিতে পারলে ভাল হয়।’

কেরি জনসন ওদের স্কুলে সবচেয়ে ওপরের ক্লাসে পড়ে। স্কুল ম্যাগাজিনের সম্পাদিকা।

‘কিন্তু প্রত্নতাত্ত্বিক খোঁড়াখুঁড়ি মানে তো পুরানো হাড়গোড়, ভাঙাচোরা মাটির হাড়ি-পাতিল; অতি ফালতু সব জিনিসপত্র,’ মুসা বলল। ‘এর মধ্যে গুপ্তধন ঢুকল কি করে?’

‘কেন, মিশরের ফারাও তুতানখামেনের কবরের কথা শোনেনি? প্রাচীনকালে ধনী কেউ মারা গেলে তাদের সঙ্গে প্রচুর ধনরত্ন, সোনার মোহর, অলঙ্কার দিয়ে দেয়া হত। তাদের বিশ্বাস ছিল পরকালে ওসব জিনিস মৃতদের স্বর্গে নিয়ে যেতে সাহায্য করবে। পৃথিবীর বহু জায়গাতেই এ নিয়ম প্রচলিত ছিল।’

‘ঈশ্বরকে ঘৃণ! হ্যাঁহ, পাগল আর কাকে বলে।’

‘ডেভিলস রিজে যাদের কবর দেয়া হয়েছে, তাদের কেউই ফারাওয়ের মত অত বড়লোক নয়, তবে ধনরত্ন ছিল না এমনও নয়। ইনটারেস্টিং কিছু পাওয়া যেতে

পারে।

‘এতকাল পরে কি সত্যি সত্যি আছে ওগুলো?’

‘না থাকার কি হলো? মিশরে যদি থাকতে পারে, এখানে থাকবে না কেন?’

‘মিশরে তো পিরামিড! শুনেছি, পিরামিডের ভেতরে সব কিছু সুরক্ষিত থাকে। এখানে তো আর তেমন কিছু নেই।’

‘কি আছে সেটাই তো দেখতে চাইছে। আমি যাব। ছবি তুলে আনব। আজ বিকেলেই যাব ফুল দুটির পর।’

‘তাহলে, নড়েচড়ে উঠল কিশোর, ‘আমরাই বা না যাই কেন?’ মুসার দিকে তাকাল সে, ‘কি, যাবে?’

‘আমার আপত্তি নেই। দিনের বেলা নিশ্চয় ভূতগুলো অতটা ভয়ানক হয়ে উঠবে না, তা ছাড়া এত মানুষের মধ্যে হামলা করারও সাহস করবে না, কি বলো?...কিন্তু বসে/বসে কি শুধু আলাপ করলেই চলবে? টিফিন পিরিয়ড তো প্রায় শেষ।’

‘যাও না, ভাই’ অনুরোধ করল রবিন, ‘এক দৌড়ে গিয়ে ক্যান্টিন থেকে কয়েকটা স্যান্ডউইচ নিয়ে এসো না। টাকাটা নাহয় আমিই দেব, যাও।’

সুন্দর বিকেল। ঝিরঝিরে বাতাস। সাইকেল চালিয়ে চলেছে তিন গোয়েন্দা।

সামনে পাহাড়ী এলাকা। ধীরে ধীরে ওপরে উঠছে ওরা। কাঁধের ওপর দিয়ে ফিরে তাকাল কিশোর। সুন্দর লাগছে রকি বীচ শহরটা। সাদা সৈকত। প্রশান্ত মহাসাগরের নীল পানি। আকাশের সাদা মেঘের প্রতিচ্ছবি তৈরি করেছে যেন ভেসে যাওয়া ছোট-বড় জলযানগুলো।

মাইলখানেক এগোনোর পর একটা সমতল অঞ্চলে উঠে এল ওরা। পথ আঁকারাকা। কিন্তু দ্রুত চালাতে পারছে এখন। দুধারে মাঠ।

আরও খানিকটা এগোনোর পর একটা ঘাসে ঢাকা ঢালের কিনারে সাইকেল থামাল মুসা।

‘নাও, এসে গেছি। এটাই ডেভিল’স রিজ।’

নিচু ঝোপের প্রাকৃতিক বেড়া তৈরি হয়ে আছে। মাঝখানে কেটে বসানো চওড়া একটা কাঠের গেট। তার ওপাশে ছড়ানো ঘাসে ঢাকা মাঠ। দুশো গজ দূর থেকে লম্বা, নিচু একটা পাহাড় ঠেলে উঠেছে যেন মাটির ওপর, উল্টে ফেলে রাখা বাথটাবের মত। চারপাশের প্রকৃতির সঙ্গে বেমানান, মানুষের তৈরি বোঝা যায়।

পুরানো একটা বাদামী গাড়ি দাঁড়িয়ে আছে রাস্তাটার মাঝামাঝি জায়গায়।

গেট খোলা। সাইকেল ঠেলে এগোতে এগোতে চোখে পড়ল ওদের, উঁচু জায়গাটার একপাশে দুটো ল্যান্ড রোভার দাঁড়িয়ে আছে। তার পেছনে ধূসর রঙের একটা ছোট ক্যারভান।

পাহাড়ের গা থেকে অনেকখানি জায়গার ঘাস চেঁছে ফেলা হয়েছে। বেলচা আর কর্ণিক নিয়ে কাজ করছে তিন-চারজন লোক।

চড়া কষ্টস্বর শুনে ফিরে তাকাল তিন গোয়েন্দা।

ক্যারভানের দরজা খোলা। সিঁড়িতে এসে দাঁড়িয়েছেন এক ভদ্রমহিলা। নিচে একজন বয়স্ক ভদ্রলোক উত্তেজিত ভঙ্গিতে চিৎকার করে হাতের ওয়াকিং-স্টিকটা

তুলে পাহাড়ের দিকে কি যেন দেখাচ্ছেন। মহিলার বয়েস আটশ কি উনত্রিশ। পরনে জিনস, গায়ে ঢোলা শার্ট, কালো চুলগুলো পেছনে টেনে নিয়ে গিয়ে ঘোড়ার লেজের মত করে বাঁধা। ভদ্রলোকের পরনে ধূসর স্যুট, দোমড়ানো; ধূসর এলোমেলো চুলের বোঝা ঘাড়ের ওপর নেমে এসেছে।

‘এই রে, সেরেছে!’ বলে উঠল মুসা। ‘বাধবে গুগোল!’

‘কে উনি?’ জানতে চাইল রবিন। ‘জমির মালিক?’

মাথা নাড়ল মুসা, ‘প্রফেসর ডেমিরন। গোস্ট মিলে থাকেন, নদীর পাড়ে, বনের মধ্যে।’ দুই বন্ধুর দিকে তাকাল সে, ‘কেন, পাগলা প্রফেসরের নাম শোনেনি? পুরানো, বিশাল এক পোড়ো বাড়িতে একলা থাকেন। সন্ন্যাসীর জীবন যাপন করেন। বাড়ি থেকে বেরোনই না।’

‘তাই,’ মাথা দোলাল রবিন, ‘পুরোই তো উন্মাদ মনে হচ্ছে। বাড়ি মারবেন নাকি?’

‘প্রফেসর ডেমিরন?’ বিড়বিড় করল কিশোর। ‘নাম শুনেছি, দেখিনি কখনও। রিটার্ড, তাই না? কি করছেন?’

‘কাছে গেলেই জানা যাবে,’ রবিন বলল।

‘লাঠির নাগালের মধ্যে যাওয়া উচিত হবে না,’ সাবধান করল মুসা। ‘ডেমিরনের লাঠির কুখ্যাতি আছে!’

‘তুমি জানলে কি করে?’

‘কমেটকে নিয়ে বেড়াতে এসেছি বললাম না এদিকে, সেজন্যেই জানি। ওয়াটার মিলটাও চিনি। বনের মধ্যে ঘুরে বেড়াতে দেখেছি তাঁকে। কাছে গিয়েছিলাম কি করছেন দেখার জন্যে। এমন ভঙ্গিতে আমার দিকে তাকালেন, থাকার সাহস হলো না; তারপর থেকে দেখলেই পালাই।’

‘অনধিকার চর্চা করছ তোমরা,’ চিৎকার করে উঠলেন ডেমিরন। ‘শান্তিতে থাকতে দেয়া উচিত ওদের।’

‘প্রফেসর ডেমিরন,’ শান্তকণ্ঠে বললেন মহিলা, ‘আমার কাছে বিশ্ববিদ্যালয় আর লোক্যাল কাউন্সিলের লিখিত অনুমতি আছে। অরৈধ কিছু করছি না। আপনার সঙ্গে অকারণ তর্ক করার সময় নেই আমাদের। আপনার কোন অভিযোগ থাকলে যথাযথ কর্তৃপক্ষের মাধ্যমে আসতে হবে।’

সাপের লেজের মত লাফ দিয়ে উঠল প্রফেসরের লাঠি। একধাপ ওপরে উঠে গেলেন মহিলা।

‘তোমাকে আমি সাবধান করে দিছি, মিস ড্যানহ্যাম,’ চিৎকার করে বললেন প্রফেসর, ‘ভাল চাও তো, এই খোঁড়াখুঁড়ি বন্ধ করো। পরে পস্তাবে বলে দিলাম।’

জুড়ে উঠল মহিলার চোখ। ‘হুমকি দিচ্ছেন নাকি?’

‘আমি তোমাকে সাবধান করছি। নাক গলাচ্ছ তোমরা। মিনাকুয়োর বিরুদ্ধে গেলে দুঃখ আছে কপালে।’

কপালে হাত বোলালেন মহিলা। ‘আপনার বকবক অনেক সহ্য করেছি, প্রফেসর। আমি বাস্তব নিয়ে কাজ করতে ভালবাসি। মিথলজিতে কোন আগ্রহ নেই আমার। আপনার বলা শেষ হয়ে থাকলে এখন যেতে পারেন। সময় থাকতে চলে প্রভুসন্ধান

যান, নইলে যা কাও শুরু করেছেন, বোকামি করে শেষে নিজেই বিপদে পড়বেন। মানুষের ধৈর্যের একটা সীমা আছে।

প্রচণ্ড রাগে চিৎকার করে উঠলেন প্রফেসর। আবোল-ভাবোল কি সব বকতে লাগলেন বেশির ভাগই বোঝা গেল না।

চোখের কোণ দিয়ে বলিষ্ঠ লম্বা এক তরুণকে ছুটে আসতে দেখল কিশোর।

‘মায়া,’ কাছে এসে বলল সে, ‘কি হয়েছে?’ প্রফেসরের লাঠি বাঁচিয়ে তাঁর কাঁধে চেপে ধরে ঝাঁকি মারল।

‘হাত সরাও, ডাকাত কোথাকার!’ গর্জে উঠলেন ডেমিরন।

হতভম্ব হয়ে দেখছে তিন গোয়েন্দা, প্রফেসরের হাত থেকে হ্যাঁচকা টানে লাঠি কেড়ে নিল লোকটা।

‘ডন,’ চিৎকার করে বললেন প্রফেসর ড্যানহ্যাম, ‘ছাড়ো ওঁকে। ছেড়ে দাও...’

কিন্তু সর্বনাশ যা ঘটান ঘটে গেল। পিছাতে গিয়ে কিসে যেন পা বেধে ঘাসের ওপর চিত হয়ে পড়ে গেলেন প্রফেসর ডেমিরন।

দৌড় দিল তিন গোয়েন্দা।

সিঁড়ি বেয়ে দ্রুত নেমে এলেন প্রফেসর ড্যানহ্যাম। তিন গোয়েন্দার সহায়তায় প্রফেসরকে তুলে দাঁড় করালেন। ডেমিরনের নীল চোখে আগুন। মুখটা ফ্যাকাসে। কুঁচকানো চামড়ার ভাঁজ আরও গভীর হয়েছে।

লাঠিটা কেড়ে নিলেন তরুণ লোকটার হাত থেকে। সবার দিকে তাকিয়ে আগুন ঝরাতে লাগলেন চোখ থেকে। চুলগুলো পাখির বাসা হয়ে আছে।

‘পস্তাবে,’ টেনেটুনে গায়ের জ্যাকেট সোজা করতে করতে বললেন। ‘এর জন্যে পস্তাতে হবে সবাইকে। ক্ষমা নেই। কেউ রেহাই পাবে না।’

‘ঘটনাটার জন্যে সত্যি দুর্গন্ধিত আমি, প্রফেসর ডেমিরন,’ প্রফেসর ড্যানহ্যাম বললেন। ‘লেগেছে? গাড়িতে করে বাড়ি পৌঁছে দিয়ে আসব?’

ঝটকা দিয়ে পেছনে সরে গেলেন ডেমিরন। হেসে উঠলেন শুকনো স্বরে। গ্রীষ্মের দুপুরে পাতার ছায়ায় বসা দাঁড়াকারের ডাকের মত লাগল হাসিটা। প্রফেসর ড্যানহ্যামের দিকে তাকালেন তিনি। ‘আমাকে সাহায্য করা লাগবে না, নিজেদের কথা ভাবো। মিনাকুরো তোমাদের ছাড়বেন না। তাঁর শান্তি নষ্ট করার প্রতিশোধ তিনি নেবেনই।’

ঘিরে থাকা মানুষের ঘের থেকে বেরিয়ে এলেন তিনি।

মুসার ওপর চোখ পড়তে থমকে দাঁড়ালেন। চোখে অদ্ভুত দৃষ্টি। তাকে ধরার জন্যে হাত বাড়ালেন।

পিছিয়ে গেল মুসা। ঘাবড়ে গেছে।

বিড়বিড় করে বললেন প্রফেসর, ‘এখানে আসা ঠিক হয়নি তোমার, রুপানি। চলে যাও এখান থেকে। মিনাকুরোকে মুক্ত করার ষড়যন্ত্র চলছে।’

অস্বস্তির হাসি ফুটল মুসার চোখে। অসহায় ভঙ্গিতে তাকাল কিশোরের দিকে।

সবার ওপর দ্রুত দৃষ্টি ঘুরে এল আবার ডেমিরনের। ‘বোকা গাধার দল!’ টের পাবে! মিনাকুরোকে ঘাঁটানো!’

গটগট করে গেটের দিকে এগিয়ে গেলেন তিনি। হতবাক হয়ে তাকিয়ে আছে

সবাই।

মুদু শিস দিয়ে উঠল কিশোর। 'এই মিনাকুয়োটা কে?'

দুই

ইঞ্জিন স্টার্ট নেয়ার শব্দ হলো। পুরানো গাড়িটা প্রফেসর ডেমিরনের।

ফোঁস করে নিঃশ্বাস ফেলে জোরে জোরে মাথা নাড়লেন প্রফেসর ড্যানহ্যাম। 'কি যে একটা কাণ্ড হলো!' তিন গোয়েন্দার দিকে তাকিয়ে বললেন, 'তোমাদের সাহায্যের জন্যে ধন্যবাদ। কি করতে পারি, বলো?'

রবিনের দিকে তাকাল কিশোর। ইঞ্জিনটা বুঝতে পারল রবিন। গলায় ঝোলানো ক্যামেরাটা তুলে এক পা এগোল। 'হবি তুলতে এসেছি। স্কুল ম্যাগাজিনের জন্যে। যদি অনুমতি দেন তো...'

মাথা ঝাঁকালেন প্রফেসর ড্যানহ্যাম। 'আমার আপত্তি নেই। তবে প্রফেসর ডেমিরনের সঙ্গে ঘটে যাওয়া অ ঘটনটার ব্যাপারে কিছু না লিখলেই খুশি হব।'

'কিন্তু উনি এত রাগলেন কেন?' জিজ্ঞেস করল কিশোর।

'কে তোমরা?'

নিজেদের নাম বলল কিশোর। গোয়েন্দা পরিচয়টা গোপন রাখল।

'আমি মায়া ড্যানহ্যাম। এ অভিযানের প্রধান। জায়গাটা তোমাদের ঘুরে দেখার অনুমতি দিতে পারি, যদি কথা দাও কোন গোলমাল করবে না।'

'না না, গোলমাল করব কেন?' তাড়াতাড়ি বলল কিশোর। 'এখানে খোঁড়াখুঁড়ি চালাচ্ছেন কিসের আশায়, দয়া করে বলবেন?'

হাসলেন প্রফেসর ড্যানহ্যাম। 'আকাশ থেকে এই এলাকার কিছু ছবি তোলা হয়েছিল। সেগুলোকে কম্পিউটারে ঢুকিয়ে দেখতে গিয়ে আবিষ্কার করলাম রিজের গায়ে অদ্ভুত পাথরের দাগ। পাথরগুলো এখন নেই, কবরের ফলক ছিল ওগুলো। তারমানে জায়গাটা এককালে ছিল গোরস্থান।'

নোটবুকে লিখে নিল রবিন।

কিশোর জিজ্ঞেস করল, 'কি পাওয়ার আশা করছেন এখানে?'

হাসলেন প্রফেসর ড্যানহ্যাম। 'এখন কিছু বলতে চাই না। আগে পাওয়া তো যাক। তোমাদের সঙ্গে কথা বলতে খারাপ লাগছে না, কিন্তু জরুরী কাজ পড়ে আছে আমার।' তরুণ লোকটার দিকে তাকালেন তিনি। 'ডন, তুমি এদের সব দেখাতে পারবে?'

'পারব।' তিন গোয়েন্দার দিকে তাকাল সে। হাত বাড়িয়ে দিল, 'আমি ডোনাল্ড ইয়ানমার, আর্কিওলজির ছাত্র। প্রফেসর মায়া ড্যানহ্যামের টীমে কাজ করছি।'

'প্রফেসর ড্যানহ্যাম কোন্ বিশ্ববিদ্যালয়ের?' ভুরু কুঁচকাল কিশোর। 'বয়েস তো একেবারেই কম।'

'হ্যাঁ, মাথা ঝাঁকাল ডোনাল্ড, 'লস অ্যাঞ্জেলেসে আর্কিওলজির সবচেয়ে অল্পবয়সী প্রফেসর।' বন্ধ হয়ে যাওয়া ক্যারাবানের দরজাটার দিকে তাকাল সে।

‘অসম্ভব ক্লিয়ান্টি ।...তা কি দেখতে চাও তোমরা?’

‘সব কিছু,’ জবাব দিল রবিন। ‘তবে সবাব আগে যদি বলেন ওই বুড়ো ভদ্রলোকের সঙ্গে গোলমালটা কী আপনাদের?’ মুসার দিকে তাকাল সে, ‘তোমাকে কি বলে যেন ডাকল?’

‘রূপানি,’ জবাব দিল মুসা। ‘মাথাটা পুরোই খারাপ তাঁর।’

‘রিটায়া’র করার পর থেকেই কেমন উদ্ভট আচরণ শুরু করেন তিনি,’ ডোনাল্ড বলল। ‘এখন অবশ্য বন্ধ পাগল। প্রভুতত্ত্বে অসাধারণ জ্ঞান। এই এলাকার প্রাচীন ইনডিয়ানদের ব্যাপারে তিনি বিশেষজ্ঞ।’ লম্বা পাহাড়টার দিকে তিন গোয়েন্দাকে নিয়ে চলল সে। ‘কাহুয়া ইনডিয়ানদের ব্যাপারে কিছু জানো তোমরা?’

‘নাহ্, তেমন কিছু না,’ কিশোর বলল।

‘কয়েক হাজার বছর এ অঞ্চলে রাজত্ব করেছে ওরা।’ পাহাড়ের মত উঁচু মাটির টিবিটার দিকে হাত তুলল ডোনাল্ড, ‘ধারণা করা হচ্ছে খ্রীষ্টের জন্মের দুশো বছর আগে থেকে কবর দেয়া শুরু হয়েছিল ওই গোরস্থানটায়।’

‘বাপরে!’ চোখ বড় বড় করে ফেলল রবিন। ‘তারমানে বাইশশো বছরের পুরানো কবর! অবিশ্বাস্য!’

‘হ্যাঁ, তাই। বড় বড় সেনাপতি আর গোত্রের সর্দারদের কবর দেয়া হত ওই গোরস্থানে। মায়ার ধারণা, সাংঘাতিক সব জিনিস পাওয়া যাবে ওখানে।’

‘আরও আগেই যে খুঁড়ে তুলে ফেলা হয়নি কি করে শিওর হচ্ছেন?’ কিশোরের প্রশ্ন। ‘দুই হাজার বছরের মধ্যে বহুবার খোঁড়াখুঁড়ি হয়ে থাকতে পারে, লুট করে নিয়ে যেতে পারে কবর চোরেরা।’

‘আমরাও ভেবেছি এ কথা,’ হাসল ডোনাল্ড, ‘পাওয়া না পাওয়া এখন অনেকটাই ভাগ্যের ওপর নির্ভর করছে। গুজব আছে, জায়গাটার নাকি ভূতের উপদ্রব। তাতে আমাদের সুবিধেই। ভয়ে আসতে চাইবে না লোকে, বিরক্ত করবে না।’

‘তারমানে ভুতুড়ে এলাকা!’ রোদের মধ্যেও গায়ে কাঁটা দিল মুসার।

হেসে উঠল ডোনাল্ড। ‘আমি ভূত বিশ্বাস করি না। তবে ভূতের উপদ্রবের চেয়েও বেশি উপদ্রব করবেন প্রফেসর ডেমিরন, তাতে কোন সন্দেহ নেই আমার।’

‘তাঁর সম্পর্কে আর কিছু জানাতে পারেন?’ অনুরোধ করল কিশোর।

‘বেশি কিছু জানি না,’ ডোনাল্ড বলল। ‘দশ বছর আগে অবসর নিয়েছেন। ইউনিভার্সিটিতে গুজব আছে, শেষ দিকে নাকি খেপামি এতটাই বেড়ে গিয়েছিল তাঁর, বিদেয় করে জানে বেঁচেছে কতপক্ষ। পুরানো গুজবে তাঁর আগ্রহ। মিথলজি, দেবদেবী আর ওদের অভিষাপ বিশ্বাস করেন। এখানে প্রত্নতাত্ত্বিক অভিযানের কথা শোনামাত্র বিশ্ববিদ্যালয় কর্তৃপক্ষকে চিঠি লেখেন। বলেন, এই এলাকার ধারে কাছে যেন আসতে দেয়া না হয়...’ রবিনের দিকে তাকাল সে, ‘উহু, লিখো না লিখো না, এ সব কথা লিখো না। ডেমিরনের ব্যাপারে পত্রিকায় কিছু না লিখতে বারণ করেছে মায়া, মনে নেই?’

অনিচ্ছাসহেও কলম থামিয়ে দিল রবিন। ‘কাহুয়া ব্যবহার করতে পারব তো?’

তা পারবে।

গলায় ঝোলানো ক্যামেরা তুলে এগিয়ে গেল রবিন। মুসা আর কিশোরকে নিয়ে পাহাড়ের গা থেকে যেখানে ছাল-চামড়া তুলে ফেলা হয়েছে সেদিকে চলল ডোনাল্ড।

‘পাওয়া গেছে নাকি কিছু?’ জানতে চাইল মুসা।

‘না, সবে তো বাইরের পরতটা ছাড়ানো শুরু করেছি।’ ছাত্রদের দিকে তাকাল ডোনাল্ড। খুব সাবধানে, কর্ণিক দিয়ে আস্তে আস্তে মাটি খুঁড়ে, প্রায় প্রতিটি কণা পরীক্ষা করে তারপর মাটিগুলো একপাশে ছুঁড়ে ফেলছে ওরা।

উজ্জ্বল সূর্যালোকে মাথার ওপর উঁচু হয়ে থাকা বিশাল টিবিটার দিকে মুখ তুলে তাকাল কিশোর। ‘মাটি খোঁড়ার জন্যে মোটর-চালিত কিছু ব্যবহার করলে তাড়াতাড়ি হত না?’

‘তা হত,’ ছোট্ট হাসি দিল ডোনাল্ড। ‘কিন্তু তাতে মূল্যবান জিনিস নষ্ট হয়ে যাওয়ার ভয় থাকে। প্রত্নসন্ধান ব্যাপারটাই একটা অতি ধীর গতির কাজ। বহু সময় লেগে যায়। অসম্ভব ধৈর্য দরকার। তাড়াতাড়ি করতে গেলেই সব মাটি। খুব ধীরে ধীরে খুঁড়তে হয়।’

‘ভেতরে কি পাবেন আশা করছেন?’

‘যদি কোন সর্দারের কবর হয়, তাতে থাকবে অস্ত্র, ধনরত্ন, গহনাপাতি। পরকালে গভীর বিশ্বাস ছিল কাহুয়া ইনডিয়ানদের। ওরা মনে করত, মূল্যবান জিনিস আর অস্ত্রশস্ত্র ওদেরকে পরকাল পাড়ি দিতে, ভাল থাকতে সাহায্য করবে।’

‘কবে নাগাদ কবর আবিষ্কার করতে পারবেন ভাবছেন?’

‘এর কোন ঠিক নেই। কালও পেয়ে যেতে পারি, আবার আসের পর মাসও লেগে যেতে পারে। বললামই তো, প্রত্নসন্ধান একটা অসম্ভব ধৈর্যের ব্যাপার।’

‘কবর দেখতে আসতে পারব আমরা? অসুবিধে হবে আপনাদের?’

‘আমাকে জিজ্ঞেস না করে বরং মায়াকে জিজ্ঞেস করো। ও আমাদের লীডার। তবে অসুবিধে হওয়ার তো কথা নয়, যদি কোন ঝামেলা না করো তোমরা।’

তিন

পরদিন স্কুলে টিফিনের সময় লাইব্রেরি থেকে নিয়ে আসা একটা বই দেখাল রবিন।

বারান্দার সিঁড়িতে বসে আইসক্রীম খাচ্ছে মুসা। ফিরে তাকাল। তবে কোন আগ্রহ প্রকাশ করল না।

কিশোর জানতে চাইল, ‘কি বই?’

জবাব দিল না রবিন। মলাট উল্টে, কয়েকটা পাতা সরিয়ে একটা নতুন অধ্যায়ে এসে থামল। অধ্যায়ের নামটা দেখাল। রূপানি: কাহুয়া হর্স-গড!

মুখ তুলে দুই বন্ধুর দিকে তাকাল রবিন। ‘মুসাকে কাল রূপানি নামে ডেকেছিলেন পাগলা প্রফেসর, মনে আছে?’

আইসক্রীম খাওয়া থামিয়ে দিল মুসা। চোখ চকচক করে উঠল কিশোরের।

মুচকি হাসল রবিন। তার উদ্দেশ্য সফল। চমকে দিতে চেয়েছিল, পেরেছে।
'লিখেছে কে, সেটা দেখো।'

দেখার জন্যে কাত হয়ে এল মুসা। পড়ল, 'কাহুয়া মিথলজি: অ্যান
ইনভেস্টিগেশন ইনটু এনশনট লিজেডস বাই শেফার্ড ডেমিরন, প্রফেসর অভ
ইনডিয়ান আর্কিওলজি। 'খাইছে!' হাঁ হয়ে গেল সে। 'ওই পাগলটা লিখেছে!'

'হ্যাঁ, মাথা ঝাঁকাল রবিন। 'পঁচিশ বছর আগে। তারমানে বহুকাল থেকেই এর
পেছনে লেগে রয়েছেন তিনি।'

নিচের ঠোটে চিমটি কাটল কিশোর। 'রূপানি সম্পর্কে কি লিখেছেন, পড়েছ
নাকি?'

'পড়েছি,' রবিন বলল। 'দাঁড়াও, আবার পড়ছি।'

'পড়ার দরকার নেই,' ধৈর্য রাখতে পারছে না কিশোর। 'মুখেই বলো।'

'রূপানি একজন অশ্ব-দেবতা। কাজ-কর্ম সব ঘোড়ার পিঠে সওয়ার হয়ে করত
যে সব দেবতা, তাদের বলা হত অশ্ব-দেবতা। ভীষণ ক্ষমতাসালী দেবতা ছিল
রূপানি। মানুষ, জন্তু-জানোয়ার, সব কিছুর রূপ ধরতে পারত। কিশোর বয়েসী
কালো মানুষের রূপ ধরতে বেশি ভালবাসত। প্রাচীনকালে শয়তান দেবতা শিংওয়ালা
মিনাকুয়োর অত্যাচারে মানুষ অতিষ্ঠ হয়ে রূপানির সাহায্য ভিক্ষা করল। তাতে সাড়া
দিয়ে মিনাকুয়াকে লড়াইয়ে আমন্ত্রণ জানাল রূপানি। লড়াইয়ের জায়গা নির্বাচন করা
হলো বিশাল এক মাটির ঢিবিকে। হেরে গিয়েছিল মিনাকুয়ো। জাদু করে তাকে
আটকে ফেলেছিল রূপানি, বন্দি করে রেখেছিল মাটির ঢিবির তলায়, যাতে জ্বালাতে
না পারে পৃথিবীর মানুষকে। শত শত বছর ধরে এক ভাবে আটকে আছে
মিনাকুয়ো। কাহুয়া ইনডিয়ানদের বিশ্বাস ছিল, কেউ গিয়ে ঢিবি খোঁড়াখুঁড়ি করলেই
বেরিয়ে চলে আসবে সেই দানব, ভয়ঙ্কর প্রতিশোধ নেবে।'

ঘোঁষ মিটমিট করছে মুসা। 'তারমানে পাগলা প্রফেসর বিশ্বাস করেন এ সব?'

'তুমি যদি ভূতপ্রেত, দৈত্যদানবে বিশ্বাস করতে পারো, তিনি করলে দোষ কি?'
হাসল রবিন।

'না, তিনি তো একজন প্রফেসর,' ঢোক গিলল মুসা। তাড়াতাড়ি কামড় দিল
আইসক্রীমে।

কিশোরের দিকে তাকাল রবিন, 'প্রফেসর নিশ্চয় বিশ্বাস করেন ডেভিলস
রিজেই মিনাকুয়াকে বন্দি করেছিল রূপানি। এ জন্যেই খুঁড়তে বাধা দিতে
গিয়েছিলেন। তার ধারণা, দানবটা বেরিয়ে এসে সব ক'জনকে খুন করবে।'

দুই কামড়ে বাকি আইসক্রীমটুকু সাবাড় করল মুসা। মুখ মুছে বলল, 'দানব
বেরোক আর না বেরোক, পাগলটার সামনে দ্বিতীয়বার আর পড়তে চাই না আমি।
কেমন ভূতের মত চেহারা। দেখলেই গা ছমছম করে।'

'ভাবছি,' কিশোর বলল, 'কাল আবার ডেভিলস রিজে যাব। তার আগে কাহুয়া
ইনডিয়ানদের সম্পর্কে খানিকটা পড়াশোনা করে নিলে বোধহয় ভাল হয়। সত্য
জানতে চাই, মিথলজি বা ভূতের কিছা নয়।'

'যা ইচ্ছে করো গে তোমরা,' উঠে দাঁড়াল মুসা। 'আমি ওসব ভূতফুতের মধ্যে
নেই। আমি ক্লাসে যাচ্ছি।'

পরদিন সকালে 'স্কুলের গেটে মুসার জন্যে অস্থির হয়ে অপেক্ষা করছে রবিন আর কিশোর। একটু আগে ফোন করে জানিয়েছে মুসা, সকালে বাড়ির কাছে হাঁটতে বেরিয়েছিল, প্রফেসর ডেমিরনের সঙ্গে দেখা। তার জন্যেই অপেক্ষা করছিলেন প্রফেসর। কিভাবে ঠিকানা জোগাড় করেছেন তিনিই জানেন। অদ্ভুত একটা পাথরের লকেট দিয়ে নাকি বলেছেন গলায় ঝুলিয়ে রাখতে, ওটা তাকে রক্ষা করবে।

'কই আসে না কেন?' রবিনের প্রশ্ন।

'ওই যে, আসছে,' বলল কিশোর।

সামনে এসে ব্রেক কমল মুসা। সাইকেল থেকে নামল। রবিন আর কিশোর দুজনেই দেখতে পেল তার গলায় ঝোলানো লকেটটা।

খুলে দিল মুসা। হাতে নিয়ে দেখতে লাগল রবিন। গোল চ্যান্টা একটা পাথর। মাঝখানে ফুটো করে তাতে চামড়ার ফালি পরানো। হালকা বাদামী রঙ। গা'টা মসৃণ। তবে ফুটোর গা তেমন মসৃণ নয়।

'কি এটা?'

হাত ওল্টাল মুসা, 'আমি কি করে জানব? জিজ্ঞেস করারও সাহস হয়নি। আমার হাতে গুঁজে দিয়ে এমন করে তাকাতে লাগল, ভয়ে জান উড়ে যাবার জোগাড় হয়েছিল আমার। ভয়ঙ্কর উন্মাদ!'

কিশোরের দিকে তাকাল রবিন, 'একটা কিছু করা দরকার, কি বলো?'

'কি করব?'

'পুলিশের কাছে যেতে পারি। গিয়ে বলতে পারি প্রফেসর ডেমিরন মুসার পিছে লেগেছেন। যে কোন সময় বিপজ্জনক হয়ে উঠতে পারেন।'

মাথা নাড়ল মুসা, 'উহু। আমার কোন ক্ষতি করবে বলে মনে হয় না। এখনও করেনি। কেবল কেমন অদ্ভুত চোখে তাকায়।'

চিন্তিত ভঙ্গিতে মাথা ঝাঁকাল কিশোর। 'যাকগে। বিকেলে ছুটির পরে যাবে নাকি ডেভিলস রিজে? কিছু পেল কিনা ওরা দেখতাম।'

হাসল মুসা। 'পেল কিনা দেখরে, নাকি দেখতে চাও সবাইকে ধরে খুন করল কিনা মিনাকুয়ো?'

ভুরু কুচকাল রবিন। 'তুমিও কি এ সব বিশ্বাস করতে আরম্ভ করেছ নাকি?'

গাল চুলকাল মুসা। 'করলেই বা কি? এতবড় প্রফেসর, তিনি যদি করতে পারেন...থাক ওসব কথা। চলো, কিশোর যখন বলছে যেতে চায়, চলেই যাই।'

'ভয় পাবে না?'

'ভয়? তা তো পেতেই পারি। কিন্তু ভয় পেয়ে কখনও কি তোমাদের সঙ্গে কোন জায়গায় যাওয়া বাদ দিয়েছি?'

তা বটে। চুপ হয়ে গেল রবিন।

সাইকেল ঠেলে নিয়ে সাইকেল রাখার ছাউনির দিকে চলল মুসা। তার সঙ্গে সঙ্গে এগোল কিশোর আর রবিন।

'তবে,' অস্বস্তিভরা হাসি হাসল মুসা, 'পাগলা প্রফেসর আবার ওখানে গিয়ে

হাজির না হলেই বাঁচি। ওর চোখের দিকে তাকালে গা'টা কেমন যেন গোলাতে শুকু
করে আমার।

চার

বিকেল বেলা ডেভিল'স রিজি এসে অবস্থার তেমন কোন পরিবর্তন দেখতে পেল না
তিন গোয়েন্দা। পরিবর্তনটা কেবল আবহাওয়ায়। আকাশে কালো মেঘ। দু'এক
ফোঁটা করে বৃষ্টিও পড়ছে।

গেটের কাছে সাইকেল রেখে এগোল ওরা।

পাহাড়ের ছাল-চামড়া তোলা অংশে এখন খোঁড়াখুঁড়ি চালাচ্ছে ছাত্ররা। তাদের
সঙ্গে যোগ দিয়েছে ডোনাল্ড। শার্টের হাতা গোটানো। কনুই পর্যন্ত মাটি লেগে
আছে। ঘাসের ওপর মাটির স্তূপ। পাহাড়ের গায়ে গর্তটা গভীর হচ্ছে ক্রমে।

একধারে একটা টেবিল পাতা। তাতে ঝুঁকে বসে লিখছেন প্রফেসর ড্যানহ্যাম।

ডোনাল্ডের দিকে এগিয়ে গেল কিশোর, 'হালো। দেখতে এলাম।'

ফিরে তাকাল ডোনাল্ড। হেসে হাত নাড়ল, 'ভাল করেছ।' টেবিলটার দিকে
দেখাল, 'ওই দেখো, কি পেয়েছি।'

চোখ বড় বড় করে টেবিলের দিকে তাকাল তিন গোয়েন্দা। পায়ে পায়ে এগিয়ে
গেল। একটা প্লাস্টিকের ব্যাগে কিছু ভরে রাখা হয়েছে। ব্যাগের গায়ে লেবেল
লাগানো। আরেকটা লেবেল লিখছেন প্রফেসর ড্যানহ্যাম।

'গুপ্তধন?' জিজ্ঞেস করল রবিন।

মুখ না তুলেই হাসলেন প্রফেসর ড্যানহ্যাম। 'গুপ্তধনের চেয়ে বেশি,' বাদামী
মাটির পাত্রের একটা ভাঙা টুকরো তুলে দেখালেন। 'একেবারে খাঁটি কাহুয়া জিনিস।
লক্ষণ শুভ।' টুকরোটা আরেকটা ব্যাগে ভরলেন। 'এ এক ধরনের কঠিন ধাঁধা।
ছড়িয়ে থাকা টুকরোগুলোকে ঝুঁজে বের করে জোড়া লাগানো।'

'দামী জিনিস নাকি?' মুসা জানতে চাইল।

'সেটা নির্ভর করে অনেক কিছুর ওপর। তোমার কাছে হয়তো অতি ফেলনা
মাটির পাত্রের ভাঙা টুকরো, কিন্তু একজন আর্কিওলজিস্টের কাছে সাংঘাতিক দামী,
অমূল্য। ওরকম একটা টুকরো থেকেই অনেক কিছু জানতে পারব আমরা, অনেক
ইতিহাস। বহু শতকের প্রত্নতাত্ত্বিক আর সংগ্রাহক আছে, এই একটা টুকরোর জন্যে
হাজার হাজার ডলার খরচ করতে রাজি।'

চেয়ারে পিঠ সোজা করে জোরে একটা নিঃশ্বাস ছাড়লেন তিনি। চোখ পড়ল
মুসার গলার দিকে। 'আরি! ওটা কি?' সামনে ঝুঁকলেন ভাল করে দেখার জন্যে।
'কোথায় পেলো?'

'প্রফেসর ডেমিরন দিয়েছেন,' মুসা বলল। 'তিনি বলেছেন, এটা আমার রক্ষা-
কবচ।...আপনি চেনেন এটা?'

'ডবি স্টোন বলে এগুলোকে। ইয়োরোপের কেলটিকদের মত কাহুয়া
ইনডিয়ানরাও শয়তান তাড়াতে এগুলো ব্যবহার করত। কখন দিল?'

মুসার মুখে সব শুনে হতাশ ভঙ্গিতে মাথা নাড়তে নাড়তে বললেন, 'বেচারার জানো কষ্ট হয়। এত বিলিয়ান্ট একটা মগজ...'

গাড়ির এঞ্জিনের শব্দে খেমে গেলেন। ঘুরে তাকালেন গেটের দিকে।

দুরুন্দুর করে উঠল মুসার বুক। অস্বস্তিভরা একটা মুহূর্ত। ডাবল, আবার এলেন বুধি পাগলা প্রফেসর। কিন্তু পুরানো গাড়িটা নয়। গেটের ভেতর ঢুকল একটা রূপালী টয়োটা। গাড়ি থেকে নামল লম্বা একজন মানুষ। চেহারার সঙ্গে বাজপাখির চেহারার অনেক মিল।

খাটো জ্যাকেটের পকেটে দুই হাত ভরে এগিয়ে এল সে। প্রফেসর ড্যানহ্যামের মুখ দেখেই অনুমান করে ফেলল কিশোর, লোকটাকে তিনি পছন্দ করেন না।

'কি চান আবার?' রুক্ষ কণ্ঠে জিজ্ঞেস করলেন প্রফেসর ড্যানহ্যাম।

হাসল লোকটা। 'এ কি কথা বলার ছিঁড়ি। আমি কি এতই অদ্ভুত?' তীক্ষ্ণ দৃষ্টিতে টেবিলের দিকে তাকাল লোকটা। 'পেয়েছেন নাকি কিছু?'

'তা জেনে আপনার দরকার কি?'

লোকটা হাসল। টেবিলে ছড়িয়ে থাকা ভাঙা টুকরোগুলো থেকে একটা টুকরো তুলে নিয়ে দেখতে দেখতে বলল, 'ভাল জিনিস। প্রচুর দামে বিক্রি করা যাবে। চাইলেই তো এখন ফাড জোগাড় করে ফেলতে পারেন। আপনার উপকারই আমি করতে চাই...'

'হ্যাঁ, তা তো বটেই। আমার উপকারের ছতোয় নিজের পকেটটাও ভারী করে নেয়া যায় তাহলে। খেগরি, সেদিনই স্পষ্ট বলে দিয়েছি আমি যা বলার। যা পাব, সব সরাসরি মিউজিয়ামে যাবে। কাজেই এখানে সমুদয় নষ্ট না করে অন্য কোথাও গিয়ে ঘুরাঘুরি করুনগে, যদি লাভের আশা করেন।'

নিরাশ ভঙ্গিতে মাথা নেড়ে লোকটা বলল, 'মিউজিয়াম আপনাকে কিছুই দেবে না। আমি যা দিতে চাইছি, ব্রিটানির অভিযানটা সহজেই চালাতে পারবেন। ইউনিভার্সিটিও আপনাকে অত টাকা দিতে পারবে না।'

'ব্রিটানির কথা আপনি জানলেন কি করে?'

মুচকি হাসল খেগরি। 'জানানোর লোকের কি অভাব?' ডিগ, অর্থাৎ খনন করা জায়গাটার দিকে তাকিয়ে জিজ্ঞেস করল, 'কাজ কেমন এগোচ্ছে?'

'সেটাও আপনার জানার দরকার নেই,' খেগরির হাত থেকে টুকরোটা কেড়ে নিলেন প্রফেসর ড্যানহ্যাম। 'যান এখন, বিদেয় হোন। এখানে দাঁড়িয়ে থেকে কোন লাভ হবে না।'

দমল না খেগরি। জ্যাকেটে আঙুল মুছতে মুছতে বলল, 'কোথায় আমাকে পাওয়া যাবে জানা আছে আপনার। যদি মত বদলান, যোগাযোগ করবেন।'

গাড়ির দিকে হাঁটতে হাঁটতে কাঁধের ওপর দিয়ে ফিরে তাকাল সে। 'আপনার ফোনের অপেক্ষায় থাকব আমি।'

একপাশে চুপচাপ দাঁড়িয়ে আছে তিন গোয়েন্দা।

গাড়িতে উঠল লোকটা। ঘাসের ওপর অনেকখানি জায়গা জুড়ে চকর দিয়ে গাড়ি ঘোরাল। এগিয়ে গেল গেটের দিকে।

‘লোকটা কে?’ জিজ্ঞেস করল রবিন।

‘দালাল! একেবারেই ছ্যাচড়া!...’ তিক্তকণ্ঠে জবাব দিলেন প্রফেসর ড্যানহ্যাম।
হেসে পরিবেশটাকে হালকা করার চেষ্টা করল কিশোর। ‘আমরা কোন সাহায্য করতে পারি?’

‘সাহায্য?’ টেবিলের জিনিসগুলোর দিকে তাকালেন প্রফেসর ড্যানহ্যাম। ‘ঠিক আছে, করতে চাইলে করো। আরও কয়েকটা ব্যাগ দরকার। ক্যারাতানে পাবে। এনে দেবে?’

‘এখনি যাচ্ছি।’

‘ধরো, এগুলোও নিয়ে যাও?’ টেবিল থেকে বোঝাই করা ব্যাগগুলো তুলে কিশোরের বাড়ানো হাতে রেখে দিলেন প্রফেসর ড্যানহ্যাম। ‘টেবিলের ওপর রেখে এসো।’

‘আমরা কিরব?’ রবিনের প্রশ্ন।

‘তোমাদের তো কোন কাজ দেখছি না আপাতত।’

রবিন বলল, ‘তাহলে আমরা বরং গিয়ে দেখি ডোনাডুরা আর কিছু খুঁজে পেল কিনা। মুসা, যাবে?’

মাথা ঝাকাল মুসা। রওনা হয়ে গেল দুজনে।

ক্যারাতানে ঢুকল কিশোর। বিশৃঙ্খল অফিসের মত লাগল জায়গাটাকে। ছোট একটা টেবিল কাগজপত্রে বোঝাই। দেয়ালে ঠেস দিয়ে রাখা রাশি রাশি মলাটের বাবু। দরজার কাছে স্তূপ করে ফেলে রাখা হয়েছে কাপড়-চোপড় আর ব্যাগ।

টেবিলের কোথায় রাখবে বুঝতে পারল না সে। এগোতে গিয়ে পা বেধে গেল কিসে যেন। কোনমতেই তাল সামলাতে পারল না। উপুড় হয়ে পড়ে গেল কাপড়ের স্তূপের ওপর।

উঠে বসল তাড়াতাড়ি। আতঙ্কিত। ব্যাগের জিনিসগুলো ভাঙল কিনা কে জানে! কিসে পা বেধেছিল দেখল।

একটা লাল-সাদা রাক-স্যাক। ফিতেয় আটকে গিয়েছিল পা। টান লেগে রাক-স্যাকের ভেতরের জিনিসপত্র মেঝেতে ছড়িয়ে পড়েছে।

‘ধূর!’ নিজেই নিজেকে ধমকাল কিশোর। ব্যাগগুলো পড়েছে একটা গদির ওপর। ভাঙলে খুব খারাপ হবে।

উঠে বসল। রাক-স্যাকের ভেতর থেকে বেরিয়ে থাকা একটা জিনিস দৃষ্টি আকর্ষণ করল তার। হাত বাড়িয়ে তুলে নিল ওটা। কাপড়ে মোড়া জিনিসটার ওজন অবাক করল তাকে। কাপড়ের একটা কোণ সামান্য সরে গেছে। ভেতরে হলুদ রঙ চোখে পড়ছে।

কোণটা আরেকটু সরাল সে। সোনালি একটা মাথা বেরিয়ে পড়ল। তাকিয়ে রইল যেন তার দিকে। মানুষের মাথা। মানুষের মুখ। কিন্তু দুটো শিং।

বাইরে চিৎকার শোনা গেল। ঝট করে ফিরে তাকাল কিশোর। কেউ দেখে ফেলল নাকি? না, দেখেনি।

চিৎকারটা শোনা গেছে ডিগের কাছ থেকে।

দ্রুত আবার কাপড় দিয়ে ঢেকে দিল মূর্তিটা। রাক-স্যাকে ঢুকিয়ে রাখল।

বেরিয়ে যাওয়া বাকি জিনিসগুলোও ঠেসে ঢুকিয়ে দিল আবার।

গদিতে পড়ে থাকা ব্যাগগুলো তুলে নিয়ে ছোট টেবিলটাতেই রাখল কোনমতে কাগজের ওপর। তারপর একটা বাক্সের ওপর রাখা একগাদা খালি ব্যাগ দেখে ছোঁ মেরে কয়েকটা তুলে নিয়ে ছুটে বেরোল ক্যারান্ডান থেকে।

সবাই এখন ডিগের কাছে। উত্তেজনায় ছটফট করছে রবিন।

নিশ্চয় কিছু পাওয়া গেছে।

দেখার জন্যে দৌড় দিল কিশোর।

মিস ড্যানহ্যামের হাতে ছোট, চ্যান্টা একটা ধূসর রঙের চারকোনা পাথর। ভীষণ উত্তেজিত তিনি। তাকে ঘিরে দাঁড়িয়ে আছে বাকি সবাই। উত্তেজনায় জ্বলজ্বল করছে সবার মুখ।

‘গড-স্টোন,’ প্রফেসর ড্যানহ্যাম বললেন। খানিক আগের রাগের চিহ্নমাত্র নেই এখন চেহারায়ে। পাথরটা থেকে মাটি সরাতে লাগলেন তিনি। ছাত্রদের দিকে তাকিয়ে বললেন, ‘দেখো, চিহ্নগুলো। এখন বুঝলে তো, আগাগোড়া আমার ধারণাই ঠিক ছিল। নিশ্চয় অভিজাত-কাউকে কবর দেয়া হয়েছে এখানে।’

‘কি এটা?’ জানতে চাইল কিশোর।

‘আমরা যে সঠিক পথে এগোচ্ছি, তার প্রমাণ। কাছাকাছি ইনডিয়ানরা তাদের কবরের প্রবেশমুখে এ সব পাথর পুঁতে দিত। তারা এগুলোকে পবিত্র মনে করত। বিশ্বাস করত, এ সব পাথর ডিঙিয়ে শয়তান ঢুকতে পারবে না ভেতরে।’

চ্যান্টা পাথরটায় অস্পষ্ট আঁচড়ের মত দাগ দেখতে পেল কিশোর। কিসের দাগ বুঝতে পারল না।

‘এই দাগগুলো কিসের, প্রফেসর?’ জিজ্ঞেস করল একজন ছাত্র। ‘মুছে গেছে মনে হচ্ছে?’

মাথা ঝাঁকালেন প্রফেসর। যেন আদর করে আঙুল বোলাতে লাগলেন কাগজগুলোর ওপর। ‘ঘোড়া আঁকা হয়েছিল। পিঠে সওয়ারি। অশ্ব-দেবতা রূপানির প্রতিকৃতি। রূপানি ছিল ওদের একজন মহা ক্ষমতাশালী বক্ষাকর্তা। দেবতার এই প্রতিকৃতি আঁকা পাথর কেবল অনেক বড় যোদ্ধা কিংবা সর্দারের কবরে রেখে যেত তারা।’

কনুই দিয়ে কিশোরের পাঁজরে খোঁচা মারল মুসা। ফিসফিস করে বলল, ‘শুনছ, মাঝে মাঝে সেই রূপানি!’

‘ইউনিভার্সিটিতে নিয়ে যেতে হবে এটা।’ ধূসর আকাশের দিকে মুখ তুলে গালালেন প্রফেসর ড্যানহ্যাম। ‘খুব বৃষ্টি হবে মনে হচ্ছে।’ ছাত্রদের দিকে মুখ ফরালেন। ‘ঢেকেঢেকে রাখো সব। পানি যাতে ঢুকতে না পারে।’

পাঁচ

প্রদিন স্কুলে টিফিনের সময় রবিন জিজ্ঞেস করল, ‘ছুটির পর যাবে নাকি আজও?’

‘যাব,’ সঙ্গে সঙ্গে জবাব দিল মুসা।

‘ভূতের ভয় করে না?’ মুচকি হাসল রবিন।

‘করে। করলেও যাব। ওই খোঁড়াখুঁড়ি দেখতে খারাপ লাগছে না আমার।’

কিশোর বলল, ‘ডেভিল’স রিজ য়াওয়ার আগে মিউজিয়ামে যাব আমি। স্কুলের লাইব্রেরিতে একটা বই পেয়েছি, তাতে রাকারুয়া হিল নামে একটা জায়গার কথা লেখা আছে, ডেভিল’স রিজ থেকে পঁয়ত্রিশ কিলোমিটার দূরে। কাহুয়া ইনডিয়ানদের আরেকটা গোরস্থান। কয়েক বছর আগে ওখানেও প্রচুর জিনিস পাওয়া গেছে। মিউজিয়ামের ডিসপ্লেতে আছে এখন, সবার দেখার জন্যে। দেখে আসতে চাই।’

‘আমি তো ভাবলাম ছুটির পর সোজা ডেভিল’স রিজ যাবে,’ মুসা বলল।

‘ওখানেও যাব, তবে আগে মিউজিয়াম। মিউজিয়াম তাড়াতাড়ি বন্ধ হয়ে যায়।’

স্কুল ছুটির পর সোজা মিউজিয়ামে এল তিন গোয়েন্দা। তিন-চারটে মাঝারি আকারের ঘর নিয়ে ছোট মিউজিয়ামটা গির্জার পেছনে। শহরের পুরানো এলাকায়।

চত্বর ঘিরে থাকা রেলিঙের সঙ্গে শেকল দিয়ে সাইকেল তিনটে বাঁধল ওরা। তালা লাগাল। তারপর এসে ঢুকল মিউজিয়ামের সামনের লবিতে। ডেস্কের ওপাশে বসে উল দিয়ে কি যেন বুনছেন এক বৃদ্ধা। ডেস্কে স্থপ করে রাখা পোস্ট কার্ড আর গাইড বুক। চওড়া একটা খিলানের ওপাশে রয়েছে ঘরগুলো। সারি দিয়ে ডিসপ্লে কেবিনেট সাজানো।

বৃদ্ধার সামনে এসে দাঁড়াল কিশোর। ‘এক্সকিউজ মি। রাকারুয়া হিলে পাওয়া কাহুয়া ইনডিয়ানদের জিনিসগুলো দেখতে এসেছি। কোন ঘরে আছে, দেখাবেন, প্রীজ?’

মুখ তুলে তাকালো বৃদ্ধা। ‘ওধু ওগুলো দেখতেই এসেছ মনে হচ্ছে? কিন্তু এখন তো দেখানো যাবে না।’

ড্রাকুটি করল কিশোর, ‘কেন?’

‘নেই।’

‘নেই! মানে?’

‘ডিসপ্লেতে নেই। ইউনিভার্সিটির কয়েকজন ছাত্র গবেষণা করছে ওগুলো নিয়ে। ওঅর্করুমে তালা দেয়ার ওদের হতাশায় যেন আশার আলো সঞ্চার করতে চাইলো বৃদ্ধা, ‘আগামী হুণ্ডায় এসো। ততদিনে ডিসপ্লেতে এসে যেতে পারে।’

কিন্তু হতাশা দূর হলো না কিশোরের।

বুঝতে পারলো বৃদ্ধা, ‘দেখাটা জরুরী ছিল নাকি?’

‘ছিল, স্কুলের ম্যাগাজিনের জন্যে লিখব ভাবছিলাম, তাড়াহড়ো... আগামী হুণ্ডায় হলে দেরি হয়ে যাবে।’

‘দেখি, আর কোনভাবে সাহায্য করতে পারি নাকি,’ একটা গাইড-বুক তুলে নিয়ে পাতা ওলটালো বৃদ্ধা। ‘এই যে, কিছু ছবি আছে জিনিসগুলোর। দেখো, এতে হয় কিনা।’

ডেস্কে ছড়িয়ে রাখা বইটার ওপর বুকে এল তিন গোয়েন্দা।

চোখ বড় বড় হয়ে গেল কিশোরের। ছবিগুলোর মধ্যে রয়েছে শিংওয়ালা একটা মানুষের মূর্তি। প্রফেসর ড্যানহ্যামের ক্যারাভানে রাক-স্যাকের মধ্যে যেটা দেখেছিল অবিকল সে-রকম।

ছবিগুলোর নিচে সংক্ষিপ্ত নোট। যে পেয়েছে, তার নামও রয়েছে। মূর্তিটার নিচের নাম দেখে হাঁ হয়ে গেল কিশোর। 'প্রফেসর ডেমিরন পেয়েছেন এটা?'

'চেনো নাকি তাকে?' বৃদ্ধা বললো।

'চিনি বললে ভুল হবে। দেখেছি।'

'কোথায় দেখলে? আজকাল তো কারও সঙ্গেই দেখা করেন না। সন্ধ্যাসী হয়ে গেছেন। আগে আমার সঙ্গে মাঝে মাঝে দেখা হত। বছর দুয়েক হলো, তা-ও হয়নি। ওনলাম, পুরোপুরিই মাথা খারাপ হয়ে গেছে।'

প্রফেসরের প্রসঙ্গে যেতে চাইল না কিশোর। 'মূর্তিটা সত্যি আছে তো আপনাদের মিউজিয়ামে? হারায়নি?'

বিস্ময় দেখা দিল বৃদ্ধার চোখে। 'হারাবে কেন! আজ সকালেও তো দেখলাম। ওঅর্করুমে। এ কথা বলছ কেন?'

'দু'দিন আগে অবিকল এ রকম একটা মূর্তি আমি দেখেছি,' সাবধানে বলল কিশোর। 'আপনার জানামতে একটাই আছে, না আরও আছে?'

'লস অ্যাঞ্জেলেসের জনসন মিউজিয়ামে আরেকটা আছে,' বৃদ্ধা জানালো। 'আরও চার-পাঁচটা আছে অন্যান্য জায়গায়। তবে যদূর জানি রকি বীচের কয়েক মাইলের মধ্যে এই একটাই পাওয়া গেছে।'

'ধন্যবাদ। অনেক ধন্যবাদ আপনাকে। চলি।'

মুসা আর রবিনকে প্রায় বগলদাবা করে নিয়ে মিউজিয়াম থেকে উড়ে বেরোল কিশোর।

'মিস ড্যানহ্যামের রাক-স্যাকে এ রকম মূর্তিই দেখেছি, আমি শিওর,' উত্তেজিত হয়ে উঠেছে সে। 'কোন সন্দেহ নেই আমার।'

মুসা বলল, 'কিন্তু বৃদ্ধা কি বললেন ওনেছ-মূর্তিটা নাকি আজ সকালেও দেখেছেন। ওঅর্কশপে তালা দিয়ে রাখা। আমার মনে হয় তুমি ওটার নকল-টকল দেখেছ।'

নিচের ঠোট কামড়াল কিশোর। 'কি জানি, হবে হয়তো। কিন্তু অবাক লাগছে আমার, মূর্তিটা প্রফেসর ডেমিরন খুঁজে পেয়েছেন ওনে। নিশ্চয় ওখানকার কবর থেকে জিনিসগুলো খুঁড়ে বের করার পর পাগল হয়েছেন তিনি।' দুই সহকারীর দিকে তাকাল সে। 'হয়তো ওখানে কিছু ঘটেছিল।'

'কি? ভুরু নাচাল রবিন। 'কোনও ধরনের অভিশাপ?'

জবাব না দিয়ে চিন্তিত ভঙ্গিতে রবিনের দিকে দীর্ঘ একটা মুহূর্ত তাকিয়ে রইল কিশোর। তারপর মাথা ঝাড়া দিয়ে যেন আপাতত দূর করে দিতে চাইল মূর্তিটার ভাবনা। 'চলো, ডেভিল'স রিজি।'

সেখানে আজ অন্য রকম দৃশ্য। গেটের বাইরে বেশ কয়েকটা গাড়ি দাঁড়ানো। টিবিটার কাছে ছোটখাট ভিড়।

সাইকেল রেখে দৌড় দিল তিন গোয়েন্দা। বারো-তেরোজন মানুষ দেখা গেল। চিৎকার করে প্রশ্ন করছে কেউ, কেউ ক্যামেরা দিয়ে ছবি তুলছে।

সাংবাদিকের দল, বুঝতে অসুবিধে হলো না। ঘেরের মাঝখানে ফাঁক করে

নিয়ে ভেতরে তাকাল কিশোর। গোল হয়ে ঘিরে থাকা মানুষগুলোর কেন্দ্রে দাঁড়িয়ে
আছেন প্রফেসর ড্যানহ্যাম। উঁচু করে ধরে রেখেছেন একটা উজ্জ্বল জিনিস। রোদে
চকচক করছে।

হ্যাঁ হয়ে গেল কিশোর।

‘কি হলো?’ পাশে এসে ধাক্কা দিয়ে দাঁড়াল মুসা।

‘সোনার মূর্তি।’

‘খাইছে! পেয়ে তাহলে গেলই!’

রবিন এসে দাঁড়াল আরেক পাশে। ওর দিকে কাত হয়ে ফিসফিস করে বলল
কিশোর, ‘কি, মিউজিয়ামের ছবির মূর্তিটার মতন না?’

বিমূঢ়ের মত মাথা ঝাঁকাল মুসা।

‘পুরো ব্যাপারটাই একটা জুয়াচুরি!’ বিড়বিড় করল কিশোর। ‘খান্নাবাজি!’

ছয়

বোকা হয়ে তাকিয়ে আছে তিনজনে।

হাসিতে উদ্ভাসিত প্রফেসর ড্যানহ্যামের মুখ। মূর্তিটা তুলে দেখাচ্ছেন, খেলায়
জিতে খেলোয়াড় যেমন করে ট্রফি দেখায়।

কিশোরের মন্তব্য চমকে দিয়েছে মুসা আর রবিনকে। জুয়াচুরি! তারমানে
প্রফেসর ড্যানহ্যামের হাতের ওই মূর্তিটা নকল!

‘কি করবে এখন?’ কিশোরকে জিজ্ঞেস করল মুসা।

‘বুঝতে পারছি না,’ দুই সহকারীর দিকে তাকাল কিশোর।

‘জুয়াচুরিটা ফাঁস করে দেয়া দরকার,’ রবিন বলল।

‘কি করে? গিয়ে বলব আপনি একটা মিথ্যাক?’

‘কিন্তু কিছু তো অবশ্যই করা দরকার,’ কিশোরকে ঠেলা দিল রবিন। ‘যাও,
গিয়ে বলেই ফেলো রাক-স্যাকে এ রকম আরেকটা মূর্তি দেখেছ তুমি। বললে কি
করবে ওরা? তুমি তো সত্যি সত্যি দেখেছ।’

আবার ঘেরের দিকে এগোল কিশোর। দ্বিধা কাটাতে পারছে না। প্রফেসর
ড্যানহ্যামের পাশে দাঁড়িয়ে আছে ভোনাভু। একান ওকান হাসি। এমন উদ্ভিগে
তাকিয়ে আছে প্রফেসর ড্যানহ্যামের দিকে, যেন তিনি পৃথিবীর সবচেয়ে বিস্ময়কর
মহিলা।

প্রশ্নের পর প্রশ্ন ছুঁড়ে দিচ্ছে সাংবাদিকেরা। সটাসট ক্যামেরার শাটার টিপছে।

ঠেলেঠেলে সবার সামনে এসে দাঁড়াল কিশোর।

‘প্রফেসর ড্যানহ্যাম,’ চিৎকার করে বলল সে, ‘কয়েক বছর আগে রকি বীচের
কাছেই আরেকটা এ রকম মূর্তি পাওয়া গিয়েছিল, তাই না?’

ঘুরে তাকালেন প্রফেসর ড্যানহ্যাম। কিশোরের চিৎকার কানে গেছে। ‘হ্যাঁ।
এখান থেকে মাত্র পঁয়ত্রিশ কিলোমিটার দূরে। পেয়েছিলেন প্রফেসর শেফার্ড
ডেয়িরন।’

‘দুটো একই ধরনের মূর্তি এত কাছাকাছি খুঁজে পাওয়াটা কেমন অস্বাভাবিক না?’ প্রশ্ন করল কিশোর।

হাসি সামান্য মলিন হয়ে গেল প্রফেসর ড্যানহ্যামের। ‘অস্বাভাবিক তো বটেই। তবে কখনও পাওয়া যায়নি এমন নয়। একই আমলে দুটো কবরে দুজন বড় যোদ্ধা বা সর্দারকে কবর দেয়া হয়ে থাকলে এক রকমের মূর্তি সঙ্গে দেয়া হতে পারে। এত কাছাকাছি বলেই সেটা বরং স্বাভাবিক—কারণ এক গোত্রের লোক বাস করত ধরে নেয়া যেতে পারে; তাহলে তাদের দেবতাও হবে এক।’

গুঞ্জন উঠল জনতার মাঝে। ভিড় ঠেলে ভেতরে ঢুকল আরও একজন।

ডিপ গ্রেগরি। চোখের পাতা সরু করে তাকিয়ে আছে প্রফেসর ড্যানহ্যামের দিকে। দুই হাত পকেটে ঢোকানো।

‘আপনাদের আর কোন প্রশ্ন না থাকলে,’ প্রফেসর বললেন, ‘আমাকে এখন মাপ করুন। ইউনিভার্সিটিতে যাব। এটার বিশুদ্ধতা পরীক্ষা করব। আমার কথা শুনতে আসার জন্যে ধন্যবাদ। নতুন কিছু পাওয়ার সঙ্গে সঙ্গে আবার দাওয়াত দেব আপনাদের।’

‘এক মিনিট,’ কর্কশ কণ্ঠে বলল গ্রেগরি। ‘আপনি বললেন—তবে কখনও পাওয়া যায়নি এমন নয়।’

‘হ্যাঁ, বলেছি,’ তীক্ষ্ণ হয়ে উঠল প্রফেসরের কণ্ঠ।

হাসল গ্রেগরি। ‘নিজের স্বার্থ সিদ্ধির জন্যে উল্টোপাল্টা কাজ করে বসেছে আর্কিওলজিস্টরা, এটাও শোনা যায়নি এমন নয়।’

জ্বলে উঠল প্রফেসরের চোখ। ‘কি বলতে চান?’

কান খাড়া হয়ে গেছে কিশোরের। গ্রেগরিরও সন্দেহ আছে তাহলে মূর্তিটার ব্যাপারে!

সবগুলো চোখ এখন গ্রেগরির দিকে।

‘বলতে চাই,’ বলল সে, ‘বড় ধরনের কোন অভিযানে যাওয়ার টাকা জোগাড়ের জন্যে মরিয়া হয়ে উঠলে অনেক অনভিপ্রেত কাজও করে বসতে পারে কোন প্রত্নতাত্ত্বিক। যেমন ধরা যাক ফ্রান্সের ব্রিটানিতে কোন প্রত্নসন্ধানের ইচ্ছে যদি থেকে থাকে করও। ওখানে গিয়ে খননকাজ চালাতে বিরাট অঙ্কের টাকা দরকার।’

‘মুখ সামলে কথা বলবেন!’ রাগে লাল হয়ে গেলেন প্রফেসর।

জোরাল গুঞ্জন উঠল শ্রোতাদের মাঝে।

নড়ে উঠল ডোনাভ।

‘ডন!’ হাত চেপে ধরলেন প্রফেসর। ‘ওর কথা ছাড়ো। ও এসেছেই গোলমাল পাকাতে।’

‘প্রফেসর,’ একজন রিপোর্টার বলল, ‘এই অভিযোগের কোন জবাব দেবেন আপনি?’

‘কি জবাব দেব? যা বলার আগেই বলেছি,’ আরও লাল হয়ে যাচ্ছে প্রফেসরের কান, ঘাড়, গলা। ‘নতুন করে কিছু বলার নেই। তবু জিজ্ঞেস যখন করছেন, বলি আরেকবার, আজ বিকেলে ডেভিল’স রিজ পাওয়া গেছে মূর্তিটা। খুঁজে পেয়েছে আমার এক ছাত্র, ডোনাভ ইয়ানমার। এখন নিয়ে যাওয়া হবে ইউনিভার্সিটিতে, এটান প্রত্নসন্ধান

বিশুদ্ধতা পরীক্ষা করানোর জন্যে। প্রমাণ করতে হবে আসল না নকল, গটগট করে
গ্রেগরির সামনে এসে দাঁড়ালেন তিনি। উঁচু করে ধরলেন মূর্তিটা। 'দেখো তো ভাল
করে। নকল কি মনে হয়?'

গ্রেগরি কি বলে শোনার জন্যে রুদ্ধশ্বাসে অপেক্ষা করতে লাগল কিশোর।

হাতে নিয়ে ঘুরিয়ে ফিরিয়ে অনেকক্ষণ ধরে দেখল গ্রেগরি। দীর্ঘ একটা মুহূর্ত
কঠিন দৃষ্টিতে তাকিয়ে রইল প্রফেসর ড্যানহামের দিকে। 'মনে তো হচ্ছে
আসলই!' মূর্তিটা আবার প্রফেসরের হাতে ফিরিয়ে দিয়ে ধীরে ধীরে বলল,
'অফিশিয়াল রিপোর্ট শোনার জন্যে আগ্রহের সঙ্গে অপেক্ষা করব আমি।'

একটা কথাও আর না বলে ঝটকা দিয়ে ঘুরে দাঁড়াল সে। বেরিয়ে যাওয়ার
জন্যে ভিড় ঠেলে পথ করে নিতে লাগল।

দর্শকদের দিকে তাকিয়ে মুখে হাসি ফুটালেন আবার প্রফেসর। 'সাধারণ
একজন অ্যানটিক বিক্রেতা নিশ্চয় দু'চারটা ফালতু কথা বলে আমাদের এতবড়
আনন্দে বিষ্ম ঘটাতে পারবে না, কি বলেন?'

সাত

পরদিন আরেক চমক অপেক্ষা করছিল তিন গোয়েন্দার জন্যে।

শনিবার। স্কুল ছুটি। সকাল বেলাতেই এসে হাজির হয়েছে ডেভিল'স রিজ।

একটা অচেনা গাড়ি দাঁড়িয়ে আছে রাস্তার ওপর। গেটে তালা দেয়া।

ভেতরে তাকাল ওরা। নির্জন মাঠ। ল্যান্ড-রোভারটা নেই।

'কেউ নেই কেন?' ক্যারাভানটার দিকে তাকিয়ে আছে কিশোর। 'কি হয়েছে?'

'বিছানা থেকে উঠতে হচ্ছে করছে না হয়তো কারও,' মুসা বলল। 'সকাল
বেলা প্রায়ই ওরকম হয় আমার।'

'উহু, আমার তা মনে হয় না। অন্য কিছু হয়েছে।'

'চুকে দেখলেই তো হয়,' বলে দেরি করল না রবিন। গেটে চড়ে বসল।
অন্যপাশে পা বুলিয়ে লাফ দিয়ে নামল মাটিতে। ফিরে তাকাল কিশোরের দিকে,
'এসো। এটাই সুযোগ। ক্যারাভানে কেউ না থাকলে রাক-স্যাকের মূর্তিটা দেখব
আরেকবার।'

মুসা আর কিশোরও গেট ডিঙাল।

ক্যারাভানের দিকে এগোল তিনজনে। ভেজা ঘাসে আটকে যাচ্ছে জুতোর
ছাপ। কাউকে চোখে পড়ছে না এখনও।

ক্যারাভানের কাছে পৌঁছতে দেখা গেল ফাঁক হয়ে আছে দরজা।

কিশোরের দিকে তাকাল মুসা, 'কি বলেছিলাম? মানুষ আছে। উঠতে দেরি
করছে।'

সিঁড়িতে পা রাখতে গিয়েও কি ভেবে পাটা সরিয়ে আনল কিশোর। ভাক দিল,
'কেউ আছেন?'

দরজায় বেরিয়ে এল একজন অচেনা লোক।

‘তুকে কি করে?’ কঠোর দৃষ্টিতে ওদের দিকে তাকাতে লাগল লোকটা।

‘গেট ডিঙিয়ে,’ জবাব দিল কিশোর। ‘প্রফেসর ড্যানহ্যামের সঙ্গে দেখা করতে এসেছি আমরা। তিনি কি উঠেছেন? আমাদেরকে আজ কোন কাজ দেবেন কিনা জিজ্ঞেস করতে এসেছি।’

‘উনি আমাদের চেনেন,’ রবিন বলল। ‘সেদিনও তাঁর কাজ করে দিয়েছি।’

ভুরু কুঁচকে ওদের দিকে তাকিয়ে রইল লোকটা। ‘একবারও তোমাদের মাথায় ঢোকেনি যে গেটে তালা দেয়াই হয়েছে কেউ যাতে ভেতরে ঢুকতে না পারে?’

হাসল কিশোর, ‘ভাবলাম, আমাদের দিয়ে সাহায্য হবে...’

‘কাজ বন্ধ। আজ খোঁড়াখুঁড়ি হবে না এখানে।’

‘কেন?’ রবিনের প্রশ্ন। ‘কালও তো দেখলাম পাগলের মত মাটি খুঁড়ছে।’

‘চুরি হয়েছে। আজ ভোর বেলা চোর ঢুকেছিল ক্যারামানে। ইউনিভার্সিটি থেকে আমাকে পাঠানো হয়েছে পাহারা দেয়ার জন্যে। পুলিশ না আসা পর্যন্ত থাকব।’

‘চোর ঢুকেছিল?’ নিচের ঠোঁট কামড়ে ধরল কিশোর। ‘নিয়েছে নাকি কিছু?’

‘খুঁড়ে পাওয়া জিনিস ভর্তি কয়েকটা ব্যাগ নিয়ে গেছে,’ লোকটা জানাল।

‘মূর্তিটা?’ জিজ্ঞেস করল রবিন। ‘ওটাও নিয়েছে?’

‘না,’ মাথা নাড়ল লোকটা। ‘ওটা ইউনিভার্সিটিতে নিয়ে যাওয়া হয়েছে আগেই।’

‘ছাত্ররা গেল কোথায়? কাল রাতে ছিল না কেউ এখানে?’

‘ছিল। মূর্তিটা পাওয়ার পর ছাত্রদের বিশ্রামের ছুটি দিয়েছেন প্রফেসর ড্যানহ্যাম। বাড়ি চলে গেছে ওরা। তবে পাহারায় একজন ছিল, ডোনাল্ড নামে একটা ছেলে, কাল রাতটা কাটিয়েছে এখানে। চোর নিশ্চয় নজর রেখেছিল, ও বেরিয়ে যাওয়ার সঙ্গে সঙ্গে ঢুকেছে। পরনের কাপড় ময়লা হয়ে গিয়েছিল ডোনাল্ডের, তাই নতুন কাপড় আনতে গিয়েছিল। মাত্র এক ঘণ্টা সময় পেয়েছে চোর। এরইমধ্যে কাজ সেরে চলে গেছে।’ বুকের ওপর দুই হাত ভাঁজ করে রাখল লোকটা। ‘কিন্তু এখানে তোমাদের ঘুরঘুর করার কোন যুক্তি দেখি না আমি। আজ এখানে কোন কাজ হবে না। পুলিশ আসবে। তদন্ত হবে। তারপর কাজ শুরু প্রশ্ন।’

খবরটা দমিয়ে দিল গোয়েন্দাদের। ধীর পায়ে গেটের দিকে ফিরে চলল ওরা।

‘কি বুঝলে?’ জিজ্ঞেস করল রবিন।

‘কি আর বুঝব?’ জবাব দিল মুসা, ‘মূর্তিটার পেছনে লেগেছে কেউ, এ তো সহজ কথা। মূর্তি না পেয়ে অন্য জিনিস নিয়ে চলে গেছে। এত কষ্ট করে ঢুকে খালি হাতে বিদেয় হতে চায়নি।’

‘পায়নি, তারমানে রাক-স্যাকে ছিল না,’ যুক্তি দেখাল রবিন। ‘এবং তারমানে ওটাই সাংবাদিকদের দেখিয়েছেন প্রফেসর ড্যানহ্যাম। জিজ্ঞেস করা দরকার।’

‘কাকে?’ ভুরু নাচাল কিশোর।

‘ডোনাল্ডকে,’ রবিন বলল। ‘সে-ও নিশ্চয় জানে ওটার কথা। প্রফেসর ড্যানহ্যামের ডান হাত সে। আসল না নকল, ক্যারামানে কেন রাখা হয়েছে ওটা, বলতে পারবে।’

‘কিন্তু প্রফেসর ড্যানহ্যামের কোন গোপন কথা আমাদের কাছে ফাঁস করবে না ডোনাল্ড,’ কিশোর বলল। ‘যদি জেনেও থাকে, বলবে না।’

‘চেষ্টা করে দেখতে দোষ কি?’

‘তা করা যায়,’ মাথা ঝাঁকাল কিশোর। নিচের ঠোটে চিমটি কাটল। হাত তুলল, ‘ঠিক আছে, তোমরা এখানে দাঁড়াও। আমি লোকটাকে জিজ্ঞেস করে আসি, ডোনাল্ডের ঠিকানা জানে কিনা।’

গেটের কাছে দাঁড়িয়ে রইল মুসা আর রবিন। ঘাস মাড়িয়ে এগিয়ে গেল কিশোর।

দুই মিনিট পর একটা কাগজের টুকরো হাতে করে ফিরে এল। নেড়ে দেখিয়ে হাসিমুখে বলল, ‘হোভার লেনে একটা বোর্ডিং হাউজে থাকে।’

‘চিনি,’ বলে উঠল মুসা। ‘এসো আমার সঙ্গে।’

লেনটা রকি বীচের এক প্রান্তে। শহরের একটা পুরানো এলাকায়। পুরানো বসতবাড়িগুলোর কোন কোনটা এখনও বসতবাড়িই আছে, বাকিগুলোকে সংস্কার করে দোকানপাট বানিয়ে ফেলা হয়েছে।

বোর্ডিং হাউজটা খুঁজে বের করতে অসুবিধে হলো না। দরজা খুলে দিল ছোটখাট সাদা চুল এক বৃদ্ধা। রান্নাঘরে কাজ করতে করতে উঠে এসেছেন। তোয়ালে দিয়ে হাত মুছছেন। হাসিমুখে জিজ্ঞেস করলেন, ‘কি চাও?’

ডোনাল্ডের নাম বলল কিশোর। তার সঙ্গে দেখা করতে চায়।

কোন ঘরে থাকে ডোনাল্ড, বলে দিলেন বৃদ্ধা।

তাকে ধন্যবাদ দিয়ে সরু একটা সিঁড়ি বেয়ে ওপরে উঠে এল তিন গোয়েন্দা।

দরজায় টোকা দিল কিশোর।

‘কে?’ স্যাঁড়া দিল ডোনাল্ড।

‘আমি,’ কিশোর বলল।

‘ট্যান্ড্রি এসেছে?’ দরজা খুলে দিয়ে অবাক হয়ে গেল ডোনাল্ড। হাঁ করে তাকিয়ে রইল তিন গোয়েন্দার দিকে।

‘চুরির খবরটা শুনেছি আমরা,’ কিশোর বলল।

হাসি মলিন হয়ে গেল ডোনাল্ডের। ‘মনে করিয়ে না আর। ভাবলেই মনে হয় নিজেকে ধরে চাবকাই। সব দোষ আমার। ওভাবে আমার চলে আসা উচিত হয়নি কোনমতেই।...কিন্তু আমার ঠিকানা পেলে কোথায়?’

‘ওখানে যে লোকটা আছে, তার কাছে। আমরা আসাতে কি কিছু মনে করেছেন?’

‘না না, মনে করব কেন,’ হাসল ডোনাল্ড। ‘মায়া বলল, সোমবারের আগে আর কোন কাজ হবে না; ভাবলাম, এ সুযোগে বাড়ি গিয়ে বাবা-মার সঙ্গে দেখাটা সেরে আসি। ট্যান্ড্রি আনতে পাঠিয়েছি। তোমরা টোকা দিলে, ভাবলাম সে-ই বুঝি এসেছে।’

‘অ! এসে আর লাভ হলো না?’

‘হতাশ হয়েছি মনে হচ্ছে?’

‘তা কিছুটা তো হয়েছিই। ভাবলাম, আপনার কাছে এলে প্রফেসর ড্যানহ্যামের এই অভিযান সম্পর্কে অনেক তথ্য পাব, স্কুলের ম্যাগাজিনে লেখার জন্যে। কিন্তু আপনি তো চলে যাচ্ছেন।’ ডোনাভের সন্দেহ না জাগিয়ে কি করে মূর্তিটার কথা জিজ্ঞেস করা যায় ভাবছে কিশোর।

‘কি জানতে চাও? মায়াকে সরাসরি জিজ্ঞেস করলেই তো পারো।’

‘আসলে, তাঁকে আর বিরক্ত করতে চাই না। আমরা...মানে, ওই মূর্তিটা...আমাদের অবাক করেছে।’

হাসল ডোনাভ। ‘তা তো করবেই। কি সাংঘাতিক আবিষ্কার। ইউনিভার্সিটি কর্তৃপক্ষ এখন মায়াকে ব্রিটানি অভিযানে পাঠানোর জন্যে পাগল হয়ে যাবে, ফান্ডের কোন অসুবিধে হবে না আর।’

‘হ্যাঁ, সে তো বুঝেছিই,’ সাবধানে বলল কিশোর। ‘কিন্তু, দেখুন, আমি বলছিলাম কি...’

বাধা পড়ল বৃদ্ধার ডাকে, ‘ডোনাভ, তোমার ট্যাক্সি এসে গেছে।’

তিন গোয়েন্দার দিকে তাকিয়ে শুকনো হাসি হাসল ডোনাভ, ‘সরি। আমার যেতে হচ্ছে।’ ঘরে ঢুকে একটা ব্যাগ কাঁধে ঝুলিয়ে ফিরে এল আবার। ‘কিছু জানার থাকলে নিশ্চিন্তে মায়ার কাছে চলে যাও। কিছুই মনে করবে না সে। তোমাদের সব প্রশ্নের জবাব পেয়ে যাবে।’

কিন্তু কথা সরছে না আর কিশোরের মুখে। হাঁ করে তাকিয়ে আছে ডোনাভের রাক-স্যাকটার দিকে। সেই লাল-সাদা রঙের, যেটাতে হোঁচট খেয়ে পড়ে গিয়েছিল সে। যেটা থেকে বেরিয়ে পড়েছিল রহস্যময় মূর্তিটা।

আট

ঘাসের ওপর কাত করে রাখা তিনটে সাইকেল। তিন গোয়েন্দা গিয়ে বসেছে একটা পুরানো ওক গাছের শিকড়ে। আকাশের নিচুতে ঝুলে রয়েছে ভারী মেঘের স্তর। সারারাত বর্ষণের পূর্বাভাস।

কিশোর জিজ্ঞেস করল, ‘আলোচনাটা কে আগে শুরু করতে চাও?’

নোটবুক খুলল রবিন। ‘প্রথম প্রশ্ন, মূর্তিটা আসল না নকল?’

নিচের ঠোঁটে ঘন ঘন দু’বার চিমটি কাটল কিশোর। তারপর বলল, ‘আমি ভেবেছিলাম, রাক-স্যাকটা প্রফেসর ড্যানহ্যামের।’

‘আমার প্রশ্ন,’ আবার বলল রবিন, ‘মূর্তিটা আসল, না নকল?’

‘আসল না নকল, সে-কথা পরে। তবে ডিগে মূর্তিটা আগেই মাটিতে পুঁতে রাখা হয়েছিল, খুঁজে পাওয়ার জন্যে।’

‘অত ভণিতা না করে খুলেই বলো না।’

‘আমাদের হাতে কি কি সূত্র আছে?’ এক আঙুল তুলল কিশোর, ‘এক, ডোনাভের রাক-স্যাকে আমি একটা সোনার মূর্তি দেখেছি।’

‘তাতে কি?’ মুসার প্রশ্ন।

‘বাধা দিয়ো না, আমাকে শেষ করতে দাও।’ দুই আঙুল তুলল কিশোর, ‘দুই, প্রফেসর ড্যানহ্যাম এমন কিছু পেতে চেয়েছেন যার ওপর ভিত্তি করে ফ্রান্সে খুঁড়তে যাওয়ার টাকা জোগাড় করতে পারেন।’

‘তিন,’ রবিন বলল, ‘প্রফেসর ড্যানহ্যাম আর ডোনাভের মাঝে এমন কোন সম্পর্ক আছে, যার কারণে ডোনাভ ছাত্র হওয়া সত্ত্বেও প্রফেসরের নাম ধরে ডাকে, তুমি তুমি করে কথা বলে, শিক্ষক-ছাত্র সম্পর্ক এমন হয় না। যে কারও চোখে পড়তে বাধ্য। তোমাদের পড়েনি?’

‘পড়েছে,’ মাথা ঝাঁকাল কিশোর।

‘আর সেই সম্পর্কের কারণেই ডোনাভ হয়তো চাইছে, যে কোন ভাবেই হোক, টাকাটা জোগাড় হোক, ফ্রান্সে যাওয়া হোক প্রফেসর ড্যানহ্যামের।’

‘আসছি আমি সে-কথায়। তার আগে আরেকটা জিনিস আলোচনা করে নিই। মূর্তিটা আসল কিনা পরীক্ষা করানোর জন্যে ইউনিভার্সিটিতে নিয়ে গেছেন প্রফেসর ড্যানহ্যাম। নকল কিনা বুঝতে বিশেষজ্ঞদের কত সময় লাগবে? বড়জোর দশ সেকেন্ড।’

‘নকল হলে গ্রেগরিই বুঝে ফেলত,’ মুসা বলল। ‘এ সব জিনিস নিয়ে কারবার করে সে। ইউনিভার্সিটির বিশেষজ্ঞদের চেয়ে অ্যানটিক কম চেনে না।’

‘তা তো নয়ই,’ কিশোর বলল। ‘ডোনাভ যদি করে থাকে কাজটা, অর্থাৎ যদি পুঁতে রেখে থাকে, তাহলে কাঁচা কাজ করবে না। আসলটা রাখবে। আর ওটা যেখান থেকে এনেছে সেখানে এমন কিছু রাখবে যেটার রঙ, ওজন, আসল সোনার জিনিসের মতই হবে, গ্রেগরির মত লোকও যা দেখে দ্বিধায় পড়ে যাবে, এমনকি ইউনিভার্সিটির বিশেষজ্ঞরাও ঝট করে দেখে বুঝতে পারবেন না ওটা আসল না নকল।’

মাথা নাড়তে নাড়তে রবিন বলল, ‘নাহ্, তোমার কথা ধাঁধার মধ্যে ফেলে দিচ্ছে আমাকে। কি বলতে চাও?’

‘গ্রীক ভাষা গুরু করেছে,’ রেগে গেছে মুসা, ‘বুঝবে কি করে? স্বভাব কি আর বদলায় কোনকালে মানুষের!’

হেসে ফেলল কিশোর। ‘এ তো সহজ, না বোঝার তো কিছু নেই। মিউজিয়ামে বৃদ্ধা মহিলা কি বলেছিল মনে নেই? কাহুয়া ইনডিয়ানদের জিনিসপত্র তালি দিয়ে রেখে দিয়েছে ছাত্রদের গবেষণার জন্যে। আমার বিশ্বাস, গিয়ে খোঁজ নিলে জানতে পারব সেই ছাত্রদের মধ্যে ডোনাভও একজন।’

‘নাহ্,’ হতাশ ভঙ্গিতে হাত ওল্টাল মুসা, ‘গ্রীক থেকে মঙ্গলগ্রহের ভাষায় চলে গেল এবার!’

কিন্তু রবিন বুঝে ফেলেছে। চিৎকার করে উঠল, ‘তারমানে...তারমানে মিউজিয়ামের মূর্তিটা...’

মাথা ঝাঁকাল কিশোর, ‘এই তো বুঝেছ।’

হাঁ করে দুজনের দিকে তাকাচ্ছে মুসা। ‘তোমাদের দুজনেরই কি মাথা খারাপ হয়ে গেল নাকি!’

তার কথা যেন কানেই ঢুকছে না রবিনের। চৈঁচিয়ে বলল, ‘আসল মূর্তিটা সে

চুরি করে নিয়ে গিয়ে রাক-স্যাকে লুকিয়ে রেখেছিল। ডেভিল'স রিজের মাটিতে পুতে রাখার জন্যে!

‘তা কি করে হয়?’ বিশ্বাস করতে চাইল না মুসা। ‘কিশোর মূর্তিটা ডোনাভের রাক-স্যাকে দেখার পরও মহিলা তাদেরটা ওঅর্কশপে দেখেছেন।’

‘চালাকিটা এখানেই,’ কিশোর বলল। ‘আমার দৃঢ় বিশ্বাস, বৃদ্ধা যেটা দেখেছেন সেটা নকল। ওঅর্কশপে বসে মাটি দিয়ে বানিয়েছে ডোনাভ, তাতে সোনার রঙ করে দিয়েছে। মিউজিয়ামে রাখা কোন জিনিস আসল না নকল বিশেষ প্রয়োজন না পড়লে তা নিয়ে মাথা ঘামাবে না কেউ, সন্দেহ না হলে পরীক্ষা করেও দেখতে যাবে না, সেই চামটাই নিয়েছে ডোনাভ-তারমানে নকলটাই দেখেছেন মহিলা।’

কিশোরের কথাটা হজম করতে সময় লাগল মুসার।

রবিন বলল, ‘তোমার কি মনে হয়, ডোনাভ একা করেছে কাজটা; না প্রফেসর ড্যানহ্যামও এতে জড়িত? যদি কোন সম্পর্ক থেকে থাকে দুজনের, গোপনে দেখা-সাক্ষাৎ হয়, তাহলে আলাপ-আলোচনা করে, প্ল্যান করে কাজটা করতে বাধা কোথায়? ডোনাভকে সহজেই ব্যবহার করতে পারেন প্রফেসর ড্যানহ্যাম।’

‘সেটা সম্ভব। কিন্তু এ ব্যাপারে আর কিছু বলার আগে, আমার মনে হয় মিউজিয়ামে গিয়ে জেনে আসা দরকার, সত্যি সত্যি ছাত্রদের মধ্যে ডোনাভের নাম রয়েছে কিনা। না থাকলে ওকে নিয়ে আলোচনার কোন মানে হয় না।’

লাফ দিয়ে উঠে দাঁড়াল মুসা। ‘তাহলে আর দেরি করছি কেন? চলো, এখনি যাই।’

‘হালো,’ ডেস্কের ওপাশে বসা বৃদ্ধা মহিলার দিকে তাকিয়ে হাসল কিশোর, ‘আমাদের চিনতে পারছেন?’

মাথা ঝাঁকালেন বৃদ্ধা। ‘পারছি। স্কুল ম্যাগাজিনের জন্যে ফিচার লিখছ। কিন্তু এখনও তো দেখানো যাবে না।’

সামনে এগিয়ে গেল কিশোর। তার মধুরতম হাসিটা উপহার দিয়ে বলল, ‘দেখুন, দেরি করব না মোটেও। এক পলক তো দেখতে দিতে পারেন?’

‘পারলে সত্যি মানা করতাম না,’ আন্তরিক কণ্ঠে বললেন বৃদ্ধা। ‘চাবিই নেই আমার কাছে। তালা দিয়ে চাবি নিজের ড্রয়ারে আটকে রেখে চলে গেছেন কিউরেটর। মিউজিয়াম বন্ধ হওয়ার আগে আসবেন বলে গেছেন। তোমাদের বেশি জরুরী হলে তখন আরেকবার এসে তিনি এলেন কিনা দেখে যেতে পারো।’

মাথা ঝাঁকাল কিশোর, ‘হ্যাঁ, তা-ই করব।...আচ্ছা, আরেকটা কথা, ওই জিনিসগুলো নিয়ে যে সব ছাত্ররা গবেষণা করছে, তাদের নাম তো নিশ্চয় জানাতে পারবেন?’

‘তা পারব।’ ড্রয়ার খুলে কাগজপত্র ঘাঁটতে লাগলেন বৃদ্ধা। ‘সবাইকে স্পেশাল পাস দিতে হয় আমাকেই,’ কিশোরের দিকে তাকিয়ে হাসলেন তিনি। ‘যাকে-তাকে তো আর ঢুকতে দেয়া যায় না। কে কখন কোনদিক দিয়ে শয়তানি করে বসে ঠিক আছে কিছু।...এই যে, পেয়েছি, পাঁচজন: ডেভিড করমোর্যান্ট, জুলিয়া জনসন, এরিক ওয়ারনার, ডোনাভ ইয়ানমার আর স্টেফি...’

‘থ্যাংকস,’ বাধা দিয়ে থামিয়ে দিল কিশোর। যা জানার জানা হয়ে গেছে। ‘অনেক ধন্যবাদ আপনাকে।’ হাসিমুখে ফিরে তাকাল দুই সহকারীর দিকে। নীরব দৃষ্টি বলছে—কীহু, বলেছিলাম না!

‘ঠিক আছে, পরে এসো,’ বৃদ্ধা বললেন।

‘আচ্ছা,’ বলে দুই সহকারীকে নিয়ে দরজার দিকে রওনা হলো কিশোর। সিঁড়ির কাছে পৌঁছে বলল, ‘আমি জানতাম, আমার কথাই ঠিক হবে।’

‘এ আর নতুন কি,’ মুসা বলল। ‘তোমার কথা কি আর কখনও বেঠিক হয়।’

‘কিন্তু মিউজিয়ামে এখন একটা নকল মূর্তি আছে,’ রবিন বলল, ‘এ কথাটা জানানো উচিত ছিল তাঁকে।’

‘জানাতে পারতাম,’ কিশোর বলল। ‘কিন্তু জানানোর সঙ্গে সঙ্গে পুলিশকে ফোন করতেন উনি।’

‘তাতে অসুবিধে কি?’ মুসার প্রশ্ন। ‘মূর্তি যদি চুরিই গিয়ে থাকে...’

‘অসুবিধে আছে। তাহলে শুধু ডোনাল্ডকেই ধরবে পুলিশ। প্রফেসর ড্যানহ্যাম এতে জড়িত থাকলে তাঁকে আর জড়ানো যাবে না, সমান অপরাধ করেছেও পার পেয়ে যাবেন। সেটা ঘটতে দিতে চাই না আমি।’

‘তাহলে কি করবে?’ জিজ্ঞেস করল রবিন।

‘প্রফেসর ড্যানহ্যামের সঙ্গে দেখা করব। তাঁকে বলব, কি কি জানতে পেরেছি আমরা।’

‘সেটা কি ঠিক হবে?’

‘এ ছাড়া আর কি করতে পারি? তাঁর জানা থাকলে ঘাবড়ে গিয়ে বলে দিতে পারেন সব। না জানলে ধরে নিতে হবে ডোনাল্ড একাই করেছে কাজটা; পুলিশকে জানাতে তখন আর দ্বিধা থাকবে না আমাদের।’

‘আমার মনে হয় না প্রফেসর ড্যানহ্যামের অজান্তে এত কিছু করেছে ডোনাল্ড,’ রবিন বলল।

‘গিয়ে কথা বললেই বোঝা যাবে।’

মুসা বলল, ‘কিন্তু তাঁকে পাওয়া যাবে কোথায়? ডেভিল’স রিজ়ে তো যাবেন না নিশ্চয়।’

‘ইউনিভার্সিটিতে গিয়ে খোঁজ নিতে পারি,’ রবিন বলল।

‘সে তে, বিশ মাইলের ধাক্কা,’ বলল কিশোর। ‘অতদূর সাইকেল চালিয়ে যেতে ইচ্ছে করছে না এখন আমার।’

‘তাহলে ফোন করা যেতে পারে,’ মুসা বলল। ‘নম্বর জোগাড় করা কঠিন হবে না। ফোন করে প্রফেসর ড্যানহ্যামকে চাইতে পারি। বলব, জরুরী কথা আছে।’

‘কিন্তু তিনি যদি সেখানে না থাকেন?’

‘তাহলে বাড়ির নম্বর চাইতে পারি।’

‘যদি বাড়ির নম্বর তোমাকে না দেয় ওরা?’

‘এত যদি যদি করছ কেন!’ জবাব খুঁজে না পেয়ে রেগে উঠল মুসা। ‘এত সমস্যা না দেখিয়ে দয়া করে নিজেই বলে ফেলো না কি করব?... প্রফেসরকে কোনভাবেই পাওয়া না গেলে আবার ফিরে যাব মিউজিয়ামে। কিউরেটরের সঙ্গে

দেখা করে সব জানাব। তাতে চলবে না।

‘ডোনাল্ড একা বিপদে পড়বে জেনেও?’

‘এ ছাড়া আর কি করার আছে?... আসলে প্রশ্ন করে করে নিজেও শিওর হয়ে নিতে চাইছি, সত্যি কি করা উচিত আমাদের।... চলো, অতশত চিন্তা না করে আগে ফোনই করা যাক।’

নয়

রিসিভার ক্রেডলে রেখে ফোন বুদ থেকে বেরিয়ে এল মুসা।

‘কি? পেলো?’ জিজ্ঞেস করল রবিন।

‘ওখানে নেই,’ মুখ গোমড়া করে জানাল মুসা। ‘যে লোকটা ধরেছে, সে জানাল মাত্র দুই মিনিট আগে বেরিয়ে গেছেন প্রফেসর।’ কিশোরের দিকে তাকিয়ে ঝাঁজাল স্বরে বলল, ‘খামাখা তর্ক করে তুমি সময় নষ্ট না করলে পেয়ে যেতাম।’

নির্লিপ্ত ভঙ্গিতে কিশোর বলল, ‘বাড়ির নম্বর নিয়েছ?’

‘না। ওরা বলল, ব্যক্তিগত নম্বর দিতে নিষেধ আছে। তখন বললাম, স্কুলের ম্যাগাজিনের জন্যে ফিচার লিখছি। মূর্তিটার ব্যাপারে জানতে আগ্রহী। পরীক্ষা করা হয়েছে কিনা আসল নানকল। ওরা বলল, আসল।’

চমকাল না কিশোর। ‘যা বলেছিলাম।’

‘কিন্তু প্রফেসর ড্যানহ্যাম নাকি সন্তুষ্ট হতে পারছেন না। তিনি আরেকজন বিশেষজ্ঞকে দেখাতে চান। তাঁর কাছেই গেছেন এখন। বিশেষজ্ঞের নাম জানতে চাইলাম। কি বলল জানো?’

এইবার আগ্রহী মনে হলো কিশোরকে। ‘কি?’

‘প্রফেসর শেফার্ড ডেমিরন।’

‘বলো কি?’ চোখ বড় বড় হয়ে গেল রবিনের।

মাথা ঝাঁকাল মুসা, ‘হ্যাঁ। শুনে তো নিজের কানকেই বিশ্বাস করতে পারছিলাম না।’

‘অবশ্য,’ কিশোর বলল, ‘এ ব্যাপারে ডেমিরন যে সবার চেয়ে বড় বিশেষজ্ঞ, তাতে কোন সন্দেহ নেই—যদিও পাগলও সবার চেয়ে বড়।’ চিন্তা করার জন্যে খামল এক মুহূর্ত। ঘড়ি দেখল। ‘শোনো, ডেমিরনের কাছে যেতে প্রফেসর ড্যানহ্যামের আধঘন্টা লাগবে। আমরা যদি এখনই রওনা হয়ে যাই, তাহলে তাঁর সঙ্গে দেখা হবে। কথা বলতে পারব।’

‘ঠিক বলেছ,’ রবিন বলল। ‘যদি আমাদের আগেই গিয়ে পৌঁছান, তাতেও কোন অসুবিধে নেই। তাঁর জন্যে মিলের বাইরে অপেক্ষা করব।’

‘চলো,’ কিশোর বলল।

সাইকেলের দিকে দৌড় দিল তিনজন।

আগে আগে চলেছে মুসা। শহরের বাইরে বেরোতে সময় লাগল না। দুই পাশে

মাঠ, ঝোপঝাড়। সেগুলো ছাড়িয়ে আসতেই চোখে পড়ল ডেভিল'স রিজ।

গেটের পাশ দিয়ে যাওয়ার সময় প্যাডালে দাঁড়িয়ে ভেতরে তাকাল কিশোর। তেরপল দিয়ে ঢেকে রাখা হয়েছে টিবির খোঁড়া অংশটা। জনমানুষের চিহ্নও নেই।

ডেভিল'স রিজ পেছনে ফেলে এল ওরা। একই রাস্তা ধরে এগিয়ে চলল। পথের শেষ মাথায় গিয়ে মোড় নিলে পাওয়া যাবে প্রফেসর ডেমিরনের বাড়ি, মুসা জানাল।

সামনে বাক।

বাক পেরিয়ে ছুটে আসতে দেখা গেল একটা গাড়িকে। আরেকটু হলেই গুঁতো লাগিয়ে দিত মুসার সাইকেলে। সাঁই করে সরে গেল সে। রূপালী রঙের একটা টয়োটা।

মোড়ের ওপাশে অদৃশ্য হয়ে গেল গাড়িটা।

ব্রেক কমল মুসা। তার প্রায় ঘাড়ের ওপর এসে পড়ল অন্য দুজন।

'ডিপ থ্রেগরি গেল!' চিৎকার করে বলল সে।

'দেখলাম তো। খুব তাড়া আছে মনে হলো,' কঁধের ওপর দিয়ে ফিরে তাকিয়ে বলল রবিন। 'যে ভাবে চালাচ্ছে, অ্যান্ড্রিভেট করবে তো।'

সেদিক থেকে চোখ ফিরিয়ে চিন্তিত ভঙ্গিতে মুসাকে জিজ্ঞেস করল কিশোর, 'আর কতদূর?'

'এসে গেছি,' মুসা জানাল। 'বড়জোড় আর দেড়শো গজ। ওই যে মোড়টা দেখা যাচ্ছে, তার ওপাশে।'

আবার প্যাডালে চাপ দিল ওরা। রাস্তা এখন ঢালু। প্রায় উড়ে চলল। পথের দুধারে বড় বড় গাছ। রাস্তার ওপর ঝুঁকে, গায়ে গায়ে লেগে থেকে মাথার ওপরে খিলান তৈরি করেছে। আসল আলো ঢেকে দিয়ে সৃষ্টি করেছে অন্ধৃত এক ধরনের সবুজ আলো-আঁধারি।

একেবারে নিচে, ডান ধারে গাছপালার খানিকটা বিরতি দেখা গেল। সেখান থেকে সরু আরেকটা পথ ঢুকে গেছে বনের মধ্যে।

'ওটাই,' মুসা জানাল। 'গোষ্ঠি মিলে যাওয়ার রাস্তা।'

প্রায় একই সঙ্গে সবার চোখে পড়ল গাড়িটা। একটা ল্যান্ড-রোভার দাঁড়িয়ে আছে রাস্তার ধারে।

ব্রেক কষে দাঁড়িয়ে গেল তিনজন।

জায়গাটা অতিরিক্ত নীরব।

'আমাদের আগেই এসে গেছেন,' রবিন বলল।

জ্রুকুটি করল কিশোর। ধীরে ধীরে সাইকেল চালিয়ে এসে গাড়িটার পাশে থামল। লক্ষ করল, ড্রাইভারের পাশের দরজাটা সামান্য ফাঁক হয়ে আছে।

'আশ্চর্য!' বিড়বিড় করল সে। ঠিকমত দরজা লাগালেন না কেন? গাড়িতে আছেন নাকি প্রফেসর? ভাবল সে।

সাইকেলটা কাত করে রাখল মুসা। ফাঁক হয়ে থাকা দরজাটার দিকে এগোল। তারপর মাটির দিকে চোখ পড়তেই চোঁচিয়ে উঠল 'খাইছে' বলে।

কি হয়েছে দেখার জন্যে দৌড়ে এল রবিন আর কিশোর।

ঘাসের ওপর দলামোচড়া হয়ে পড়ে আছে নিখর দেহটা।
অস্ফুট একটা শব্দ বেরোল রবিনের মুখ থেকে।
'প্রফেসর ড্যানহ্যাম!' ভুরু কুঁচকে তাকিয়ে আছে কিশোর।

দশ

'মরে গেল নাকি...' ফিসফিস করে বলল মুসা। জোরে বলতে ভয় পাচ্ছে।
প্রফেসর ড্যানহ্যামের পাশে হাঁটু গেড়ে বসল কিশোর। দেখল, মাথার পেছনে রক্ত!

'গাড়ি থেকে নামতে গিয়ে পড়ে গেছেন?' ঝুঁকে দেখছে রবিন।
মাথা নাড়ল কিশোর, 'উঁহ্! জখমটা মাথার পেছনে। অথচ পড়ে আছেন উপুড় হয়ে।' নাড়ী দেখল। স্বস্তির নিঃশ্বাস ফেলে বলল, 'বঁচে আছেন।' কাঁধ ধরে ঝাঁকি দিয়ে ডাকল, 'প্রফেসর! প্রফেসর, শুনতে পাচ্ছেন?'
সাদা নেই।

মুখ তুলে দুই সহকারীর দিকে তাকাল কিশোর। 'একটা ফোন দরকার। অ্যামবুলেন্স ডাকতে হবে। রবিন, তুমি থাকো। মুসা, এসো আমার সঙ্গে।'

'মাইলখানেক দূরে এক সারি কটেজ আছে,' মুসা বলল। 'ওখানে গিয়ে চেষ্টা করে দেখতে পারি।'

'তারচেয়ে মিলটাতে ঢুকি না কেন? প্রফেসর ডেমিরনের বাড়িতে? তাঁর বাড়িতে টেলিফোন না থাকার কথা নয়।'

'কি জানি!'

'চলো, গিয়ে তো দেখা যাক। না পেলে তখন অন্য চিন্তা করব।'

সাইকেলের দিকে ছুটল দুজনে।

পেছন থেকে ডেকে জিজ্ঞেস করল রবিন, 'পুলিশকে ফোন করবে নাকি?'

'দেখি,' জবাব দিল কিশোর।

খাড়াই এড়াতে টিলাটকুর আর পাহাড়ের গোড়া দিয়ে ঐক্যবৈক্যে যাওয়া ঘোরানো পথটা ধরল ওরা। বন রয়েছে চতুর্দিকে। সামনে নিঃসঙ্গ দাঁড়ানো মিলটা। রোগাটে চেহারার একটা বিল্ডিং। অন্ধকার জানালা। ছাল-চামড়া ওঠা দেয়ালের গোড়ায় হাঁটু সমান ঘাস, ঝোপঝাড় ভরা। ঢালু চালাটা শ্যাওলায় সবুজ।

সাইকেল রেখে দৌড়ে এসে সামনের দরজার কাছে দাঁড়াল দুজনে। কলিং বেল নেই। পুরানো আমলের কালো রঙের লোহার নকার আছে। শয়তানের চেহারার মত করে বানানো। ভয়ঙ্কর চোখে তাকিয়ে আছে ওদের দিকে। মুখ হাঁ করে দাঁত দেখিয়ে ভেঙচি কাটছে। জিভ বের করা। ওসবের দিকে তাকানোর সময় নেই এখন। হ্যামার তুলে বাড়ি মারল কিশোর।

ঝনঝন করে প্রাচীন বাড়িটার আনাচে-কানাচে ছড়িয়ে পড়ল নকারের বিকট শব্দ।

'কাজটা কি ঠিক হচ্ছে?' অস্বস্তি বোধ করছে মুসা। 'প্রফেসর ডেমিরনের মত

একজন পাগলের বাড়িতে ফোন আছে, এ কথা বিশ্বাস হয় তোমার?

‘জিজ্ঞেস না করলে জানব কিভাবে?’ পর পর তিনবার বাড়ি মারল কিশোর। কান পেতে শুনল। কারও সাড়া পেল না। পায়ের শব্দ এগিয়ে এল না দরজা খুলে দেয়ার জন্যে। মুসার দিকে তাকাল সে। ‘পেছন দিকে গিয়ে দেখা দরকার। ঢোকান দরজা আছে নিশ্চয়।’

‘দরকারটা কি এত কষ্টের,’ মুসার পছন্দ হচ্ছে না মোটেও। ‘অন্য কোন বাড়িতে গেলেই পারি।’

কিন্তু বাড়ির কোণের দিকে হাঁটতে শুরু করেছে ততক্ষণে কিশোর। পা আটকে দিচ্ছে ঘাসের দঙ্গল। প্রায় বিধ্বস্ত একটা দেয়াল চোখে পড়ল তার। দরজা একটা দেখা গেল বটে, কিন্তু ঘাস আর কাঁটাঝোপে এমন করে ঢেকে আছে যে ওখান দিয়ে গলে বেরোনো কঠিন।

স্রোতের শব্দ কানে আসছে। কাছেই নদী। গভীর, সরু নদীর খরস্রোতা বাদামী পানি বয়ে যাচ্ছে দ্রুত, ক্রমাগত ঘুরপাক খেয়ে যাচ্ছে মিলের শ্যাওলায় ঢাকা বিশাল ঢাকাটাকে ছুঁয়ে। ঢাকা ঘুরলে জাঁতা ঘুরবে, জাঁতা ঘুরলে শস্য পেঘাই হবে। এখন সে-সব বন্ধ। কত বছর ধরে বন্ধ কে জানে।

ঢাকা থেকে খানিক দূরে নদীর ওপরে সরু, ছোট একটা ব্রিজ। এত পুরানো, মনে হচ্ছে পা রাখলেই ধসে পড়বে নিচের পাক খেয়ে বয়ে যাওয়া ঘোলা পানিতে।

বিল্ডিংয়ের পেছনে ছোট একটা দরজা। খোলা। পায়ে চলা একটা পথ চলে গেছে পানির কিনারে। রাস্তার দাঁড়িয়ে ডাক দিল কিশোর, ‘প্রফেসর ডেমিরন, বাড়ি আছেন? প্রফেসর!’

সাড়া নেই এবারও। ঘাস, লতাপাতা আর ঝোপ মাড়িয়ে দরজার কাছে এগিয়ে গেল সে। দোরগোড়ায় দাঁড়িয়ে আবার ডাক দিল, ‘প্রফেসর!’

আবহাওয়া গরম। সামান্য পরিশ্রমেই ঘাম বেরিয়ে গা আঠা হয়ে যায়। কিন্তু মিলটার মধ্যে ঠাণ্ডা। বরফের মত শীতল। উনিশ শতকের গোড়ার দিকে এমন কায়দায় বাড়িঘর বানানো হত যাতে ঠাণ্ডা আটকে থাকে, প্রচণ্ড গরমের দিনেও গরম না লাগে—এক ধরনের এয়ারকন্ডিশনিং সিস্টেম। বাড়ি পুরানো, কিন্তু তাক আর টেবিলে রাখা জিনিসগুলো অনেক আধুনিক।

হলওয়াতে ঢুকল দুজনে। আবছা অন্ধকার। ধূসর রঙের দেয়ালগুলো ভেতরের দিকে অদ্ভুত ভঙ্গিতে ঠেলে এসেছে, ধসে পড়ার হুমকি দিচ্ছে। কার্পেটের অবস্থা বড়ই করুণ। ছেঁড়া, ফাটা, সুতো বেরোনো।

আরেকটা খোলা দরজা দেখা গেল। তার ওপাশে ছোট একটা বসার ঘর। কালচে-খয়েরী কাঠের আসবাব আর চামড়ায় মোড়া পুরানো সোফা। দেয়ালের তাক বইয়ে ঠাসা। প্রচুর বই আর কাগজপত্র মেঝেয় লুটানো। দেয়ালে ঝোলানো অলঙ্কারের জিনিসপত্র দৃষ্টি আকর্ষণ করল ওদের। ভয়ঙ্কর চেহারার মুখোশ রয়েছে কয়েকটা। তার নিচে অন্ধকার ছায়ার মধ্যে বেদিতে দাঁড়িয়ে আছে পাথরের সব জন্তু-জানোয়ার, দেবদেবতা ও শয়তানের মূর্তি। চালাটা ধরে রেখেছে কালো রঙের কাঠের মোটা মোটা কড়ি-বরগা। পুরানো হয়ে নিচের দিকে বেকে এসেছে। ভয় লাগল ওদের। তার সইতে না পেরে কোন সময় ভেঙে পড়ে ওদের মাথার ওপর।

বাতাসে ভাপসা গন্ধ।

‘কিশোর, চলো, পালাই!’ ফিসফিস করে বলল মুসা।

‘ওই যে!’ বলে উঠল কিশোর।

এমন করে বলল কিশোর, চমকে গেল মুসা। ভাবল কি না কি দেখেছে। চিৎকার দিয়ে দৌড় মারতে যাবে এই সময় চোখে পড়ল টেলিফোনটা। দেয়াল ঘেষে রাখা একটা টেবিলে পুরানো আমলের একটা ব্যাকলাইট টেলিফোন সেট।

‘হাত দেয়াটা কি ঠিক হবে?’ গলা কাঁপছে মুসার। ‘যদি প্রফেসর চলে আসে?’

‘এলে আসবেন,’ এগিয়ে গেল কিশোর। ‘অকারণে তো আর ফোন করছি না আমরা। জরুরী বলেই।’

ভারী রিসিভারটা তুলে কানে ঠেকাল সে।

মুসার চোখ ঘুরছে চতুর্দিকে। পাথরের মূর্তিগুলোকে জীবন্ত লাগছে তার, চোখগুলো যেন ওর দিকেই তাকিয়ে আছে জ্বলন্ত দৃষ্টিতে।

ডায়াল করল কিশোর। প্রথমে অ্যামবুলেন্সকে খবর দিল। তারপর জানাল পুলিশকে। সন্তুষ্ট হয়ে রিসিভারটা রেখে মুসাকে নিয়ে বেরিয়ে এল বাইরের উষ্ণ, স্বাভাবিক আবহাওয়ায়। হাঁপ ছেড়ে বাঁচল। ওদের পক্ষে যা করার করেছে, প্রফেসর ড্যানহ্যাম এখন টিকে থাকলেই হয়।

ফিরে এসে দেখল, জ্ঞান ফিরেছে প্রফেসরের। গাড়ির গায়ে হেলান দিয়ে বসেছেন। মাথার পেছনে জখমটাকে চেপে ধরে রেখেছেন কাপড় দিয়ে। পাশে বসে আছে রবিন।

‘ফোন করেছে?’ জানতে চাইল সে।

‘হ্যাঁ,’ কিশোর বলল। ‘চলে আসবে।’ প্রফেসরের দিকে তাকাল, ‘কি হয়েছিল?’

ঘোলাটে দৃষ্টিতে তাকালেন প্রফেসর। ‘জানি না। গাড়িতে ঢুকতে যাব, কিসের যেন বাড়ি লাগল মাথার পেছনে। আর কিছু মনে নেই।’

‘গ্রেগরির কাজ!’ বলে উঠল মুসা।

মাথা ঘোরাতে গিয়ে ব্যথা লাগতেই চোখমুখ কুঁচকে ফেললেন প্রফেসর ড্যানহ্যাম। ‘কার কাজ?’

‘আসার সময় ডিপ গ্রেগরিকে দেখলাম গাড়িতে করে পালাচ্ছে,’ মুসা জানাল। ‘এই তো, কয়েক মিনিট আগে। ও কি এখানে এসেছিল নাকি?’

মাথা নাড়তে গিয়েও ব্যথা পাবেন মনে পড়ায় থেমে গেলেন প্রফেসর। ‘জানি না। ওকে দেখিনি আমি।’ দম নিলেন। ‘প্রফেসর ডেমিরনের সঙ্গে দেখা করতে গিয়েছিলাম। ফিরে এসে গাড়িতে উঠছি এ সময় বাড়ি লাগল মাথায়। আর কিছু মনে নেই।’

‘দেখা হয়েছে প্রফেসরের সঙ্গে?’ জানতে চাইল কিশোর।

‘হয়েছে। মূর্তিটা দেখাতে নিয়ে গিয়েছিলাম। ওর সঙ্গে কথা বলে একটা ব্যাপারে শিওর হতে চেয়েছি। অদ্ভুত একটা ব্যাপার...’ থেমে গেলেন তিনি। ‘আরে মূর্তি! হঠাৎ যেন মনে পড়ে গেছে। ‘কোথায় ওটা? ব্রীফকেসে ছিল!’

ঘাসের মধ্যে খুঁজে বেড়াল ওরা। মুসা গিয়ে গাড়ির মধ্যেও দেখে এল।

কোথাও নেই ব্রীফকেস। মূর্তিটাও গায়েব।

‘এর মানে বুঝতে পারছেন?’ মুসা বলল। ‘ডিপ থ্রেগরি নিয়ে গেছে ওটা।’

রবিন বলল, ‘ওকে পালাতে দেখেছি আমরা।’

ঘড়ি দেখল কিশোর, ‘পুলিশ আসে না কেন?’

কয়েক মিনিট পরেই এসে হাজির হলো পুলিশ। অ্যান্ডুলেসটা এল ওদের পেছন পেছন।

পুলিশকে সব জানানো হলো।

‘মূর্তিটা কি দামী?’ জিজ্ঞেস করল একজন অফিসার।

কাঁধে একটা কন্ডল জড়িয়ে দেয়া হয়েছে প্রফেসর ড্যানহ্যামের। অ্যান্ডুলেসের দিকে নিয়ে যাওয়া হচ্ছে। প্রশ্ন শুনে ফিরে তাকালেন, ‘দামী মানে? অমূল্য!’

আনমনে মাথা নাড়তে নাড়তে অফিসার বলল, ‘কিন্তু প্রফেসর, এত দামী একটা জিনিস বহনের জন্যে যে পরিমাণ সতর্কতা বা প্রহরার প্রয়োজন ছিল, তার কোনটাই আপনার ছিল না। প্রথমে তালা ভেঙে আপনার ক্যারাভানে চোর ঢুকল, তারপর এখন...’

চিৎকার শুনে থেমে গেল অফিসার। গাড়িতে ব্রীফকেসটা আছে কিনা নিশ্চিত হবার জন্যে ল্যান্ড-রোভারে ঢুকেছিল একজন পুলিশম্যান। চিৎকার করেছে সে। ধাক্কা দিয়ে খুলে ফেলল পেছনের দরজা।

কি হয়েছে দেখার জন্যে ছুটে গেল তিন গোয়েন্দা। ড্রাইভারের সীটের পেছনে মেঝেতে পড়ে আছে পাথর আর ভাঙা তৈজসপত্র ভরা কয়েকটা ব্যাগ।

চিনতে পেরে বলে উঠল কিশোর, ‘এগুলোই তো ক্যারাভানে ছিল!’

সাদা হয়ে গেল প্রফেসরের মুখ। ‘কি ব্যাপার কিছু তো বুঝতে পারছি না!’ পুলিশ অফিসারের সন্দিহান চোখের দিকে তাকালেন তিনি। ‘সত্যি বলছি। বিশ্বাস করুন। আমি এর কিছুই জানি না। কোথেকে এল, কিছু না।’

স্থির দৃষ্টিতে প্রফেসরের দিকে তাকিয়ে জিজ্ঞেস করল অফিসার, ‘এগুলোই ডেভিল’স রিজে আপনার ক্যারাভান থেকে চুরি গিয়েছিল, তাই না?’

‘হ্যাঁ...কিন্তু আমার গাড়িতে এল কি করে জানি না!’

শীতল দৃষ্টিতে প্রফেসরের দিকে তাকিয়ে রইল অফিসার।

প্রফেসরকে ড্যানহ্যামকে নিয়ে চলে গেল অ্যান্ডুলেস। পুলিশ গেল তাদের সঙ্গে।

কিশোরের দিকে তাকাল রবিন। ‘এবার কি?’

ঘড়ি দেখল কিশোর। ‘এখন রওনা দিলে মিউজিয়াম বন্ধের আধঘণ্টা আগে পৌছতে পারব। দেখি গিয়ে, কিউরেটর এলেন কিনা!...কিন্তু একটা কথা বুঝতে পারছি না। এত হই-চই, এত হটগোল, আমরাও গিয়ে বাড়িতে ঢুকলাম, কিন্তু দেখতে পেলাম না ঘরকনো প্রফেসর ডেমিরনকে। তিনি গেলেন কোথায়?’

জবাবটা পেল মিউজিয়ামে এসে। সিঁড়ি দিয়ে ওঠার সময় এক বিচিত্র দৃশ্য চোখে পড়ল।

রিসেপশনে বসা বৃদ্ধা আর ওদের অপরিচিত আরেকজন লোক প্রফেসর ডেমিরনকে শান্ত করার আশ্রয় চেষ্টি চালাচ্ছেন। ঘরের মাঝখানে দাঁড়িয়ে চিৎকার

করছেন প্রফেসর। লাঠি তুলে বাড়ি মারার ভঙ্গি করছেন।

‘প্রফেসর ডেমিরন!’ ভুরু কুঁচকে ফেলল কিশোর, ‘এখানে কি করছেন?’

‘পাগলামি! যার যা কাজ,’ মুসা বলল।

ঘরে ঢুকল ওরা। অপরিচিত ভদ্রলোক প্রফেসরের হাত ধরে তাঁকে ধানানোর বৃথা চেষ্টা করছেন। লাফ দিয়ে সরে গেলেন প্রফেসর। লাঠি তুলে ঘোরাতে শুরু করলেন মাথার ওপর।

‘প্রফেসর, প্রীজ, শান্ত হোন,’ ভদ্রলোক বললেন। ‘প্রীজ!’

‘অত কথা শুনতে চাই না আমি। আমার জিনিসগুলো বের করুন, জলদি!’ চিৎকার করে উঠলেন প্রফেসর। মাথার পেছনে লম্বা চুল নাচছে। রাগে মুখ টকটকে লাল। ভাঁজগুলো আরও গভীর। ‘জিনিসগুলো আমি পেয়েছি, এটা তো ঠিক। আমার জিনিস আমার কাছ থেকে এভাবে লুকিয়ে রাখার মানে কি?’

‘লুকিয়েছি কে বলল? চলুন, দেখাচ্ছি। আসুন আমার সঙ্গে...’ ঝট করে মাথা নুইয়ে ফেললেন তিনি, লাঠির বাড়ি থেকে বাঁচার জন্যে।

‘চোরের দল!’ গর্জে উঠলেন প্রফেসর। ‘চোর কোথাকার! সব ব্যাটা চোর!’

‘পুলিশকে ফোন করুন তো,’ বৃদ্ধাকে বললেন ভদ্রলোক। বোঝা গেল তিনিই কিউরেটর। ধৈর্যের বাঁধ ভেঙেছে তাঁর। রেগে গেছেন তিনিও।

‘পুলিশ! পুলিশ কি করবে আমার!’ এত জোরে চিৎকার করে উঠলেন প্রফেসর, চমকে গেল সবাই।

মুসার দিকে চোখ পড়ল প্রফেসরের। চিৎকার করে উঠলেন আবার, ‘রূপানি! রূপানি! তুমি এসেছ কেন?’

লাঠি তুলেছিলেন কিউরেটরকে বাড়ি মারার জন্যে। লক্ষ্যভ্রষ্ট হলো। লাগল গিয়ে একটা কাঁচের ডিসপেন্সে কেসে। ঝনঝন করে ভেঙে পড়ল সেটা।

এগারো

কাঁচ ভাঙার সঙ্গে সঙ্গে বেজে উঠল অ্যালার্ম। মিউজিয়ামে কোন অঘটন ঘটলেই বেজে ওঠে, জানায় সতর্ক সঙ্কেত।

হাত থেকে লাঠি ফেলে দিয়েছেন প্রফেসর। কজি চেপে ধরেছেন। ভাঙা কাঁচের টুকরো লেগে কেটে গিয়ে রক্ত বেরোচ্ছে।

‘মিস কোরাজন,’ বৃদ্ধার উদ্দেশে চিৎকার করে উঠলেন কিউরেটর, ‘অ্যালার্মের সুইচ অফ করুন। ফাস্ট এইড বক্সটা নিয়ে আসুন। জলদি!’

দৌড়ে গিয়ে একটা চেয়ার নিয়ে এল রবিন। তাতে বসলেন প্রফেসর। তিন গোয়েন্দা ঘিরে দাঁড়াল তাঁকে। কিউরেটরও আছেন। পুলিশ ডাকার কথা মনে হয় ভুলে গেছেন।

জখমটা কিছু না, সামান্য চামড়া কেটেছে মাত্র। ধুয়ে সেটাকে বেঁধে দিতে বসল রবিন। দুর্ঘটনা শান্ত করে দিয়েছে প্রফেসরকে। রাগ দূর হয়ে গেছে। নিরীহ ভঙ্গিতে তাকাচ্ছেন এখন সবার দিকে।

‘জিনিসগুলো কোথায়?’ কিউরেটরকে জিজ্ঞেস করলেন তিনি। ‘ওগুলো আমার কাছ থেকে লুকিয়ে রাখার কোন অধিকার নেই আপনার।’

‘লুকিয়ে তো রাখিনি, স্যার,’ কিউরেটরও নরম হয়ে গেছেন।

‘তাহলে ডিসপ্লে কেস থেকে সরিয়েছেন কেন?’

‘ছাত্ররা গবেষণা করছে ওগুলো নিয়ে। ওঅর্করুমে রাখা হয়েছে।’

‘নিয়ে আসুন। যদি সত্যি কথাই বলে থাকেন, এনে দেখান আমাকে।’

অস্বস্তি ফুটল কিউরেটরের চোখে। ‘দেখাচ্ছি। কিন্তু আপনাকে কথা দিতে হবে, স্যার, আপনি শান্ত থাকবেন। থাকবেন তো?’

মাথা ঝাঁকালেন প্রফেসর, ‘আমি এখন শান্তই আছি, মিস্টার হাচিন্স।’

‘ঠিক আছে, নিয়ে আসছি।’ তিন গোয়েন্দার দিকে তাকালেন তিনি। ‘সাহায্য দরকার। একজন আসবে আমার সঙ্গে?’

মুহূর্তে রাজি হয়ে গেল কিশোর। কিউরেটরের সঙ্গে চলল।

‘পুলিশ ডাকবেন সত্যি সত্যি?’ হাঁটতে হাঁটতে জিজ্ঞেস করল কিশোর।

‘না ডাকা লাগলেই খুশি হব,’ কিউরেটর বললেন। ‘অসুখ হওয়ার আগে প্রফেসর ডেমিরন একজন সত্যিকারের ভদ্রলোক ছিলেন। নার্ভাস ব্রেকডাউন হয়েছিল তাঁর; কোনমতেই সারল না আর পুরোপুরি। কমে, আবার বাড়ে।’

‘এখন তো মনে হয় বেড়েছে।’

‘হ্যাঁ,’ বিষণ্ণ ভঙ্গিতে মাথা ঝাঁকালেন মিস্টার হাচিন্স। ‘বুঝতে পারছি না জিনিসগুলো তাঁকে দেখাতে নিয়ে যাওয়াটাও এখন ঠিক হচ্ছে কিনা।’

‘কেন দেখতে চান বলেছেন কিছু?’

‘ডেভিল’স রিজে পাওয়া মূর্তিটার সঙ্গে নাকি রাকারুয়া হিলেরটার ছব্ব মিল। প্রফেসর ড্যানহ্যাম দেখাতে নিয়ে গিয়েছিলেন।’ মাথা নাড়তে লাগলেন মিস্টার হাচিন্স। ‘দেখানোই উচিত হয়নি। নিশ্চয় পুরানো স্মৃতিতে খোঁচা লেগেছে ডেমিরনের। বড়ই দুঃখজনক।’

কিশোরের ধারণা অন্য কোন কারণে মূর্তিটা দেখতে চাইছেন প্রফেসর। নিশ্চয় সন্দেহ হয়েছে। কিউরেটরের কাছে কথাটা চেপে গেল সে।

‘জিনিসগুলো ঠিকঠাক আছে বোঝাতে পারলে,’ কিউরেটর বললেন, ‘বুঝিয়ে-সুঝিয়ে বাড়ি পাঠিয়ে দিতে পারব। পুলিশ ডাকতে চাই না। ক্ষতি যেটুকু হয়েছে, সামান্যই, তার জন্যে আর পুলিশ ডাকাডাকির কোন মানে হয় না। মিউজিয়ামকে বহু জিনিস দিয়েছেন প্রফেসর ডেমিরন।’

একটা বন্ধ দরজার সামনে এসে দাঁড়ালেন তিনি। পকেট থেকে চাবির গোছা বের করে তালা খুললেন।

ঘরটা দেখতে ল্যাবরেটরির মত। লম্বা লম্বা ওঅর্ক বেঞ্চ আছে। পরীক্ষা চালানোর জন্যে নানা রকম আধুনিক যন্ত্রপাতি রয়েছে। একধারে একটা কম্পিউটারও আছে। একটা বেঞ্চে রাখা দুটো কাঠের বাস্ক, কেবিনেটের ড্রয়ারের মত। সেগুলোতে যত্ন করে ভরে রাখা হয়েছে রাকারুয়া হিলে পাওয়া সমস্ত জিনিস। তৈজসপত্র তো আছেই, আছে নানা রকম মূর্তি, চুলের কাঁটা, খোদাই করা পাথর। টিন্য় পেপারের বিছানায় শুয়ে আছে সোনার দেবমূর্তিটা।

তলতে গিয়ে থমকে গেলেন কিউরেটর।

কিশোর ভাবল, নকল যে বুঝে ফেলেছেন বুঝি 'জিজ্ঞাস করল, 'কি হলো?'

'বুঝতে পারছি না কাজটা ঠিক করছি নাকি!'

'কি জানি! পাগলের মতিগতি তো বোঝা যায় না। ঠিক আছে দেখলে হয়তো ঠাণ্ডা হয়ে যাবেন প্রফেসর,' কিশোর বলল। 'বুঝতে পারবেন চুরি হয়নি। বাড়ি ফিরে যাবেন।'

বাক্সগুলো নিয়ে বেরিয়ে এল দুজনে।

মুসা আর রবিন তখন ঝাড় দিয়ে ভাঙা কাঁচ পরিষ্কার করছে। প্রফেসর দাঁড়িয়ে আছেন একপাশে। হাতে ব্যান্ডেজ।

কিশোর আর মিস্টার হাচিন্সকে আসতে দেখে উজ্জ্বল হলো তাঁর চোখ। এগিয়ে গেলেন।

বাক্সটা টেবিলে রাখলেন হাচিন্স। এক এক করে জিনিসগুলো বের করে দেখতে লাগলেন প্রফেসর। মূর্তিটা হাতে নিয়ে ঘুরিয়ে-ফিরিয়ে দেখলেন। স্থির দৃষ্টিতে তাঁর দিকে তাকিয়ে আছে কিশোর। প্রফেসরের ঠোঁটে হালকা এক চিলতে হাসি ফুটতে দেখল।

'বাড়ি নিয়ে যাব এটা,' মূর্তিটা পকেটে ঢোকালেন প্রফেসর। 'মাটির জিনিস মাটিতেই ফিরে যাক।'

'প্রফেসর!' চমকে গেলেন কিউরেটর। 'আপনি কথা দিয়েছেন!'

'বোকা নাকি!' প্রফেসর বললেন। 'এগুলো আপনার জিনিস নয়। আমি পেয়ে দিয়েছিলাম, আমি নিয়ে যাচ্ছি। যেখান থেকে বের করেছি সেখানে আবার পুঁতে রেখে আসব।'

হাত বাড়িয়ে এগিয়ে গেলেন মিস্টার হাচিন্স। পারলে প্রফেসরের পকেট থেকে মূর্তি বের করে আনেন। কি করবেন বুঝে উঠতে পারলেন না তিনি। অসহায় ভঙ্গিতে কিশোরের দিকে তাকালেন।

কিন্তু কিশোর কি করবে? যার জিনিস তিনি নিয়ে গেলে বাধা দেয়া যায় না।

মুসার মুখের দিকে স্থির দৃষ্টিতে তাকিয়ে রইলেন প্রফেসর। 'ও তোমাকে ছাড়বে না। টেনে নিয়ে যাবে নিজের অঙ্গকার জগতে। কোনমতেই বেরোতে পারবে না আর। তোমাকে বাঁচানোর জন্যেই মিনাকুয়াকে কবর দিতে হবে আমাকে। আর কোন উপায় নেই।' আনমনে মাথা নাড়তে নাড়তে আচমকা রওনা হয়ে গেলেন। দরজার কাছে গিয়ে ফিরে তাকিয়ে বললেন, 'সবার ভালর জন্যেই এ কাজ করতে হচ্ছে আমাকে। মিনাকুয়াকে মুক্ত রাখা কোনমতেই উচিত হবে না আর। ধড় থেকে মুণ্ডগুলো সব আলাদা করে দিতে থাকবে এক এক করে...'

বেরিয়ে গেলেন প্রফেসর।

চেপে রাখা ফুসফুসের বাতাস সশব্দে ছেড়ে দিল মুসা।

'পুরো উন্মাদ!' সিঁড়ির দিকে তাকিয়ে থেকে বলল রবিন।

চিন্তিত ভঙ্গিতে ঘন ঘন নিচের ঠোঁটে চিমটি কাটছে কিশোর।

আর মিস্টার হাচিন্সের মুখ দেখে মনে হচ্ছে, যে কোন মুহূর্তে বাচ্চা ছেলের মত হাপুস নয়নে কাঁদতে বসে যাবেন।

পরদিন, রোরবারের সকাল। কমেটকে নিয়ে বেরোবে ঠিক করল মুসা। বেশ কয়েকদিন দৌড় করানো হয় না ঘোড়াটাকে।

আগের রাতে সারারাত বৃষ্টি হয়েছে। ভোরের দিকে মেঘ কেটে গেছে। বেরিয়ে পড়েছে বৃষ্টিস্নাত গাঢ় নীল আকাশ।

মাটি ভেজা। কাদা হয়ে গেছে। কিন্তু দমাতে পারল না মুসা বা তার ঘোড়াটাকে। ঘোড়ার চকচকে ঘাড়টা চাপড়ে দিয়ে বলল, 'সুন্দর সকাল, কি বলিস, কমেট? দারুণ মজা হবে আজ।'

পাহাড়ের দিকে চলল ওরা। সূর্য পেছনে। পিঠে লাগছে চড়া রোদ। যেখানে কাদা নেই, সেখানে নরম মাটি; ঘোড়ার খুরের শব্দ ঢেকে দিচ্ছে।

তীব্র গতিতে ছুটছে। উঠে যাচ্ছে চড়াই বেয়ে। দুই ধারে মাঠ। কোথাও চষা খেত। ছুটতে ছুটতে সামনে দেখা গেল ডেভিল'স রিজ। হঠাৎ যেন বোধোদয় হলো মুসার। মনেই ছিল না যেন কোনদিকে চলেছে। জায়গাটাকে এখন মোটেও ভাল চোখে দেখে না সে। দ্রুত পাশ কাটাল ওটার। ফিরে যাবে নাকি ভাবতে ভাবতে মনে পড়ল গোস্ট মিলের কাছে নদীটার কথা। বেশি বৃষ্টি হলে নাকি ওটার পানির রঙ লাল হয়ে যায়। বহুবার শুনেছে কথাটা সে। ব্লাডি ওয়েল বা রক্ত-কূপ নামে একটা কূপ আছে পাহাড়ের মধ্যে। সেটা ভরে যায় পানিতে। উপচে পড়ে। লাল পানি। নদীর পানিকেও নাকি লাল করে দেয়।

প্রফেসরের বাড়িটা দেখার চেষ্টা করল। পারল না। ঘন বন রহস্যময় বাড়িটাকে আড়াল করে রেখেছে দৃষ্টিসীমা থেকে।

যাবে কিনা দ্বিধা করতে লাগল মুসা। কৌতূহলেরই জয় হলো। হাত বোলাল প্রফেসরের দেয়া ডবি স্টোনের লকেটটায়। তারপর যা থাকে কপালে ভেবে রওনা করিয়ে দিল কমেটকে। ভাবতে ভাবতে চলল-বৃষ্টি যা হয়েছে, তাতে কুয়াটা ভরল কিনা, পানি উপচে পড়ছে কিনা-প্রচুর পানি না পেলে লাল পানি উগড়াতে পারবে না ভূতুড়ে কূপ।

'জলদি চল, কমেট,' তাগাদা দিল সে। 'পানি নেমে গেলে আর হবে না।' বনের দিকে তাকাল সে। 'কিন্তু ভয়ও যে লাগছে! ওই ভূতুড়ে মিলের কাছে যেতে চাস?' তার কথা বুঝতে পেরেই যেন গতি বাড়িয়ে দিল ঘোড়াটা। হাসল মুসা। 'অ, তারমানে তোর যাওয়ার ইচ্ছে। ঠিক আছে, এগো। খোদা যদি কপালে দেও-দানবের হাতে মরণ লিখে রাখে ঠেকাবে কে!'

রাস্তা ছেড়ে ঘন বনে ঢুকে পড়ল কমেট। জায়গাটা মুসার অচেনা নয়। আগেও এসেছে। কিন্তু অন্যদিন আজকের মত এতটা গা ছমছম করেনি। জড়াজড়ি করে থাকা গাছের ফাঁক-ফোকর দিয়ে এগোতে এগোতে আবার কথা বলতে লাগল কমেটের সঙ্গে, 'পাখুলা প্রফেসরটা এখন দেখে না ফেললেই বাঁচি। তবে, ভয়ের কিছু নেই, কি বলিস? দেখার সঙ্গে সঙ্গে ছুটে পালাব।'

বাইরে কড়া রে, উজ্জ্বল আলো। কিন্তু গাছের মাথার চাঁদোয়ার জন্যে এখানে রোদ ঢুকতে না পারায় সকাল বেলাতেও সবুজ গোখুলি সৃষ্টি হয়ে আছে। বনবাদাড় খারাপ লাগে না মুসার। প্রফেসরের ভয় না থাকলে আনন্দই পেত, উপভোগ করতে পারত এখানকার প্রকৃতি। ঘন গাছগুলোর দিকে তাকিয়ে অস্বস্তি বোধ করতে লাগল সে। ফিরে যাওয়ার ইচ্ছেটা জোরাল হচ্ছে।

নিজের অস্তিত্ব প্রকাশ না করার জন্যেই যেন নুয়ে পড়ল কমেটের ঘাড়ের ওপর। বনটা কেমন অদ্ভুত। মনে হচ্ছে আড়াল থেকে সর্বক্ষণ চোখ রাখা হচ্ছে তার ওপর। কি যেন অদৃশ্য বিপদ ঘুরে বেড়াচ্ছে চারপাশে।

পাহাড় দেখা গেল। গাছপালায় ছাওয়া ঢালের গায়ে কালো একটা গর্ত। গুহামুখ। ঝোপঝাড়ে অর্ধেক ঢেকে রয়েছে।

এই গুহার কথাও শুনেছে সে। কুয়াটা ওদিকেই কোথাও রয়েছে। পাশ ঘুরে নদীর দিকে এগোতে যাবে, গাছের আড়াল থেকে লাফ দিয়ে বেরিয়ে ছুটে এল একটা ছায়া। চমকে গেল কমেট। মুহূর্তে সামনের দু'পা শূন্যে তুলে পেছনের পায়ে ভর দিয়ে প্রায় সোজা হয়ে দাঁড়িয়ে গেল। চিৎকার করে উঠল তীক্ষ্ণ স্বরে।

সামলাতে পারল না মুসা। গড়িয়ে পড়ে গেল ঘোড়ার পিঠ থেকে। হাড়গোড় ভাঙত। কিন্তু নরম মাটি আর বনতলে পড়ে থাকা লতাপাতার পুরু কার্পেট বাঁচিয়ে দিল তাকে।

তেরো

দম নিতে কষ্ট হচ্ছে। চোখ বুজে থেকে আশ্রয় চেষ্টি করতে লাগল মুসা। নিঃশ্বাস স্বাভাবিক হয়ে এল অবশেষে।

টের পেল, কে যেন ঝুঁকে এসেছে গায়ের ওপর। ভূত দেখবে ভয়ে চোখ মেলতে সাহস করল না।

‘তুমি ঠিক আছ?’

কানে এল পরিচিত কণ্ঠস্বর। চোখের পাতা খুলে মিটমিট করে তাকাল মুসা। প্রফেসর ডেমিরনের চোখে চোখ পড়ল।

‘যে ভাবে পড়েছ,’ আবার বললেন তিনি, ‘হাড়গোড় কিছু আঁশ্ঠ থাকার কথা নয়। ভেঙেছে?’

নাড়াচাড়া দিয়ে দেখল মুসা। ‘না...মনে হয় না...তবে ভাঙতে পারত। ঘাড়টাও মটকে যেতে পারত।’ আচমকা রাগ যেন মাথা চাড়া দিয়ে উঠল। চিৎকার করে উঠল, ‘সব দোষ আপনার। চুপি চুপি এসে এ ভাবে ঘোড়াটাকে চমকে না দিলে...কেন এসেছেন?’

ঝুঁকে মুসার হাত চেপে ধরে তোলার জন্যে টান দিলেন প্রফেসর। ‘তোমাকে সাবধান করতে এলাম,’ ফিসফিস করে বললেন। চারপাশে তাকিয়ে দেখে নিলেন কেউ দেখছে কিনা। ‘আমি জানতাম, তুমি আসবে, রূপানি; তোমার জন্যেই অপেক্ষা করছিলাম। জানতাম তুমি আসতে না চাইলেও তোমাকে টেনে নিয়ে আসা

হবে। নিজের বিপদ বুঝতে পারবে না তুমি।

‘মিনাকুয়াকে কবর দেননি?’

‘দিয়েছি। কিন্তু তারপরেও বলা যায় না কিছু। তার আসল কবর খুলে ফেলা হয়েছে। যদি জাদুর ক্ষমতা নষ্ট হয়ে যায়? ভয়ঙ্কর মূর্তি নিয়ে সবাইকে খুন করতে আসবে সে।’

বুকের মধ্যে কাঁপুনি শুরু হয়ে গেল মুসার। উঠে বসে চারপাশে তাকাল ঘোড়াটার জন্যে। দেখলেই দৌড়ে গিয়ে পিঠে চড়ে বসবে। পাগলা প্রফেসরের ক্রাচ থেকে পালানো দরকার। মিনাকুয়ার চেয়ে প্রফেসরকে বেশি ভয় পাচ্ছে সে।

কিন্তু চোখে পড়ল না কমেটকে। নিশ্চয় বাড়ি রওনা হয়ে গেছে ওটা। ভয় পেলে এমন করে ঘোড়ারা। তার নিজেকে এখন হেঁটে ফিরে যেতে হবে। দূরত্ব কম না।

সব কিছুর জন্যে প্রফেসরকে দায়ী করল মুসা। বাঁজাল কণ্ঠে বলল, ‘মোটোও টেনে আনা হয়নি আমাকে। আমি নিজের ইচ্ছেতেই এসেছি। ছাড়ুন আমাকে।’

ঝাড়া দিয়ে ছাড়াতে গিয়ে টের পেল মুসা, কি সাংঘাতিক শক্তি প্রফেসরের হাতে। এক চুল টিল করতে পারল না সে। পাগলের শক্তি বেশিই থাকে। টান মেরে তাকে দাঁড় করিয়ে দিলেন প্রফেসর। আরেকবার হাত ছাড়ানোর ব্যর্থ চেষ্টা করল মুসা।

‘দেখুন,’ চিৎকার করে বলল সে, ‘আমাকে ছেড়ে দিন। আমি রুপানি-ফুপানি কিছু না। আমার নাম মুসা, মুসা আমান। আমি দেবতা নই, দেবতার কোন রকম ক্ষমতা নেই আমার মধ্যে, আমি অতি সাধারণ একটা ছেলে।’

হাতের চাপ টিল হলো প্রফেসরের, কিন্তু চোখের বন্যতা গেল না।

মুখে হাসি ফোটানোর চেষ্টা করল মুসা। ‘আমার ঘোড়াটাকে ধরা দরকার। ওটাকে একা ফিরতে দেখলে দৃষ্টিভ্রান্তি মা পাগল হয়ে যাবে।’

‘হ্যাঁ, তাই তো,’ মুসার হাত ছেড়ে দিলেন প্রফেসর। চোখের নিচেটু চুলকালেন। ‘তোমার নাম তাহলে মুসা?’

‘হ্যাঁ।’

অবাক দৃষ্টি ফুটল প্রফেসরের চোখে। ‘তবে কি আমি ভুল করছি?’ বিড়বিড় করতে লাগলেন, ‘ভুল করছি?’

‘তাই তো করছেন, ...দ্বিধায় পড়ে গেছেন আরকি।’

‘দ্বিধা? হ্যাঁ, তাই হবে। ...ঘোড়াটাকে ধরবে কি করে?’

‘জানি না। তবে চিন্তা নেই। ধরতে না পারলেও ঠিকই বাড়ি ফিরে যাবে ওটা। রাস্তা চেনে।’ ফোঁস করে নিঃশ্বাস ফেলল মুসা। ‘কষ্টটা হবে আমারই। হেঁটে যেতে হবে অতটা পথ।’

‘তোমার মা চিন্তা করবেন বললে না? যদি ফোন করে দাও, তাহলেই তো হয়। বলবে, তুমি ভাল আছ। আমার বাড়িতে টেলিফোন আছে।’

প্রফেসরের প্রস্তাবটা ভাল হলোও আবার সেই ভূতুড়ে মিল হাউসে ফিরে যেতে ইচ্ছে করল না মুসার। ‘না না, ফোন আর করা লাগবে না।’

‘কিন্তু তুমি তোমার মাকে দৃষ্টিভ্রান্তি মুক্ত করতে চাও,’ প্রফেসর বললেন। খপ

করে আবার হাত চেপে ধরলেন মুসার। 'সেটাই তোমার করা উচিত। আমি তোমাকে বেকায়দায় ফেলেছি, সমস্যার সমাধান করা আমার দায়িত্ব। তোমার মাকে ফোন করে দাও। তারপর গাড়িতে করে আমি তোমাকে পৌঁছে দিয়ে আসব। এতটা পথ হেঁটে যাওয়ার কোন মানে নেই।'

সন্দেহ দেখা দিল মুসার চোখে। সত্যি উপকার করতে চাইছেন প্রফেসর? না পাগলের পাগলামি! পাগল শান্ত রয়েছে, শান্তই থাক; তাকে আর খেপাতে চাইল না। পাগলের মতে মতে থাকল। বলল, 'ফোন করতে পারলে আপনার আর কষ্ট করে গিয়ে দিয়ে আসা লাগবে না। আমার মা-ই এসে গাড়িতে করে নিয়ে যেতে পারবে আমাকে।' মাথা ঝাঁকাল সে। 'চলুন, ফোনই করব।'

গাছপালার ফাঁক দিয়ে এগোচ্ছে দুজনে। প্রফেসরকে এখন একেবারে স্বাভাবিক মানুষ মনে হলো মুসার।

কিন্তু মিল হাউসে ঢোকার পর আবার সব কেমন এলোমেলো হয়ে গেল। রোম খাড়া হয়ে গেল তার। পেছনের দরজা দিয়ে তাকে এনে ঢুকিয়েছেন প্রফেসর। রান্নাঘর পার করিয়ে নিয়ে এলেন হলঘরে। একটা খোলা দরজার পাশ দিয়ে যাওয়ার সময় হঠাৎ প্রচণ্ড ধাক্কা মারলেন। ছমড়ি খেয়ে গিয়ে একটা ঘরের মধ্যে পড়ল সে। উঠে দাঁড়ানোর আগেই গুনতে পেল দরজাটা লাগিয়ে দিচ্ছেন প্রফেসর।

দরজায় কিল মারতে মারতে চিৎকার করে ডাকতে লাগল সে, 'প্রফেসর, প্রফেসর, দরজা খুলুন! প্রফেসর!'

'ওখানেই থাকো,' ভারী কাঠের দরজার অন্যপাশ থেকে ভেসে এল প্রফেসরের কণ্ঠ, 'বিপদ না কাটা পর্যন্ত। ও তোমাকে ডাকছে, রূপানি। শয়তান-দেবতা মিনাকুয়ো। তার দিকে টেনে নিতে চাইছে তোমাকে। রক্ষা করতে হবে আমার। ভয় নেই, আমি তোমাকে বাঁচাবই।'

কিল মারা বন্ধ করল না মুসা। 'প্রফেসর, দোহাই আপনার, খুলুন!'

কিন্তু আর কোন সাড়া পাওয়া গেল না ওপাশ থেকে। প্রচণ্ড হতাশায় গুঁড়িয়ে উঠে দরজার গায়ে হেলান দিল মুসা। কাঁধটা পাল্লায় ঠেকিয়ে রেখেই খসে পড়ার মত ধীরে ধীরে বসে পড়ল মেঝেতে।

'তুমি আমাকে শয়তান-দেবতার হাত থেকে রক্ষা করবে, বুঝলাম,' বিড়বিড় করল সে, 'কিন্তু তোমার মত পাগলের হাত থেকে আমাকে রক্ষা করবে কে!'

চোদ্দ

চমকের প্রথম ধাক্কাটা কেটে যেতে নিজেকে রক্ষা করতে তৈরি হলো মুসা।

যে ঘরটাতে বন্দি করা হয়েছে তাকে, তাতে কার্গেট নেই। কাঠের তৈরি দু'চারটা ভারী কাঠের আসবাব, পুরু ধুলোয় ঢাকা। ছোট, ময়লা লাগা, মাকড়সার জালে ঢাকা একটা জানালা আছে। সেটা দিয়ে বেরিয়ে যাওয়া সম্ভব।

কাঁচ ভাঙার জন্যে একটা কিছু খুঁজতে শুরু করল সে। খুঁজতে গিয়ে একটা দরজাও আবিষ্কার করে ফেলল। এমন ঘরে বন্দি করেছেন প্রফেসর, যেটা থেকে

সহজেই বেরিয়ে যাওয়া সম্ভব-ভাবতে হাসি পেল মুসার, এ সব কাজে একেবারেই আনাড়ি তিনি। দরজাটা রয়েছে একটা ওয়ারড্রোবের পেছনে। প্রফেসরের বোধহয় মনেই ছিল না দরজা আছে ওখানে।

ওয়ারড্রোবটা সরানোর জন্যে ঠেলতে শুরু করল সে। ভীষণ ভারী। নড়াতে পারছে না। উল্টো দিকের দেয়ালে পা ঠেসে ধরে ওয়ারড্রোবের গায়ে পিঠ ঠেকিয়ে ঠেলা দিল। এইবার নড়ল। কাঠের মেঝেতে শব্দ তুলে কয়েক ইঞ্চি সরে গেল ওয়ারড্রোবটা। কয়েকবারের চেষ্টায় অনেকখানি সরিয়ে ফেলল। দেয়াল আর ওয়ারড্রোবের মাঝের ফাঁক দিয়ে ঢোকা যায় এখন।

দরজার কোন হাতল নেই। তালাও লাগানো নেই। হাতলের জায়গায় একটা ছিদ্র। তারমানে হাতল ছিল এক সময়। খসে পড়ে যাওয়ার পর আর লাগানো হয়নি।

ঠেলা দিতেই ফাঁক হয়ে গেল দরজা। পুরোটা খুলল না, তবে যেটুকু খুলেছে অন্যপাশে যাওয়ার জন্যে যথেষ্ট। ঝুরঝুর করে মাথায় ঝরে পড়ল ধুলো-ময়লা।

ফাঁক গলে অন্যপাশে চলে এল সে। আবছা অন্ধকার একটা ঘরে এসে দাঁড়িয়েছে। ধুলোর অভাব নেই। কোন কিছুতে সামান্য নাড়া লাগলেই ঝরে পড়ছে। আর আছে মাকড়সার জাল। হাতে-মুখে জড়িয়ে যাচ্ছে। নিঃশব্দে সরে যাচ্ছে মাকড়সা। ঘাবড়ে গেল সে। বনের মধ্যে বাড়ি। বিষাক্ত মাকড়সা থাকা সম্ভব। ব্র্যাক উইডো স্পাইডার! নাহ, এই এলাকায় উইডোরা থাকে না-নিজেকে বোঝাল সে। কিন্তু বুঝতে চাইল না মন। যদি থাকে!

চোখে আলো সয়ে আসতে দেখল যন্ত্রপাতিতে ভরা ঘর। বড় বড় জাঁতা, যেগুলো দিয়ে শস্য পেমা হত এককালে। মিল রুম। উল্টো দিকের দেয়ালের খড়খড়ির ফাঁক দিয়ে চোখে পড়ছে নদীর ওপরের বিরাট চাকাটার একাংশ।

হঠাৎ বিল্ডিংয়ের কোনখান থেকে ভেসে এল ফাঁপা, ভোঁতা শব্দ। ধাতব নকারে বাড়ি মারার। বাইরে এক রকম লাগে শব্দটা, ভেতর থেকে আরেক রকম।

ধড়াস করে উঠল বুকের মধ্যে। প্রফেসরের সঙ্গে কেউ দেখা করতে এসেছে। কে এল?

কথা শোনা গেল। দূর থেকে আসায় বিকৃত শোনা। একটা কণ্ঠ প্রফেসরের-রেগে যাওয়া; অন্যটাও পুরুষের। চেনা চেনা লাগল। চিৎকার করছে দুজনেই।

জ্রুটি করল সে। চেনা কণ্ঠটা কার? কোথাও শুনেছে। দু'চারদিনের মধ্যেই। মনে করতে পারছে না।

এগিয়ে আসছে কথা বলার শব্দ। হঠাৎ চিনে ফেলল সে। ডিপ গ্রেগরি। ঝটকা দিয়ে খুলে গেল একটা দরজা। হুড়মুড় করে ঘরে ঢুকলেন প্রফেসর।

বড় বড় যন্ত্রপাতিগুলোর আড়ালে লুকিয়ে পড়ল সে। সাবধানে মাথা তুলে তাকাল দাঁত-কাটা একটা বিশাল চাকার ওপর দিয়ে। দরজায় দাঁড়িয়ে থাকতে দেখল ডিপ গ্রেগরিকে।

'আপনার প্রলাপ শুনতে আমি আসিনি এখানে,' গ্রেগরি বলল। 'আমি জানতে চাই, মূর্তিটাকে কি করেছেন।'

৪- 'রেখে দিয়েছি ওটা যেখান থেকে উঠে এসেছে সেখানেমই, মাটির নিচে।'

প্রফেসর বললেন। 'জেগে উঠেছে শয়তান-দেবতা। ক্রমেই ক্ষমতা বাড়ছে ওর। কেউ রেহাই পাবে না।'

সরু হয়ে এল গ্রেগরির চোখের পাতা। হতাশ ভঙ্গিতে মাথা নাড়তে নাড়তে বলল, 'মাথাটা পুরোই গেছে!...এ সব নিয়ে এত বেশি ঘাঁটাঘাঁটি করেছেন, মগজে গ্যাট হয়ে বসে গেছে। গাঁজাখুরি গল্পগুলোই বিশ্বাস করতে আরম্ভ করেছেন।...মিস ড্যানহ্যামের মাথায় আপনিই বাড়ি মেরেছিলেন, তাই না? তখনই যদি বুঝতাম...এত কাছে এসেও হাতছাড়া হত না মূর্তিটা...সর্বনাশের মূলে আমার গাড়ির চাকা, ফুটো হওয়ার আর সময় পেল না। আসতে দেরি হয়ে গেল বলেই দেখতে পাইনি বাড়িটা কে মেরেছে। দেখলে আপনি কোনমতেই সরাতে পারতেন না ওই মূর্তি...' ঘরে ঢুকল সে। হাত নাড়ল প্রফেসরের দিকে। 'এই যে মিস্টার, আমার কথা কি কিছু ঢুকছে আপনার কানে?'

প্রফেসরকে পিছিয়ে যেতে দেখল মুসা। 'শয়তান দেবতার সঙ্গে হাত মিলিয়েছে তুমি। তোমার চেহারাতেই সেটা স্পষ্ট।'

বিরক্তিতে মুখ বাঁকাল গ্রেগরি। 'নহ, পাগলের সঙ্গে কথা বলাই ঝকঝক। একটা বললে বোঝে আরেকটা। কারও সঙ্গে হাত মেলাইনি আমি।...ইস, কাল মিস ড্যানহ্যামকে পড়ে থাকতে দেখে মাথা গরম করে ওভাবে কেন যে পালালাম! মাথা ঠাণ্ডা করে চিন্তা করলে বুঝে যেতাম আপনার কাজ, আজ আর ঝামেলা করতে আসা লাগত না তাহলে। কালই নিয়ে যেতে পারতাম মূর্তিটা। বিক্রি করে পায়ের ওপর পা তুলে কাটিয়ে দিতে পারতাম বাকি জীবনটা।...প্রফেসর ড্যানহ্যামকে ফাঁসানোর জন্যেই এত কাণ্ড করেছি, বুঝলেন। আমি ওকে চোর বানাতে চেয়েছি। পুলিশকে বোঝাতে চেয়েছি ক্যারাভানের মাল সে নিজেই চুরি করেছে-বিক্রি করে ফ্যান্ডের টাকা জোগাড়ের জন্যে। ক্যারাভানের মাল চুরির ব্যাপারে পুলিশ তাকে সন্দেহ করলে, মূর্তি চুরির দায়টাও চাপত তার ঘাড়। মাঝখান থেকে আমি খালাস। আমার দিকে নজরই দিত না পুলিশ। কিন্তু গোল বাধালেন আপনি। যাকগে, এখনও সময় আছে, পুলিশ ঠিকই সন্দেহ করেছে মিস ড্যানহ্যামকে। সামনের দিকে মুখ বাড়িয়ে দিল গ্রেগরি। 'মূর্তিটা কোথায় লুকিয়েছেন?'

'বলব না...'

প্রফেসরের কথা শেষ হলো না। বেজে উঠল নকার।

সতর্ক হয়ে গেল গ্রেগরি। কান পাতল শব্দের দিকে। আবার বাজল নকার। হঠাৎ সচল হলো সে। খপ করে প্রফেসরের কাঁধ চেপে ধরে ঝাঁকাতে শুরু করল। 'কোথায় রেখেছেন? জলদি বলুন!'

'বলছি,' গ্রেগরির হাত থেকে ছাড়া পাওয়ার জন্যে হাসফাঁস করতে লাগলেন প্রফেসর। 'ওহার মধ্যে। কিন্তু সেখানে যাওয়া উচিত হবে না। বিপদটা বুঝতে পারছ না তুমি? মিনাকুয়াকে বাইরে রাখলে সবাই মরবে আমরা। কেউ রেহাই পাবে না।...কাউকে ছাড়বে না ওই অপদেবতা!'

জ্বলজ্বল করছে গ্রেগরির চোখ। 'জাহান্নামে যাক আপনার রূপকথা! ওহাটা কোনখানে?'

'বনের কিনারে, পাহাড়ের ঢালে...' শরীর মুচড়ে ঝাঁকি দিয়ে কাঁধটা ছাড়িয়ে

নিলেন প্রফেসর।

আবার ধরতে এল গ্রেগরি। তত্ত্বায় পা বেধে পেছনে উল্টে পড়ে যাচ্ছিলেন প্রফেসর, থাবা মেরে লম্বা একটা কাঠের লিভার ধরে পতন ঠেকালেন। ক্যাচকোঁচ করে উঠল পুরানো কাঠের যন্ত্র। দেহের ভারে নিচে নেমে গেল লিভারটা। ঝুঁকে দাঁড়াল গ্রেগরি। প্রফেসরকে মেরেই বসবে মনে হচ্ছে।

দাঁত-কাটা চাকাটার সঙ্গে সঁটে রয়েছে মুসা। বাধা দেয়ার সিদ্ধান্ত নিয়ে ফেলল সে। চোখের সামনে একজন বুড়ো মানুষকে মারবে একটা শয়তান লোক, চুপচাপ দাঁড়িয়ে এ দৃশ্য দেখা সম্ভব নয়।

ঘড়ঘড়, মড়মড়, গৌ-গৌ, নানা রকম বিচিত্র আওয়াজ তুলল যন্ত্রপাতিগুলো। চাকা ঘুরছে। বুকের মধ্যে কাঁপুনি শুরু হয়ে গেল মুসার। শব্দগুলো চাপ দিচ্ছে মগজে।

লিভারে চাপ লেগে নিশ্চয় খুলে গেছে নদীর ওপরের বিশাল চাকার লকটা, ঘুরতে শুরু করেছে চাকা। চালু করে দিয়েছে মিল।

দাঁত-কাটা চাকার কাছ থেকে সরে যেতে চাইল মুসা। হ্যাঁচকা টান লাগল শার্টের কোণায়। ফিরে তাকাল। আতঙ্কিত চোখে দেখল, কাপড় আটকে গেছে চাকার দাঁতে। ক্ষুধার্ত দানবের মত টেনে নিয়ে যাচ্ছে তাকে।

পিছলে গেল পা। ক্রমেই টেনে নিচ্ছে তাকে চাকাটা।

ঝনঝন শব্দ হলো। কাঁচ ভাঙল জানালার। গলা ফাটিয়ে চিৎকার করে উঠল সে।

পনেরো

‘মুসার কমেট একলা ফিরে এসেছে,’ রিসিভারটা ধরে রেখে রবিনের দিকে তাকিয়ে উদ্ভিগ্ন স্বরে বলল কিশোর। লাইন কেটে গেছে ওপাশের। আশ্তে করে ক্রেডলে রেখে দিল রিসিভার। ‘আর বসে থাকা যায় না। ভাল মনে হচ্ছে না আমার। মুসার কিছু হয়েছে। গিয়ে দেখা দরকার, কি হলো।’

ডেস্কের ওপাশের চেয়ার থেকে উঠে দাঁড়াল সে।

রবিনও উঠল এ পাশের টুল থেকে। হেডকোয়ার্টারের মেঝের ঢাকনাটা তুলল। এটা দিয়ে একটা পাইপে নামতে হয়। হামাগুড়ি দিয়ে বেরোতে হয় বাইরে। তিন গোয়েন্দার অনেকগুলো গুপ্তপথের একটা-নাম দুই সুড়ঙ্গ।

সকালে উঠেই রবিনকে ফোন করেছিল কিশোর। ইয়ার্ডে চলে আসতে বলেছিল। মূর্তির কেসটা নিয়ে আলোচনার জন্যে। তারপর করেছে মুসাদের বাড়িতে। তাকে পাওয়া যায়নি। মিসেস আমান জানিয়েছেন, কমেটকে দৌড়াতে নিয়ে গেছে মুসা।

তারপর থেকে অপেক্ষা করে বসে ছিল কিশোর। রবিন চলে এসেছিল কয়েক মিনিটের মধ্যেই। কিন্তু মুসার দেখা নেই। বার বার ফোন করেছে ওদের বাড়িতে। বার বার একই জবাব-মুসা ফেরেনি। তারপর এইমাত্র তার আত্মা ফোন করে

জানালেন, কমেট একলা ফিরে এসেছে উদ্ভ্রান্ত হয়ে।

মুসাদের বাড়িতে ছুটল দুজনে। ঘোড়াটা কোনদিকে গিয়েছিল আবিষ্কার করতে সময় লাগল না। একটু ভাবতেই অনুমান করে ফেলল কিশোর, কোথায় গেছে মুসা। কিন্তু যে ডেভিল'স রিজকে ভয় পায়, সেদিকে কেন গেল বুঝতে পারল না।

নরম মাটিতে ঘোড়ার পায়ের ছাপ অনুসরণ করে আসা গেল সহজেই। বনের মধ্যে মিল হাউসটা চোখে পড়ল।

সাইকেল থেকে নামল ওরা। গাছের গায়ে ঠেস দিয়ে রাখল সাইকেল দুটো। মিলের দিকে এগোল। কয়েক পা গিয়েই কিশোরের হাত খামচে ধরল রবিন, 'কিশোর, গাড়িটা চিনতে পারছ?'

মাথা ঝাঁকাল কিশোর। 'ডিপ গ্রেগরি! এখানে কি করছে?'

'পাগলা প্রফেসরের দোস্তু নাকি?'

'কি জানি। তুমি এখানে দাঁড়াও। চোখ রাখো। আমি গিয়ে বাড়ির ভেতরে উঁকি দিয়ে দেখে আসি।'

বাড়ির সামনে এসে দাঁড়াল সে। নকারে বাড়ি দিল। সাড়া নেই। আবার বাড়ি দিল। ভুরু কুঁচকে তাকাল ওটার দিকে। শব্দটা অন্য রকম লাগছে মনে হলো আজ। কেমন ভোতা ভোতা। তীক্ষ্ণতা নেই।

নকারটা অযথাই রাখা হয়েছে। একদিনও এসে এটাতে বাড়ি দিয়ে প্রফেসরের সাড়া পায়নি।

মিলের পাশ দিয়ে সাবধানে এগোল কিশোর। থমকে দাঁড়াল হঠাৎ। চালু হয়ে গেছে মিল। অদ্ভুত শব্দ। ফিরে তাকাল। স্রোতের টানে ঘুরতে আরম্ভ করেছে বিশাল চাকাটা। অবাক লাগল তার। মিল চালু করল কে?

জাতাঘরের কাছে এসে দাঁড়াল সে। পুরু পাথরের দেয়াল। ছোট জানালাটা দিয়ে উঁকি দিল ভেতরে। চিত হয়ে আছেন প্রফেসর ডেমিরন। তাঁর ওপর ঝুঁকে রয়েছে গ্রেগরি। ডান হাত তুলেছে ঘুসি মারার ভঙ্গিতে।

পলকে সিদ্ধান্ত নিয়ে ফেলল কিশোর। একটা পাথর তুলে নিয়ে ছুঁড়ে মারল জানালার কাঁচে।

ঝনঝন করে কাঁচ ভাঙল। পরক্ষণে তীক্ষ্ণ চিৎকার। মুসার গলা চিনতে পারল কিশোর।

জানালার দিকে ঘুরে গেল গ্রেগরির মুখ।

ঘরের মেঝেতে ছড়িয়ে পড়েছে কাঁচের টুকরো। কাঁচ ভেঙেই পাথরটার ক্ষমতা শেষ। ওটাও পড়ে গেছে মেঝেতে।

ঝটকা দিয়ে সোজা হলো গ্রেগরি। সতর্ক বেড়ালের মত তাকিয়ে রইল জানালার দিকে। পাথরটা কোনখান থেকে এসেছে বোঝার চেষ্টা করছে। আচমকা ঘুরে দৌড় দিল দরজার দিকে।

আবার শোনা গেল মুসার চিৎকার। ঘরের ভেতর থেকে আসছে সন্দেহ নেই, কিন্তু দেখা গেল না ওকে। আরেকটা পাথর তুলে নিয়ে ঠুকতে লাগল কিশোর। ভাঙা কাঁচগুলো ফেলে দিয়ে পুরো সাফ করে ফেলল জানালাটা। জানালা গলে ঢুকে পড়ল ভেতরে।

প্রফেসর ভেমিরন উঠে দাঁড়িয়েছেন। দুই হাতে চেপে ধরে টেনে তোলার চেষ্টা করছেন লিভারটা। কিশোরকে দেখে চিৎকার করে উঠলেন, 'জলদি এসো! একা পারছি না। তোমার বন্ধুকে টেনে নিয়ে যাচ্ছে মেশিনের চাকা।'

'কিশোর!'

চিৎকার শুনে মুখ ফেরাল কিশোর। দেখতে পেল মুসাকে। নিজেকে ছাড়ানোর আশ্রয় চেষ্টা করছে। জিনসের শার্ট গায়ে দিয়েছে সে। কাপড় সাংঘাতিক শক্ত। ছিঁড়তে পারছে না। দাঁত-কাটা একটা চাকা টেনে নিচ্ছে তাকে।

লাফ দিয়ে গিয়ে পড়ল কিশোর। হাত লাগাল প্রফেসরের সঙ্গে। দুজনের মিলিত শক্তির কাছে হার মানল লিভার। ধীরে ধীরে উঠতে আরম্ভ করল।

ঝাঁকি দিয়ে থেমে গেল চাকাটা। থেমে গেল শব্দ। বড় বেশি নীরব মনে হতে লাগল এখন ঘরটা। মুসার ভারী নিঃশ্বাসের কাঁপা কাঁপা শব্দ কানে আসছে।

লিভার ছেড়ে সোজা হয়ে দাঁড়াল কিশোর। জিজ্ঞেস করল, 'মুসা, ঠিক আছ তুমি?'

মাথা ঝাঁকাল মুসা। 'আছি। আরেকটু হলেই গেছিলাম আজ।' কঁপে উঠল, 'সে।'

'জখম-টখম?'

'নাহ্। কিন্তু নড়তে তো পারছি না এখনও। শার্টটা আটকে রয়েছে।'

'দাঁড়াও, আসছি।'

চাকাটার দিকে চোখ বড় বড় করে তাকিয়ে রইল কিশোর। বুঝল কি বাঁচাটাই না, বেঁচেছে মুসা। ওই চাকার মধ্যে ঢুকে গেলে কিমা হয়ে যেত তার শরীর।

পাশে এসে দাঁড়ালেন প্রফেসর, 'ও ভাল আছে?'

'আছে, জবাব দিল কিশোর।'

'শার্টটা খুলছ না কেন?'

'খুলছি।'

দুজনে মিলে টানাটানি করে শার্টটা চাকার দাঁত থেকে খুলে আনল। কাপড় নষ্ট হয়ে গেছে। পরার যোগ্য নেই আর। তবে তা নিয়ে মাথা ঘামাল না মুসা। বেঁচেছে যে এই বেশি।

'এক্কেবারে সময়মত হাজির হয়েছে,' ছেঁড়া শার্টের কোণটা সমান করতে করতে মুসা বলল। 'আজ আর বাঁচার আশা ছিল না।...এলে কি করে?'

কিভাবে এসেছে জানাল কিশোর। জিজ্ঞেস করল, 'কিন্তু তুমি এখানে এসেছিলে কেন?'

খুলে বলল মুসা। কমেটকে দৌড় করাতে বেরিয়ে রেড রিভারের লাল পানি দেখার কৌতূহল, বনের মধ্যে ঢোকা, প্রফেসরের ঝগড়ায় পড়া, বন্দী-ঘর থেকে বেরোনো, সব কথা।

পায়ের শব্দ শোনা গেল। দরজা দিয়ে ঘরে ঢুকল রবিন। কিশোরের দেরি দেখে উদ্ভিগ্ন হয়ে চলে এসেছে। মুসা আর কিশোরকে নিরাপদ দেখে স্বস্তির নিঃশ্বাস ফেলল। প্রফেসরকে বলল, 'সরি, স্যার, আপনার সদর দরজা খোলা...আমার বন্ধুরা বিপদে পড়েছে ভাবলাম...' কিশোরের দিকে তাকাল সে, 'অত ভাবতাম না, যদি

গ্রেগরিকে ওভাবে ছুটে বোঝিয়ে যেতে না দেখতাম।

অনেক ধকল গেছে প্রফেসরের ওপর দিয়ে। দাঁড়িয়ে থাকতে পারছেন না আর।
তাকে টলতে দেখে তাড়াতাড়ি ধরে ফেলল কিশোর। 'চলুন, আপনাকে বসিয়ে
দিই।'

ধরে ধরে তাঁকে বসার ঘরে নিয়ে এল ওরা। একটা আর্মচেয়ারে নেতিয়ে
পড়লেন তিনি। বিধ্বস্ত লাগছে তাঁকে। বিস্মিত চোখ মেলে তাকাতে লাগলেন ওদের
দিকে। 'কি করেছি আমি, বলো তো?'

'কি করেছেন মানে?' কপাল কুঁচকাল কিশোর। 'কিছুই মনে করতে পারছেন
না?'

জবাব দিলেন না প্রফেসর। কিংবা দিতে পারলেন না। চোখ বুজলেন। মাথাটা
এলিয়ে পড়ল চেয়ারের বাইরে।

'প্রফেসর ড্যানহ্যামের মাথায় গ্রেগরি বাড়ি মারেনি,' মুসা বলল।

'তাহলে কে মেরেছে?' ভুরু নাচাল রবিন।

'প্রফেসরের কাছ থেকে মূর্তিটা কেড়ে নিতে এসেছিল গ্রেগরি। লুকিয়ে থেকে
ওদের কথা সব শুনেছি আমি।'

ডেমিরন আর গ্রেগরির মাঝে কি কি কথা হয়েছে, সব জানাল মুসা।

হঠাৎ খুলে গেল প্রফেসরের চোখ। 'পুলিশ!...পুলিশকে ফোন করা দরকার!'
যেন শুধু এই কথাটা বলার জন্যে চোখ মেলেছিলেন। বন্ধ করে ফেললেন আবার।

রবিনের দিকে তাকাল কিশোর, 'রবিন, গ্রেগরি কোন্‌দিকে গেছে?'

'সেটাই তো অবাক লাগল আমার। গাড়ির দিকে যায়নি। গেছে উল্টো দিকে।
বনের মধ্যে গিয়ে ঢুকেছে।'

'খাইছে!', মুসা বলল, 'তারমানে গুহার দিকে গেছে। মূর্তিটা নিতে।'

'কোন গুহা? চেনো নাকি?' উদ্বিগ্ন স্বরে জিজ্ঞেস করল কিশোর।

'গুহা একটা দেখেছি বটে। ওখান থেকেই ধরে এনেছেন আমাকে
প্রফেসর...তবে যদি ওই গুহাটাই হয়। জলদি চলো।'

ষোলো

নদীর ধার ধরে দৌড়ে চলল তিন গোয়েন্দা।

ঢুকে পড়ল বনের মধ্যে। আগে আগে চলেছে মুসা। কান খাড়া। চোখ
সতর্ক। সামনে বাঁক নিয়ে এগিয়েছে নদীটা। উঁচু হতে শুরু করেছে ভূমি। পাহাড়টা
রয়েছে সামনেই।

ছুটতে ছুটতেই গাছপাল... হাওয়া ঢালটা খুঁজছে মুসার চোখ। যেটাতে রয়েছে
গুহা।

আশেপাশেই কোথাও থাকতে পারে গ্রেগরি। সাবধান রইল ওরা। শব্দ না করে
এগোনার চেষ্টা করল।

পাহাড়ের ঢালটা দেখা গেল অবশেষে।

‘ওই যে,’ হাত তুলে গুহাটা দেখাল মুসা।

পাহাড়ের গোড়ায় পৌছে থামল না ওরা। দৌড়ে উঠে চলল ঢাল বেয়ে, গুহা লক্ষ্য করে। গুহামুখের কাছে এসে তারপর দাঁড়াল। গুহামুখের হাঁ করা মুখটা দিয়ে কালো সুড়ঙ্গটাকে লাগছে মানুষের গলার মত।

গ্রেগরিকে দেখা গেল না। চারপাশে তাকাল কিশোর। আসেনি এখনও? নাকি ঢুকে গেছে গুহার মধ্যে?

‘যা অন্ধকার,’ সুড়ঙ্গের দিকে তাকিয়ে থেকে বলল রবিন, ‘ঢুকতে হলে আলো লাগবে।’

নিচের ঠোঁটে চিমটি কাটল কিশোর। ‘সাইকেলের ল্যাম্প আছে। মুসা, থাকো এখানে। চোখ রাখো। গ্রেগরি এলে লুকিয়ে পড়বে। তোমাকে যেন না দেখে।’

‘দেখবে না।’

‘এসো,’ রবিনকে বলে আবার দৌড় দিল কিশোর।

গুহামুখের কয়েক গজ তফাতে একটা ঘন কাঁটাঝোপের দিকে এগোল মুসা।

বনের মধ্যে দিয়ে সাবধানে এগোল রবিন আর কিশোর। কড়া নজর রাখল। কিছুতেই গ্রেগরির চোখে পড়তে চায় না।

ল্যাম্প খুলে নিয়ে আবার গুহার কাছে ফিরে চলল দুজনে। হঠাৎ কিশোরের হাত আঁকড়ে ধরল রবিন। ‘দেখো!’

বিশ-পঁচিশ গজ দূরে গাছপালার আড়ালে আড়ালে এগিয়ে চলেছে একটা কালো ছায়া। গ্রেগরি। ওদের কাছ থেকে সরে যাচ্ছে সে। বিড়বিড় করে গাল দিচ্ছে।

নীরব হাসি ফুটল কিশোরের মুখে। ‘পথ হারিয়েছে মনে হচ্ছে। গুহাটা খুঁজে পায়নি,’ ফিসফিস করে বলল সে। ‘এই সুযোগে মূর্তিটা খুঁজে বের করে ফেলা দরকার।’

ওরা কাছে যেতেই ঝোপের ওপরে মাথা তুলল মুসা।

‘আসেনি এদিকে,’ বলল সে। ‘মনে হয় অন্য কোনদিকে গেছে।’

‘হ্যাঁ, অন্যদিকেই গেছে,’ রবিন-বলল। ‘এইমাত্র দেখে এলাম। উল্টো দিকে।’

‘কথা বলে সময় নষ্ট,’ কিশোর বলল। ‘খুঁজে খুঁজে আবার চলে আসতে পারে এদিকে।’

গুহামুখটা ছোট, চার ফুট উঁচু। খোঁচা খোঁচা পাথর বেরিয়ে আছে।

ভেতরে ঢুকল কিশোর। আলোটা বাড়িয়ে ধরল। নিচু ছাতওয়ালা খিলানের মত সুড়ঙ্গটা দেখল। ফিরে তাকিয়ে মুসাকে বলল, ‘তুমি মুখের কাছেই থাকো। পাহারা দাও। গ্রেগরিকে বিশ্বাস নেই।’

মাথা নিচু করে রেখে রবিনকে নিয়ে এগিয়ে চলল কিশোর। ল্যাম্পের আলোয় দেয়ালের গায়ে কিছুত লাগছে ওদের ছায়া দুটো।

‘দেখতে পাচ্ছ কিছু?’ জিজ্ঞেস করল রবিন। অদ্ভুত চাপা শোনা তার কণ্ঠস্বর। চারপাশের পাথরের জন্যেই এমন হচ্ছে, শুধু নিচ্ছে যেন শব্দ।

‘কোনখানে রেখেছেন যদি তা-ও বলতেন,’ মূর্তিটা রাখা যেতে পারে এমন কোন তাক কিংবা ছোট খোঁড়ল আছে কিনা দেখতে দেখতে চলেছে কিশোর।

কিছুই চোখে পড়ল না। সামনে কালো অন্ধকারের ওপারে গিয়ে শেষ হয়ে

গেছে সুড়ঙ্গ। বালিতে ঢাকা মেঝে। পাথর ছিটিয়ে আছে ইতস্তত।

একটা, গুহায় ঢুকেছে তারা। মাঝারি আকারের কামরার সমান। বড় বড় পাথরের চাওড় বিচিত্র ছায়া ফেলেছে দেয়ালে। গুহার পেছনে অন্ধকার একটা ফাটল-আরেকটা সুড়ঙ্গ, ভাবল কিশোর।

কিশোরের আগে রবিনের চোখে পড়ল জিনিসটা। আলোটা ধরে রেখে বলল, 'মিস ড্যানহ্যামের ব্রীফকেস!'

ছুটে গেল কিশোর। ব্রীফকেসটা খুলল। কিন্তু কাগজ আর দলিলপত্র ছাড়া অন্য কিছু নেই তাতে। মূর্তিটা নেই।

ল্যাম্প তুলে পাথর বিছিয়ে ঢাকা মেঝেটার ওপর ফেলল সে। ধীরে ধীরে ঘুরিয়ে এনে ভাল করে দেখতে লাগল।

ঝিক করে উঠল মনে হলো সোনালি রঙের কিছু। ছোট্ট একটা চিৎকার বেরিয়ে এল মুখ থেকে। 'ওই যে!' গুহার শেষ প্রান্তে একটা চ্যাপ্টা পাথরের ওপর পড়ে আছে মূর্তিটা। 'রবিন, পেয়ে গেছি!'

এগিয়ে গিয়ে তুলে নিল সে। খুব ভারী।

পেছনে শব্দ হলো এই সময়। ঘুরে দাঁড়াল দুজনে। দেখল, মুসা এসে দাঁড়িয়েছে। শঙ্কিত কণ্ঠে জানাল মুসা, 'গ্রেগরি! দোষটা আমারই। কাছাকাছি ঘুরঘুর করছিল। শব্দ শুনে মাথা তুলেছিলাম। দেখে ফেলল। আসছে। কি করব এখন?'

'একযোগে ঝাঁপিয়ে পড়ব,' রবিন বলল। 'ও জানে না আমরা তিনজনেই আছি।'

'মারপিটের মধ্যে না গিয়ে অন্য কিছু করা যায় কিনা ভাবা দরকার,' কিশোর বলল। 'ওর কাছে পিস্তল থাকতে পারে। পিস্তল দেখিয়ে সহজেই কেড়ে নেবে মূর্তিটা।' গুহার অন্য প্রান্তের ফাটলটার দিকে তাকাল। 'ওটা হয়তো বেরোনের পথ। আর কিছু না হোক লুকিয়ে তো থাকতে পারব।'

'কিন্তু ফাটলটা ওর চোখেও পড়তে পারে,' রবিন বলল। 'পিছু নেবে আমাদের।'

'তা নেবে হয়তো। এখানে দাঁড়িয়ে থাকলেও ছাড়বে না। কেটে পড়ার চেষ্টা করাই ভাল।'

পায়ের শব্দ ভেসে এল গুহামুখের কাছ থেকে।

'এসে গেছে!' বলে উঠল মুসা।

আর দ্বিধা করল না ওরা। এক সারিতে ঢুকে পড়ল কালো ফাটলটার মধ্যে। কিশোর হাঁটছে আগে আগে, মুসা সবার শেষে। ছাত দেখা গেল না সুড়ঙ্গটার, ওপরে আলো ফেললে কেবল পাথর চোখে পড়ে। দূরিক থেকে ঠেলে এসে গায়ে গায়ে লেগে ছাতের মত হয়ে আছে। আসল ছাত ওটা নয়।

যতই এগোচ্ছে, ধীরে ধীরে চওড়া হয়ে আসছে ফাটলটা। আরেকটা গুহা পাওয়া গেল। চতুর্দিকে অসংখ্য সুড়ঙ্গ বেরিয়ে গেছে এটা থেকে।

'এবার কি?' মুসার প্রশ্ন।

'লুকিয়ে পড়ব,' একটা সুড়ঙ্গ-মুখে আলো ফেলল কিশোর।

সুড়ঙ্গের ছাত এতই নিচু, হামাগুড়ি দিয়ে ঢুকতে হলো ওদের। চার হাত-পায়ে

ভর দিয়ে এগিয়ে চলল চতুষ্পদ জন্তুর মত।

‘আলো নিভিয়ে দাও,’ কিশোর বলল। ‘আলো দেখলে বুঝে যাবে আমরা কোনদিকে গেছি।’

নিভিয়ে দেয়া হলো ল্যাম্পগুলো। ঘন অন্ধকারে নিজেদের নিঃশ্বাসের শব্দকেও অনেক বেশি জোরাল শোনাল।

কান খাড়া করে আছে পেছন থেকে শব্দ আসে কিনা শোনার জন্যে।

সবার পেছনে রয়েছে মুসা। সুড়ঙ্গের মুখের দিক থেকে আসা আলোর ঝিলিকটা তার চোখে পড়ল সবার আগে।

দম বন্ধ করা উত্তেজনা।

এগিয়ে আসছে আলোটা। টর্চ নয়। কাঁপা। পা ম্লান আলো।

গুহার মধ্যে পায়ের শব্দ। জুতো পড়ছে পায়েরে।

সুড়ঙ্গ-মুখে জুতোর ছাপ দেখেই বুঝে যাবে কোনদিকে গেছি আমরা-ভাবল কিশোর।

তার আশঙ্কা সত্যি হলো। সুড়ঙ্গের মধ্যে আলো বাড়তে শুরু করল। ফিরে তাকিয়ে সাদা আলোর ক্ষুদ্র শিখাটা নাচতে দেখল মুসা।

ওদের মতই হামাগুড়ি দিয়ে সুড়ঙ্গে ঢুকেছে থ্রেগরি। এক হাতে উঁচু করে ধরে রেখেছে একটা সিগারেট লাইটার।

‘তাহলে ঠিকই অনুমান করেছি!’ থ্রেগরি বলল। এগিয়ে আসতে শুরু করল দ্রুত। থাবা মারল মুসার পা ধরার জন্যে।

লাথি মেরে তার হাতটা ধরিয়ে দিল মুসা।

‘পালিয়ে বাঁচবে মনে করেছে!’ হিসিয়ে উঠল থ্রেগরি। ‘পারবে না! কোনমতেই পালাতে দেব না তোমাদের!’

‘তাই নাকি?’ রেগে গেল রবিন। ‘কি করবেন?’

‘ভাল চাও তো মূর্তিটা দাও!’ চিৎকার করে উঠল থ্রেগরি। আরেকটু এগোল। ধূসর দেয়ালে ছায়া নেচে উঠল।

পেছন দিকে আবার লাথি মারল মুসা। থ্রেগরির হাত থেকে ফেলে দিল লাইটারটা।

হঠাৎ করে আলো নিভে যাওয়ায় অন্ধকারটা অনেক বেশি গাঢ় মনে হলো।

রবিনের হাত ধরে টান দিল কিশোর। যতটা দ্রুত সম্ভব এগিয়ে গিয়ে ফাঁকি দিতে হবে থ্রেগরিকে। তার বিশ্বাস, বেরোনের কোন না কোন পথ নিশ্চয় আছে সামনে।

এগোতে এগোতে আচমকা হাতটা আর মাটিতে পড়ল না কিশোরের। শুধুই শূন্যতা।

ধড়াস করে এক লাফ মারল তার হৃৎপিণ্ড। উঠে চলে এল যেন গলার কাছে। সামনের দিকে ঝুঁকে গেল শরীরটা। নিচু হয়ে পড়ে যাচ্ছে। ঠেকানোর চেষ্টা করে ব্যর্থ হলো। মাথা নিচু করে পিছলে নেমে চলল দেহটা।

চিৎকার করে উঠল কিশোর।

কিশোরের কিছু একটা হয়েছে, বুঝতে পারল রবিন। ধরার জন্যে হাত বাড়াল

অন্ধকারে। কিশোরের পায়ে ছোঁয়া লাগল বটে, কিন্তু ঠেকাতে পারল না। বরং পিছলে গেল সে-ও। কিশোরের মত একই ভাবে নিচে পড়তে শুরু করল। চিৎকার করে উঠল।

সতেরো

দুজনের চিৎকারই শুনতে পেল মুসা। ভারী নেহ দুটো গড়িয়ে পড়া, সেই সঙ্গে হড়হড় করে নেমে যাওয়া পাথরের শব্দ। গভীর অন্ধকারে আতঙ্কে দিশেহারা হয়ে পড়ল সে।

কান পেতেও আর কিছু শুনতে পেল না।

কি ঘটেছে অনুমানের চেষ্টা করল সে। ঠিক তার সামনেই ছিল ওরা। মুহূর্ত আগেও ছিল। এখন নেই। স্তব্ধ নীরবতা। বুঝতে পারছে, সে এখন একা।

পেছনে থ্রেগরির নিঃশ্বাসের শব্দ কানে আসছে। সেই সঙ্গে পাথরে হাতড়ানোর। লাইটারটা খুঁজছে থ্রেগরি।

কি করবে বুঝতে পারছে না মুসা। পড়ে যাবার ভয়ে আগে বাড়তে সাহস করছে না। ভয়ানক এক দুঃস্থপ্নের মধ্যে রয়েছে যেন। তবে ঘুমের দুঃস্থপ্নের চেয়ে এটা অনেক বেশি ভয়ঙ্কর, এটা থেকে জেগে গিয়ে বাঁচার উপায় নেই।

ভাল বিপদে পড়েছে। আগে বাড়লে কিশোর আর রবিনের অবস্থা হবে। থেমে থাকলে লাইটারটা খুঁজে বের করে থ্রেগরি এসে তাকে ধরে ফেলবে।

ও কোন সিদ্ধান্ত নেবার আগেই খস করে শব্দ হলো। জ্বলে উঠল থ্রেগরির লাইটার। দেয়ালে নেচে উঠল কালো কালো ছায়া।

কানের কাছে শিরাগুলোতে শৌ-শৌ করছে রক্ত। গলায় ঝোলানো ডবি স্টোনটা চেপে ধরল মুসা। পরক্ষণে সরিয়ে আনল হাত। এটা তাকে দিয়েছেন প্রফেসর ভূতের বিরুদ্ধে লড়াই করার জন্যে। থ্রেগরি মানুষ। তাকে ঠেকাতে হলে অন্য অস্ত্র দরকার। আর কিছু না হোক, একটা পাথর পেলেও হয়। ছুঁড়ে মারতে পারবে থ্রেগরির কপালে।

পাথর খুঁজতে গিয়ে হাতে ঠেকল একটা ল্যাম্প। কিশোর বা রবিনেরটা হবে। ফেলে গেছে।

থ্রেগরির বিরুদ্ধে কোন অস্ত্র নয় এটা। আলোটা হাতে পেতেই মনে হলো জাহান্নামে যাক থ্রেগরি!—আগে রবিন আর কিশোরের কি হয়েছে দেখা দরকার। সুইচ টিপে আলো ফেলল সামনের দিকে।

চিৎকার করে উঠল থ্রেগরি।

কাঁধের ওপর দিয়ে ফিরে তাকাল মুসা। থ্রেগরি এগিয়ে আসছে কিনা দেখল। আবার তাকাল সামনের দিকে। কয়েক ফুট দূরে একটা গর্ত। গর্তের মেনোটা ঢালু হয়ে নেমে গেছে নিচের দিকে।

বুকের মধ্যে ধুড়স ধুড়স করছে। নিচে নিশ্চয় এখন বেইশ হয়ে পড়ে আছে রবিন আর কিশোর। কিংবা আরও খারাপ কিছুও ঘটে থাকতে পারে।

হামাগুড়ি দিয়ে গর্তটার একেবারে কিনারে চলে এল সে। আলো ফেলল নিচের দিকে। তল দেখা গেল না। আলোর সীমানার ওপারে গাঢ় অন্ধকার।

‘কিশোর! রবিন!’ চিৎকার করে ডাকল সে।

আলো ঘুরিয়ে দেখতে গিয়ে পাথরের খাঁজে একটা চকচকে জিনিস চোখে পড়ল তার। সোনার মূর্তিটা আটকে আছে। হাত বাড়িয়ে তুলে আনল।

‘কিশোর!’ চিৎকার করে ডাকল আবার।

জবাবে নিচ থেকে অস্পষ্ট সাড়া এল বলে মনে হলো। কিন্তু সেটা তার চিৎকারেরই প্রতিধ্বনি কিনা নিশ্চিত হতে পারল না।

পেছনে শব্দ হতে ঝট করে ফিরে তাকাল। ভুলেই গিয়েছিল গ্রেগরির কথা।

তার পা চেপে ধরল গ্রেগরি। কঠিন স্বরে আদেশ দিল, ‘মূর্তিটা দাও!’

‘আমার বন্ধুরা,’ গলা শুকিয়ে গেছে মুসার, স্বর বেরোতে চাইছে না, ‘নিচে পড়ে গেছে। হাত-পা ভেঙে বেহঁশ হয়ে পড়ে থাকতে পারে।’

‘তাই?’ মুসার হাতের মূর্তিটার দিকে তাকিয়ে চোখ চকচক করছে গ্রেগরির।

‘আমাকে সাহায্য করুন,’ মরিয়া হয়ে বলল মুসা। ‘ওদের জন্যে কিছু করা দরকার।’

‘মূর্তিটা দাও!’ ধমকে উঠল গ্রেগরি।

‘না!’ হাতটা গর্তের দিকে বাড়িয়ে ভয় দেখাল মুসা, ‘আমাকে সাহায্য না করলে গর্তে ফেলে দেব এটা।’

মুসার পা ছেড়ে দিল গ্রেগরি। লোভে চকচক করছে চোখ। ধীরে ধীরে কুটিল হাসি ফুটল মুখে। ‘করব।’ হাত বাড়াল সে, ‘দাও।’

কিশোরের মনে হলো, পতনটা শেষ হবে না কোনদিন। চারপাশে তার সঙ্গে গড়িয়ে নামছে পাথর। পাহাড়ের ভেতরে ধস শুরু হলো কিনা বুঝতে পারল না সে। শঙ্কিত হয়ে আছে, যে কোন মুহূর্তে নিচ থেকে মাটি সরে যাবে, অনন্ত শূন্যে ভাসতে ভাসতে কোন্ অতলে গিয়ে পড়ে ভর্তা হবে তার শরীর কে জানে!

প্রচণ্ড এক ধাক্কা খেয়ে থেমে গেল তার শরীর। মনে হলো হাড়গোড় আর আঁত নেই একটাও। ফুসফুসের সমস্ত বাতাস বেরিয়ে গেছে। দম নেয়ার জন্যে হাঁসফাঁস শুরু করল। গায়ের ওপর পাথরবৃষ্টি হচ্ছে।

চোখ মেলে তাকাল। অন্ধকার ছাড়া আর কিছুই চোখে পড়ল না।

গায়ের ওপর এসে পড়ল ভারী কিছু। বুঝল, আরেকটা দেহ। কাশি শুনে বুঝতে পারল, রবিন।

‘রবিন?’ দম নিতে গিয়ে নাকে ঢুকে যাচ্ছে বালি।

‘হ্যাঁ,’ জবাব এল মৃদু কণ্ঠে।

‘হাড়টাড় ভেঙেছে?’

‘বুঝতে পারছি না। সারা গায়েই তো ব্যথা।’

‘ভাল করে দেখো।’

ভাল করে দেখে জানাল রবিন, ‘হাড় তো মনে হচ্ছে আঁতই আছে। তবে চামড়া নেই এক ইঞ্চিও। সব ছড়ে গেছে।’

‘আমারও নেই,’ কনুই ডলতে ডলতে বলল কিশোর।

দাঁড়ানোর চেষ্টা করল রবিন। আবার ঝুরঝুর করে পাথর ঝরে পড়ল কয়েকটা।

‘ল্যাম্পটা আছে তোমার হাতে?’

‘না। পড়ে গেছে।’ উঠে বসল কিশোর। ‘মুসার খবর কি?’

‘এখনও মনে হয় ওপরেই আছে। আমার পেছনেই ছিল।’ হতাশ কণ্ঠে জিজ্ঞেস করল রবিন, ‘কিশোর, কি করব আমরা এখন?’

‘হাতড়াতে থাকো। ল্যাম্পগুলোও গড়িয়ে পড়ার কথা। আমারটা হাতেই ছিল, কখন যে ছেড়ে দিয়েছি মনে নেই।’

‘ওপরে কোথাও আটকে গিয়ে থাকলে আর পাব না।’

অন্ধকারে হাতড়াতে শুরু করল দুজনে। মিহি পুরু বালিতে ঢাকা মেঝে। এই বালির কারণেই মারাত্মক জখম কিংবা হাড় ভাঙা থেকে বেঁচে গেছে ওরা।

হাতড়াতে হাতড়াতে যখন কিশোরের মনে হলো আর পাবেই না, ঠিক তখন একটা ল্যাম্প হাতে ঠেকল তার। তুলে নিয়ে জ্বালতে যাবে, কানে এল অস্পষ্ট চিৎকার।

‘ওনলে?’ জিজ্ঞেস করল রবিন।

‘মুসা!’ জোরে এক হাঁক ছাড়ল কিশোর; ‘আমরা এখানে!’

জবাবের আশায় কান পেতে রইল।

এল না জবাব।

সুইচ টিপল কিশোর। গাঢ় অন্ধকারে সূর্যের আলোর মত উজ্জ্বল মনে হলো ল্যাম্পের আলো। পরম স্বস্তিতে পরস্পরের দিকে তাকিয়ে হাসল ওরা। দুজনেই দুজনের চেহারা দেখল। মাথা, সারা গা বালিতে মাখামাখি। কাপড় ঝাড়তে গেল, রবিন। থাবা দিতেই ধুলোর ঝড় উঠল। থেমে গেল সে।

কোথায় পড়েছে, আলো ফেলে দেখতে শুরু করল কিশোর। নিচু ছাতওয়ালা বড় একটা গুহার মধ্যে পড়েছে।

ঢালু গর্তের মত সুড়ঙ্গটা দিয়ে ওপরে তাকাল রবিন, যেটা দিয়ে পড়েছে। ‘ওঠা অসম্ভব। ওপর থেকে দড়ি ফেললে পারা যায়... মুসা ফেলবে, তাই না?’

‘পাবে কোথায়?’

কিশোরও তাকিয়ে আছে ঢালটার দিকে। বেকে যাওয়া ছাত দৃষ্টি আটকে দেয়। ওপরে কি আছে দেখা যায় না।

‘আমরা এখানে আছি জানাতে হবে ওকে,’ বলল সে।

পাশাপাশি দাঁড়িয়ে চিৎকার করার জন্যে তৈরি হলো দুজনে।

‘রেডি?’ কিশোর বলল।

মাথা ঝাঁকাল রবিন, ‘রেডি।’

বুক ভরে বাতাস নিয়ে, ওপর দিকে মুখ তুলে বিকট চিৎকার করে উঠল ওরা। অন্ধকারে ভয়াবহ প্রতিধ্বনি তুলল সে-শব্দ।

আঠারো

গ্রেগরিকে বিশ্বাস করতে পারল না মুসা। মূর্তিটা দিতে গিয়েও শেষ মুহূর্তে হাতটা সরিয়ে আনল। গর্তের দিকে তাকাল। আবার দিতে গেল। ঠিক এই সময় কানে এল চিৎকার। ঝট করে সরিয়ে নিল হাত।

রাগে দাঁত-মুখ খিঁচিয়ে ফেলল গ্রেগরি। ঝাঁপিয়ে পড়তে গেল মুসার ওপর।

‘খবরদার!’ হুমকি দিল মুসা, ‘গায়ে হাত দেবেন না। ভাল হবে না তাহলে। প্রফেসর ডেমিরন পুলিশকে ফোন করে দিয়েছেন। বেশি দূর যেতে পারবেন না। ধরা পড়ে যাবেন।’

কিন্তু হুমকির পরোয়া করল না গ্রেগরি। শুরু হলো ধস্তাধস্তি। হাত থেকে আলোটা পড়ে গেল মুসার। কিন্তু মূর্তি ছাড়ল না।

থামল না গ্রেগরি। দুজনেই যে সরে যাচ্ছে ঢালু গর্তের দিকে সে খেয়ালই রইল না।

শেষ পর্যন্ত মুসার হাত থেকে মূর্তিটা কেড়ে নিল গ্রেগরি। তা তখন গর্তের মুখে পড়ে গেছে। মরিয়া হয়ে অন্ধকারেই থাবা মারল। পা আঁকড়ে ধরল গ্রেগরির। ওকে তর করে ওপরে উঠে যেতে চাইল।

টান লেগে গর্তের দিকে কয়েক ইঞ্চি সরে গেল গ্রেগরি। হাতে মূর্তিটা না থাকলে হয়তো পাথর আঁকড়ে ধরে বাঁচতে পারত। এক হাতে সুবিধে করতে পারল না। মুসার ওজন তাকে নামিয়ে নিয়ে এল।

তারপর শুরু হলো পতন।

গড়াতে গড়াতে পড়তে লাগল দুজনে। এত কিছু মধ্যো গ্রেগরির পা ছাড়ল না মুসা।

ওপর থেকে আবার পাথরের ধস নেমে আসছে দেখে লাফ দিয়ে দুদিকে সরে গেল রবিন আর কিশোর। ধূপ ধূপ করে দুটো দেহ এসে আছড়ে পড়ল, ধাক্কা খেল দেয়ালে—ঠিক ওরা যেমন করে পড়েছিল।

বিস্ময়ের প্রথম স্ফোরণটা কাটলে দেখল, মুসা আর গ্রেগরি পড়েছে।

মুসাকে উঠতে সাহায্য করল ওরা।

গোড়ালি চেপে ধরে গোড়াচ্ছে গ্রেগরি। ককিয়ে উঠল, ‘বাবাগো, পাটা গেছে আমার! এই শয়তান ছেলেটা শেষ করে দিয়েছে!’

পরীক্ষা করে বোঝা গেল, গোড়ালি মচকে গেছে ওর। উঠে দাঁড়ানোর চেষ্টা করল। ব্যথায় চিৎকার দিয়ে বসে পড়ল আবার।

পড়ার সময় মুসা ওর পা চেপে ধরে রেখেছিল, তাতেই ঘটেছে অঘটন। গড়ানোর সময় মোচড় লেগে মচকে গেছে। তবে এত কিছু মধ্যো মূর্তি ছাড়েনি। হাতেই রয়েছে তার।

‘যত নষ্টের গোড়া হচ্ছে এই মূর্তিটা,’ রবিন বলল। ‘এটার জন্যেই আটকা পড়লাম এখানে।’ কিশোরের দিকে তাকাল, ‘ভেবেছিলাম মুসা টেনে তুলবে, সেই

ভরসাও তো শেষ। কি করা যায় এখন?

নিচের ঠোটে ঘন ঘন চিমটি কাটছে কিশোর। আলো ফেলল দেয়ালটার ওপর, যেটাতে ধাক্কা খেয়েছিল। ফিরে তাকিয়ে দুই সহকারীকে বলল, 'চলো, এগিয়ে দেখা যাক কোথায় গেছে।'

'গিয়ে কি কোন লাভ হবে?' মুসার প্রশ্ন।

'তাই বলে তো আর বসে থাকা যায় না। একটা কিছু তো করতে হবে। ওঠো, এসো।'

'আমার কি হবে?' ককিয়ে উঠল গ্রেগরি।

'তার আমরা কি জানি?' কিশোর বলল, 'পড়ে থাকুন আপনার মূর্তি নিয়ে। ওটার জন্যেই তো এতসব, বলুন না এখন ওটাকে, আপনাকে বাঁচাক।'

'দেখো, আমাকে ফেলে যেয়ো না, প্লীজ!'

'তো কি করব?'

'সঙ্গে নিয়ে যাও।'

'কি করে নেব? দাঁড়াতেই তো পারছেন না।'

'তোমরা সাহায্য করলে পারব।'

'কিন্তু কেন করব আমরা? আপনার হাত থেকে পালাতে গিয়েই তো এখন এই বিপদ।'

'দেখো, যা হবার হয়েছে। আমার ভুল আমি বুঝতে পারছি। জাহান্নামে যাক এটা!' মূর্তিটা ছুঁড়ে ফেলে দিল গ্রেগরি। অন্ধকারে পাথরের ওপর পড়ার শব্দ হলো। 'আমার দরকার নেই।'

'আমার একার মতে তো হবে না, দেখি ওরা কি বলে,' দুই সহকারীর দিকে তাকাল কিশোর। 'এই, কি বলে, তোমরা?'

'ভুল বুঝতে পারলে আর কারও ওপর রাগ থাকা উচিত নয়,' রবিন বলল।

'দেখো, ও মানুষ ভাল না,' মুসা বলল, 'ভেজালে পড়ব বলে দিলাম। তারচেয়ে থাকুক এখানে। আমরা বেরিয়ে গিয়ে পুলিশকে বলব...'

'না না! আমাকে ফেলে যেয়ো না!' কেঁদে ফেলবে যেন গ্রেগরি। 'একলা থাকলে আমি মরে যাব। ক্লসট্রোফোরিয়া আছে আমার! দোহাই তোমাদের। আমাকে নিয়ে যাও।'

'নিয়েই নিই,' মুসাকে বলল কিশোর। 'ঝামেলা কনলে তখন ফেলে দিয়ে চলে যেতে পারব।'

মূর্তিটা কোথায় দেখার জন্যে আলো ফেলেই স্থির হয়ে গেল কিশোর। নীরবে তাকিয়ে রইল ওটার দিকে। খড় থেকে মুণ্ডটা আলাদা হয়ে গেছে। ভাঙা গলাটা ধূসর রঙের।

'কি হলো?' বলতে গিয়ে রবিনেরও নজর পড়ল। চিৎকার করে উঠল, 'হায় হায়, নকলটা!'

'খাইছে!' মুসা বলল। 'এটার জন্যে এত কাণ্ড করলাম! প্রফেসর আমাদের ঠকিয়েছে।'

ভাঙা টুকরো দুটো তুলে নিয়ে পকেটে ভরল কিশোর।

‘এগুলো আর নিলে কেন?’ মুসার প্রশ্ন।

‘প্রমাণ।’

‘কিসের?’

‘জুয়াচুরির। নাও, চলো। বেরোনোর চেষ্টা করা দরকার।’

আগে আগে পথ দেখে এগিয়ে চলল সে। দেয়ালের কিনার ঘেঁষে। পেছনে মুসা আর রবিনের কাঁধে ভার দিয়ে খোঁড়াতে খোঁড়াতে এগোচ্ছে গ্রেগরি।

এক ভাবে এগিয়ে গেছে দেয়ালটা। সুড়ঙ্গের অন্য পাশের দেয়াল কখনও চেপে আসছে, কখনও সরে যাচ্ছে। পায়ের তলে বালিতে কখনও ঢেউ, কখনও উঁচুনিচু টিবি, কখনও সমান। শ’খানেক গজ এগোনোর পর কাম পাতল কিশোর, ‘কিছু শুনছ?’

‘হ্যাঁ, ভূতেরা গোসল করছে!’ গলা কেঁপে উঠল মুসার।

চাপা, অদ্ভুত কলকল শব্দ।

‘পানি!’ কিশোর বলল।

‘পানি!’ উত্তেজিত হয়ে উঠল রবিন। ‘তাহলে তো খুব ভাল। এ জিনিসটাই এখন আমাদের দরকার। গলা শুকিয়ে কাঠ হয়ে গেছে।’

‘খাওয়ার উপযুক্ত হলে তবে তো গলা ভেজানো,’ গুরুতেই বেশি আশা করে নিরাশ হতে চায় না কিশোর। ‘চলো, এগিয়ে দেখি।’

মোড় নিল দেয়াল। বালির উঁচু পাড় দেখা গেল। তাতে চড়ল ওরা। ছাত লেগে গেল মাথায়। পাড়ের ওপাশে লাল কাদা। তার কিনার ঘেঁষে বয়ে চলেছে কালো পানি। হয়তো পরিষ্কারই, গুহার ভেতরে অন্ধকারে ওরকম কালো লাগছে।

পাতালের নদী। পাহাড়ের নিচে থাকে। এ ধরনের নদী আগেও দেখেছে ওরা। কোন কোনটা বেরিয়ে যায় বাইরে। ওগুলোর পাড় ঘেঁষে এগোলে বাইরে বেরোনো যায়। তবে কোন দিকে যেতে হবে জানা থাকলে। উল্টো দিকে গেলে পাহাড়ের আরও গভীরে ঢুকে যাবে। বেরোনো তো দূরে থাক, বিপদ বাড়বে।

পানিতে আলো ফেলে ভাবতে লাগল কিশোর। কি করা যায়? কোনদিকে যাবে? ভালমত আলো ফেলে দেখার পর বোঝা গেল, পানির রঙ কালো নয়, মরচে-লাল। মুখে দিয়ে দেখে এল মুসা। বলল, ‘চমৎকার। লোহা লোহা একটা গন্ধ আছে বটে, তবে খুব মিষ্টি।’

পানি খেয়ে এল তিনজনে। গ্রেগরিকে নিয়ে যাওয়া ঝামেলা, তারচেয়ে রেখে যাওয়া ভাল। কাপড় ভিজিয়ে এনে ওর মুখে চিপে দিল মুসা।

‘কোন দিকে যাওয়া যায়, বলো তো?’ কিশোরকে জিজ্ঞেস করল রবিন।

‘কোন দিকে গেলে বেরোনো যাবে, বোঝা বোধহয় খুব একটা কঠিন না,’ কিশোর বলল। ‘পানির ধর্ম কি? ঢালুর দিকে বয়ে যাওয়া। স্রোতটা কোন দিকে চলেছে সেটা দেখলেই বোঝা যাবে ভাটি কোনটা, আর উজান কোনটা। উজান হলো উৎস, সেদিকে যাব না। মুখটা ভাটির দিকেই থাকবে।’

‘ঠিক বলেছ,’ আনন্দে চিৎকার করে উঠল রবিন। স্রোতের গতি দেখে নিয়ে আঙুল তুলল, ‘ওদিকে যাব।’

মুসা হাসল না। কিশোরের হাতের ল্যাম্পের দিকে নজর। আলোর উজ্জ্বলতা

কমে গেছে। জিজ্ঞেস করল, 'কিশোর, ব্যাটারি কবে ভরেছে?'

'তা তো মনে নেই!...আরে, আলো তো কম!'

'জলদি বেরোতে হবে আমাদের,' শঙ্কিত হয়ে বলল মুসা। গ্রেগরিকে দেখিয়ে বলল, 'এই ঝামেলাবাজটা না থাকলে আরও তাড়াহাড়ি বেরোতে পারতাম আমরা। এই মিয়া, উঠুন, আমার কাঁধেই উঠুন। আপনার হেঁটে যাওয়ার চেয়ে বরং বয়ে নিলে সময় অনেক কম লাগবে। বাড়ি গিয়ে বিছানায় পড়ে থাকতে হবে আরকি আমাকে। পিঠের ব্যথার সেক দিতে হবে। ঠেকায় যখন পড়েছি, আর কি করা।'

'তোমাদের এই বিপদে ফেলার জন্যে আমি দুঃখিত,' মিনমিন করে বলল গ্রেগরি।

'হয়েছে, উঠুন!'

উনিশ

নদীর পাড় ধরে স্রোতের দিকে এক সারিতে এগিয়ে চলল ওরা। পাড় খুব সরু। পাশ থেকে চেপে এসেছে দেয়াল। মাঝে মাঝেই বাঁক নিচ্ছে। পায়ের নিচে বালির পাড়েও পাথরের ছড়াছড়ি। চোখা পাথর আছে প্রচুর। এ ছাড়া আছে আলাদা পাথর। তাড়াহাড়ো করতে গিয়ে পা হড়কালে গ্রেগরির অবস্থা হবে। সবচেয়ে অসুবিধে হচ্ছে মুসার, পিঠে ভারী বোঝা নিয়ে। মুখ বুঝে সহ্য করছে সে। কোন অভিযোগ নেই।

কিছুদূর গিয়ে সামনে বালি শেষ হয়ে গেল। নদীর পাড় এখন নিরেট পাথরে তৈরি। আলোয় চকচক করছে। পানিতে ভেজা। স্রোতের শব্দ বদলে গেছে।

বদলে যাওয়ার কারণ বোঝা গেল আরও খানিকটা এগোনোর পর। সামনে পাথরের দেয়াল আড়াআড়ি দাঁড়িয়ে আছে নদীর ওপর। নিচে চওড়া, মস্ত ড্রেনের মত ফোকর দিয়ে ঢুকে যাচ্ছে পানি।

সেদিকে তাকিয়ে দমে গেল মুসা। গ্রেগরিকে পিঠ থেকে নামিয়ে দিয়ে হতাশ কণ্ঠে বলল, 'নাহ, আর পারলাম না। ওটার মধ্যে দিয়ে যাওয়া অসম্ভব।'

'কে বলল?' পাহাড় সহজে দমাতে পারে না রবিনকে। 'ড্রেনের ওপর দিকটায় ফাঁক আছে দেখছ না। মাথা তুলে রাখতে পারব, বাতাসও পাওয়া যাবে।'

'নদীটা কতখানি গভীর, জানি না। যদি ঠাই পাওয়া না যায়?'

'দেখলেই হয়। ঠাই না পেলে সাঁতরে যাব। খুব অসুবিধে হবে না। বরং স্রোতের সাহায্য পাব। ঠেলে নিয়ে যাবে।'

পানিতে নেমে পড়ল রবিন। বুক সমান পানি। ফিরে তাকিয়ে হাসল, 'যাওয়া যাবে। এসো।'

নেমে পড়ল সবাই। রবিন চলল আগে আগে। আলোটা তার হাতে দিল কিশোর। মাঝখানে রইল সে। সবার পেছনে মুসা। পানিতে গ্রেগরির ভার অনেকখানি কমে গেল।

ড্রেনের মধ্যে গর্জন করে বয়ে চলেছে পানি। পেছন থেকে ধাক্কা মারছে স্রোত। তাতে সুবিধেই হচ্ছে। স্রোতের অনুকূলে যাচ্ছে। প্রতিকূল হলে বিপদে

পড়ত।

ল্যাম্পের আলো অনেক কমে গেছে। হলুদ, ঘোলাটে। ব্যাটারি প্রায় শেষ। যে কোন মুহূর্তে নিভে যেতে পারে।

সুড়ঙ্গটা এখানে মোটামুটি সোজাই এগিয়েছে। বাকি কম। তবে মাথার ওপর ক্রমেই নিচু হয়ে আসছে ছাত। মাথা নামাতে নামাতে খুতনি ঠেকে যাচ্ছে এখন পানিতে। এ হারে চলতে থাকলে ওপরে ফাঁকা জায়গা বলতে আর কিছু থাকবে না। ফাঁকা না থাকলে বাতাসও থাকবে না। এগোবে কি করে তখন?

ফিরে তাকাল রবিন। কিশোরের হাত ধরে চাপ দিয়ে বলল, 'ফাঁক বন্ধ হয়ে গেলেও থামব না। ডুব দিয়ে হলেও এগোব।'

'যদি বেশি লম্বা হয় সুড়ঙ্গটা?' পেছন থেকে মুসা বলল। 'দম ফুরিয়ে যাবে। কোনদিনই ভেসে ওঠা হবে না আর।'

জবাব দিল না রবিন। এ সব ভাবতে গেলে এগোনো হবে না।

কিশোর বলল, 'বেরোতে হলে ঝুঁকি এখন নিতেই হবে। দেরি করলে আঁটা নিভে যাবে। তখন হবে আরও বিপদ।'

আরও নেমে এল ছাত। খুতনি, গাল ডুবে গেল। নাকের ফুটোর নিচে পানি। নড়াচড়া করতে গেলেই ফুটোয় ঢুকে যায়।

বিপদের ওপর বিপদ বাড়তে ঠিক এই সময় ল্যাম্পটা গেল নিভে। ঝাঁকি দিয়ে, সুইচ টেপাটেকি করে জ্বালানোর চেষ্টা করল রবিন। কাজ হলো না। ব্যাটারি শেষ। শত চেষ্টা করেও আর জ্বালানো যাবে না।

প্রফেসর ডেমিরনের কথা মনে পড়ল মুসার—রূপানি, মিনাকুয়ো তোমার ওপর প্রতিশোধ নেবেই! তার মনে হলো, অদৃশ্য থেকে ওই পিশাচ দেবতাই একের পর এক বিপদে ফেলছে ওদের। তার একার জন্যে বাকি সবাই বিপদে পড়েছে। কিন্তু ভূতের তো অসীম ক্ষমতা। ওটা কি বুঝতে পারছে না সে রূপানি নয়! নিজের অজান্তেই আবার হাত চলে গেল গলায়। পাথরের লকেটটা চেপে ধরল।

এগোনো বন্ধ হলো না ওদের। পেছন দিকে ঘাড় ঝাঁকিয়ে নাক ওপরে তুলে দম নিতে নিতে এগোল। পানির গর্জন বেড়েছে। তার সঙ্গে যুক্ত হয়েছে অন্য একটা শব্দ। পানি পড়ার। জলপ্রপাত!

আশা বাড়ল রবিনের। জলপ্রপাত হওয়ার একটাই মানে—সামনে সুড়ঙ্গ শেষ, পানি ঝরে পড়ছে নিচে। চলার গতি বেড়ে গেল তার।

সুড়ঙ্গের মুখে পৌঁছে গেল। পেছন থেকে প্রবল বেগে ধাক্কা দিচ্ছে পানি। মুখ বাড়িয়ে দেখা মুশকিল। এর মধ্যেই কোনমতে দেখে নিল, প্রপাতটা বড় না। ড্রেনের মুখ থেকে সবেগে কয়েক গজ নিচে পানি ঝরে পড়ে একটা ছোট পুকুর সৃষ্টি করেছে।

লাফ দিল সে। প্রপাতের পানির সঙ্গে সে-ও পড়ল পুকুরে। ডুবে গেল। পানি পড়ে পড়ে যথেষ্ট গভীর করে দিয়েছে। ভাঙ করে মাথা তুলল আবার। সাতরে সরে গেল কিছুটা। পায়ের নিচ মাটি ঠেকতে ফিরে তাকাল।

কিশোরও পড়ল পানিতে।

তার পর পরই মুসা লাফ দিল গ্রেগরিকে পিঠে নিয়ে। লাফ দিল মানে নিচের

দিকে ছেড়ে দিল শরীরটা। প্রচণ্ড ব্যথায় চিৎকার করে উঠল গ্রেগরি। নিচে পড়ে পানির বাড়ি লেগেছে তার আহত পায়ে। প্রপাতের শব্দকে ছাপিয়ে তার চিৎকার বিকট প্রতিধ্বনি তুলল গুহার দেয়ালে।

পুকুরের কিনারে এসে বালিতে উঠে বিশ্রাম নিতে বসল রবিন। একটানা হেঁটে এসে ক্লান্ত।

সবাই পানি থেকে উঠে এসে বসল তার পাশে।

ককাতে ককাতে গ্রেগরি বলল, 'উফ্, মরে গেছি! পা'টা একেবারে শেষ!' ফুলে ওঠা গোড়ালিতে হাত বোলাতে লাগল সে।

জবাব দিল না কেউ।

গুহার মধ্যে পানি পড়ার একটানা শব্দ। পুকুরের পানি বাড়ছে না। এক জায়গায় স্থির। তারমানে বাড়তি পানি বেরিয়ে যাচ্ছে কোনখান দিয়ে।

'আলো আসছে কোথেকে?' এদিক ওদিক তাকাতে তাকাতে বলল কিশোর।

তাই তো! গুহার মধ্যে অন্ধকার থাকার কথা। ল্যাম্প আগেই নিভে গেছে। কিন্তু অন্ধকার নেই। সব দেখতে পাচ্ছে। যদিও অস্পষ্ট।

আলো আসছে মাথার ওপরের একটা ফাটল দিয়ে। চুইয়ে চুইয়ে। লাফ দিয়ে উঠে দাঁড়াল রবিন। 'দাঁড়াও। দেখে আসি।'

গলা টানটান করে দিয়েও ফাটলটা পর্যন্ত চোখ পৌছে না। কোন কিছুর ওপরে দাঁড়াতে পারলে দেখতে পারত। পাথরের অভাব নেই। তিনজনে মিলে অনেক চেষ্টা করে ঝড় একটা পাথর গড়িয়ে এনে রাখল ফাটলের নিচে। তাতে উঠে দাঁড়াল রবিন। ফাটলটার ভেতরে কি আছে উঁকি দিয়ে দেখল।

ফাটলের ওপাশ থেকে আলো আসছে। আরেকটা খাটো সুড়ঙ্গই বলা চলে। আনন্দে বুকের মধ্যে কাঁপুনি শুরু হয়ে গেল তার। ওপাশেই রয়েছে পাহাড়ের ঢাল। দিনের আলো আসছে। চিৎকার করে জানাল সে-কথা।

গুহায় ঢোকার পর এই প্রথম একটা আশার কথা শুনল ওরা।

ফাটলটায় ঢোকা ওদের তিনজনের জন্যে কঠিন নয়, কিন্তু গ্রেগরি উঠবে কি করে? ঠিক হলো, মুসা উঠে যাবে প্রথমে। নিচ থেকে গ্রেগরিকে তুলে ধরবে কিশোর আর রবিন। ওপর থেকে তুলে নেবে মুসা।

বলা সহজ। কিন্তু আহত একটা ভারী শরীরকে ওরকম বেকায়দা জায়গায় টেনে তোলা মোটেও সহজ নয়। ফাটলে উঠে বসল সে। গ্রেগরিকে তোলার চেষ্টা করল। কিন্তু জোর পেল না। পা গেল হড়কে। আরেকটু হলে গ্রেগরিকে সহ নিচে পড়ত। পাথরের ওপর মাথা নিচু করে পড়লে তার নিজের কি অবস্থা হত, ভাবতে চাইল না। শেষে উপুড় হয়ে শুয়ে পড়ল ফাটলে। হাত বাড়িয়ে দিল। বহু কষ্টে টেনে তুলল গ্রেগরিকে। তারপর রবিন আর কিশোরকে উঠতে সাহায্য করল সে।

শেষবারের মত পুকুরটার দিকে ফিরে তাকাল রবিন। আনমনে বিড়বিড় করল, 'দারুণ জায়গা! আবার আসব আমি এখানে। বেড়াতে। পুকুরটার তুলনা হয় না!'

তার সঙ্গে সুর মেলাল মুসা, 'হঁ, সঁতার কাটতেও ভীষণ ভাল লাগবে। যদি অবশ্য ভূতে তাড়া না করে।'

হাসল রবিন। 'কিশোরকে সঙ্গে করে নিয়ে আসবে। পালাতে পথ পাবে না।'

ভূতের দল।

ফাটলটা বেশি লম্বা না হলেও বেরোনো অত সহজ হলো না। অতিরিক্ত সুরু। একজন মানুষের কোনমতে জায়গা হয়। ছাতও এত নিচু, দাঁড়ানো সম্ভব না। শেষে হামা দিয়ে, বুকে হেঁটে পৌঁছল এসে শেষ মাথায়। গ্রেগরিকেও এই পথটুকু ক্রল করে এগোতে হলো।

‘রোদ! রোদ!’ চিৎকার করে উঠল রবিন। ‘বেরিয়ে গেছি আমরা!’

আনন্দে হেসে উঠল কিশোর।

ঘাসের ওপর চিত হয়ে শুয়ে পড়ল মুসা।

গ্রেগরি হাঁপাচ্ছে আর ককাচ্ছে। মনে করিয়ে দিল, ‘এখনও বহু পথ যেতে হবে।’

পাহাড়ের ঢালে বসে নিচে তাকাল কিশোর। ঝর্নাটা দেখতে পেল। ওদের নিচে বিশ-পঁচিশ গজ দূরে চওড়া একটা ফাটল। ফিনকি দিয়ে বেরিয়ে যাচ্ছে লাল পানি। লাল কাদার কারণে পানির এই রঙ। যে পাতাল নদীটা দেখে এসেছে ওরা, ওটা আসলে নদী নয়—এতক্ষণে বুঝতে পারল, আন্ডারগ্রাউন্ড ড্রেন। বৃষ্টি হলে পানিতে ভরে যায়। বেরিয়ে আসে ঢালের ওই ফাটল দিয়ে। নদীতে গিয়ে মিশে। নদীর পানি লালচে করে দেয়।

যাক, আরেকটা রহস্যের সমাধান হলো। রক্ত-কূপেরও সন্ধান পাওয়া গেছে। মিথ্যে গুজব নয়।

রোদে গা শুকানোর পর একে অন্যের দিকে অবাক হয়ে তাকাতে লাগল ওরা। চামড়া লাল লাগছে। কোন ধরনের খনিজ এত বেশি মিশে যাচ্ছে ওই পানিতে, লাল বানিয়ে দিচ্ছে সব।

‘আমার খিদে পেয়েছে,’ আচমকা ঘোষণা করল মুসা। ‘বাড়ি যাব।’

তার কথায় সবার পেটই মোচড় দিয়ে উঠল। উত্তেজনা কেটে যেতেই খিদে টের পাচ্ছে সবাই।

কিশোরের দিকে তাকাল রবিন, ‘আগে প্রফেসর ডেমিরনের বাড়ি যেতে হবে। সাইকেলগুলো দরকার। হেঁটে তো আর বাড়ি ফিরতে পারব না।’

মাথা ঝাঁকাল কিশোর।

বনের ভেতর দিয়ে বহু কষ্ট আর পরিশ্রম করে গ্রেগরিকে নিয়ে প্রফেসর ডেমিরনের বাড়িতে হাজির হলো ওরা।

বাড়ির সামনে একটা পুলিশের গাড়ি দাঁড়ানো দেখল।

‘নিশ্চয় পুলিশকে ফোন করেছেন প্রফেসর,’ স্বস্তির নিঃশ্বাস ফেলল মুসা। ‘কিন্তু পুলিশ ওহায় গেল না কেন...?’ পুলিশের গাড়ির পাশে দাঁড়ানো একটা অ্যান্ডুলেসের ওপর চোখ আটকে দিল তার।

প্যারামেডিকের পোশাক পরা তরুণ একজন লোক দাঁড়িয়ে আছে অ্যান্ডুলেসের পেছনে। খোঁড়া গ্রেগরি আর গোয়েন্দাদের দিকে হাঁ করে তাকিয়ে রইল। মুসার কাঁধে ছেড়ে দিয়ে যখন আচমকা ধপাস করে পড়ে গেল গ্রেগরি, দৌড়ে এল লোকটা।

‘কি হয়েছে?’ জানতে চাইল সে।

‘সে অনেক কথা,’ কিশোর বলল। ‘অ্যান্ডুলেস কেন? কারও শরীর খারাপ?’

‘প্রফেসর ডেমিরন। পুলিশকে ফোন করেছিলেন। কিন্তু ওরা এসে তাঁকে বেইশ অবস্থায় পেয়েছে। অ্যাথুলেসের জন্যে ফোন করেছে পুলিশ।’

‘খুব খারাপ নাকি অবস্থা?’ শঙ্কিত হলো কিশোর।

‘বোঝা যাচ্ছে না। তবে চেষ্টা চালিয়ে যাচ্ছি আমরা।’

দৌড় দিল তিন গোয়েন্দা। অ্যাথুলেসের পেছনে স্ট্রিচারে চিত হয়ে আছেন প্রফেসর। গলা পর্যন্ত কবুল টানা। হুঁশ ফেরানোর চেষ্টা করছেন একজন ডাক্তার।

‘ওই বুড়ো ছাগলটার কথা ছাড়ুন,’ খেঁকিয়ে উঠল গ্রেগরি। ‘পুলিশকে আসতে বলুন।’ জ্বলন্ত চোখে মুসাকে দেখিয়ে বলল, ‘এই ছেলেটা আমার পা ভেঙে দিয়েছে। ওর বিরুদ্ধে নালিশ আছে আমার।’

মুসা হতবাক। বলে কি লোকটা!

‘এই ছেলেগুলোকে অ্যারেস্ট করা দরকার, বিশেষ করে এটাকে,’ মুসাকে দেখাল গ্রেগরি। ‘আমাকে জখম করার দায়ে।’

বিশ

প্রফেসরকে নিয়ে চলে গেল অ্যাথুলেস। তাঁর আর্মচেয়ারটায় এখন গ্রেগরি বসেছে। মচকানো পাটা তুলে দিয়েছে একটা টেবিলে। চেয়ারে বসেছে দুজন পুলিশ অফিসার আর তিন গোয়েন্দা। তাদের মধ্যে অফিসার মরিস ডুবরয়ও রয়েছে।

‘ছেলেগুলোকে হাতকড়া লাগাচ্ছেন না কেন?’ গ্রেগরি বলল। ‘ওই ড্যানহ্যাম মেয়েমানুষটাকে সহ-ও রয়েছে এর মধ্যে। ওদের শয়তানির পুরো গল্পটাই শোনাতে পারি। শুনবেন?’

‘বিশ্বাস করবেন না!’ রাগে চোঁচিয়ে উঠল রবিন। ‘ওর মত মিথ্যুক, অকৃতজ্ঞ, নির্লজ্জ মানুষ জীবনে দেখিনি আমি।’

ক্রকুটি করল মরিসের সঙ্গী অফিসার, ‘তোমার কথা পরে শুনব।’ গ্রেগরির দিকে ফিরল সে, ‘আসলে কি বলতে চান?’

‘বলতে চাই, প্রফেসর ড্যানহ্যামের সহকারী হিসেবে কাজ করছে এই ছেলেগুলো।...আপনারা কি ডেভিল’স রিজে খননের খবর শুনেছেন?’

‘শুনেছি,’ অফিসার বলল। ‘ক্যারাডানে ডাকাতির খবরও শুনেছি। প্রফেসর ড্যানহ্যাম এখন থানায়, পুলিশের তদন্তে সাহায্য করছেন; জিজ্ঞাসাবাদ করা হচ্ছে তাঁকে। মূর্তির ব্যাপারটা কি, খুলে বলুন তো?’

‘ড্যানহ্যাম মেয়েমানুষটা আপনাদের বলেছে, মূর্তিটা চুরি হয়ে গেছে, তাই না? মিথ্যে কথা। ও ওটা লুকিয়ে ফেলেছে। একটা নকল মূর্তি কায়দা করে প্রফেসর ডেমিরনের হাতে তুলে দিয়েছে। ডেমিরনের মাথা খারাপ থাকায় চিনতে পারেনি। তাকে জিজ্ঞেস করলেই সব জানতে পারবেন।’

‘কথা বলার মত অবস্থায় আসতে অনেক সময় লাগবে প্রফেসর ডেমিরনের,’ অফিসার বলল।

‘অ। গতকাল আমাকে এখানে দেখা করতে বলেছিল মিস ড্যানহ্যাম। মূর্তিটা

সঙ্গে করে নিয়ে এসেছিল প্রফেসরকে দেখাতে। দেখানোর পর বিক্রি করে দিতে চাপাচাপি করেছিল আমাকে। আমি মানা করে দিয়ে চলে গেলাম। তারপর গুনলাম, সে নাকি ডাকাতির কবলে পড়েছে। ডাকাত তাকে পিটিয়ে বেহাশ করে মূর্তি নিয়ে চলে গেছে। শুনে তো আমি থ। আজ বুড়ো পাগলটার সঙ্গে কথা বলতে ছুটে এলাম। বুড়ো বলল, মূর্তিটা সে-ই কেড়ে নিয়েছে। তাকে বোঝানোর চেষ্টা করছিলাম মূর্তিটা যাতে মিউজিয়ামকে দিয়ে দেয়। সে বলল, মূর্তিটা গুহায় লুকিয়ে ফেলেছে। বের করে আনতে গেলাম। পাওয়া গেল বটে, তবে সেটা নকল। তারমানে আসলটা এখনও ড্যানহ্যাম মেয়েমানুষটার কাছেই আছে। ওই মেয়েমানুষটা প্ররোচিত করেছে এদের, বুড়ো আঙুল কাত করে তিন গোয়েন্দাকে দেখাল গ্রেগরি। 'আমি কি করি না করি দেখার জন্যে লেলিয়ে দিয়েছে পেছনে। আমার পিছে পিছে গুহায় ঢুকল এই তিন বদমাশ।...ভালভাবে আমি বোঝাতে গেলাম। চড়াও হলো আমার ওপর। মেরেধরে কি অবস্থা করেছে, দেখতেই তো পাচ্ছেন।'

আর সহ্য করতে পারল না মুসা। চিৎকার করে উঠল, 'মিথ্যে কথা! ও-ই আমাদের পিছু নিয়ে গুহায় ঢুকেছিল। তাড়া করেছিল সুড়ঙ্গের মধ্যে। মূর্তি কেড়ে নিতে গিয়ে ঢাল বেয়ে গড়াতে গড়াতে নিচে পড়েছে। পা মচকেছে...'

তাচ্ছিল্যের হাসি হাসল গ্রেগরি। পুলিশের দিকে তাকিয়ে জিজ্ঞেস করল, 'ড্যানহ্যাম মেয়েমানুষটার চর ওরা, বুঝতে পারছেন না কেন! আপনারা এই বিচ্ছিন্নতার কথা বিশ্বাস করবেন, না আমার?'

'তার আগে আরেকটা প্রশ্ন করি আপনাকে, মিস্টার গ্রেগরি,' এতক্ষণে মুখ খুলল ডুবয়। 'গুহার ভেতরে আপনার পা মচকেছিল, এটা তো ঠিক, তাই না?'

'হ্যাঁ,' মুসাকে দেখাল গ্রেগরি, 'এই ছেলেটা ভেঙেছে। সেজন্যেই তো ওকে অ্যারেস্ট করতে বলছি।'

গ্রেগরির কথা কানে তুলল না ডুবয়। 'কথা হলো, তারপর অনেকটা পথ আসতে হয়েছে আপনাকে। কি করে এলেন?'

সতর্ক হয়ে গেল গ্রেগরি। 'কি বলতে চান?'

'বলতে চাই, টেবিলে পা তুলে দিয়ে বসে আছেন, এতটাই ব্যথা। হেঁটে এলেন কি করে?'

'আ-আ-আমি...ওরা আমার পা ভেঙেছে, লজ্জায় পড়ে নিজেরাই...'

'থামলেন কেন, বলুন? ওরা বয়ে এনেছে, এই তো বলতে চাইছিলেন? সেটাই ওদের স্বভাব-মানুষকে সাহায্য করা। আপনি যত যা-ই বলুন না কেন, মিস্টার গ্রেগরি, আমরা জানি-পুলিশ জানে, ওরা খুব ভাল ছেলে।' রুদ্ধ হয়ে উঠল ডুবয়ের কণ্ঠস্বর, 'আমার ধারণা, আপনি রকি বীচে নতুন, কিংবা চোরাই অ্যানটিক ছাড়া দুনিয়ার আর কোন খবর রাখেন না-নইলে তিন গোয়েন্দার নাম না শোনার কথা নয়। ওরা শখের গোয়েন্দা। পুলিশ ওদের সুনজরে দেখে।'

গ্রেগরির চোখে সাপের বিষাক্ত দৃষ্টি দেখতে পেল কিশোর। ডুবয়ের দিকে তাকাল, 'থ্যাংক ইউ, অফিসার। এখন আমি কিছু বলি?'

'বলো।'

ক্যারাবানে চুরিটা অন্য কেউ করেনি, 'এই লোক করেছে,' গ্রেগরিকে দেখাল কিশোর। 'প্রফেসর ড্যানহ্যাম ওকে আসতে বলেননি, সে নিজেই এসেছিল, তাঁকে ফাঁসানোর জন্যে। চুরি করা জিনিসগুলো এনে রেখে দিয়েছিল প্রফেসর ড্যানহ্যামের গাড়িতে। আমরা তখন এদিকেই আসছিলাম। গাড়ি নিয়ে পালাতে দেখেছি ওকে। ফাঁসানোর জন্যেই যে ওগুলো রেখেছিল, আফসোস করে নিজেই সে-কথা বলেছে আজ প্রফেসর ডেমিরনকে। মুসা শুনেছে। কি, মুসা?'

মাথা ঝাঁকাল মুসা, 'হ্যাঁ। গ্রেগরি বলেছে: প্রফেসর ড্যানহ্যামকে ফাঁসানোর জন্যেই এত কাণ্ড করেছে। আমি ওকে চোর বানাতে চেয়েছি। পুলিশকে বোঝাতে চেয়েছি ক্যারাবানের মাল সে নিজেই চুরি করেছে-বিত্তি করে ফান্ডের টাকা জোগাড়ের জন্যে। ক্যারাবানের মাল চুরির ব্যাপারে পুলিশ তাকে সন্দেহ করলে, মূর্তি চুরির দায়টাও চাপত তার ঘাড়ে। মাঝখান থেকে আমি খালাস। আমার দিকে নজরও দিত না পুলিশ।'

ভুরু কুঁচকে গ্রেগরির দিকে তাকাল ডুবয়, 'এ ব্যাপারে আপানার কি বক্তব্য, মিস্টার গ্রেগরি?'

সাপের মত ফুঁসে উঠল গ্রেগরি, 'আমার কথা তো বিশ্বাস করবেন না, বুঝতেই পারছি। আমার উকিলকে সামনে না রেখে আপনাদের আর কোন প্রশ্নের জবাব দেব না আমি।'

'হুঁ,' কিশোরকে জিজ্ঞেস করল ডুবয়, 'আসল মূর্তিটা কি সত্যি প্রফেসর ড্যানহ্যামের কাছে আছে?'

'মনে হয় না। প্রফেসর ডেমিরন নিজের মুখে স্বীকার করেছেন, তাঁকে আঘাত করে মূর্তিটা কেড়ে নিয়েছেন তিনি। তা ছাড়া নকল মূর্তিটাও নিয়ে এসেছিলেন মিউজিয়াম থেকে, আমাদের সামনে।' কথাটা বলে আড়চোখে গ্রেগরির দিকে তাকাল কিশোর। তার নিচের চোয়াল ঝুলে পড়তে দেখে মুচকি হাসল। 'নকলটা সুড়ঙ্গে রেখে এসেছেন তিনি লোভী চোরগুলোকে ধোঁকা দেয়ার জন্যেই,' আড়চোখে আবার তাকাল গ্রেগরির দিকে। 'আসলটা, আমার ধারণা, এ বাড়িরই কোথাও লুকিয়ে রেখেছেন। রাকারুয়া হিলে নিয়ে গিয়ে যেখান থেকে ওটা তুলে এনেছেন, সেখানেই পুঁতে ফেলার ইচ্ছে ছিল। সুযোগ পাননি।'

'বের করতে পারবে?'

'চেষ্টা করে দেখতে পারি।'

লাফ দিয়ে উঠে দাঁড়াল ডুবয়। 'চলো তাহলে।' সহকর্মীর দিকে তাকাল, 'এটাকে পাহারা দাও। আমরা আসছি।'

দুই সহকারী আর ডুবয়কে নিয়ে সোজা বাইরে চলে এল কিশোর। এসে দাঁড়াল নকারটার সামনে। হাত ঢুকিয়ে দিল ওটার হাঁ করা মুখে। সবার দিকে তাকিয়ে হেসে দেখে টিপল, 'আছে।'

শয়ানের মুখের ভেতর থেকে সোনার মূর্তিটা বের করে আনল সে। বাড়িয়ে দিল ডুবয়কে, 'নির্ন।'

'কি? বুঝলে তুমি এটা এখানে আছে?' প্রশ্ন না করে আর পারল না রবিন।

'কাল রাত্ন বাড়ি মেরেছিলাম, তীক্ষ্ণ ছিল আওয়াজটা; আজ বাড়ি মেরে শুনলাম

ভোঁতা। ঘণ্টার গায়ে কিছু লেগে থাকলে ঠিকমত বাজে না, ঝনঝনানিটা নষ্ট হয়ে যায়।

‘তারমানে সুড়ঙ্গে ঢোকার আগেই ব্যাপারটা লক্ষ করেছ তুমি। এত কষ্ট করে আর ঢুকলে কেন তাহলে?’

‘শব্দটা যে অন্য রকম হচ্ছে, খেয়াল করেছিলাম বটে, কিন্তু গুরুত্ব দিইনি তখন। এত সব ঘটনা ঘটে গেছে এরপর, উদ্বেজনায ভাবার সময় পাইনি। তা ছাড়া তখন জানিও না, নকল মূর্তিটা গুহায় লুকিয়েছেন প্রফেসর। মূর্তিটা ভেঙে গেলে যখন জানলাম ওটা নকল, একটু চিন্তা করতেই বুঝে ফেললাম আসলটা কোথায় রেখেছেন প্রফেসর।’

তিন গোয়েন্দাকে নিয়ে আবার ঘরে ফিরে এল ডুবয়। গ্রেগরিকে মূর্তিটা দেখিয়ে ভুরু নাচাল, ‘এবার কি বলবেন? প্রফেসর ড্যানহ্যামের কাছে নাকি আছে?’

‘উকিল ছাড়া কথা বলব না, বললামই তো।’ দুই দুইবার এত কাছে থেকে মূর্তিটা হাতছাড়া হয়ে যাওয়াতে ক্ষোভে, দুঃখে চুল ছিড়তে ইচ্ছে করছে গ্রেগরির, মুখ দেখেই বোঝা গেল।

সহকর্মীর দিকে তাকাল ডুবয়। ‘তাহলে আরকি, যাওয়া যাক, চলো।’ গ্রেগরির দিকে ফিরল, ‘থানায় চলুন। ডাক্তার, উকিল, দুটোই পাবেন।’

‘থানায় যাব কেন? আপনারা কি আমাকে অ্যারেস্ট করেছেন নাকি?’

কঠিন হলো ডুবয়ের চোয়াল। ‘সে গেলেই বুঝাবেন।’ তিন গোয়েন্দার দিকে তাকাল, ‘এক গাড়িতে এত লোকের জায়গা হবে না। তোমরা সাইকেল নিয়ে এসো। শহরে ফিরে যত তাড়াতাড়ি সম্ভব থানায় দেখা করো।’

থানার ইন্টারভিউ রুমে ঢুকে দেখল তিন গোয়েন্দা, অফিসার ডুবয় বসে আছে তার ডেস্কে। নোট লিখছে। মুখ তুলে ওদের দেখে বলল, ‘বসো।’

‘ক্যাপ্টেন ইয়ান ফ্লেচার এসেছেন?’ জানতে চাইল কিশোর।

‘না, তিনি তো এখনও আসেননি। জিজ্ঞাসাবাদ যা করার আমরাই করছি।’

‘মিস ড্যানহ্যামের কি খবর?’

নোটের দিকে তাকাল ডুবয়। ‘প্রফেসর ড্যানহ্যামের গাড়িতে চোরাই মাল গ্রেগরি রেখেছে—এ কথা ঠিক হলে, ক্যারাভানে চুরির অভিযোগ থেকে তাঁকে রেহাই দেয়া যায়। কিন্তু মিউজিয়ামের মূর্তি চুরির অভিযোগ থেকে অত সহজে রেহাই পাবেন না।’

‘তাঁকে অ্যারেস্ট করেছেন নাকি!’

‘থানাতেই আছেন এখনও, কাগজ-পত্রে অ্যারেস্ট দেখানো হয়নি। তাঁর সহকারী ডোনাল্ড ইয়ানমারকেও সন্দেহ করছে পুলিশ।’

সামনে ঝুঁকল কিশোর। ‘ডোনাল্ড এখন কোথায়?’

‘বাসায় নেই। বাড়ির সামনে পাহারা দিচ্ছে পুলিশ। এলেই ধরবে। থানায় নিয়ে আসবে। প্রফেসর ড্যানহ্যাম অবশ্য তার পক্ষে সাফাই দিয়েছেন—বলেছেন, ডোনাল্ড এ সবে জড়িত নেই।’

নিচের ঠোঁট কামড়াল কিশোর। ‘গ্রেগরি দোষ স্বীকার করেছে?’

‘এত সহজে কি আর করে। জিজ্ঞাসাবাদ চলছে। ডোনাল্ডের জন্যে অপেক্ষা করছি আমরা। আমার বিশ্বাস, ও এলে কাহিনীর মোড় ঘুরবে।’

কিছু বলতে যাচ্ছিল কিশোর, বাইরের করিডরে হই-চই শুনে থেমে গেল। সবাই ফিরে তাকাল খোলা দরজার দিকে। দুজন পুলিশ দুদিক থেকে পাহারা দিয়ে নিয়ে এল ডোনাল্ডকে।

টুকেই থমকে দাঁড়াল ডোনাল্ড। তাকিয়ে রইল কিশোরের দিকে। চিৎকার করে উঠল, ‘কি বলেছ তুমি ওদের? মায়া’র নামে কি বলেছ?’

‘যা সত্যি তা-ই বলেছি,’ জবাব দিল কিশোর। ‘আমি পুলিশকে জানিয়েছি, ডেভিল’স রিজে মূর্তি পাওয়ার ঘটনা। একটা জঘন্য জুয়াচুরি।’

‘কিন্তু সেই জুয়াচুরিটা তো না যা করেনি! ওর কোন দোষ নেই। সে কিছু জানেও না।’ চিৎকার করে বলল ডোনাল্ড, ‘ওটা আমি করেছি! সব দোষ আমার!’

একুশ

‘ডন! চুপ করো! কিছু বোলো না ওদের!’

দরজার বাইরে করিডরে দেখা গেল মায়া ড্যানহ্যামকে। একজন পুলিশম্যানের সঙ্গে দাঁড়িয়ে আছেন।

‘কিন্তু ওদের তো ধারণা তুমি চুরি করেছ,’ ডোনাল্ড বলল। ‘ওদের সত্যি কথাটা বলে দেয়া দরকার।’

পাশের ঘর থেকে এসে ঢুকল আরেকজন পুলিশ অফিসার। অফিসার নটিংটন। ‘এত চেষ্টামেচি কিসের?...অ, তুমিই ডোনাল্ড?’

‘হ্যাঁ, আমাকে আন্নার জন্যেই আমার বাসার সামনে গাড়ি বসিয়ে রেখেছিলেন। আমি বলছি, মায়া চুরি করেনি।’ ডোনাল্ড বলল, ‘আপনাদের কি জানানো হয়েছে আমি জানি না, তবে মায়া এ সবে নেই। ও এ সবার কিছুই জানে না।’

‘ডন!’ চিৎকার করে উঠল ড্যানহ্যাম। ‘দোহাই তোমার, কিছু বোলো না ওদের! একটা শব্দও না!’

ড্যানহ্যামের দিকে তাকিয়ে রইল ডোনাল্ড। ‘কেন বলেছ ওদের আমি কিছু বুঝি না মনে করেছ?’ নটিংটনের দিকে তাকাল সে। ‘মায়া আমাকে বাঁচানোর চেষ্টা করছে, অফিসার। ওকে ছেড়ে দিন। আমি আপনাদের সব বলছি।’

ভুরু কুঁচকে ওর দিকে তাকিয়ে রইল নটিংটন। ‘বোসো।’ এগিয়ে গিয়ে একটা ডেস্কের সামনে বসল সে নিজেও। নোটবুক আর পেন্সিল বের করে রেডি হলো। ‘বলো। সত্যি কথাগুলো জানা দরকার আমাদের।’

ঘরে ঢুকলেন প্রফেসর ড্যানহ্যাম। ডোনাল্ডের মুখোমুখি দাঁড়ালেন। ‘কেন করেছ এ কাজ? কেন অপেক্ষা করলে না? কবরটা খুললেই তো সব পেয়ে যেতাম আমরা।’

‘আমার ভয় ছিল, কিছুই পাওয়া যাবে না,’ ডোনাল্ড বলল। ‘বুঁকি নেয়ার সাহস হচ্ছিল না। আমি জানতাম মূল্যবান কিছু পাওয়ার জন্যে কি রকম মরিয়া হয়ে

উঠেছিলে তুমি। তোমার জন্যে এ কাজ করেছি আমি। আমাদের দুজনের জন্যে।
যাতে একসঙ্গে ফ্রান্সে যেতে পারি।’

‘ওহ, ডন!’ কপাল চাপড়ালেন প্রফেসর ড্যানহ্যাম। ‘কোন প্রয়োজন ছিল না এ
সবের। ফ্রান্সে যাওয়াটা এত জরুরী ছিল না যে নিজেদের তোলা মাল নিজেদেরই
চুরি করতে হবে।’

তাকিয়ে রইল ডোনাল্ড। ‘ক্যারাভানে চুরির কথা বলছ? মূর্তিটা আমিই মাটিতে
পুঁতে রেখেছিলাম, কিন্তু ক্যারাভানের জিনিস তো আমি চুরি করিনি।’

ঝুলে পড়ল প্রফেসর ড্যানহ্যামের চোয়াল। ‘আমি তো ভাবলাম তুমি করেছ।
সে-জন্যে নিজের ঘাড়ে দোষটা নিয়ে নিয়েছিলাম। বলেছি চুরি করে নিয়ে গিয়ে
আমার গাড়িতে আমিই রেখেছি ওগুলো।’

আঙুল তুলল ডুবয়, ‘এক মিনিট। তারমানে ক্যারাভানে চুরি আপনারা করেননি?
কে করেছে, তা-ও জানেন না?’

আন্তে মাথা নাড়লেন প্রফেসর ড্যানহ্যাম, ‘ডোনাল্ড যদি না করে থাকে, আমিও
করিনি।’

ডোনাল্ড বলল, ‘আমি করিনি।’

নটিংটনের দিকে তাকাল ডুবয়, ‘গ্রেগরিকে ছেপে ধরতে হবে।’ তিন
গোয়েন্দাকে বলল, ‘আপাতত তোমাদের কাজ শেষ। আবার প্রয়োজন পড়লে খবর
দেব।’

পরদিন স্কুল ছুটির পর স্কুলের কাছের একটা বৃদ থেকে থানায় ফোন করল কিশোর।
ইয়ান ফ্লেচারকে পাওয়া গেল। গ্রেগরি কিছু স্বীকার করেছে কিনা, জানতে চাইল
সে।

ক্যাপ্টেন বললেন, ‘সময় থাকলে চলে এসো না। সামনা-সামনিই সব বলা
যাবে।’

বৃদ থেকে বেরোতেই জিজ্ঞেস করল রবিন, ‘কি হলো?’

‘ক্যাপ্টেন থানায় যেতে বলেছেন।’

‘মুখ খুলেছে মাকি গ্রেগরি?’

মাথা ঝাঁকাল কিশোর, ‘মনে হয়।’

মুসা বলল, ‘ওখানে নিশ্চয় অনেক সময় লাগবে। কিছু খেয়ে গেলে কেমন
হয়? একআধটা বার্গার? না খেয়ে এতক্ষণ থাকা যাবে না।’

‘ঠিক আছে, চলো। পথে কোন দোকান থেকে খেয়ে মেয়া যাবে।’

থানায় ঢুকল তিন গোয়েন্দা।

ডিউটি অফিসার ওদের দেখে হাসল। ‘তোমাদের অপেক্ষাই করছেন
ক্যাপ্টেন।’

ইয়ান ফ্লেচারের অফিসের সামনে এসে দাঁড়াল ওরা। দরজায় টোকা দিল
কিশোর।

‘এসো,’ সাড়া এল ভেতর থেকে।

ভেতরে ঢুকল তিন গোয়েন্দা।

উঠে হাত বাড়িয়ে দিলেন ক্যাপ্টেন। হেসে বললেন, 'ডেভিল'স রিজের ভূত তাড়িয়েই ছাড়লে।'

'কিশোর পাশা যখন পিছে লেগেছে,' রবিন বলল, 'ভূতের সাধ্য কি সেখানে থাকে?'

'তোমরাও কম নও।...বোসো।...মুসা, কি খাবে?'

'আপাতত কিছু লাগবে না, স্যার,' খেয়ে আসায় মনে মনে হতাশাই হলো যেন মুসা। 'পেট ভরা। এইমাত্র তিনটে বার্গার সাবাড় করে এলাম।'

শব্দ করে হাসলেন ক্যাপ্টেন। 'তাই। ঠিক আছে, পেটে জায়গা তৈরি হলে জানিয়ে।'

'চেয়ারে হেলান দিলেন ক্যাপ্টেন। 'মিস ড্যানহ্যাম, ডোনাল্ড, গ্রেগরি, সবাই স্বীকারোক্তি দিয়েছে। প্রথম দুজনের কথা তো নিজের কানেই অনেকখানি শুনে গেছ তোমরা। ওরা পরস্পরকে ভালবাসে, সেটাও নিশ্চয় বুঝেছ। কিশোর, ডোনাল্ড কিভাবে মূর্তিটা চুরি করে এনেছিল, অনুমান করতে পারো?'

'পারি,' কিশোর বলল। 'ডেভিল'স রিজে কাজ করতে করতে মূর্তি চুরির ভাবনাটা মাথায় আসে ডোনাল্ডের, কারণ একই সময়ে মিউজিয়ামে গিয়ে অন্য ছাত্রদের সঙ্গে প্রফেসর ডেমিরনের পাওয়া জিনিসগুলো নিয়েও বেষণা চালাচ্ছিল সে। ও অর্কশপে বসেই মাটি দিয়ে আসল মূর্তিটার একটা নকল তৈরি করে। সোনালি রঙ লাগায়। এতই নিখুঁত হয়েছিল, খালি চোখে দেখে চট করে বোঝার উপায় ছিল না ওটা নকল। সে জানত, বেশ কিছুদিন ওটা ডিসপ্লেতে দেয়া হবে না। কাজেই বিশেষজ্ঞ কারও চোখে পড়ারও সম্ভাবনা ছিল না। সুযোগটা কাজে লাগায় সে। আসলটার জায়গায় নকলটা রেখে, আসলটা নিয়ে গিয়ে পুঁতে রাখে ডেভিল'স রিজে।'

'হ্যাঁ, ঠিক আছে,' মাথা ঝাঁকালেন ইয়ান ফ্রেচার। 'তারপর?'

'তার পরিকল্পনার কথা কিছুই জানতেন না প্রফেসর ড্যানহ্যাম। মূর্তিটা পাওয়ার পরও সঙ্গে সঙ্গে কিছু বুঝতে পারেননি, কারণ মূর্তি পাওয়ার আনন্দ আর উত্তেজনায় ভাল করে দেখার মত অবস্থা ছিল না তাঁর। ইউনিভার্সিটিতে পরীক্ষা করতে বসে নিশ্চয় এমন কোন চিহ্নটি বা কিছু দেখেছেন মূর্তির গায়ে, যাতে তাঁর সন্দেহ হয়।'

আবার মাথা ঝাঁকালেন ক্যাপ্টেন, 'হ্যাঁ, তোমার এই অনুমানও ঠিক। বাকার? হিলে পাওয়া মূর্তিটা তিনি আগে দেখেছেন। ডেভিল'স রিজেরটার ওপর সন্দেহ হয়েছিল। তারপর?'

'সন্দেহ নিরসনের জন্যেই ছুটে গিয়েছিলেন প্রফেসর ডেমিরনের কাছে,' কিশোর বলল। 'কারণ একমাত্র ডেমিরনই নিশ্চিত বলতে পারবেন কোনটা তিনি খুঁজে পেয়েছিলেন। পাগল হলেও মূর্তিটা দেখেই বুঝে গিয়েছিলেন ডেমিরন, কিছু একটা গোলমাল হয়েছে। প্রফেসর ড্যানহ্যাম তাঁর বাড়ি থেকে বেরিয়ে যাওয়ার পর হুপচাপ তাঁকে অনুসরণ করলেন। মাথায় বাড়ি ঘেরে বেঁধুঁশ করে মূর্তিটা নিয়ে গিয়ে সুকিয়ে রাখলেন নকারে। তারপর আসল ঘটনাটা কি ঘটেছে জানার জন্যে মিউজিয়ামে গেলেন খোঁজ নিতে।'

‘হ্যাঁ,’ মাথা ঝাঁকালেন ক্যাপ্টেন।

এক মুহূর্ত চুপ থেকে বলল কিশোর, ‘যাই হোক, এদিকের ব্যাপার তো গেল। শ্রেগরির খবর কি? মিস ড্যানহ্যামের গাড়িতে জিনিস রাখার কথা স্বীকার করেছে?’

‘করেছে। প্রফেসর ড্যানহ্যাম যখন মূর্তি দেখানোর জন্যে প্রফেসর ডেমিরনের বাড়িতে যান, পিছে পিছে শ্রেগরিও যায়। চোরাই মালগুলো সঙ্গেই ছিল তার। প্রফেসর ড্যানহ্যামকে বেইশ পড়ে থাকতে দেখে তাড়াতাড়ি তাঁর গাড়িতে রেখে দিয়েই পালায়।...মূর্তিটা হাতানোই হচ্ছে ছিল। কিন্তু ভজকট করে দেন প্রফেসর ডেমিরন।’

‘যাকগে, শেষ পর্যন্ত তো আর কিছু করতে পারল না। হারই হলো তার।...প্রফেসর ডেমিরনের কি অবস্থা?’

‘নার্সাস ইগ্জশনে ভুগছেন তিনি,’ ক্যাপ্টেন জানালেন। ‘ডাক্তাররা আশা করছেন পুরোপুরি সুস্থ হয়ে যাবেন, তবে সময় লাগবে। মাথায় বাড়ি মারার জন্যে নালিশ করছেন না প্রফেসর ড্যানহ্যাম, কাজেই জিজ্ঞাসাবাদের জন্যে প্রফেসর ডেমিরনকে আপাতত আমাদের দরকার নেই।’

‘মূর্তিটা কই?’

‘আমাদের কাছেই আছে। প্রমাণের জন্যে দরকার হবে। কাজ শেষ হলেই মিউজিয়ামকে ফিরিয়ে দেয়া হবে।’

‘তুরমানে ভালয় ভালয় শেষ হচ্ছে সব,’ রবিন বলল।

মাথা ঝাঁকালেন ক্যাপ্টেন। ‘তোমাদের জন্যেই হচ্ছে। মূর্তিটা নিয়ে শ্রেগরি পালিয়ে গেলে তাকে ধরা কঠিন হত।’

‘ভাল কথা, ডোনাল্ডের খবর কি?’ জানতে চাইল কিশোর।

‘কিছু শাস্তি তাকে ভোগ করতেই হবে, কারণ জুয়াচুরি তো একটা করেছে—সেই সঙ্গে চুরি। তবে মূর্তিটা যেহেতু ফেরত পাওয়া গেছে, আর অকপটে সব কথা স্বীকার করেছে সে, বিচারক নিশ্চয় এ দিকটা দেখবেন।’

সব প্রশ্নের জবাব জানা হয়েছে। কারোরই আর কোন প্রশ্ন নেই। ঘড়ি দেখল কিশোর। উঠে দাঁড়াল। ‘আজ তাহলে যাই, স্যার।’

দেখাদেখি মুসা আর রবিনও উঠল।

মুসার দিকে তাকালেন ক্যাপ্টেন, ‘কি, পেটে জায়গা খালি হয়নি এখনও? আইসক্রীম আনাব?’

‘আনাবেন?’ দ্বিধায় পড়ে গেল মুসা। দুই বন্ধুর দিকে তাকাল। কোন সহযোগিতা পেল না ওদের কাছ থেকে। সিদ্ধান্তটা তার একলারই নিতে হলো। ‘ঠিক আছে, আনান। এত করে বলছেন যখন, না খাওয়াটা অভদ্রতা হবে।’ আস্তে করে বসে পড়ল আবার সে।



‘বরফ ছাড়া আর তো কিছুই চোখে পড়ছে না,’
কিশোরের দিকে ফিরে তাকাল মুসা। ‘রাস্তা কই?’
সানগ্লাসটা কপালের ওপর ঠেলে দিল
কিশোর। ‘বরফই তো ভাল। নইলে ক্রস-কান্ট্রি
স্কি জমে না। কষ্ট বেশি হয়।’

‘হুঁ, এ সব কথা মুসারও জানা। দূরের
পর্বত-চূড়াটার দিকে তাকাল সে। পোল দিয়ে
আবার বরফে খোঁচা মারবে কিনা ভাবছে। ‘রকি
বীচ থেকে বহুদূরে চলে এলাম। বিশ্বাসই হচ্ছে না, কাল ছিলাম একটা জমজমাট
শহরে, আর আজ এ রকম একটা অপার্থিব জায়গায়, কিছুই নেই যেখানে।’

‘সাবধান,’ রবিন বলল, ‘শহরে গিয়ে কারও সামনে এ ভাবে বলে বোসো না
আবার। কলোরাডোর মানুষ তাদের দেশ সম্পর্কে এ ধরনের মন্তব্য পছন্দ করবে
না।’

‘ভুলটা কি বললাম?’ চারপাশে তাকাল মুসা। মানুষ চোখে পড়ার সম্ভাবনা
নেই। কারণ সবচেয়ে কাছের শহর এলকম্প্রিঙও এখান থেকে আট মাইল দূরে।
ট্রেইলহেড, অর্থাৎ রাস্তার যে মাথা থেকে স্কি শুরু করেছে ওরা, যেখানে ভাড়া করে
আনা গাড়িটা রেখে এসেছে, সেই জায়গাটাও এখান থেকে তিন মাইল।

‘না থাকাই তো ভাল,’ জবাব দিল কিশোর। ‘নির্জনতাই দরকার আমাদের।
মানুষ নেই, কোলাহলমুক্ত, প্রকৃতি আর আমাদের মাঝে প্রতিবন্ধকতা সৃষ্টি করবে না
কেউ।’ রবিনের দিকে তাকাল, ‘রবিন, কেমন লাগছে তোমার?’

‘খুব ভাল। তবে অতিরিক্ত নির্জন।’

‘হয়তো এ কারণেই এ রকম একটা জায়গায় তোমাকে নিয়ে আসার পরামর্শ
দিয়েছেন ডাক্তার।’

‘কি জানি! হতে পারে। তবে নির্জনতাটা সহ্য করতে সময় লাগবে মনে
হচ্ছে।’

‘পস্তাচ্ছ না তো?’

এক হাতের একটা স্কি-পোল বরফে চেপে ধরে নিজেকে আটকে রাখল রবিন,
যাতে পিছলে না যায়। জিনিঙ্গটা ফাইবারগ্লাসে তৈরি সরু লাঠির মত। মাথাটা
ইস্পাতের। সামনের ঢালু তরাই অঞ্চলটার দিকে তাকাল। উপত্যকায় ছড়ানো-
ছিটানো পাইন বন। ঢালের মাঝামাঝি জায়গায় দাঁড়িয়ে আছে ওরা। আকাশ ঘন
নীল। বাতাস এতটাই স্বচ্ছ আর পরিষ্কার, গাছপালা, আকাশ-সব কিছুর রঙ হয়ে
গেছে অতিমাত্রায় উজ্জ্বল। বরফ ধবধবে সাদা। নাক চিরে ঢুকে যাচ্ছে পর্বতের
বাতাস, শরীরটা খুব তাজা লাগছে।

‘মোটেও না,’ জবাব দিল সে।

‘মাথার মধ্যের গোলমালটা আছে আর?’ জিজ্ঞেস করল মুসা।

‘এখন তো টের পাচ্ছি না।’ জবাব দিল রবিন। অথচ হোটেল থেকে বেরোনের সময়ও কেমন যেন লাগছিল। তার অসুস্থতার কারণেই কলোরাডো রকির পার্বত্য অঞ্চলে বেড়াতে এসেছে ওরা। মাথায় গোলমাল দেখা দিয়েছিল তার। ‘রূপালী মাকড়সা’ অভিযানে গিয়ে মাথায় আঘাত পেয়েছিল। ডাক্তার বলেছেন, সেই আঘাতটাই বর্তমান গুণ্ণোগলের কারণ। চেপে ছিল এতদিন, মাথা চাড়া দিয়েছে এখন। কেন দিয়েছে, সেই কারণটা খুঁজে পাচ্ছিলেন না তিনি। তাই বলেছেন, ব্র্যাক ফরেষ্টের বন্ধুতা থেকে দূরে কোথাও সরে যেতে। এমন কোথাও, যেখানটা অতিরিক্ত খোলামেলা, কোলাহল বর্জিত, একেবারে প্রকৃতির কোলে কোনখানে। তিন বন্ধু মিলে আলোচনা করে এই জায়গাটাই পছন্দ হয়েছে ওদের। চলে এসেছে। ছুটি কাটাতে। রবিনের জন্যে বেড়ানোও হবে, সেই সঙ্গে আবহাওয়া বদল। তিনজনের খরচের টাকাটা রবিনের বাবী-মাই বহন করছেন।

‘এখান থেকে আর যেতেই হচ্ছে করছে না আমার,’ মুসা বলল।

‘আমারও খুব ভাল লাগছে,’ কিশোর বলল।

পোল দিয়ে আবার ঠেলা-দিল মুসা। পিছলে গেল তার পায়ে বাঁধা স্কি দুটো। ছুটতে শুরু করল সে। চিৎকার করে ডাকল কিশোর আর রবিনকে, ‘এসো, দেখা যাক কত মাইল পথ পাড়ি দিতে পারি আজকে আমরা।’

বরফে স্কি-এর চাপে সৃষ্টি হওয়া দুটো গভীর খাঁজ রেখে যাচ্ছে মুসা। যতটা সম্ভব সে-দুটো অনুসরণ করেই এগোল রবিন। পেছনে কিশোর। এক লাইনে থাকা ভাল।

কিছুদূর এগোনোর পর ডেকে বলল কিশোর, ‘একদিনেই বেশি কষ্টের দরকার নেই। নির্দিষ্ট কোথাও যাবার তো তাড়া নেই আমাদের। তা ছাড়া পরিবেশের সঙ্গে মানিয়ে নেবারও ব্যাপার আছে। বাতাস দেখেছ, কি রকম পাতলা? বেশি ছোটোছুটি দ্রুত কাহিল করে ফেলবে। তারচেয়ে থেমে থেমে এগোই। ক্লান্তও কম হবে, প্রকৃতিও দেখতে পারব।’

‘ওই ন্যাশনাল ফরেষ্টের সব দেখতে চাই আমি,’ মুসা বলল।

‘ছুটি তো মাত্র সাত দিন। সব দেখবে কি করে? স্কি করে গানিসন ন্যাশনাল ফরেষ্টের পুরোটা দেখতে চাইলে এক বছরেও পারবে না।’

‘প্লেন ভাড়া করলে দেখা যায়,’ রবিন বলল।

‘তা হয়তো যায়,’ কিশোর বলল। ‘কিন্তু তাতে তোমার রোগের কোন উপকার হবে না। আসল উদ্দেশ্যটা সব সময় মাথায় রাখতে হবে আমাদের।’

শীঘ্রিই ছোট্ট উপত্যকাটার অন্য পাশে বেরিয়ে এল ওরা। ঢাল বেয়ে আবার ওপরে উঠতে শুরু করেছে পথ। গতি কমে গেল মুসার।

‘এখন কি মনে হচ্ছে?’ শৈলশিয়ার ওপরে উঠে এসে জিজ্ঞেস করল কিশোর। ‘সারাদিন ছুটতে পারবে? এখানে বসে যেতে পারে। প্রয়োজন মনে করলে কিছু খেয়েও নেয়া যায়।’

‘ভাল কথা মনে করেছে তো,’ হাসি ফুটল মুসার মুখে। ‘আমার প্রয়োজন আছে।’

দেরি করল না আর সে। স্কি দুটো খুলে নিয়ে খাড়া করে গেঁথে রাখল বরফে। শৈলশিরার একেবারে কিনারে একটা পাথরের ওপর এসে বসল। ব্যাকপ্যাক থেকে গ্র্যানোলা বার বের করে চিবানো শুরু করল। কিশোরের মতই তারও নজর নিচের উপত্যকার দিকে। দৃশ্যটা অবাক করল ওকে। যেদিক দিয়ে উঠে এসেছে সেদিকের ঢালটার চেয়ে উল্টোপাশের ঢাল অনেক বেশি দীর্ঘ, অনেক খাড়া ভাবে নেমে গেছে গভীর খাদের মধ্যে।

‘নামতে কি পারব এদিক দিয়ে?’ মুসার কণ্ঠে সন্দেহ।

ব্যাকপ্যাকটা গাছের গোড়ায় ঠেস দিয়ে রেখেছে কিশোর। চেন খুলে সাইড পকেট থেকে ন্যাশনাল ফরেস্টের একটা ম্যাপ বের করল। দেখেটেখে বলল, ‘খাড়াই বেয়ে নামার দরকার হবে না। শৈলশিরা ধরে একটা রাস্তা আছে।’

মুসাও তাকাল ম্যাপের দিকে। ‘ম্যাপ দেখে বলতে পারবে কতটা ওপরে রয়েছি আমরা?’

‘কাত হয়ে গলা বাড়িয়ে এল রবিনও।

‘সঠিক বলা যাবে না,’ কিশোর বলল। ‘বিশদ ভাবে সব দেখানো নেই এটাতে। তবে মোটামুটি অনুমান করা সম্ভব।’

‘অনুমানে কাজ হবে না,’ মাথা নাড়ল মুসা। ‘মনোকিউলারটা দিয়ে দেখো না চেষ্টা করে।’

ব্যাকপ্যাক থেকে ছোট একটা যন্ত্র বের করল কিশোর, হাতের তালুতে জায়গা হয়ে যায়। হালকা, খুদে একটা টেলিস্কোপ, রেঞ্জফাইন্ডার, কম্পাস, ঘড়ি আর উচ্চতামাপক যন্ত্র অলটিমিটারের সংমিশ্রণ ওটা। যন্ত্রটা চোখের সামনে তুলে এনে ওপরের দিকের একটা বোতাম টিপে দিল সে। নিচের দিকে একটা ডিজিটাল ডিসপ্লে মিটমিট শুরু করল। ‘আট হাজার ফুট ওপরে রয়েছি এখন আমরা।’

‘খাইছে!’ মুদু শিস দিয়ে উঠল মুসা, ‘তারমানে দেড় মাইল!’

‘হ্যা-ও বলা যায়, না-ও বলা যায়,’ জবাব দিল কিশোর। ‘সমুদ্র সমতলকে স্ট্যান্ডার্ড ধরে নিয়ে রিডিং দিচ্ছে যন্ত্রটা। সমুদ্র সমতল থেকে দেড় মাইল, কিন্তু আমরা যে জায়গাটা থেকে ওঠা শুরু করেছি, সেটাও সমুদ্র সমতল থেকে অনেক ওপরে। তারমানে দেড় মাইলের অনেক কম।’

‘ওসব জটিল অঙ্ক বুঝি না। আসলে ঠিক কতখানি ওপরে আছি, সেটা বলো।’

মুসার দিকে তাকিয়ে হাসল কিশোর। ‘ট্রেইলহেডের কাছে যেখানে গাড়ি ফেলে এসেছি, সেটাকে সমতল ধরলে রয়েছি তিনশো ফুট ওপরে।’

‘স্বস্তির নিঃশ্বাস ফেলল মুসা, ‘তাই বলো। আমি তো ভেবেই পাচ্ছিলাম না, স্কি করে এত হাজার হাজার ফুট ওপরে উঠলাম কি করে আমরা!’

‘তারপরেও বলতে হয়, তিনশো ফুট ওঠাটাও কম না।

‘দেখি, দাও তো জিনিসটা,’ হাত বাড়াল মুসা।

‘তুমিও মাপবে নাকি?’

‘না, টেলিস্কোপ দিয়ে দেখব।’

যন্ত্রটা চোখে লাগিয়ে খাদের দিকে তাকাল মুসা। আঁকাবাঁকা একটা রাস্তামত চোখে পড়ল। পাহাড়ী নদী সম্ভবত, পানি এখন জমাট বরফ।

কয়েক মিনিট পরও যখন চোখ সরাল না মুসা, রবিন জিজ্ঞেস করল, 'কি দেখছ?'

'কিছুই নেই,' হতাশ কণ্ঠে জবাব দিল মুসা। 'এল্ক দেখব ভেবেছিলাম। কিংবা অন্য কোন হরিণ। বুনো জানোয়ারই যদি না দেখলাম, বুনো এলাকায় আসাটাই বৃথা।' ঠিক এই সময় একটা নড়াচড়া দৃষ্টি আকর্ষণ করল তার। 'দাঁড়াও দাঁড়াও, এক মিনিট! কিছু একটা আছে ওখানে। নড়ছে।'

মুসার হাত থেকে মনোকিউলারটা নিয়ে চোখে ঠেকাল রবিন। প্রথমে গাছপালা, বরফ আর পাথর ছাড়া কিছু চোখে পড়ল না। তারপর দেখল, বরফে ঢাকা এক টুকরো খোলা জায়গার ওপর দিয়ে ধীরে ধীরে সরে যাচ্ছে একটা কমলা রঙের আকৃতি। খানিক পর আরও তিনটি বিভিন্ন রঙের আকৃতি গোচরে এল, তাদের দিকে এগোচ্ছে। দুপুরের রোদে ধাতব জিনিসের প্রতিফলনও চোখে পড়ল। তারমানে তিনজন মানুষ, অন্তত দুজনের হাতে রাইফেল আছে।

'শিকারী।' মনোকিউলারটা কিশোরের হাতে দিতে দিতে বলল রবিন, 'বোধহয় বিগহর্ন ভেড়ার পেছনে লেগেছে।'

'শঙ্কিত কণ্ঠে মুসা বলল, 'দূর থেকে আমাদেরকে আবার ভেড়া ভেবে বসবে না তো?'

মুসার পরনে উজ্জ্বল নীল স্কি-স্যুট। কিশোর বলল, 'না, তোমার কোন ভাবনা নেই। ভেড়ার রঙ নীল হয় না।'

দৃষ্টিসীমার বাইরে চলে গেল শিকারীরা। দ্রুত ওদের কথা ভুলে গেল তিন গোয়েন্দা। দিনটা চমৎকার। যেখানে বসে আছে, জায়গাটা খুব সুন্দর। আশেপাশের দৃশ্যও দারুণ। বিশ্রাম, খাওয়া, দুটোই হয়ে গেছে। উঠে পড়ল ওরা।

দুটো ঢাল যেখানে মিলিত হয়েছে, সেখান দিয়ে চলে যাওয়া ট্রেইল ধরে এগোল। কয়েক ঘণ্টা পর এসে পৌঁছল সবুজ একটা গভীর গিরিখাতে। আগে আগে চলেছে এখন কিশোর। থমকে দাঁড়াল হঠাৎ। তার গায়ের ওপর এসে পড়ল মুসা।

'খাওয়ার সময় হয়েছে নাকি আবার?' জানতে চাইল সে।

'হয়তো,' চিন্তিত ভঙ্গিতে জবাব দিল কিশোর। 'তবে সেটা কার, বলা মুশকিল।'

নিচের দিকে চোখ পড়তেই কিশোরের কথার মানে বুঝে গেল মুসা। পার্বত্য সিংহের পায়ের ছাপ। জন্তুটার আরেক নাম কুগার। 'খাইছে! মানুষ খায় নাকি ওরা?'

মাথা ঝাঁকাল কিশোর, 'সিংহ যখন, মানুষকেও হতে বাধ্য নেই। ছাপ দেখেছ কত বড়? অনেক বড় জানোয়ার।' ঝুঁকে বসে ভালমত দেখল ছাপগুলো। 'ধারগুলো সামান্য ভেঁতা হয়ে গেছে। তারমানে তাজা নয়। গরুকালাকেরও হতে পারে, কিংবা পরন্তর। পাহাড়ের দেয়ালের জন্যে বাতাস লাগে না বলে ছাপগুলো আছে এখনও, নইলে পুরোপুরিই ঢেকে যেত।'

'তারমানে, ধরে নেয়া যেতে পারে কাছাকাছি নেই জানোয়ারটা,' রবিন বলল।

'কাছাকাছি আছে কিনা বলা কঠিন।'

'দেখতে দোষ কি?' মুসা এগিয়ে যেতে আগ্রহী।

'কুগারের পিছু নেবে?'

‘সাবধানে এগোব। বিপদ দেখলেই পেছন ফিরে দৌড়।’

কৌতূহল দমন করতে পারল না কিশোরও। প্রাকৃতিক পরিবেশে উত্তর আমেরিকার সবচেয়ে ভয়ানক হিংস্র প্রাণীটাকে দেখার লোভ সংবরণ করতে না পেরে বলল, ‘চলো।’

কিছুদূর এগোতে সামনে একটা বরফের স্তূপ চোখে পড়ল মুসা। তার মধ্যে অদ্ভুত কি যেন দেখা যাচ্ছে। ‘ওটা কি?’

স্তূপটার দিকে তাকিয়ে কিশোরও দেখতে লাগল বেরিয়ে থাকা জিনিসটা। বরফে জমাট জানোয়ারের খুর নাকি!

‘এল্ক দেখতে চেয়েছিলে না?’ রবিন বলল, ‘ওটাই তোমার হরিণ। তবে আংশিক দেখেই সন্তুষ্ট থাকতে হবে, পুরো দেহটা আর পাবে না।’

‘চলো, গিয়ে দেখি কতখানি আছে,’ কথা শেষ করার আগেই পোল দিয়ে বরফে ঠেলা মারল মুসা।

‘কাছে যাওয়া ঠিক হবে না!’ বলতে গিয়েও থেমে গেল কিশোর। লাভ নেই। চলতে আরম্ভ করেছে মুসা।

বরফে অর্ধেক ঢেকে যাওয়া একটা হরিণের মৃতদেহই ওটা। সিংহের রেখে যাওয়া মড়ি।

মড়িটার বেশি কাছে যাওয়ার আগেই ভয়ঙ্কর একটা গর্জন চমকে দিল ওদের। ঘোরের মধ্যে যেন ফিরে তাকিয়ে পাহাড়ের ঢালের শৈলশিরায় দাঁড়ানো কুগারটাকে দেখতে পেল মুসা। মাথা নিচু করে তাকিয়ে আছে ওদের দিকে। হাঁ করা মুখের মধ্যে মারাত্মক স্বদন্তগুলো চোখে পড়ছে। আশেপাশের পাথরের সঙ্গে চমৎকার ভাবে মিশে গেছে ওটার চামড়ার রঙ। টানটান হয়ে যাচ্ছে জন্তুটার পেশীগুলো। ঝাঁপ দিতে তৈরি হচ্ছে ভয়ঙ্কর শিকারী।

বোবা হয়ে ওটার চোখে চোখে তাকিয়ে আছে মুসা। জন্তুটার সবচেয়ে কাছে রয়েছে সে।

দুই

দৌড় দেয়ার চেষ্টা বৃথা, বুঝতে পারছে মুসা। মুহূর্তে ঝাঁপিয়ে পড়ে ছিঁড়ে টুকরো টুকরো করে ফেলা হবে তাকে।

আবার গর্জন করে উঠল কুগারটা। আস্তে করে একটা পোল হাত থেকে ছেড়ে দিল মুসা। দুই হাতে তুলে ধরল অন্য পোলটা। ইম্পাতের মাথাওয়ালা ফাইবারগ্লাসের দণ্ডটাই এখন তার একমাত্র অস্ত্র। বিনা যুদ্ধে পরাস্ত হবে না সে।

তীক্ষ্ণ একটা শব্দ হলো হঠাৎ। পিস্তলের গুলির শব্দের মত। চিৎকার দিয়ে শূন্যে লাফিয়ে উঠল কুগারটা। ঝট করে মাথা নিচু করে ফেলে পোলটা সামনে বাড়িয়ে দিল মুসা। কয়েকশো পাউন্ড ওজনের মারাত্মক দাঁত আর নখ সমৃদ্ধ দেহটা গায়ে এসে পড়ার অপেক্ষা করছে।

পড়ল না। কুগারটা তাকে ছুঁলো না। লাফ দিয়ে শূন্যে উঠে আবার সেই

শৈলশিরাটার ওপরই নেমে এল। পাক খেয়ে ঘুরে, শরীর ঝাঁকিয়ে নিজের নিত্যস্ব
ধাৰা মারতে শুরু করল, যেন বোলতায় কামড়ে দিয়েছে ওখানে।

জানোয়ারটার চোখে সন্দেহ আর দ্বিধা দেখতে পেল মুসা। ভড়কে যাওয়া
ভঙ্গিতে পায়চারি শুরু করল ওটা। তারপর, আচমকা, পেছনের পা দুটো ভাঁজ হয়ে
গেল। ঘাড় ঘুরিয়ে অবাক চোখে তাকিয়ে দেখল নিজের অবশ্য হয়ে আসা অর্ধেকটা
শরীর। সামনের পা দুটোও ভাঁজ হয়ে গেল। ধপ করে চ্যান্টা পাথরের ওপর পড়ে
গেল সে। শেষবারের মত হিসিয়ে উঠে নেতিয়ে পড়ল। বুজে এল চোখ। মুসাকে
দিয়ে লাঞ্চ করা আর হলো না ওর।

চোখের পাতা সরু করে তাকিয়ে আছে মুসা। কি ঘটে গেল, বুঝতে পারছে
না। কাছের একটা পাইন গাছ থেকে লাফিয়ে নামল ক্যামোফ্লেজ পরা একটা মূর্তি।
হাতে শক্তিশালী রাইফেল।

‘কেউ নড়বে না!’ স্কি মাস্কের আড়াল থেকে আদেশ শোনা গেল।

এইমাত্র মুসার প্রাণ বাঁচালেন যিনি, ভারী পায়ে এগিয়ে এসে রাইফেলটা তুলে
ধরলেন তার দিকে। ‘নাও, ধরো এটা।’

মাস্ক খুলে ঝাড়া দিয়ে লম্বা বাদামী চুলগুলো ছড়িয়ে দিলেন শিকারী। ‘আট ঘণ্টা
ধরে গাছে বসে আছি আমি, কুগারটার ফেরার অপেক্ষায়। মাঝখানে তোমরা ঢুকে
পড়ে আরেকটু হলেই কেঁচে দিচ্ছিলে সব।’

স্তব্ধ হয়ে গেছে মুসা। কি বলবে? কুগারের আক্রমণের চমক কাটতে না
কাটতেই ধমক শুনতে হচ্ছে। তার ওপর শিকারী একজন মহিলা।

তীক্ষ্ণ দৃষ্টিতে তার দিকে তাকালেন মহিলা। ধমকের সুরেই বললেন, ‘আমার
দিকে তুলে ধরে রেখেছ কেন?...আরে, ধূর, আবার মাটির দিকে নামায়! কুগারটার
দিকে ধরো না। নড়তে দেখলেই দেবে আরেকটা মেরে।’ ঘুরে পাইন গাছটার দিকে
হাঁটতে শুরু করলেন তিনি।

‘এক মিনিট,’ এতক্ষণে কথা খুঁজে পেল মুসা। ‘আমি ওটাকে খুন করতে
পারব না।’

‘তা তো করবেই না!’ জবাব দিলেন তিনি। ‘গত দশটি বছর ধরে ওকে বাঁচিয়ে
রাখার আশ্রয় চেষ্টি করছি আমি।’

কাছে এসে দাঁড়াল কিশোর। কনুই দিয়ে ওঁতো দিল মুসার গায়ে। ‘আজব
একটা জিনিস লক্ষ করেছ কুগারটার?’

কিশোর বলার পর এতক্ষণে লক্ষ করল মুসা ব্যাপারটা। ররিন এসে দাঁড়িয়েছে
পেছনে। সে-ও দেখল, মোটা কালো একটা কলার লাগানো কুগারের গলায়। গায়ে
বিধে আছে একটা ডার্ট।

‘গুলি করা হয়নি,’ কিশোর বলল, ‘ট্রাংকুইলাইজার ডার্ট। ওষুধের ক্রিয়া শেষ
হয়ে গেলেই জ্ঞান ফিরে আসবে।’

মোটা কলারটায় লাগানো বাক্সের মত একটা জিনিস দেখতে পাচ্ছে মুসা। খুন
ছোট একটা ধাতব দণ্ড বেরিয়ে আছে সেটা থেকে। ‘কোন ধরনের অ্যান্টেনা নাকি?’

‘বাহ, বুদ্ধিগুদ্ধি তো বেশ ভালই,’ মন্তব্য করলেন মহিলা। ‘কিন্তু ও রকম
বোকার মত কাজ করে বসেছিলে কেন?’

কখন পেছনে এসে দাঁড়িয়েছেন তিনি, টের পায়নি কিশোর। নজর ছিল পার্বত্য সিংহটার দিকে। ফিরে তাকাল। 'মুসাকে অবশ্য আমি এ ভাবে ছুটে যেতে মানা করতে চেয়েছিলাম,' বলল সে। 'কিন্তু সুযোগই দিল না। আপনি না থাকলে গেছিল আজ। কিন্তু একটা কথা বুঝতে পারছি না। গাছের মাথায় বসে তো সবই দেখেছেন আপনি। আমাদের সাবধান করে দিতে পারতেন।'

'মাত্র এসেছে তখন কুগারটা,' জবাব দিলেন তিনি। 'ভয় দেখিয়ে তাড়াব নাকি? তা ছাড়া আমি ভেবেছিলাম, ট্রেইল ধরে স্কি করে চলে যাবে তোমরা। মড়ির দিকে নজর দেবে বুঝতে পারিনি। তবে তোমাদের কাজটাকে ভুল বলা যায় না। আমি হলেও ওরকম কৌতূহলী হতাম।' হাত বাড়িয়ে দিলেন তিনি, 'আমি মারিসা কুপার। জীববিজ্ঞানে ডক্টরেট করেছি।'

কিশোরও তাদের পরিচয় দিল।

কাঁধে ঝোলানো লাল ব্যাকপ্যাকটা নামিয়ে তাতে বসলেন ডক্টর কুপার। কিশোর লক্ষ্য করল, ব্যাগের পেছনে বাঁধা রয়েছে নীল রঙের একটা ধাতব বাক্সের মত জিনিস, সেটা থেকে বেরিয়ে আছে দুই ফুট লম্বা একটা অ্যান্টেনা। বাক্সের ওপরে লাগানো একটা সিগন্যাল মিটার। একপাশের সকেট থেকে ইলেকট্রিকের তার গিয়ে যুক্ত হয়েছে অ্যান্টেনার সঙ্গে।

'তারমানে, কুগারটা এখানে পৌঁছাব অনেক আগে থেকেই আসছে যে জেনে গিয়েছিলেন আপনি,' নীল বাক্সটা দেখাল কিশোর। 'কুগারের কলারে লাগানো ওটা রেডিও, তাই না? ইলেকট্রনিক যন্ত্রপাতি ব্যবহার করে ওটার সঙ্গে যোগাযোগ রক্ষা করেন আপনি।'

'এদিকে আসছে বুঝতে পারছিলাম,' ডক্টর কুপার বললেন। 'তবে ঠিক কতটা কাছে এসেছে, বুঝিনি। অত নিখুঁত নয় যন্ত্রগুলো।'

যন্ত্রপাতিগুলোর দিকে তাকিয়ে থেকে জিজ্ঞেস করল মুসা, 'কি ভাবে কাজ করে এগুলো?'

'এটাকে বলে ডিরেকশনাল অ্যান্টেনা,' ডক্টর কুপার বললেন। 'এদিক ওদিক তাক করে ঘোরাতে থাকবে যতক্ষণ না সিগন্যাল পাও। তারপর সিগন্যাল যদিও থেকে পারে, সেদিকে এগোতে হবে জন্তুটার দেখা পাওয়ার জন্যে।'

মাথা ঝাকাল কিশোর। 'মিটারের কাঁটাটা যত বেশি ওপরে উঠবে, বুঝতে হবে তত বেশি কাছে পৌঁছে গেছে।'

কৌতূহলী চোখে কিশোরের দিকে তাকালেন ডক্টর কুপার। 'আমার কাজটা তো বেশ ভাল বোঝো তুমি।'

'আপনার মত বুঝি না। ইলেকট্রনিক যন্ত্রপাতিতে মোটামুটি জ্ঞান আছে আমার,' জবাব দিল কিশোর। 'তা ছাড়া জন্তু-জানোয়ার ধরার অভিজ্ঞতাও আছে। সে-জানোই বলতে পারছি।'

মহিলাকে ভাল করে দেখল সে। লম্বাটে, চ্যাপ্টা মুখ, হালকা-পাতলা শরীর। মুখে বেশ কিছু ভাঁজ, বিশেষ করে সবুজ সদাসতর্ক চোখ ঘিরে, যেটা বলে দিচ্ছে তার থেকে বেশি সময় বাইরে বাইরেই কাটান তিনি। বয়েস তিরিশের ঘরে, তবে দেখে অতটা মনে হয় না।

‘দশ বছর ধরে কুগারটাকে বাঁচানোর চেষ্টা কুরছেন বলে কি বোঝাতে চেয়েছেন আপনি?’ জিজ্ঞেস করল কিশোর।

‘ওধু ওই একটাকেই না,’ ডক্টর কুপার বললেন, ‘বাঁচাতে চাইছি এই পর্বতে যতগুলো কুগার আছে সবগুলোকে। পার্বত্য সিংহের প্রজাতিকে। চারপাশ থেকে ঘিরে আসছে সবাই। গাছপালা কেটে, বনভূমি উজাড় করে গড়ে উঠছে শহর, বাড়িঘর; মানুষের বাসস্থান। বিরাট এলাকা নিয়ে তৈরি করছে গরু-ঘোড়ার র‍্যাঞ্চ। খনি থেকে মূল্যবান ধাতু আর তেল উত্তোলনের নামেও প্রকৃতি ধ্বংস করছে নেহায়েত কম না। অন্তত তিরিশ-চল্লিশ বর্গমাইল জায়গা না পেলে শিকার করে টিকতে পারে না কুগার। কিন্তু যে হারে ওদের জায়গা দখল করে নিচ্ছে মানুষ, এ অবস্থা চলতে থাকলে বিলুপ্ত হতে দেরি হবে না। কিন্তু ওদেরও বেঁচে থাকা প্রয়োজন।’

মরা এলকটোর দিকে ইঙ্গিত করে মুসা বলল, ‘বনের অন্য জানোয়ারেরা আপনার সঙ্গে একমত হবে না।’

‘তুমি তো খুব মজার ছেলে হে,’ হাসলেন ডক্টর কুপার। ‘একমত হতেই হবে। কারণ ওদের ভাল থাকার জন্যেও পার্বত্য সিংহের প্রয়োজন। ওই মরা এলকটোর মত বুড়ো আর অসুস্থ জানোয়ারগুলোকেই কেবল শিকার করে কুগার। দু’দিন আগে মেরেছে ওটাকে। খেয়ে শেষ করতে পারেনি। বাকিটা লুকিয়ে রেখে গেছে পরে এসে খাওয়ার জন্যে। আসবে, আমি জানতাম, তাই গাছে উঠে বসে ছিলাম।’

বেহুশ হয়ে পড়ে থাকা কুগারটার দিকে তাকাল মুসা। ‘এখন তো পেলেন। কি করবেন?’

‘দ্রুত একবার তার মেডিক্যাল চেকআপ করব। তারপর কলারের রেডিওটার ব্যাটারি বদলে দেব।’

‘একবার বদলালে কতদিন যায়?’ জানতে চাইল রবিন।

‘বছরখানেক তো ভাল থাকার কথা,’ ডক্টর কুপার বললেন। ‘কিন্তু ইদানীং লক্ষ করছি, কয়েক মাসের মধ্যেই নষ্ট হয়ে যাচ্ছে। গত ছয় মাসে তিনটা কুগারের সঙ্গে যোগাযোগ হারিয়েছি। ব্যাটারি নষ্ট হয়ে যাওয়ার কারণেই সম্ভবত। সে-জন্যেই সব এখন বদলে দিতে চাচ্ছি।’

খানিক চুপ করে থেকে বললেন আবার, ‘আমার এখন ওয়াশিংটনে থাকার কথা। রিসার্চের ফান্ড বাড়ানোর জন্যে সিনেটর আর হিশ অ্যান্ড ওয়াইন্ডলাইফ সার্ভিসের কাছে ঘ্যানর-ঘ্যানর করার চেয়ে ব্যাটারি বদলানোটা বেশি জরুরী মনে হয়েছে আমার কাছে। তাই সব বাদছাদ দিয়ে চলে এসেছি।’

গিরিখাতের দেয়ালের কাছে এগিয়ে গেলেন তিনি। কুগারটাকে দেখিয়ে বললেন, ‘ও জেগে ওঠার আগেই কাজটা মারা দরকার।’ গোয়েন্দাদের দিকে ফিরলেন। ‘ওকে নাম্নাতে সাহায্য করবে? ওপরে কাজ করার চেয়ে নিচে অনেক সুবিধে।’

‘বলুন, কি করতে হবে?’ এগিয়ে গেল মুসা।

কিশোর আর রবিনও গিয়ে দাঁড়াল তার পাশে।

তাকটা হাতের নাগালের বাইরে। দাঁড়িয়ে হাত বাড়িয়ে ছোঁয়া যায় না। লাফ দিয়ে উঠে কার্নিসটা ধরে ঝুলে পড়ল মুসা। বেয়ে উঠে গেল ওপরে। হাত বাড়িয়ে টেনে তুলল কিশোরকে। কি করে নামালে সুবিধে হবে, নিচ থেকে বলে দিতে লাগলেন ডক্টর কুপার। দড়ি সরবরাহ করলেন। ওপর থেকে কুগারটাকে নামিয়ে দিল কিশোর আর মুসা। ধরে ধরে মাটিতে নামাল রবিন আর ডক্টর কুপার। কাজটা মোটেও সহজ হলো না। আকার দেখে অত ভারী যে বোঝা যায় না।

‘বাপরে বাপ, মেলা ওজন!’ মুসা বলল। ‘দুশো পাউন্ডের কম হবে না।’

‘গত সেপ্টেম্বরে একশো ঊনআশি ছিল,’ ডক্টর কুপার জানালেন। ‘যতগুলো কুগারকে কলার পরিয়েছি, তারমধ্যে এটা সবচেয়ে বড়।’ হাঁটু গেড়ে বসে আঙুল দিয়ে ঠোট সরিয়ে দাঁত দেখতে শুরু করলেন তিনি।

‘এ পর্যন্ত মোট ক’টা কুগারকে কলার পরিয়েছেন?’ জানতে চাইল কিশোর।

প্যাক থেকে একটা স্টেথোস্কোপ টেনে বের করতে করতে ডক্টর কুপার বললেন, ‘কথা বলার সময় নেই এখন। কাজটা সারতে সময় লাগবে আমার। ওর জেগে ওঠার সময় কাছাকাছি থাকাটা ঠিক হবে না তোমাদের। আধঘণ্টার মধ্যেই জেগে উঠবে।’

এক মুহূর্ত দ্বিধা করে বললেন, ‘আমাকে সাহায্য করার জন্যে ধন্যবাদ। কিন্তু আমি যখন কাজ করি, দয়া করে তোমরা কাছে না থাকলেই খুশি হব।’

‘আমিও খুশি,’ সঙ্গে সঙ্গে জবাব দিল মুসা। ‘কুগারের সঙ্গে কুস্তি লড়ার কোন ইচ্ছেই আমার নেই। কিন্তু কথা হলো, আপনি একা পারবেন তো?’

হেসে বললেন ডক্টর কুপার, ‘একা কাজ করতেই অভ্যস্ত আমি। নিশ্চিন্তে চলে যাও।’

তিন

বিশাল এক পার্বত্য সিংহের সঙ্গে ডক্টর কুপারকে একা ফেলে আসার ইচ্ছে ছিল না কিশোরের। কিন্তু কিছু বলে লাভ হবে না বুঝতে পারল। যে পথে যাচ্ছিল, এগিয়ে চলল। আরও আধঘণ্টা স্কি করার পর উত্তরের পর্বত চূড়ার কাছে কালো মেঘ জমতে দেখল। এগিয়ে আসছে ওদের দিকে।

পাহাড়ের ঢালের মাঝামাঝি জায়গায় ক্যাম্প করার জায়গা বেছে নিল কিশোর। ঝোড়ো বাতাসের ঝাপটা কম লাগবে এখানে। সঙ্গে করে আনা হালকা তাঁবুটা খাড়া করতে সময় লাগল না। খুদে একটা বুটেন স্টোভ জ্বেলে খাবার গরম করে খেয়ে নিল ওরা। সূর্য ডোবার সঙ্গে সঙ্গে ঢুকে পড়ল স্নীপিং ব্যাগে।

সারাদিনে প্রচুর পরিশ্রম করেছে। মুহূর্তে ঘুমিয়ে পড়ল। রাতে মাঝে মাঝেই চমকে চমকে জেগে উঠল সবাই, বাতাসের গর্জনে। ক্রমাগত তাঁবুর গায়ে ঝাপটা মারতে থাকল ঝোড়ো হাওয়া। তাঁবু উড়িয়ে নিয়ে যাওয়ার ভয়ে শঙ্কিত হয়ে থাকল ওরা।

ভোর হতে হতে তুমারে অর্ধেক ঢেকে গেল তাঁবুটা। তাতে ভালই হলো।

নিচের ফাঁকগুলো পুরোপুরি বন্ধ হয়ে গেল। বাতাস ঢুকতে পারছে না আর। গরম রইল তাঁবুর ভেতরটা। হাই-প্রোটিন গ্র্যানোলা বার দিয়ে নাস্তা সারল ওরা। ঝড় থামার অপেক্ষা করতে লাগল। ন'টার পর তুষারপাত বন্ধ হলো মিনিট গনোরোর জন্যে। তারপর আবার শুরু হলো। দশটার আগে সূর্য দেখা দিল না।

‘এখান থেকে ট্রেইলটা কোনদিকে গেছে?’ তাঁবু গোটাতে গোটাতে প্রশ্ন করল মুসা।

গাছের দিকে তাকাল কিশোর। ডালগুলো সব নুয়ে পড়েছে তুষারের ভারে। ‘আর না এগিয়ে মনে হয় ফিরে যাওয়াই ভাল।’

ওর দিকে তাকিয়ে রইল মুসা। ‘কেন? খাবারে তো ঘাটতি পড়েনি। পাঁচ দিন অনায়াসে চলে যাবে।’

‘তুষার-ধস নামে এ সব অঞ্চলে যখন তখন,’ কিশোর বলল। ‘প্রচুর তুষারপাত হয়েছে। গাছের অবস্থা দেখেছ? পাহাড়ের ঢালে কি পরিমাণ জমেছে বোঝা যায়। এগোনোর চেষ্টা করলে বিপদে পড়ব।’

রবিনেরও ফিরে যাবার ইচ্ছে।

‘তাহলে আর কি, ফিরেই চলো,’ হতাশ মনে হলো মুসাকে। এত তাড়াতাড়ি এলক স্প্রিং শহরে ফিরে যেতে ইচ্ছে করছে না তার। কিন্তু উপায়ও নেই।

দুপুর হয় হয়, এমন সময় গিরিখাতের সেই জায়গাটাতে পৌঁছল ওরা, যেখানে ক্ষুধার্ত কুগারটার সঙ্গে রেখে গিয়েছিল ডক্টর কুপারকে।

একটা পাইন গাছের গোড়ায় জমা বরফের স্তূপ থেকে কয়েক ইঞ্চি বেরিয়ে থাকা ডক্টর কুপারের লাল ব্যাকপ্যাকটা চোখে পড়ল কিশোরের। সেটার দিকে ইঙ্গিত করে বলল, ‘মনে হচ্ছে এই এলাকাতেই রাত কাটিয়েছেন ডক্টর।’

‘কিন্তু তিনি গেলেন কোথায়?’ এগোতে গিয়ে কি যেন ঘষা লাগল রবিনের স্কি'র তলায়। একটা ধাতব জিনিস চোখে পড়ল তার। নিচু হয়ে তুলে নিল। তুষার সরাতেই বেরিয়ে পড়ল ছয় ইঞ্চি লম্বা একটা সিলিন্ডার, খুদে একটা অ্যান্টেনা লাগানো। আকারের তুলনায় যথেষ্ট ভারী। ‘এটা খুঁজতে গেলেন নাকি?’

‘উহু,’ গম্ভীর হয়ে গেছে কিশোরের কণ্ঠ, ‘খোঁজাখুঁজির পর্যায়ে নেই উনি এখন।’ লাল ব্যাকপ্যাকটার ওপাশে, পাইন গাছটা থেকে দূরে দৃষ্টি স্থির হয়ে আছে তার। আরেক ঝলক লাল রঙ চোখে পড়ছে। ব্যাগের রঙের চেয়ে গাঢ় রঙ। গোলাকার। তুষারের মধ্যে থাকাতে অনেক বেশি স্পষ্ট লাগছে। রক্ত! বুঝতে সময় লাগল না তার। নিখর হয়ে পড়ে থাকতে দেখল ডক্টর মারিসা কুপারকে।

ছুটে গেল ওরা।

চিৎ হয়ে পড়ে আছেন ডক্টর কুপার। মুখটা কাত হয়ে গিয়ে গাল ঠেকে আছে বরফে। শরীরের ওপর তুষারের আস্তর। বুকের কাছটা রক্তে লাল।

স্কি খুলে নিয়ে হাঁটু গেড়ে তাঁর কাছে বসে পড়ল কিশোর। ঘাড়ের কাছে আঙুল রেখে নাড়ি দেখল। ‘দুর্বল,’ বলল সে। ‘তাড়াতাড়ি হাসপাতালে নিয়ে যেতে পারলে হয়তো বাঁচানো যাবে।’ রবিনের দিকে তাকাল সে, ‘রবিন, ফাস্ট এইড বক্সটা দাও জলদি!’

‘কুগারটার কাছে একা ফেলে যাওয়া মোটেও উচিত হয়নি,’ মুসা বলল।

ক্ষতের দিকে তাকিয়ে নিচের ঠোটে চিমটি কাটল একবার কিশোর। 'কুগার যে আগ্নেয়াস্ত্র ব্যবহার করে, জানতাম না!'

'মানে?' হাঁ হয়ে গেল মুসা।

মুসার দিকে মুখ তুলল কিশোর। 'গুলি করা হয়েছে।'

'গুলি!' কিশোরের কথার প্রতিধ্বনি করল মুসা। 'কে গুলি করল?'

'সেটা নিয়ে পরে ভাবা যাবে। এখন তাকে হাসপাতালে নেয়ার ব্যবস্থা করা দরকার।'

'নাড়াচাড়া করাটা কি ঠিক হবে?'

'না নেড়ে নেব কি করে?'

'আমি আর রবিন বরং থেকে যাই এখানে,' মুসা বলল। 'তুমি গিয়ে সাহায্য নিয়ে এসো।'

মাথা নাড়ল কিশোর। 'একবারের জায়গায় তাতে তিনবার যাতায়াত করা লাগবে। এলক স্প্রিঙে যাব, ডাক্তার নিয়ে ফিরে আসব, তারপর ডক্টর কুপারকে নিয়ে আবার শহরে ফিরে যাব—ততক্ষণ তিনি টিকবেন বলে মনে হয় না।'

ক্ষতটায় ব্যান্ডেজ বাঁধতে আরম্ভ করল কিশোর। 'তার কি আর পোল দিয়ে একটা ফ্রেম বানাব প্রথমে। তার সঙ্গে গাছের ডাল বেঁধে একটা কাজ চলার মত স্লেজ বানাব। তাতে পাতা বিছিয়ে গদি তৈরি করে তার ওপর ডক্টরকে রেখে টেনে নিয়ে যাওয়া খুব একটা কঠিন হবে না। কি বলো?'

এক মুহূর্তও দেরি না করে স্লেজ বানাতে বসল মুসা। আঙুল ব্যবহারে সুবিধের জন্যে দস্তানা দুটো খুলে নিয়ে পকেটে ভরে রাখল। তাকে সাহায্য করল রবিন আর কিশোর।

ছোট সিলিন্ডারের মত জিনিসটার ওপর আবার চোখ পড়তে কিশোরকে দেখিয়ে জিজ্ঞেস করল রবিন, 'ট্রান্সমিটার নাকি?'

'মনে হয়। রেখে দাও ডক্টরের ব্যাগে,' পাইনের ডাল ছেঁটে সমান করতে করতে জবাব দিল কিশোর।

বিচিত্র স্লেজটার ওপর সাবধানে ডক্টর কুপারের অজ্ঞান দেহটা তুলে চিৎ করে ওইয়ে দিল ওরা। স্লেজে দড়ি দিয়ে বেঁধে টেনে নিয়ে চলল গিরিখাতের মাঝখান দিয়ে যাওয়া ট্রেইল ধরে। কাজটা মোটেও সহজ নয়। দেখতে দেখতে ঘামে ভিজে যেতে লাগল ওদের শরীর।

বিকেলবেলা এসে পৌঁছল ট্রেইলের মাথায়, যেখানে গাড়িটা রেখে গিয়েছিল। ভাড়া করে এনেছে। একটা সেডান গাড়ি। ডক্টরকে তুলে ওইয়ে দিল পেছনের 'সীটে'।

গাড়ি চালাল মুসা। নতুন জমা তুষারের আস্তরের ওপর দিয়ে গাড়ি চালাতে যথেষ্ট সাবধান হতে হলো ওকে।

পিচ্ছিল পাহাড়ী পথ। একটু এদিক ওদিক হলে খাদে পড়ে মরতে হবে। এলক স্প্রিঙে যেতে মাত্র পাঁচ মাইল পথ পেরোতে একটা ঘণ্টা লেগে গেল।

নীল সাইনবোর্ডের ওপর সাদা অক্ষরে লেখা ইংরেজি 'এইচ' শব্দটা দেখে স্বস্তির নিঃশ্বাস ফেলল। 'পাওয়া গেছে হাসপাতালটা,' কিশোরকে নয়, যেন

নিজেকেই শোনাঁল মুসা।

আরেকবার ডক্টর কুপারের নাড়ি দেখল কিশোর। এ নিয়ে কতবার যে দেখল, বলতে পারবে না। 'নাহ্, চলছে। খুব দুর্বল।'

চার

নীল সাইনবোর্ডের নির্দেশক দেখে দেখে বড় একটা বিল্ডিংয়ের সামনে গাড়ি থামাল মুসা। কাউন্টি হাসপাতালটা এত নতুন আর এত বড় হবে কল্পনা করেনি।

ডক্টর কুপারের ক্ষতটার দিকে একবার চোখ বুলিয়েই সোজা সার্জারিতে নিয়ে যেতে নার্সকে হুকুম দিলেন ইমার্জেন্সির ডাক্তার।

প্রশ্নের ঝাঁক ছুটে আসতে শুরু করল গোয়েন্দাদের দিকে: তোমরা কে? কেন গিয়েছিলে ওখানে? কখন ওলি খেয়েছেন ডক্টর কুপার? কি করে ঘটল ঘটনাটা? আনলে কি করে?

ওয়েইটিং রুমে অপেক্ষা করতে লাগল তিন গোয়েন্দা। প্রায় এক ঘণ্টা পর সার্জারি থেকে বেরিয়ে এসে ডাক্তার জানালেন, আপাতত বেঁচে গেছেন ডক্টর কুপার। তবে কখন জ্ঞান ফিরবে, আদৌ ফিরবে কিনা, নিশ্চিত হয়ে বলতে পারলেন না।

ডাক্তার চলে গেলে মুসাকে বলল কিশোর, 'পুলিশকে জানানো দরকার। থানাটা খুঁজে বের করতে হবে।'

'তার আর দরকার হবে না,' ভারী কণ্ঠে জবাব শোনা গেল। 'ফিরে তাকাল তিনজনেই। মোটাসোটা একজন মানুষ। ঝুলে পড়া গাঁফ। ওয়েইটিং রুমে ওদের সঙ্গেই বসে ছিলেন এতক্ষণ। কিন্তু নজর দেয়নি গোয়েন্দারা। ধূসর রঙের ছোঁয়া লেগেছে তাঁর চুল আর গাঁফে। চুল পুরোটা দেখা যাচ্ছে না স্টেটসন হ্যাটে ঢেকে রয়েছে বলে, তবে যেটুকু দেখা যাচ্ছে তাতেই রঙটা স্পষ্ট। র‍্যাঙ্কারদের মত পোশাক পরেছেন।

'আপনাকে তো চিনলাম না?' কিশোরের প্রশ্ন।

কানায় ঠেলা দিয়ে হ্যাটটা পেছনে সরিয়ে উঠে দাঁড়ালেন ভদ্রলোক। 'আমি আর্ক হ্যামিলটন।' শার্টের পকেট থেকে পাতলা একটা চামড়ার কেস বের করে আনলেন। অভ্যস্ত হাতে ঝাড়া দিয়ে খুলে ফেললেন পুরোটা। ফ্লোরেসেন্ট আলোয় ঝিক করে উঠল সোনালি ব্যাজ। 'আমি ঐখানকার শেরিফ। একজন বন্ধুকে দেখতে হাসপাতালে এসেছিলাম। এ সময় তোমরা ঢুকলে মারিসা কুপারকে নিয়ে।'

'তিনি যে ওলি খেয়েছেন, এ কথা তো তাহলে জেনেই গেছেন,' কিশোর বলল। 'এতক্ষণ ওখানে বসে বসে আমাদের দিকে নজর রেখেছিলেন, বোঝার চেষ্টা করছিলেন, আমাদের কথা কতটুকু বিশ্বাস করা যায়, তাই না?'

বিচিত্র হাসি দেখা দিল শেরিফ হ্যামিলটনের ঠোটে। ঘুরিয়ে জবাব দিলেন কিশোরের প্রশ্নের, 'বিশ বছর কোন কাজে অভিজ্ঞ হওয়ার পর প্রাথমিক কাজগুলো আর তেমন কঠিন থাকে না, কি বলো?' কোটবে বসা চোখে আলো ঝিলিক দিল

তার। বোঝা গেল, এখনও পুরোপুরি বিশ্বাস করে উঠতে পারেননি ওদের।

‘আমি কিশোর পাশা,’ পরিচয় দিল সে। ‘ও মুসা আমান। আর ও রবিন মিলফোর্ড। আমার বন্ধু। ছুটি কাটাতে এসেছি আমরা।’

দীর্ঘ একটা মুহূর্ত নীরব থেকে শেরিফ বললেন, ‘রাস্তার ধারে মারিসাকে খুঁজে পেয়েছ বলছ?’

‘হ্যাঁ,’ জবাব দিল কিশোর। ‘এমন করে বলছেন আপনি, মনে হচ্ছে ডক্টর কুপারকে চেনেন?’

মৃদু হাসলেন শেরিফ। ‘এখানকার কে ওকে না চেনে? এ অঞ্চলের সবচেয়ে বড় ব্যাংগারদের একজন ছিলেন ওর বাবা। এখন আমার কয়েকটা প্রশ্নের জবাব দাও দেখি।’

‘কি প্রশ্ন?’

‘পর্বতের ওখানে আসলে কি করতে গিয়েছিলে তোমরা?’

‘কি করতে,’ সহজ ভঙ্গিতে জবাব দিল কিশোর।

‘ঠিক কোনখানটাতে?’

ম্যাপ বের করে দেখাল কিশোর, কোন জায়গায় কি করছিল ওরা, আর কোনখানে খুঁজে পেয়েছে ডক্টর কুপারকে।

ভীক্ষু দৃষ্টিতে পুরো একটা মিনিট চুপচাপ গোয়েন্দাদের দিকে তাকিয়ে থাকলেন শেরিফ। তারপর বললেন, ‘একআধটু শিকারের ইচ্ছেও হয়েছিল নিশ্চয়, তাই না? হরিণ মারতে গিয়ে দুর্ঘটনাক্রমে গুলি লাগিয়ে দিয়েছ মারিসার বুকে।’

শুনে তেমন অবাক হলো না কিশোর। এ রকম সন্দেহই আশা করেছিল শেরিফের কাছে। একজন দক্ষ গোয়েন্দা সহজ সম্ভাবনাগুলোই খুঁটিয়ে দেখবে প্রথমে।

‘না,’ শান্তকণ্ঠে জবাব দিল কিশোর, ‘আমরা শিকারী নই। আমাদের মালপত্র চেক করে দেখতে পারেন। অস্ত্র তো দূরের কথা, শিকারের সঙ্গে সম্পর্কিত কোন জিনিসই খুঁজে পাবেন না।’

শ্রাগ করলেন শেরিফ। ‘জানি। অপরাধের লক্ষণ প্রকাশ পাচ্ছে না তোমাদের আচরণে। চিন্তিত ভঙ্গিতে গোঁফে টোকা দিলেন তিনি। ‘ক’টার সময় পেয়েছ তাকে?’

কিশোর জানাল, ‘আমার ঘড়িতে তখন এগারোটা সাতেরো।’

অবাক হলো মুসা। এ রকম অবাক তাকে বহুবার করেছে কিশোর। এত উদ্বেজনার মাঝে ঘড়ি বলে যে একটা জিনিস আছে, সেটাই মনে ছিল না তার, কিন্তু কিশোর ঠিকই সময়টা দ্রুত রেখেছে।

‘তারমানে,’ হিসেব করে বললেন শেরিফ, ‘গুলি খাওয়ার আধঘন্টা পরে গিয়েছ তোমরা।’

চোখের পাতা সরু হয়ে এল কিশোরের। ‘আমরা যখন তাঁকে পেয়েছি, গায়ের ওপর তুমারের স্তর জমাতে আরম্ভ করেছে কেবল। তারমানে আধঘন্টাই হবে। কিন্তু আপনি জানলেন কি করে?’

‘মারিসার হাতে একটা ঘড়ি ছিল,’ শেরিফ জানালেন। ‘দশটা ছেচল্লিশ মিনিটে

বন্ধ হয়ে গেছে। কাঁচ ভাঙা। পড়ে যাওয়ার সময় পাথরে বাড়ি লেগেছিল হয়তো।

খবরটা অবাক করল কিশোরকে। ঘড়িটা কি করে নজর এড়াল তার! কল্পনায় ঘটনাস্থলটা দেখার চেষ্টা করল আবার। ডক্টর কুপারের হাতে দস্তানা ছিল। তাতে ঢেকে থাকতেই ঘড়িটা দেখেনি সে। কিন্তু কোথায় যেন কি একটা গোলমাল রয়ে গেছে। খাপে খাপে মিলছে না।

স্কি জ্যাকেট পরা লম্বা একজন লোক হুড়মুড় করে ঘরে ঢুকল। চিন্তাসূত্র ছিন্ন হয়ে গেল কিশোরের। দুই গোয়েন্দার দিকে এক নজর তাকিয়েই চোখ ফেরাল শেরিফের দিকে। 'মারিসা কেমন আছে?'

নতুন লোকটাকে তীক্ষ্ণ দৃষ্টিতে দেখতে লাগল কিশোর। বরফ-নীল চোখ। নাটো করে ছাঁটা হালকা বাদামী চুল। ছিপছিপে সুগঠিত শরীর। দীর্ঘ সময় ঠাণ্ডা অঞ্চলের রোদ-বাতাসে বাইরে পড়ে থাকার ঘোষণা দিচ্ছে মুখের চামড়ার পোড়া রঙ।

'অবস্থা বিশেষ ভাল না, ফ্র্যাঙ্ক হ্যান,' সত্যি কথাটাই জানালেন আগন্তুককে শেরিফ। 'বেঁচে যে আছে এখনও, ওই ছেলেগুলোর বদান্যতায়। একটা ধন্যবাদ দাও কিশোর পাশা, মুসা আমান আর রবিন মিলফোর্ডকে। তোমরা কথা বলো, আমি কিছু খোঁজ-খবর নিয়ে আসি।' দরজার কাছে গিয়ে ফিরে তাকালেন গোয়েন্দাদের দিকে। 'আমি ফিরে না আসা পর্যন্ত থেকে, নাকি?' জবাবের অপেক্ষা না করে চলে গেলেন তিনি।

অবাক দৃষ্টিতে তিন গোয়েন্দার দিকে তাকিয়ে আছে ফ্র্যাঙ্ক হ্যান। 'কিছু তো বুঝতে পারছি না। তোমরা কি মারিসার সঙ্গে কাজ করছ? তার অ্যাসিস্ট্যান্ট?'

'না,' মাথা নাড়ল কিশোর। 'যথাসময়ে যথাস্থানে পৌঁছে গিয়েছিলাম, বাস। আপনি কি তাঁর কিছু হন?'

মৃদু হাসি ফুটল ফ্র্যাঙ্ক হ্যানের ঠোঁটে। 'না। তবে দীর্ঘ দিনের বন্ধু আমরা। বহুদিন ওর সঙ্গে কাজও করেছি আমি, ওর গবেষণায় সাহায্য করেছি।'

'ডক্টরের ওপর আক্রোশ আছে, এমন কাউকে চেনেন আপনি?'

'চিনি।' চোখের পাতা সরু হয়ে গেল ফ্র্যাঙ্ক হ্যানের। 'বুকেগুনে কেউ গুলি করেছে নাকি?'

'করতে পারে : আপনার কি ধারণা?'

জানালার কাছে এগিয়ে গেল ফ্র্যাঙ্ক হ্যান। দূরের পর্বতের দিকে তাকাল। 'আমিও তোমার সঙ্গে একমত,' বিধায় ভরা কণ্ঠ। 'এটা একটা ক্যাটল টাউন। যে কোন ব্যাধারের কাছে কুগার হলো একটা মূর্তিমান আপদ। সেই কুগারকে রক্ষা করতে চাইছে মারিসা। কুগার শিকার এখন অনেক কমিয়ে দেয়া হয়েছে সরকারী ভাবে। শীতকালে প্রতি সীজনে প্রতিজনে একটার বেশি না। কিন্তু সেটাও সহ্য করতে রাজি নয় মারিসা। সে মারতেই দিতে চায় না। ওয়াশিংটনের একটা জানোয়ার সংরক্ষণ সংস্থার সদস্য হিসেবে কাজ করেছে সে। ন্যাশনাল ফরেস্টগুলোতে শিকার করাই বন্ধ করে দিতে চাইছে। তাতে রেগে গেছে স্থানীয় কিছু ক্যাটল ব্যারন।'

'বিশেষ কারও নাম উল্লেখ করতে পারেন?' জিজ্ঞেস করল কিশোর।

‘তা পারি,’ বলতে সামান্য দ্বিধা করল ফ্র্যাঙ্ক হ্যান। ‘এ এলাকার সবচেয়ে বড় র‍্যাঙ্গার জেরাল্ড থার্সটন। মারিসার সঙ্গে ভাল একটা লাগালাগি হয়ে গেছে তার। অবৈধ ভাবে কুগার শিকারের অভিযোগ এনে তাকে অ্যারেস্ট করানোরও চেষ্টা করেছে মারিসা। প্রমাণ করতে পারেনি বলে রক্ষা।’

‘আর কেউ?’

‘আছে।’ সামান্য বিরতি দিয়ে জবাব দিল ফ্র্যাঙ্ক হ্যান, ‘রাম্পা ওয়ালাপ্যাটুকুংক। তার গোত্রের লোকেরা তাকে যে নামে ডাকে সেটার ইংরেজি করলে দাঁড়ায় লঙ হার্ট। সহজ বলে আমরাও ওই নামেই ডাকি। ও একজন নেটিভ আমেরিকান। ন্যাশনাল ফরেস্টের একটা বিরাট অংশ তার গোত্র ইউটিদের সম্পত্তি বলে দাবি করছে। ওই জায়গার প্রাণীকুলকে রক্ষা করারই চেষ্টা চালাচ্ছে মারিসা আর তার দল।’

‘রাম্পা ওয়ালাপ্যাটুকুংক।’ কিশোরের দিকে তাকাল মুসা, ‘ইনডিয়ান নাম না?’

জবাব দিল ফ্র্যাঙ্ক হ্যান, ‘হ্যাঁ, ইনডিয়ান। ইউটি ইনডিয়ান।’

‘হুঁ,’ নিচের ঠোট কামড়াল কিশোর। ‘দুজনের নাম জানা গেল। আর কেউ?’

‘আছে। তবে এই দুজনই প্রধান।’

‘আপনারও কি র‍্যাঙ্ক আছে?’

হাসল ফ্র্যাঙ্ক হ্যান। ‘না, আমি ওসব বুট-ঝামেলায় নেই। শহরে একটা ছোটখাট দোকান করি, ক্যাম্প করার প্রয়োজনীয় সমস্ত জিনিসপত্র পাবে আমার দোকানে।’

‘ভালই হলো,’ হাসল কিশোর। ‘বাড়ি ফেরার আগে সময় পেলে যাব আপনার দোকানে। কয়েকটা জিনিস দরকার আমাদের।’

‘এত জলদি বাড়ি ফেরা হচ্ছে না তোমাদের,’ দরজার কাছ থেকে শোনা গেল শেরিফের কণ্ঠ। কতক্ষণ ধরে ওখানে দাঁড়িয়ে কথা গুনছিলেন তিনি, বুঝতে পারল না কিশোর।

‘অসমাপ্ত কিছু কাজ শেষ করতে হবে আমাদের,’ জ্রুটি করলেন শেরিফ। পেছনে দাঁড়ানো তার দুজন ডেপুটি। পাথরের মত মুখ করে রয়েছে। দুই গোয়েন্দার উদ্দেশে মাথা ঝাঁকালেন তিনি, ‘এসো আমাদের সঙ্গে।’

‘আপনি কি আমাদের অ্যারেস্ট করতে চাইছেন?’ শেরিফের চোখে চোখে তাকিয়ে বলল কিশোর, ‘শক্ত প্রমাণ দরকার হবে তাহলে।’

‘অ্যারেস্ট?’ ঝোপের মত দেখতে এক ভুরু উঁচু করলেন শেরিফ। ‘তা করব কেন? অ্যাভালান্স হোটেলে তোমাদের জন্যে রুম বুক করা হয়েছে, শহর কর্তৃপক্ষের তরফ থেকে।’ বুড়ো আঙুল তুলে কাঁধের ওপর দিয়ে দুই ডেপুটিকে দেখালেন তিনি, ‘মারটিন তোমাদেরকে গাড়িতে করে পৌঁছে দেবে ওখানে। আর কিছু কাজ সেরে তোমাদের গাড়িটা নিয়ে যাবে ল্যানি।’

হোটেলে রুম বুক। তারমানে নজর বন্দী। ‘কিছু কাজ সেরে’ বলে কি বোঝাতে চাইছেন শেরিফ, বুঝতে অসুবিধে হলো না কিশোরের। গাড়িটাতে সার্চ করা হবে। খোজা হবে তন্নতন্ন করে। শেরিফের কথায় কিশোর রাজি না হলে কি করবেন তিনি, বলা কঠিন। তবে সেটা ভাল কিছু হবে না। তাই আপাতত মুখ বন্ধ রেখে যা করতে

বলা হচ্ছে, সেটাই করার সিদ্ধান্ত নিল সে। এত তাড়াতাড়ি রাগানো উচিত হবে না শেরিফকে।

পাঁচ

পরদিন সকাল ঠিক সাতটায় এসে গোয়েন্দাদের দরজায় টাকা দিল শেরিফ হ্যামিলটনের নির্বাক ডেপুটি মারটিন। গায়ে চামড়ার জ্যাকেট, ভেড়ার লোমের লাইনিং দেয়া।

‘এতদিনে ছুটিটা বেশ জমে উঠছে মনে হয়,’ মুসা বলল, গাড়িতে করে ওদের নিয়ে এসে যখন বেড়া দেয়া একটা জায়গায় ঢুকল মারটিন।

জায়গাটা হেলিপ্যাড। হাসপাতালের পেছনে। একটা হেলিকপ্টার অপেক্ষা করছে। সকালের নির্মল বাতাস কেটে ঘুরতে শুরু করেছে ওটার রোটর ব্লেড। কাদের জিনিস, গায়ে লেখা নেই। ভেতরে বসে আছেন শেরিফ আর পাইলট।

পেছনের ছোট সীটটায় গাদাগাদি করে বসতে হলো তিন গোয়েন্দাকে। কানে হেডসেট পরতে দেয়া হলো তিনজনকেই, শেরিফ আর পাইলট যে রকম পরেছে। মুখের সামনে খুদে মাইক্রোফোন। রোটরের বিকট শব্দের মধ্যেও কথা চালালো যাবে এই হেডসেট আর মাইক্রোফোনের সাহায্যে।

‘এত ছোট শহরের তুলনায় আপনাদের হাসপাতালটা কিন্তু বিরাট,’ কিশোর বলল।

‘ওধু শহর তো নয়, পুরো কাউন্টির জম্যেই বানানো হয়েছে,’ শেরিফ জানালেন। ‘ল্যান্ডিং প্যাডটা তৈরি করা হয়েছে অ্যামবুলেন্স চপারের (হেলিকপ্টার) জন্যে।’

‘এটা কি হাসপাতালের হেলিকপ্টার?’

‘না। জরুরী কাজের কথা বলে ধার নেয়া হয়েছে।’

‘কোথায় যাচ্ছি আমরা?’ জিজ্ঞেস করল মুসা।

‘সত্যি জানো না?’ শেরিফের কণ্ঠ জোরাল হয়ে বাজল মুসার কানে।

চুপ হয়ে গেল মুসা। কোথায় যাচ্ছে ওরা, অনুমান করতে পারছে।

কি করে যে জায়গাটা পার হয়ে আসতে কয়েক ঘণ্টা লেগেছিল ওদের, হেলিকপ্টারে করে সেটা পেরোতে লাগল মাত্র কয়েক মিনিট। যে জায়গায় ওলি খেয়েছেন ডক্টর কুপার, সেখান থেকে কিছুটা দূরে কপ্টার নামাতে বললেন শেরিফ। আগের দিন কিশোরদের রেখে যাওয়া ক্রির দাগ স্পষ্ট হয়ে আছে বরফে। সেটা ধরে এগোল ওরা।

পুরো এলাকাটা ঘুরে দেখতে লাগলেন শেরিফ। মাঝে মাঝে নিচু হয়ে ঝুঁকে দেখছেন। পাইন গাছটার কাছে রক্তের দাগের কাছে এসে দাঁড়িয়ে পেলেন। তিনশো ষাট ডিগ্রি পাক খেয়ে ভালমত দেখলেন গিরিখাতটা। গোয়েন্দাদের দিকে তাকালেন, ‘এখানেই পেয়েছ তাকে, তাই না?’

‘হ্যাঁ,’ মুসা বলল।

ঠেলা দিয়ে হ্যাটটা পেছনে সরিয়ে মাথা চুলকালেন শেরিফ। 'একটা ব্যাপারে শিওর হয়ে গেলাম, কাছে থেকে গুলি করা হয়নি তাকে।'

'কি করে শিওর হলেন?' মুসা জিজ্ঞেস করল।

'সহজ,' শেরিফের হয়ে মুসার প্রশ্নের জবাবটা দিল কিশোর, 'কি'র দাগ আছে মাত্র তিন সেট। গতকাল আমরা যেগুলো রেখে গিয়েছিলাম।'

'ব্যাপারটা অ্যান্ড্রিডেন্টও হতে পারে,' শেরিফ বললেন। 'কোন শিকারী হয়তো হরিণ-টরিণকে গুলি করেছিল, মিস হয়ে এসে লেগেছে মারিসার গায়ে। বেচারী বুঝতেই পারেনি কারও গায়ে লেগেছে গুলিটা।'

'আমি সেটা বিশ্বাস করি না,' সঙ্গে সঙ্গে জবাব দিল কিশোর।

এক ভুরু উচু করলেন শেরিফ। 'কেন?'

'কেন, আপনি বুঝতে পারছেন না!' গম্ভীর স্বরে জবাব দিল কিশোর। 'আমাদেরওলো ছাড়া আশেপাশে আর কোন কি'র দাগ নেই। তারমানে গিরিখাতের ওপরে ছিল শিকারী। তুমার পড়ছিল না তখন। ওপর থেকে নিচের শিকারের দিকে গুলি চালালে এ জায়গাটা পরিষ্কার দেখতে পাওয়ার কথা তার।'

'এটাকে দুর্ঘটনা হিসেবেই ধরে নিতে হচ্ছে,' শেরিফ বললেন। 'কারণ এ ছাড়া আর কোন ব্যাখ্যা খুঁজে পাচ্ছি না আমি আপাতত।' তিন গোয়েন্দার দিকে তাকালেন তিনি। 'এখন তোমরা মুক্ত। যখন খুশি চলে যেতে পারো শহর ছেড়ে।'

'ভেবে দেখব,' জবাব দিল কিশোর।

আরও কয়েক মিনিট ঘোরাঘুরি করে কাটাল ওখানে ওরা। কিশোর লক্ষ করল, শেরিফ আর তেমন সূত্র খুঁজে বেড়াচ্ছেন না। সিদ্ধান্ত নিয়ে ফেলেছেন মনে হয় তিনি।

হোটেল ফিরে এল তিন গোয়েন্দা। সকাল শেষ হতে এখনও অম্লক দেরি। কেন তদন্তে অনিচ্ছা জন্মেছে শেরিফের, মনে মনে একটা ব্যাখ্যা খাড়া করে ফেলল কিশোর। 'ফ্র্যাঙ্ক হ্যান যে র‍্যাঙ্গারের কথা বলল আমাদের-জেরাল্ড থার্সটন-নিশ্চয় এখানে সাংঘাতিক প্রভাব-প্রতিপত্তি তার।'

'তারমানে,' কিশোরের কথা ধরে খেল রবিন, 'থার্সটনকে সন্দেহ করেই তদন্তের ইচ্ছা ত্যাগ করেছেন শেরিফ?'

'হু,' মাথা নাড়ল কিশোর, 'প্রমাণের অপেক্ষায় আছেন তিনি। জোরাল প্রমাণ জোগাড় করতে পারলে সর্বশক্তি নিয়ে ঝাঁপিয়ে পড়বেন থার্সটনের ওপর।'

'সুতরাং প্রমাণটা এখন জোগাড় করে দিতে হবে আমাদের, এই তো?' চোড়া হাসি ছড়িয়ে পড়ল মুসার মুখে। 'তাহলে কি বাদ। পায়ে দিতে হবে র‍্যাঙ্গারের কাঁটাওয়ালা জুতো, "গরুর" সঙ্গে কথা বলতে যাওয়ার জন্যে।'

হয়

থার্সটনের র‍্যাঙ্ক খুঁজে বের করাটা মোটেও কঠিন হলো না। বরং এক্ষুণ্ণে এমন

কাউকে পাওয়া দুস্কর, যে দুই হাজার একর জমির ওপর তৈরি ব্যাঙ্কটা চেনে না।

মগজের মধ্যে যে চিত্রটা নিয়ে দেখতে এসেছিল মুসা, সেই পুরানো ওয়াইল্ড ওয়েস্ট সিনেমায় দেখা ব্যাঙ্কের আদল, তার সঙ্গে মিলের চেয়ে অমিলই বেশি। লম্বা কাঠের তৈরি চালাঘর, গোলাঘর আর শ্রমিকদের থাকার ঘরগুলো পুরানো ধাঁচে তৈরি। কিন্তু বরফে চলার উপযোগী স্নো-মোবাইল আর নানা রকম গাড়ির বহর দাঁড়িয়ে আছে যে বাড়িটার সামনে, সেটা অত্যাধুনিক।

গেটে দাঁড়ানো গ্রহরীর মাথায় স্টেটসন হ্যাট, পরনে নীল জিনস। মোটামুটি পুরানো আমলের কাউবয়দের মতই তবে কোমরের বেলেট খুলছে রিভলভার বা সিঙ্গ-গটারের বদলে ওয়াকি-টকি।

একটুও গতি শ্রুত না করে গেটের পাশ কাটিয়ে এল মুসা। 'ভুল হলে শুধরে দিও,' বলল সে। 'যে জায়গাটা খুঁজতে এসেছি, সেটার পাশ কাটিয়ে এলাম না?' 'শুধরে দেয়ার জন্যে আমি সদা প্রস্তুত,' মুচকি হেসে জবাব দিল কিশোর। 'চলতে থাকো।'

রবিন কিছু বলছে না। তাকিয়ে আছে ব্যাঙ্কের দিকে।

বেশ কয়েকটা মোড় ঘুরে ভাড়াটে সিডানটাকে নিয়ে একটা বুনো অঞ্চলে ঢুকে পড়ল মুসা। রিয়ারভিউ মিররে দেখল আর কোন গাড়ি অনুসরণ করছে কিনা। দাঁড় করাল রাস্তার পাশে। 'এরচেয়ে গেট দিয়ে ঢুকে সোজা গিয়ে সদর দরজার সামনে দাঁড়ালে হত না? আমন্ত্রণও জানাতে পারত।'

টান দিয়ে পার্কার জিপার তুলে দিল কিশোর। কানের ওপর টেনে দিল স্কি ক্যাপের কানা। হাত ঢোকাল মোটা দস্তানায়। 'গাড়ির দরকার কি, হেঁটে গিয়েই দেখা যাক না কি করে।' দরজা খুলতেই ঝাপটা মারল কনকনে ঠাণ্ডা ঝোড়ো বাতাস।

নিচু একটা কাঁটাতারের বেড়ার কাছে এসে দাঁড়াল তিনজনে। এই বেড়া গরুকে ঠেকাতে পারলেও মানুষকে পারে না। তার প্রমাণ ওরাই। বেড়া ডিঙানো কোন সমস্যা হলো না। ভেতরে ঢুকে বেড়ার ধার ঘেঁষে এক সারিতে এগোল। কিশোর আগে, রবিন মাঝে, সবার শেষে মুসা। মূল বাড়িটা লক্ষ্য। এক টুকরো খোলা জায়গায় এসে পৌঁছল ওরা। গাছপালার বাধা না থাকায় কয়েক পরত পোশাকের আস্তর ভেদ করেও চুইয়ে ঢুকতে শুরু করল ঠাণ্ডা।

'কি খুঁজতে এসেছি,' মাটিতে জুতো ঠুকে গা গরম রাখার চেষ্টা চালাল মুসা।

কিশোরের চোখ জটলা পাকানো বাড়িঘরগুলোর দিকে। 'জানি না। মনে হলো, ঘুরে দেখে যাওয়া দরকার, তাই এলাম। কিছু না পেলে আর কি করব। সোজা গিয়ে মিস্টার থার্সটনের সঙ্গে দেখা করে জিজ্ঞেস করব, কোন বন্যপ্রাণী গবেষককে তিনি গুলি করেছেন কিনা।'

'ই, জিজ্ঞেস করলেই যেন তিনি জবাব দেবেন,' কথা বলার সময় মুখ দিয়ে বেরোনো বাতাস কি ভাবে বরফের কণায় পরিণত হয়ে যাচ্ছে, সেদিকে তাকিয়ে আছে মুসা।

বাংকহাউস থেকে বেরিয়ে এল দুজন শ্রমিক। এগিয়ে গেল একটা স্নোমোবাইলের দিকে। দুজনের হাতেই রাইফেল। পিছিয়ে এসে একটা বড় গাছের

আড়ালে লুকিয়ে পড়ল দুই গোয়েন্দা।

‘আজকে আশা করি ভাগ্য খুলতে পারে আমাদের,’ বলল একজন। ‘বাড়তি টাকাটা পেলে ভালমত খরচ করতে পারতাম।’

‘হঁ।’ গাড়ির সঙ্গে আটকানো চামড়ার খাপে রাইফেলটা ভরে রাখল দ্বিতীয়জন। পা ঘুরিয়ে উঠে বসল মোমোবাইলের সীটে। ইগনিশনে চাবি ঢুকিয়ে এক মোচড়ে চালু করে ফেলল ইঞ্জিন। ‘পুরস্কারের টাকাটা যদি কুগারের মাথা হিসেবে না দিয়ে মিস্টার থার্সটন ওজন হিসেবে দিতেন, বড়লোক হয়ে যেতাম।’ গ্যাস বাড়াতে ইঞ্জিনের গর্জন বেড়ে গেল। সে-শব্দকে ছাপিয়ে চিৎকার করে বলল সে, ‘আজ সকালে যেটার ছাপ দেখেছি, কুগারটা বিশাল।’

ফ্র্যাঙ্ক হ্যান কি বলেছিল, মনে পড়ল কিশোরের। পার্বত্য সিংহ শিকারের ব্যাপারে আইন বড় কড়া।

‘কুগার শিকার করলে যদি নিজের শ্রমিকদের মোটা টাকা পুরস্কার দিয়ে থাকেন মিস্টার থার্সটন...’ কিশোর বলল।

‘এবং অকাজটা করার সময় ওদের দেখে ফেলে থাকেন ডক্টর কুপার...’ রবিন বলল।

কিন্তু কথা শেষ হলো না তার। পেছনের বনে ইঞ্জিনের শব্দ শোনা গেল। তীক্ষ্ণ শব্দটা এগিয়ে আসছে দ্রুত। চরকির মত পাক খেয়ে ঘুরে দাঁড়িয়েছে তিন গোয়েন্দা। এমন জায়গায় রয়েছে, দ্রুত লুকিয়ে পড়ার কোন জায়গা চোখে পড়ল না।

আরেকটা মোমোবাইল। ওদেরকে দেখে ফেলল চালক। র‍্যাঙ্কের আরেক শ্রমিক। ঘ্যাচ করে ব্রেক কষল। ‘কি কাণ্ড! এমন জায়গায় থাকে নাকি মানুষ? আরেকটু হলেই তো না দেখে দিয়েছিলাম তোমাদেরকে...’

থেমে গেল আচমকা। একটানে চোখ থেকে খুলে আনল সানগ্লাস। ডুকুঁচকে সন্দেহের দৃষ্টিতে তাকাল গোয়েন্দাদের দিকে। ‘তোমাদেরকে তো চিনি বলে মনে হচ্ছে না!’ কর্কশ হয়ে গেল কণ্ঠস্বর, ‘এখানে কি?’

‘আমরা ফেডারেল সেক্টি ব্যুরোর সঙ্গে জড়িত, জুনিয়র গ্রুপ,’ চমকে যাওয়াটা সামলে নেয়ার চেষ্টা করছে কিশোর।

চোখের পাতা সরু হয়ে এল লোকটার। বেড়ার দিকে ঘুরে আচমকা চিৎকার করে উঠল, ‘এই, কোথায় তোমরা! জলদি এসো! চোর ধরেছি, চোর...’

মোমোবাইল থেকে লাফিয়ে নেমে কিশোরের দিকে ছুটে এল লোকটা। মাংসল থাবা কিশোরের ঘাড় চেপে ধরল। মুহূর্তে ঝট করে বসে পড়ল সে। ঘাড় থেকে ছুটে গেল লোকটার হাত। সোজা হয়ে দাঁড়ানোর আগেই ছুটেতে শুরু করল কিশোর।

ওদিকে যে সহজ বুদ্ধিটা মাথায় এল মুসার, সেটাই করে বসল সে। কোন রকম চিন্তা-ভাবনা না করে গিয়ে লাফ দিয়ে চড়ে বসল মোমোবাইলে। চিৎকার করে উঠল কিশোর আর রবিনের উদ্দেশে, ‘জলদি এসো! উঠে পড়ো!’

রবিনের পেছনে কিশোর পুরোপুরি উঠে বসার আগেই চালানো শুরু করে দিল মুসা। ঝাঁকি দিয়ে সামনে লাফ মারল মোমোবাইল। একবার দূলে উঠেই সোজা

হয়ে গেল। দু'জনের সীটে তিনজন। আরেকটু হলে ছিটকে পড়ে যাচ্ছিল কিশোর। পেছনের চাকার ঘায়ে ছিটকে উঠল তুষারকণা, ফুলঝুরির মত ছিটানো শুরু করল, গিয়ে লাগল লোকটার হাতে।

বুদ্ধিটা মন্দ করেনি, পার পেয়ে যেত, কিন্তু একটা ভুল করে ফেলল মুসা। যদিকে যাওয়া উচিত ছিল, সেদিকে না গিয়ে রওনা হলো উল্টোদিকে। ভুল শোধরানোর জন্যে স্লোমোবাইল ঘোরাতে গিয়ে দেখে পিপড়ের সারির মত ঝাঁক বেঁধে বাংকহাউস থেকে দৌড়ে বেরোনো শুরু করেছে শ্রমিকেরা।

'আরে, হাঁ করে দেখছ কি!' চিৎকার করে উঠল একজন। 'থামাও না ছেলেগুলোকে!'

'শক্ত হয়ে বোসো!' কিশোর আর রবিনকে বলেই হ্যাঁচকা টানে হ্যান্ডেল ঘুরিয়ে দিল মুসা। একটা খোলা মাঠের দিকে ছুটল। পেছনে আবার উল্টে পড়ে যাচ্ছিল কিশোর, বহু কষ্টে সামলাল।

ছোট একটা পাহাড়ের মত টিলার দিকে প্রায় উড়ে চলল স্লোমোবাইল। চূড়াটা পেরোনোর সময়ও গতি কমাল না মুসা। তাতে মাটি থেকে চাকা সরে গেল। মুহূর্তের জন্যে তিন জন আরোহী সহ শূন্যে ঝুলে রইল যেন যানটা। তারপর আছড়ে পড়ল মাটিতে। প্রচণ্ড ঝাঁকিতে ছিটকে পড়ার জোগাড় হলো আরোহীদের। অন্য সময় হলে মজাই পেত মুসা।

বাঁচার উপায় খুঁজছে কিশোরের মন। কিন্তু বেশিক্ষণ চিন্তা করার সময় পেল না। হঠাৎ আধপাক ঘুরে গেল স্লোমোবাইলের সামনের চাকা, প্রচণ্ড ঝাঁকুনি, হোঁচট খেয়ে থেমে যাওয়া। এবার আর সামলাতে পারল না কিশোর। উড়ে গিয়ে পড়ল তুষারের মধ্যে।

লাফিয়ে নেমে পড়ল মুসা। রবিনও নামল।

দৌড়ে এসে টান দিয়ে কিশোরকে তুলল মুসা। 'কি হলো? ঠিক আছ?'

কোনমতে মাথা ঝাঁকাল কিশোর। 'মনে হয়। থামলে কেন?'

সামনের দিকে আঙুল তুলল মুসা। 'ওই দেখো।'

সামনে মাটি দেখতে পেল না কিশোর। শুধুই শূন্যতা। নিচে তাকাল। চোখ বড় বড় হয়ে গেল মুহূর্তে। বড় বাঁচা বেঁচে গেছে। যেখানে ব্রেক করেছে মুসা, তার মাত্র কয়েক ফুট দূর থেকে খাড়া নেমে গেছে পাহাড়ের দেয়াল। নিচে আরেকটা পাহাড়ের খাড়া মাথা নজরে পড়ছে। বিবর্ণ, প্রাণহীন, নিরানন্দ।

পেছনে হই-চই শোনা যাচ্ছে। সেই সঙ্গে স্লোমোবাইল সহ অন্য গাড়ির ইঞ্জিনের শব্দ। ফিরে তাকাল ওরা। ওদের ধরার জন্যে দল বেঁধে ধাওয়া করে আসছে থার্সটনের কর্মচারীরা।

সাত

কিশোরের দিকে তাকিয়ে দুর্বল হাসি হাসল মুসা। খাড়া দেয়ালের দিকে ইঙ্গিত করে রসিকতা করল, 'দড়ির মই নিশ্চয় সঙ্গে আনোনি।'

এগিয়ে গিয়ে একেবারে কিনারে দাঁড়িয়ে নিচের দিকে তাকাল কিশোর। গভীর গিরিখাত। গভীর কণ্ঠে জবাব দিল, 'এত লম্বা দড়ির মই বোধহয় বানানোও যাবে না।'

পাশে এসে দাঁড়াল রবিন। কিশোরের সঙ্গে যোগ দিয়ে নিচে তাকাল সে-ও। ঝোড়ো হাওয়া ক্রমাগত গর্জন করে ফিরছে খাদের ওপরে, ঝাপটা মেরে দেয়ালে লেগে থাকা তুষারকণা উড়াচ্ছে। বের করে আনছে রুক্ষ পাথরের ধারাল দাঁত। মগজে প্রতিবাদের ভাষা জেগে ওঠার আগেই ভারী দম নিয়ে দেয়ালের কিনার বেয়ে নেমে পড়ল রবিন।

'করছ কি!' চিৎকার করে উঠল কিশোর। 'একশো ফুটের কম হবে না।'

'এ ছাড়া আর উপায় কি?' ওপর দিকে তাকিয়ে দাঁত বের করে হাসল রবিন। ধীরে ধীরে নামতে শুরু করল নিচের দিকে। পাহাড় বাওয়ার ওস্তাদ সে। চড়তে গিয়ে কয়েকবার পা ভেঙেছে। তা-ও নেশা যায় না। 'কতখানি ওপরে আছ এবং কি করছ, সেটা যদি ভাবনা থেকে দূর করে দিতে পারো, তাহলে খুব একটা কঠিন লাগে না কাজটা।'

মুসার হাতে চাপ দিল কিশোর। 'কি করব?'

'জানি না।' রবিনের দিকে তাকিয়ে আছে মুসা। যে ভাবে নামছে, একটু এদিক ওদিক হলেই নিচে পড়ে নিশ্চিত মৃত্যু।

'নেমে এসো,' ডাকল রবিন। পায়ের ডগা ঢোকানোর জন্যে আরেকটা ফাটল খুঁজছে। 'পালানোর এটাই একমাত্র পথ।'

ইই-চই, ইঞ্জিনের গর্জন এগিয়ে আসছে। কাঁধের ওপর দিয়ে ফিরে তাকাল কিশোর। ধরা পড়লে কি ঘটবে পরীক্ষা করে দেখার কোন ইচ্ছে নেই তার। ফিরে তাকিয়ে দেখল, আরও নেমে গেছে রবিন। আর দ্বিধা করল না সে। রবিনের পথ ধরল। মুসা আর কি করে। সে-ও দেয়ালের কার্নিস বেয়ে নেমে পড়ল।

কোনদিকে না তাকিয়ে প্রায় অন্ধের মত দেয়াল হাতড়ে হাতড়ে নেমে চলল তিনজনে। মাথার ওপর চিৎকার করছে কাউবয়রা। কানের কাছে বাতাসের গর্জনে ঢাকা পড়ে যাচ্ছে সে-শব্দ।

খুব ধীরে, সাবধানে, বুঝেবুঝে প্রায় ইঞ্চি ইঞ্চি করে নেমে চলেছে রবিন। উত্তেজনা, উৎকণ্ঠা ঠাই দিচ্ছে না মগজে। দিলেই ঘাবড়ে যাবে, আর গেলেই না হবে নামা, না হবে ওঠা, আটকে যাবে মাঝপথে। পরিণতি হবে ভয়ঙ্কর।

মনে হলো সাংঘাতিক এক দীর্ঘ দুঃস্বপ্নের মধ্যে পড়ে গেছে ওরা। অনন্তকাল ধরে নেমে চলেছে। নামার যেন আর শেষ হবে না। কতটা ওপরে আছে দেখার জন্যে ঝুঁকি নিয়েই নিচে তাকাল রবিন। ধড়াস করে উঠল বুকের মধ্যে। আনন্দে। মাত্র আর কয়েক ফুট বাকি। হাত ছেড়ে দিয়ে লাফিয়ে নামল তুষারের মধ্যে।

কিশোর রয়েছে আরও কয়েক ফুট ওপরে। ওখান থেকে লাফিয়ে পড়লেও ক্ষতি হওয়ার সম্ভাবনা নেই। নিচে রয়েছে নরম তুষার।

চিৎকার করে জানাল কিশোরকে। কিন্তু সাহস করল না কিশোর। এতটা নেমে আসার পর আর কোন ঝুঁকি নিতে চাইল না। দেয়াল বেয়েই নেমে এল নিচে। তুষারে পা রাখার সঙ্গে সঙ্গে যেন দেহটা ছেড়ে দিল তার। ধপাস করে পড়ে গেল।

কি হলো! কি হলো! চিৎকার করে উঠে হাত ছেড়ে দিয়ে লাফিয়ে নেমে পড়ল মুসাও।

না, কিছু হয়নি। উঠে বসে দেয়ালে হেলান দিল কিশোর।

কিন্তু স্বস্তিটা দীর্ঘস্থায়ী হতে পারল না ওদের। কালো ছায়া দেখা দিল মাথার ওপর। সেই সঙ্গে জোরাল একঘেয়ে শব্দ। ওপর দিকে তাকাল তিনজনেই। হেলিকপ্টার। একটা মুহূর্ত ওদের ওপর ঝুলে থেকে সরে গেল ওটা। কেউ যেন ধরে টান মেরে নিয়ে চলে গেল একপাশে। খানিক দূরে উঁচু একটা চ্যাপ্টা বেদীমত জায়গায় নামল।

জোরে নিঃশ্বাস ফেলল মুসা, 'যাক, এখান থেকে কি ভাবে যাব সে-চিন্তাটা আর করতে হলো না আমাদের।'

কাদের জিনিস, হেলিকপ্টারের গায়ে কিছু লেখা নেই।

'চেনা চেনা লাগছে না?' রবিনের প্রশ্ন।

মাথা ঝাঁকাল কিশোর। 'সকালবেলা এটাতে করেই গিয়েছিলাম আমরা।'

মস্ত একটা ফড়িঙের মত বেদীর ওপর বসে আছে কপ্টারটা। খপ-খপ-খপ-খপ করে বাতাস কেটে চলেছে ওটার রোটর। বাতাসের প্রচণ্ড ঝাপটায় মাটিতে পড়া তুষার ওড়াচ্ছে। তাকিয়ে থেকে অপেক্ষা করছে তিন গোয়েন্দা। ঝুলে গেল দরজা। আরও অপেক্ষা। মিনিটখানেক পরও যখন কেউ বেরোল না, বুঝতে পারল ওরা, বেরোবে না। ওদেরকেই যেতে হবে।

দুই সহকারীর দিয়ে তাকিয়ে ভুরু উঁচু করল কিশোর। নীরবে মাথা ঝাঁকাল রবিন। মুসা বলল, 'চলো।'

পাশাপাশি সাবধানে হেঁটে চলল তিনজনে। পা দেবে যাচ্ছে আলাদা বরফে। সেদিকে তাকাচ্ছে না কেউ। কপ্টারটার দিকেই নজর। কাছে যেতে গায়ে এসে ঝাপটা মারল বরফ-শীতল বাতাস। কপ্টারের রোটরে সৃষ্টি হচ্ছে বাতাসের ঝড়।

মাথা নিচু করে এগিয়ে গিয়ে দরজা দিয়ে ভেতরে উঁকি দিল কিশোর।

আত্মতৃপ্তির হাসি হাসলেন পাইলট। টারবাইন ইঞ্জিন আর রোটরের গর্জনকে ছাপিয়ে চিৎকার করে জিজ্ঞেস করলেন, 'লিফট লাগবে?'

'এ ছাড়া আর কোন উপায় আছে আমাদের?' পাইলটের কথার হালকা ভঙ্গিটা ফিরিয়ে দিল কিশোর। ককপিটে পাইলটকে একা দেখে অবাক হয়েছে।

হাসিটা চওড়া হলো পাইলটের। 'তা নেই,' একমত হলেন তিনি। নিজের পাশের সীটটা দেখিয়ে বললেন, 'উঠে বসো। ওদেরকেও আসতে বলো।'

সকালবেলা পাইলটের দিকে বিশেষ নজর দেয়নি কিশোর। দিলে, মাথার টুপিতে কাত করে লেখা টি. আর. শব্দ দুটো দেখতে পেত। টি. আর., অর্থাৎ থার্সটন র‍্যাঞ্চ। উঠে বসতে বসতে বলল, 'কপ্টারটার মালিক তাহলে মিস্টার থার্সটন?'

মাথা ঝাঁকালেন পাইলট। 'হ্যাঁ। একেবারে নতুন এটা। কয়েক হপ্তা আগে কেনা হয়েছে। কোম্পানির নাম লেখানোরও সময় পাইনি এখনও।'

পেছনের সীটে গিয়ে বসল রবিন আর মুসা। দু'জন হওয়াতে প্রথমবারের মত গাঙ্গাগাঙ্গি হলো না।

‘তারমানে জেরাল্ড থার্সটন বিরাট বড়লোক,’ পাইলটের সঙ্গে কথা চালিয়ে গেল কিশোর। ‘একটা প্রাইভেট কন্টার কেনা, সেই সঙ্গে বেতন দিয়ে পাইলট রাখা-বিরাট খরচের ব্যাপার।’

‘কিনতে অনেক টাকা লেগেছে ঠিকই,’ কন্টারটাকে তুলতে তুলতে জবাব দিলেন পাইলট। ‘তবে পাইলটের জন্যে একটা পাইপয়সাও খরচ করা লাগে না।’

অবাক হলো কিশোর। ‘তারমানে? বিনা বেতনে মিস্টার থার্সটনের কাজ করে দেয় নাকি?’

মৃদু হাসি ফুটল পাইলটের চোটে। ‘নিজের কাজের জন্যে কে আর পয়সা নেয়, বলো। আমিই জেরাল্ড থার্সটন।’

জবাবটা শুদ্ধ করে দিল কিশোরকে। ব্যাঞ্ছ ফেরার পথে আর একটা কথাও বলতে পারল না। সামান্য ওই সময়টুকু ব্যয় করল থার্সটনকে পর্যবেক্ষণের কাজে।

কন্টারটাকে যে রকম সহজ ভাবে চালাচ্ছেন, তাতেই বোঝা যায় বহু ঘণ্টা ওড়ার অভিজ্ঞতা আছে তাঁর। দক্ষ পাইলট। রুসিন-শেভড, চৌকো চোয়াল। প্রথমে ভাবল বয়েস পঁয়তাল্লিশ থেকে পঞ্চাশের মাঝামাঝি। কোটের কলারের নিচে গলাটা যেখানে ঢুকে গেছে, ভাল করে তাকাতে সেখানকার চামড়া চোখে পড়ল। একলাফে বয়েস দশ বছর বাড়িয়ে দিল সে মনে মনে, তারমানে ষাটের কম না। বয়েসের তুলনায় অনেক বেশি জোয়ান লাগে থার্সটনকে।

আট

ব্যাঞ্ছহাউসের ভেতরে মস্ত একটা বৃত্তাকার গাড়িপথের মাঝখানের গোল জায়গায় কন্টার নামালেন থার্সটন। সামনে দোতলা বাড়ি। অস্বাভাবিক মোটা মোটা চাকাওয়ালা প্রায় বাক্সের মত দেখতে একটা ফোর-ডোর জীপ ছুটে এল ড্রাইভওয়ে ধরে। ছাতের ওপর জুলছে-নিভছে একজোড়া নীল আলো। তিন গোয়েন্দা নামল। গাড়িটার কাছে এসে দাঁড়িয়ে গেল।

জীপ থেকে লাফিয়ে নামলেন শেরিফ হ্যামিলটন। ভীষণ অসন্তুষ্ট মনে হলো তাঁকে। তীব্র ক্রকুটি করলেন তিন গোয়েন্দার দিকে তাকিয়ে। ‘আমি তো ভেবেছি, ডেনভারের কাছাকাছি চলে গেছ তোমরা এতক্ষণে।’

‘গাড়িটা সাতদিন রাখলে ভাড়ার হার কমে যাবে,’ জানাল কিশোর। ‘তা ছাড়া আমাদের ট্র্যাভেল এজেন্ট জানিয়েছে, হঠাৎ করে প্লেনের টিকেট বদল করতে গেলে জরিমানা দিতে হবে অনেক টাকা। তাই ভাবলাম, বাকি হপুটা কাটিয়েই যাই। বাড়ি যাবার তো আর তাড়া নেই।’

‘পরিস্থিতি যা দাঁড়িয়েছে এখন, ত্রাত সাতদিনেও ছাড়া পাবে কিনা সন্দেহ,’ জবাব দিলেন শেরিফ। ‘শুনলাম তোমরা একটা স্লোমোবাইল চুরি করেছ। কথাটা সত্যি হলে...’

‘থাক না, ফ্র্যাঙ্ক, বাদ দাও,’ বাধা দিলেন থার্সটন। ‘শ্রমিকরা যখন আমাদের ফোন করল, ভেবেছিলাম, সাধারণ গুরুত্বের কাজ। কল্পনাই করিনি মার্সিসাকে যে

ছেলেগুলো বাঁচিয়েছে, ওরা ঢুকেছে। নিশ্চয় কোন কারণ আছে।’

জুলন্ত চোখে গোয়েন্দাদের দিকে তাকালেন শেরিফ। ‘কারণটা কি শুনে ফেলা যাক তাহলে।’

শেরিফের দৃষ্টিবাণে কাবু হলো না কিশোর। থার্সটনকে দেখিয়ে গম্ভীর কণ্ঠে বলল, ‘আমার বিশ্বাস, তারচেয়ে অনেক বেশি আগ্রহী হবেন, যদি শোনে মিস্টার থার্সটনের লোকেরা কুগার শিকার করার জন্যে মোটা টাকা পুরস্কার পায়। ওটাও নিশ্চয় অপরাধের পর্যায়ে পড়ে, শেরিফ, যদি না কিছু কিছু মানুষ আইনের উর্ধ্বে থাকার ক্ষমতা অর্জন করে থাকে।’

‘আমার কাছে কেউ আইনের উর্ধ্বে নয়,’ ভোঁতা স্বরে জবাব দিলেন শেরিফ।

‘মনে হচ্ছে কোথাও একটা ভুল বোঝাবুঝি হয়ে গেছে,’ শেরিফের দিকে তাকিয়ে মসৃণ কণ্ঠে বললেন থার্সটন। ‘বুড়ো কুগারটার কথা বলেছি তোমাকে, আমার গুরুগুলোকে মেরে শেষ করেছে। পরশু দিন একটা দুখেল গাইকে ধরে নিয়ে গেছে। খোঁয়াড়ের জানোয়ারগুলো চেষ্টামেচি শুরু করেছিল। তাতেই জানা গেছে ব্যাপারটা। আমার তো ভয় লাগছে, কখন পশু ছেড়ে মানুষের ওপর হামলা চালায়। মানুষকেও হয়ে গেলে তো সর্বনাশ।’

জোরে একটা নিঃশ্বাস ফেললেন শেরিফ। আচরণেই বোঝা গেল, কৈফিয়তে সন্তুষ্ট হতে পারেননি তিনি। ‘তারমানে পুরস্কৃত করার লোভ দেখিয়ে লোক পাঠিয়েছ কুগারটাকে খুন করতে। এ নিয়ে তোমার সঙ্গে বহু আলোচনা হয়ে গেছে আমার, গেরি। তুমি জানো, তোমার এ ধরনের সমাধান আমার পছন্দ না।’

চোখে অবিশ্বাস নিয়ে শেরিফের দিকে তাকাল মুসা। ‘খাইছে! শুধুই আপনার “অপছন্দ”। এ ব্যাপারে আর কিছুই করার নেই আপনার?’

‘না, সত্যিই নেই,’ জবাব দিলেন শেরিফ। ‘গবাদি পশু কিংবা মানুষের প্রাণের জন্যে হুমকি হয়ে দাঁড়ালে নিজের সীমানার মধ্যে কুগার হত্যা করা যাবে—এর বিরুদ্ধে কোন আইন নেই।’

‘আমার লোকেরাও জানে সেটা,’ থার্সটন বললেন। ‘আমার সীমানার মধ্যে পেলেই কেবল গুলি চালাবে। কড়া নির্দেশ আছে আমার।’

‘কিন্তু ওরা আপনার হুকুম মানল কি মানল না, কি করে জানছেন?’ প্রশ্ন তুলল কিশোর। ‘কুগারটাকে মেরে নিয়ে এসে আপনাকে বলবে, সীমানার মধ্যেই পাওয়া গেছে, তখন? তাদের মুখের কথাই বিশ্বাস করতে হবে আপনাকে। পুরস্কারের টাকা দিয়ে দেবেন?’

পাতলা হাসি ফুটল র‍্যাঙ্গারের ঠোঁটে। ‘আমি ওদের বিশ্বাস করি। আমার আরও বিশ্বাস, তোমরাও আর কোন রকম গুণগোল করবে না এখানে। তাহলে তোমাদের বিরুদ্ধে আর কোন রকম অভিযোগ আনা থেকে বিরত থাকব আমি। বেআইনী ভাবে আমার র‍্যাঞ্জে ঢোকা, স্নোমোবাইল চুরি করার কথা—কোনটাই আর মনে রাখব না।’

‘তাহলে আমিও ঝামেলা থেকে বাঁচব,’ শেরিফ বললেন। ‘অ্যারেস্ট আর করতে হবে না তিনজনকে। ফাইলপত্র আর লেখালেখির ঝামেলা থেকে মুক্তি। চলো, জীপে করে তোমাদের গাড়ির কাছে পৌঁছে দেব।’

থার্সটনকে গুডবাই জানিয়ে দুই সহকারীকে নিয়ে শেরিফের গাড়িতে উঠল

কিশোর।

‘গল্পটা আপনি বিশ্বাস করলেন?’ শেরিফকে জিজ্ঞেস করল কিশোর।

‘কমবেশি,’ জবাব দিলেন শেরিফ।

‘তারমানে?’

‘তার মানে, মাঝেসাঝে বেআইনী কাজ করে ফেলে থার্সটনের লোকেরা। আর দেখেও সেটা দেখে না সে।’

‘আর সে-রকমই একটা বেআইনী কাজ করতে যদি ওদের দেখে ফেলে থাকেন ডক্টর কুপার,’ প্রশ্ন করল কিশোর, ‘তাহলে কি ঘটবে?’

‘জানি না,’ জবাব দিলেন শেরিফ। ‘থার্সটন র‍্যাঞ্চার সীমানা থেকে পঁয়ত্রিশ মাইল দূরে গুলি খেয়েছে মারিসা। সেটাও ভেবে দেখতে হবে।’

‘এমনও তো হতে পারে,’ থামল না কিশোর, ‘মানুষের মাথার জন্যে অনেক বেশি টাকা পুরস্কার ঘোষণা করেছেন থার্সটন?’

ধীরে ধীরে মাথা নাড়তে লাগলেন শেরিফ। ধৈর্য হারালেন না তিনি। ‘মারিসা কুপার বিরক্ত করেছে থার্সটনকে, তাতে কোন সন্দেহ নেই। তবে ক্ষতি কিছুই করতে পারছে না। সুতরাং মারিসাকে নিয়ে অতটা মাথাব্যথাও নেই থার্সটনের। এলেক্স স্প্রিঙ অপরাধীদের স্বর্গরাজ্য নয়। তা ছাড়া জেরাল্ড থার্সটন একজন সম্মানী লোক। তার ওখানে যারা কাজ করে, তারাও সবাই মোটামুটি সৎ। কঠিন পরিশ্রমী কাউবয়।’

অবাক লাগল কিশোরের। বন্ধু বলে থার্সটনের ব্যাপারে অন্ধ হয়ে গেলেন শেরিফ? নাকি নিজের মনের সঙ্গেই চুলচেরা বিশ্লেষণ করছেন?

‘তুমি প্রশ্ন করার আগেই আরও একটা কথা জানিয়ে দিই,’ শেরিফ বললেন, ‘গতকাল একটা গরুর নিলামে গরু কিনতে মনটানায় গিয়েছিল থার্সটন। কাজেই গুলিটা সে করেছে, এই ধারণাটাও মাথা থেকে বের করে দিতে পারো।’

‘গুলির কথা যখন উঠলই,’ কিশোর বলল, ‘কি ধরনের বন্দুক ব্যবহার করা হয়েছে, জানতে পেরেছেন?’

মাথা ঝাঁকালেন শেরিফ। ‘মোটামুটি। ক্যালিবারটা জানা যায়নি এখনও। মারিসার জখম থেকে পাওয়া বুলেটটা দেখেই বোঝা যায়, শক্তিশালী হান্টিং রাইফেল থেকে ছোঁড়া। বেশি ভেতরে ঢোকেনি...’

‘তারমানে ছোঁড়া হয়েছে বহুদূর থেকে,’ বাক্যটা শেষ করে দিল কিশোর। ‘আরেকটু কাছে থেকে মারলে বাঁচতেন না তিনি। তারমানে খাদের ওপর থেকে গুলি করার ব্যাখ্যাটা আরও জোরদার হচ্ছে।’

সিডানটার কাছে এসে জীপ থামালেন শেরিফ। কিশোরের দিকে ফিরলেন। ‘অনেক কিছু জানো তুমি। এত শিখলে কোথায়?’

‘বড় বেশি খুঁতখুঁতে তো,’ পেছন থেকে জবাব দিল মুসা। ‘কৌতূহলও বেশি। কম্পিউটারের মগজ। কোন জিনিস একবার মগজে ঢুকলে জীবনেও আর বেরোয় না।’

‘সে-রকমই মনে হচ্ছে আমার,’ কিশোরের দিক থেকে চোখ ফেরাননি শেরিফ। ‘সাধারণ হান্টিং অ্যান্ড্রিভেন্টের মধ্যেও কি বাঁকা কিছু দেখতে পাচ্ছে

তোমার কৌতূহলী মগজ?

‘সাধারণ দুর্ঘটনা মনে হচ্ছে না আমার,’ ঘুরিয়ে জবাব দিল কিশোর। ‘কে দুর্ঘটনাটা ঘটাল, খোঁজ পেয়েছেন তার?’

‘ওসব খোঁজার জন্যেই বেতন দেয়া হয় আমাকে,’ ধৈর্যের বাঁধ ভাঙতে আরম্ভ করেছে মনে হয় শেরিফের। ‘কিছু সূত্র আমি পেয়ে গেছি।’

‘যেমন?’

ড্যাশবোর্ডে বসানো টু-ওয়ে রেডিওটা খড়খড় করে উঠল এই সময়। ‘শেরিফ হ্যামিলটন? শুনতে পাচ্ছেন?’

হ্যান্ডসেটটা তুলে নিয়ে কথা বলার বোতামটা টিপে দিলেন শেরিফ। ‘মারটিন। বলো। কিছু পেলো?’

‘বহুত ঘোরাঘুরি করলাম...’

‘আরে সেকথা কে শুনতে চাইছে!’ ধমকে উঠলেন শেরিফ। ‘রাইফেলটা পেয়েছ নাকি, বলো!’

‘পেয়েছি, স্যার,’ স্পীকারের খড়খড়ানির সঙ্গে মিশে যান্ত্রিক শোনাল কণ্ঠটা। ‘যেখানে খুঁজতে বলেছিলেন, সেখানেই দেখেছি। বাকি জায়গাগুলো...’

‘ওড। হেডকোয়ার্টারে নিয়ে যাও। আমি আসছি।’ আর কোন কথা বলার সুযোগ না দিয়ে যোগাযোগ বিচ্ছিন্ন করে দিলেন শেরিফ।

‘ঘটনাটা কি?’ ভুরু নাচাল কিশোর।

‘মনে হচ্ছে তোমার সন্দেহই ঠিক,’ শেরিফ বললেন। ‘কেউ একজন ইচ্ছে করেই খুন করতে চেয়েছিল মারিসাকে। আশা করছি, চব্বিশ ঘণ্টার মধ্যেই তাকে ধরে এনে হাজতে ভরতে পারব।’

নয়

‘অস্ত্রটা পেলেন কি করে?’ জানতে চাইল কিশোর। ‘মনে হচ্ছে যেন হেঁটে হেঁটে এসে হাজির হয়েছে।’

‘তোমার নিশ্চয় জানা আছে,’ উত্তেজনার ভাবটা চলে গেছে শেরিফের ভঙ্গি থেকে, ‘অনেক অপরাধীকেই ডোবায় হয় তাদের বন্ধুরা, কিংবা পরিচিত কেউ?’

‘কে গুলি করল ডক্টর কুপারকে? আর কে-ই বা ডোবাল তাকে?’

‘সন্দেহজনক ব্যক্তিটি একজন নেটিভ আমেরিকান,’ শেরিফ বললেন। ‘তার ডাক নাম লঙ হার্ট। নাম শুনে কিছু বুঝতে পারবে না। আমাদের এলাকার বাইরের কোন পত্রিকায় নাম ছাপা হয় না তার।’

‘তিনি কে, জানি আমরা,’ জবাব দিল কিশোর। ‘উনিই দায়ী, কেন ভাবছেন?’

‘একটা উড়ো ফোন পেয়েছি আমি,’ শেরিফ বললেন। ‘লোকটা জানিয়েছে, একটা গুলির শব্দ নাকি শুনেছিল সে। তার পর পরই লঙ হার্টকে গিরিখাতের কাছ থেকে চলে যেতে দেখেছে। লঙ হার্টের ট্রাকে একটা রাইফেল পাওয়া গেছে। মারটিন পরীক্ষা করে বুঝতে পেরেছে, দু’একদিনের মধ্যে গুলি করা হয়েছে ওটা

দিয়ে।

‘জুটি করল কিশোর। ‘তাতে তেমন কিছু প্রমাণ হয় না। রাইফেল গাড়িতে নিয়ে ঘুরে বেড়াবেন কেন লঙ হার্ট? আর কুমতলব থেকে থাকলে অন্য কোথাও লুকাতেন, ধরা পড়ার জন্যে গাড়িতে ফেলে রাখতেন না।’

‘লুকানোই ধরা যেতে পারে এটাকে,’ জবাব দিলেন শেরিফ। ‘বনের মধ্যে তার কেবিন। রাস্তা বলতে প্রায় কিছুই নেই। সচরাচর যায়ও না কেউ ওদিকে। বাড়িতে রাখার অসুবিধে বলে শীতকালে শহরের একটা গ্যারেজে গাড়ি রাখে সে। স্কি নিয়ে ঘুরে বেড়ায়। ও হয়তো ভেবেছিল রাইফেলটা এ সময় ট্রাকে রাখাই নিরাপদ।’

‘তাতেও প্রমাণ হয় না তিনিই গুলি করেছেন,’ কিশোর বলল। ‘কেউ ফাঁসানোর জন্যে ওখানে নিয়ে গিয়ে রাইফেলটা রেখে দিতে পারে। এলক স্প্রিঙে সবার কাছেই নিশ্চয় হান্টিং রাইফেল আছে। আর যেটা পাওয়া গেছে, সেটা লঙ জনেরই রাইফেল, কি করে শিওর হচ্ছেন? ওটা তার জিনিস না-ও হতে পারে।’

ঘোং করে উঠলেন শেরিফ। ‘সহজে হাল ছাড়ার পাত্র নও তোমরা। তোমাদের ইচ্ছেটা কি? লঙ হার্টকে গ্রেফতার না করি?’

‘তা বলব কেন? আমি চাইছি সঠিক লোকটাই গ্রেফতার হোক।’

‘দেখো,’ শীতল কণ্ঠে বললেন শেরিফ, ‘আমাকে পরামর্শ দেয়ার চেয়ে তোমাদের বয়েসী ছেলেদের যা করা উচিত, তা-ই করো; আর আমাকে আমার কাজ করতে দাও। আসল অপরাধীকে আমি খুঁজে বের করবই।’

‘তারমানে আপাতত আপনি লঙ হার্টকে অ্যারেস্ট করছেন না?’

‘না,’ জবাব দিলেন শেরিফ। ‘তবে তোমাদের রেখে গিয়ে প্রথম কাজটাই হবে আমার তার সঙ্গে দেখা করা।’ মাথা ঝাঁকিয়ে ইঙ্গিতে জানালার বাইরে দেখালেন তিনি। ‘ওই যে তোমাদের গাড়ি। যাও। যেখানে খুশি যেতে পারো। যেখানে ইচ্ছে। কেবল আমার ঘাড়ের কাছ থেকে দূরে থাকলেই আমি খুশি।’

ইঙ্গিতটা বুঝতে অসুবিধে হলো না তিন গোয়েন্দার।

‘তাহলে কি করছি আমরা এখন?’ নিজেদের গাড়িতে বসে জিজ্ঞেস করল রবিন। তাকিয়ে আছে শেরিফের গাড়িটার দিকে। চলে যাচ্ছে ওটা।

ইঞ্জিন স্টার্ট দিল মুসা। ‘শেরিফ যা করতে বলেছেন, সেটাই করা উচিত আমাদের,’ বলল সে। ‘যেখানে খুশি চলে যাওয়া উচিত।’

‘ঠিক,’ রহস্যময় হাসি ফুটল কিশোরের মুখে। ‘কেবল তাঁর ঘাড়ের কাছ থেকে দূরে থাকতে বলেছেন আমাদের। কিন্তু পিছু পিছু যেতে মানা করেননি। কি বলো?’

যতটা সম্ভব দূরে থেকে জীপটাকে অনুসরণ করে চলল মুসা। রাস্তায় গাড়ি-ঘোড়া প্রায় নেই। দুটো গাড়ির মাঝখানে ফাঁকা। চোখে পড়ে যাওয়ার সম্ভাবনা বেশি।

আঁকাবাঁকা, উঁচুনিচু পাহাড়ী পথে ঠোকর খেতে খেতে এগিয়ে চলেছে গাড়ি।

‘এতক্ষণে শিওর জেনে গেছেন,’ কিশোর বলল, ‘আমরা তাঁকে অনুসরণ করছি, যদি না দেখে থাকেন, তাহলে তাঁর রিয়ারভিউ মিররের কাঁচ নষ্ট।’

‘বোকা বানানোর জন্যে অকারণে ঘুরিয়ে মারছেন না তো আমাদের?’ রবিনের প্রশ্ন।

মাথা নাড়ল কিশোর, 'মনে হয় না। এ ভাবে নিজের সময় নষ্ট করবেন না শেরিফ।'

তীক্ষ্ণ একটা মোড়ের ওপাশে অদৃশ্য হয়ে গেল জীপ। উদ্ভিগ্ন হলো না কিশোর। মোড়ের কাছে গেলেই আবার দেখা পাবে। কিন্তু গিয়ে দেখল, তার অনুমান ভুল। মোড়ের ওপাশে রাস্তা শূন্য। উধাও হয়ে গেছে জীপটা।

চোখ বড় বড় করে এপাশ ওপাশ তাকাতে লাগল মুসা। 'কি হলো? কোথায় গেল গাড়িটা?'

গাড়ি থামাতে বলল কিশোর। রাস্তার দুই পাশটা ভালমত দেখল।

'ওই যে,' হাত তুলে দেখাল রবিন। রাস্তা থেকে নেমে চাকার দাগ চলে গেছে বরফের ওপর দিয়ে। ঢুকেছে গিয়ে বনের মধ্যে।

'ই,' মাথা দোলল কিশোর। 'শেরিফ তো বলেইছিলেন, লঙ হার্ট রাস্তা থেকে দূরে একটা কেবিনে বাস করেন।'

'সে-জন্যেই আমাদের দেখে উদ্ভিগ্ন হননি শেরিফ,' রবিন বলল। 'জানতেন, শেষ পর্যন্ত অনুসরণ করে যাওয়া সম্ভব হবে না আমাদের পক্ষে। ফোর-হইল ড্রাইভ জীপ। তুমারে চলার উপযোগী চাকা। রাস্তা প্রয়োজন নেই তাঁর। কিন্তু আমাদের এই গাড়ি নিয়ে ওদিকে দশ ফুটও যেতে পারব না।'

'তারমানে গাড়ি রেখেই যেতে হবে আমাদের,' নির্বিকার কণ্ঠে বলল কিশোর।

তার দিকে ফিরে তাকাল রবিন। 'তুমি বলছ, পায়ে হেঁটে? লঙ হার্টের কেবিনটা কতদূরে, তাই তো জানি না আমরা।'

'গেলেই জানতে পারব।' গাড়ি থেকে নেমে পড়ল কিশোর। ছাতে রাখা স্কি ব্যাক দেখিয়ে বলল, 'হেঁটে যেতে না ইচ্ছে করলে বরফের ওপর দিয়ে চলার আরও বিকল্প ব্যবস্থা আছে।'

কোনটা কঠিন হবে বুঝতে পারল না রবিন-গোড়ালি দেবে যাওয়া তুমারের মধ্যে বার বার পা উঁচু করে ছপাৎ-ছপাৎ করে হাঁটা, নাকি স্কি পরে চাল বেয়ে ওপরে ওঠা। আরেকবার তাকাল সরু রাস্তাটার দিকে। প্রথম মোড়টার পরেই মোটামুটি সমতল হয়ে গেছে রাস্তা।

মুসাও দেখল। রবিনের মত দ্বিধা করল না সে। ব্যাকের দিকে হাত বাড়াল। 'স্কি করতে এসেছি, স্কি-ই করব।'

বেশি দূর যেতে হলো না। ফিরে এল পুলিশের জীপটা। মুসা রয়েছে আগে। তার স্কি'র প্রায় সামনের ডগা ছুঁয়ে দাঁড়িয়ে গেল গাড়ির চাকা। জানালা দিয়ে মাথা বের করে দিলেন শেরিফ। মুখ দেখে মনে হচ্ছে, ওদের দেখে হাসবেন না কাঁদবেন সিদ্ধান্ত নিতে পারছেন না।

'দারুণ প্রাকৃতিক দৃশ্য এখানকার,' গভীর মনোযোগে প্রকৃতি দেখার ভান করল কিশোর।

হাসি চাপলেন শেরিফ। 'নাহ্, তোমাদের প্রশংসা না করে পারছি না। এত নাছোড়বান্দা ছেলে জীবনে দেখিনি আমি।' কাউবয়টা হ্যাটটা খুলে হাতের উল্টো পিঠ দিয়ে কপাল মুছলেন। 'তবে অহেতুক সময় নষ্ট করবে। লঙ হার্ট বাড়ি নেই।'

ঠোট গোল করে শিস দিয়ে উঠল মুসা। 'দূর! খামোকাই এলাম কষ্ট করে।'

মুচকি হাসলেন শেরিফ। 'কেন, প্রকৃতি দেখতে নাকি এসেছ তোমরা? যাকগে, সাবধান করে দিচ্ছি, লঙ হার্টের কাছে আরও বন্দুক থাকতে পারে। বিপজ্জনক লোক সে।'

'শুধু একটা রাইফেল পেয়ে এবং সেটা থেকে গুলি করা হয়েছে সন্দেহ করে কাউকে দোষী ঠাউরানো ঠিক মেনে নিতে পারছি না আমি,' কিশোর বলল।

'সামান্যতম সূত্র থেকে অনেক বড় বড় অপরাধী ধরার ঘটনার কথা জানি আমি,' জবাব দিলেন শেরিফ। গোঁফ চুলকালেন অন্যমনস্ক ভঙ্গিতে। 'আর সাবধান থাকাটা ভাল। তাতে জীবনটা দীর্ঘায়িত করা যায়।'

'তা ঠিক,' ইচ্ছে করেই তর্ক থেকে সরে এল কিশোর। শেরিফকে চটানোটা ঠিক হবে না।

তীক্ষ্ণ দৃষ্টিতে তার দিকে তাকিয়ে আছেন শেরিফ। 'তোমাদের পার করে দিয়ে আসা উচিত ছিল,' ঘড়ি দেখলেন তিনি। 'কিন্তু আমার সময় নেই। নিজেরা এসেছ, নিজেরাই ফিরে যাওয়ার ব্যবস্থা করো। আমার একটাই অনুরোধ-গণ্ডগোল থেকে দূরে থাকবে।'

গাড়ি চালিয়ে এগিয়ে যেতে যেতে জানালা দিয়ে মুখ বাড়িয়ে আবার চিৎকার করে বললেন, 'আর লঙ হার্টের কাছ থেকেও দূরে থাকবে।'

হাসিমুখে তাকিয়ে তাঁর উদ্দেশে জোরে জোরে হাত নাড়ল কিশোর। জীপটা চোখের আড়ালে চলে যেতেই আবার যে দিকে যাচ্ছিল সেদিকে রওনা হলো।

সামনে পথ মোটামুটি সমতল হয়ে এল। ঋড়াই আছে এখনও, তবে কম।

'বাপরে বাপ, অলিম্পিকে জেতাও এরচেয়ে সহজ,' আধঘন্টা পর হাঁপাতে হাঁপাতে বলল মুসা।

'হু,' গাল ফুলিয়ে মুখ দিয়ে বাতাস ছাড়তে ছাড়তে বলল রবিন। 'রক্ত চলাচল স্বাভাবিক রাখতে এরচেয়ে ভাল কোন উপায় বোধহয় আর নেই।'

'সে তো বটেই,' ঘড়ঘড়ে শব্দ বেরোচ্ছে কিশোরের গলা দিয়ে। 'হার্ট অ্যাটাকটা হোক না খালি এখন, টের পাবে স্বাভাবিক কাকে বলে।'

কষ্ট হচ্ছে এগোতে, তাই বলে থামল না ওরা। তুষারে পোলের খোঁচা মেরে মেরে এগিয়েই চলল সামনের দিকে।

বন থেকে বেরিয়ে এল এক সময়। সামনে তৃণভূমি। তুষারে ঢাকা। কোন দিকে যাচ্ছে জানার জন্যে কম্পাসের প্রয়োজন হলো না ওদের। পশ্চিম আকাশে হেলতে থাকা শেষ বিকেলের রোদ ওদের দিক-নির্দেশনা দিচ্ছে।

অনেক নেমে গেছে, 'সূর্যের দিকে তাকিয়ে আনমনে বলল কিশোর।' দুই সহকারীর দিকে তাকাল। 'খামার বোধহয় সময় হয়েছে আমাদের।'

কাঁধের ওপর দিয়ে ফিরে তাকাল মুসা, 'ক্লান্ত হয়ে গেছ?'

মাথা নাড়ল কিশোর, 'না, সে-জন্যে নয়। সূর্য দেখে বেশিক্ষণ আর দিক ঠিক রাখা যাবে না। ফিরে যেতে হলে এখনই সময়।'

কপালে হাত রেখে সামনের দিকে তাকাল মুসা। 'কিন্তু এতখানি এসে ফিরে যাব? শেরিফ বেশি দূরে যাননি। তারমানে লঙ হার্টের বাড়িটা আর বেশি দূরে না। দেখেই যাই, কি বলো?'

‘বাড়িটা তো আর রাতারাতি উধাও হয়ে যাবে না,’ কিশোর বলল। ‘কালও একই জায়গায় থাকবে। অন্ধকার হয়ে গেলে যদি বনের মধ্যে আটকা পড়ি, কোন নিরাপত্তা পাব না, ঠাণ্ডায় জমেই মরতে হবে।’

রবিনও একমত হলো কিশোরের সঙ্গে। অনিচ্ছাসত্ত্বেও ঘুরে দাঁড়াল মুসা। কিশোর আর রবিনের পেছন পেছন তৃণভূমি থেকে ফিরে এসে আবার ঢুকল বনে।

খোলা সাদা প্রান্তরের চেয়ে ছায়াঢাকা পাইন বনের মধ্যে আলো অনেক কম। শীতে গায়ে কাঁটা দিল রবিনের। ঝাড়া দিয়ে তাড়ানোর চেষ্টা করল। কিন্তু কেমন করে উঠল মাথার মধ্যে। বনবন করে ঘুরতে শুরু করল। টলে উঠল দেহ। কোনমতে একটা গাছ ধরে ফেলে পতন ঠেকাল। গাছের গায়ে হেলান দিয়ে হাঁ করে বাতাস গিলতে লাগল।

দু’দিক থেকে এসে তাড়াতাড়ি তাকে ধরে ফেলল মুসা আর কিশোর।

‘মগজটাকে শূন্য করে দাও,’ কিশোর বলল। ‘লম্বা লম্বা দম নাও, ধীরে ধীরে ছাড়ো। তোমার মাথার রোগটা তো আছেই, আরও একটা কারণে হতে পারে এ রকম-পর্বতের পাতলা বাতাস।’

দম নিয়ে আস্তে মাথা ঝাঁকাল রবিন। মগজের ঘোলাটে ভাবটা রয়ে গেছে, তবে দেহের টালমাটাল অবস্থা কাটতে আরম্ভ করেছে। চলতে গেলে আবার কি ঘটবে, বলা মুশকিল।

মুসা জিজ্ঞেস করল, ‘আবার কি তোমার উল্টোপাল্টা দেখা শুরু হতে যাচ্ছে? ব্যাক ফরেস্টের মত?’

‘দৈব-দর্শনের কথা বলছ?’ মাথা নাড়ল রবিন। ‘উহু! তোমরা যা দেখছ, আমিও তাই দেখছি!’

‘একটা শব্দ শুনলাম মনে হলো?’ কিশোর বলল।

‘আমিও!’ বলার সঙ্গে সঙ্গে ওপর দিকে মুখ তুলে তাকাল মুসা। তার মনে হলো, পাতার আড়ালে কাঠবিড়ালী নড়েছে।

আবার শোনা গেল শব্দটা।

‘কুগার নাকি আবার?’ ফিসফিস করে বলল মুসা। ‘না ভালুক?’

ঠোটে আঙুল রেখে চুপ থাকতে ইশারা করল কিশোর। গাছের ডালে নজর। খুঁজে বেড়াচ্ছে।

মুখ তুলে রেখেছে তিনজনেই। এ ভঙ্গিতে তাকিয়ে থাকতে কষ্ট হচ্ছে রবিনের। চোখ বুজল সে।

কিন্তু মুসা আর কিশোর তাকিয়েই আছে। পাইনের জট পাকানো ডাল-পাতা ভেদ করে কিছু চোখে পড়ছে না।

আবার শোনা গেল খসখস শব্দ।

মট করে একটা ডাল ভাঙল।

না, ওপরে তো নয়!

প্রায় একই সঙ্গে ফিরে তাকাল মুসা আর কিশোর।

বড় ধরনের কিছু একটা রয়েছে গাছের আড়ালে। সন্দেহ আর নেই।

এক-দুই করে তিনটে সেকেন্ড পার হয়ে গেল।

হঠাৎ গাছের আড়াল থেকে বেরিয়ে এল কিম্বত একটা মূর্তি।

দশ

‘খাইছে!’ চিৎকার করে উঠল মুসা।

ফিরে তাকাল রবিন।

ক্যামোফ্রেজে ঢাকা বিশালদেহী একজন মানুষকে দাঁড়িয়ে থাকতে দেখল। লম্বা কালো চুল ঘোড়ার লেজের মত করে বাঁধা ঘাড়ের ওপর। হাতে ধনুক। পিঠে ঝোলানো তীর ভর্তি তুণীর। তীক্ষ্ণ কালো চোখের দৃষ্টি ছুরির মত ধারাল। ভারী গলায় বললেন, ‘এটা ব্যক্তিগত জায়গা।’

‘সরি,’ জবাব দিল কিশোর। ‘কিন্তু ওরকম কোন সাইনবোর্ড তো দেখলাম না।’

‘বোর্ড-ফোর্ড দেখতে পারি না আমি,’ জবাব শোনা গেল। ‘কাঁটাতারের বেড়া, সাইনবোর্ড, এ সব জিনিস প্রকৃতির সৌন্দর্য নষ্ট করে। অন্যের অধিকারের ওপর মানুষের শ্রদ্ধা থাকা উচিত। তাহলেই আর কেউ কারও এলাকায় ঢুকে পড়বে না। কিন্তু এ সব কথা আর মানছে কোথায় লোকে। শ্বেতাস্রা ঢোকার পর থেকেই শুরু হয়েছে অনাচার।’

‘আপনি নিশ্চয় লঙ হার্ট?’ জিজ্ঞেস করল কিশোর।

মাথা ঝাঁকালেন ইনডিয়ান। ‘এখন নিশ্চয় জানাবে তোমরা কে, আর কেন ঢুকেছ এখানে।’

নিজেদের পরিচয় দিয়ে কিশোর বলল, ‘আপনাকে খুঁজতে এসেছি।’

‘ইদানীং মনে হচ্ছে খুব বিখ্যাত হয়ে গেছি আমি,’ লঙ হার্ট বললেন। ‘প্রথম এল শেরিফ হ্যামিলটন, তারপর তোমরা।’

‘শেরিফকে দেখেছেন আপনি?’

‘সরাসরি দেখিনি,’ বরফে শেরিফের গাড়ির রেখে যাওয়া চাকার দাগের দিকে ইঙ্গিত করলেন লঙ হার্ট। ‘দাগ চিনতে অসুবিধে হয় না আমার।’ নেচে উঠল তার কালো চোখের তারা। ‘আমার সঙ্গে দেখা করার জন্যে এত কষ্ট করে এতদূর কেন এসেছিল শেরিফ, কোন ধারণা আছে তোমাদের?’

দুই সহকারীর দিকে তাকাল কিশোর। সত্যি কথাটা বলার সিদ্ধান্ত নিল। লঙ হার্টের দিকে ফিরে বলল, ‘ডক্টর মারিসা কুপারের গুলি খাওয়ার ব্যাপারে আপনার সঙ্গে কথা বলতে চান।’

কিশোরের ওপর স্থির হয়ে গেল কালো চোখের তারা। ‘আজ সকালেই জানলাম খবরটা, একজন বন্ধু রেডিওতে জানিয়েছে আমাকে। কিন্তু আমার সঙ্গে কথা বলতে চায় কেন শেরিফ?’

‘আপনার ট্রাকে একটা রাইফেল পাওয়া গেছে,’ জানাল কিশোর। ‘শেরিফ আর তার ডেপুটির ধারণা, ওটা দিয়ে গুলি করা হয়ে থাকতে পারে।’

তিক্ত হাসি হাসলেন লঙ হার্ট। ‘ট্রাকটা বাদ দিলে চলাফেরার জন্যে শুধু কি’র

ওপর নির্ভর করতে হবে আমাকে, যে জিনিসটা আমি ভাল পারি না। তোমরাই বলো, তুমারঝড়ের মধ্যে স্কি করে গিয়ে মারিসাকে গুলি করে, ফিরে এসে, শহরে গিয়ে রাইফেলটা কখন লুকালাম ট্রাকের মধ্যে? সম্ভব? তা ছাড়া আমি ওটা ওখানে লুকাতেই বা যাব কেন? তারপর সেখান থেকে আবার স্কি করে এখানে ফিরে আসা। কত দূরে বাস করি সে তো দেখতেই পাচ্ছি।...কিন্তু এ সবে সঙ্গ তোমাদের কি সম্পর্ক?

বলতে গেল কিশোর, কিন্তু থামিয়ে দিয়ে লঙ হার্ট বললেন, 'ঠিক আছে, আমিই বলছি। তোমরা হচ্ছে সেই তিনজন, যারা মারিসাকে তুলে এনে হাসপাতালে পৌঁছে দিয়েছ। ভালই করেছে। মারিসার বেঁচে থাকা দরকার। একটা অতি জরুরী গবেষণা করছে সে।'

'বন্য প্রাণী সংরক্ষণের কাজ,' বলল কিশোর। 'কিন্তু আমরা ওললাম, ওই একই জায়গা দখলের জন্যে আপনিও লড়ে চলেছেন?'

'আমাদের লড়াইটার উদ্দেশ্য কমবেশি একই,' লঙ হার্ট জানালেন। 'শত শত বছর ধরে প্রকৃতির সঙ্গে ভাল মিলিয়ে, একে অন্যকে সহযোগিতা করে বাস করেছে ইউটি আর অন্যান্য গোত্রের ইনডিয়ানরা। আর কুগারের প্রতি বিশেষ শ্রদ্ধা আছে আমাদের। আমরা ওদেরকে বলি পর্বতের প্রেত।'

'তারমানে, আপনি বলতে চাইছেন, ইউটিরা তাদের ভূমি ফেরত পেলে মারিসা কুপার আপনাদের জন্যে কোন হুমকি নন?'

ফাঁস করে নিঃশ্বাস ফেললেন লঙ হার্ট। 'একটা কথা তোমাদের জোর দিয়ে বলতে পারি, যদি পূর্ব-পুরুষের জমি ফেরত পাই আমরা, চমৎকার ওই প্রাণীগুলোর বেঁচে থাকার জন্যে যতটা জায়গা দরকার, নির্দিধায় ছেড়ে দেব।'

দুই সহকারীর দিকে তাকাল কিশোর। মুসা আর রবিনের মুখ দেখে বোঝা গেল, লঙ হার্টের কথা বিশ্বাস করেছে ওরা। কিশোরও করল। 'তাহলে ধরে নিতে পারি, ডক্টর কুপারকে খুন করার কোন মোটিভ বা উদ্দেশ্য আপনার নেই। কিন্তু আপনার রাইফেলটা ট্রাকে গেল কি ভাবে? ব্যালিস্টিক রিপোর্ট যদি প্রমাণ করে গুলিটা আপনার রাইফেল থেকেই বেরিয়েছে, আবার আপনাকে জিজ্ঞাসাবাদ করতে আসবেন শেরিফ। আপনার যে বড় শত্রু রয়েছে এখানে, এটা না জানার কথা নয় তাঁর।'

আকাশের দিকে তাকালেন লঙ হার্ট। 'অন্ধকার হয়ে যাচ্ছে। তোমাদের বন্ধুটিকেও অসুস্থ মনে হচ্ছে,' রবিনকে দেখালেন তিনি। 'আগুন জ্বলে গরম গরম খাবার রান্না করতে যাচ্ছি আমি। যাবে নাকি আমার সঙ্গে? না অন্য কোন কাজ আছে তোমাদের?'

'আপনার সঙ্গে যাওয়ার চেয়ে ভাল কোন কাজ আপাতত আমি অন্তত ভাবতে পারছি না,' হেসে বলল মুসা। অস্পষ্ট হয়ে আসা গোধূলির আলোতেও ঝকঝক করে উঠল তার ধবধবে সাদা দাঁত।

এগারো

পপলার গাছের কান্নার মধ্যে লঙ হার্টের বাড়ি। অতি সাধারণ একটা কাঠের কেবিন। ভেতরে বড় একটা ঘর। একপাশে ঘুমানোর জায়গা, আরেক পাশে পাথরের ফায়ারপ্লেস। ঘরের আসবাবপত্র বেশির ভাগই নিজের হাতে বানানো।

ঘরের আদিম পরিবেশে বড় বেশি বেখাপ্লা লাগছে এককোণে রাখা একটা আনকোরা নতুন রেফ্রিজারেটর, একটা রেডিও, আর লম্বা ওঅর্ক-টেবিলের ওপর রাখা একটা পার্সোনাল কম্পিউটার।

‘পাওয়ার লাইন তো দেখছি না,’ রবিন বলল। ‘ইলেকট্রিসিটি পান কোন্‌খান থেকে?’

‘ঘরের পেছনে একটা জেনারেটর আছে,’ লঙ হার্ট জানালেন। ‘লিকুইড প্রপেনে চলে।’ জমিয়ে রাখা কাঠের স্তূপ থেকে এক পাজা কাঠ তুলে নিলেন তিনি। ফায়ারপ্লেসে ফেলতে ফেলতে বললেন, ‘এখানে আগুন জ্বেলে খুব একটা সুবিধে হয় না। তাপ আটকায় না, বেশির ভাগটাই বেরিয়ে যায় চিমনি দিয়ে।’

ওক কাঠে তৈরি ম্যানটল থেকে দেশলাই তুলে নিয়ে এলেন তিনি। কাঠে আগুন ধরিয়ে শিক দিয়ে খুঁচিয়ে উসকে দিতে শুরু করলেন আগুন। ‘তারপরেও, বাইরে যখন গর্জন করে ক্ষেপে বাতাস, তুমার ঝড়ের তাণ্ডব চলে, এখানে এই আগুনের সান্নিধ্যটাই তখন নারী দুনিয়ায় আমার সবচেয়ে আরামদায়ক সঙ্গী।’

জ্বলে উঠা আগুনে হাত সেকতে সেকতে মুসা বলল, ‘এ মুহূর্তে আমারও সেকথাই মনে হচ্ছে।’

তার দিকে তাকিয়ে হাসলেন লঙ হার্ট। ‘খুব সহজ করে কথা বলো তুমি। ইউটি কিশোরদের মত।’

হেসে রবিনকে দেখাল কিশোর, ‘অথচ ইনডিয়ান রক্তের মিশ্রণ ওর গায়ে।’
‘ওকেও জটিল মনে হচ্ছে না।’ ভুরু নাচালেন লঙ হার্ট, ‘কেমন লাগছে তোমার এখন, রবিন?’

‘ভাল। তবে মাথার মধ্যেটা ভাল না।’
‘কি হয়েছে?’

‘মাথায় একবার বাড়ি খেয়েছিল ও,’ কিশোর জানাল। ‘কয়েকটা দিনের কথা চিরকালের জন্যে মুছে গেছে স্মৃতি থেকে। ডাক্তার বলেছেন, ওই আঘাতেরই কুফল এটা। তবে সেই সঙ্গে অদ্ভুত কিছু ক্ষমতা তৈরি হয়েছে ওর মগজের মধ্যে।’

চোখের পাতা সরু করে দীর্ঘ একটা মুহূর্ত রবিনের দিকে তাকিয়ে রইলেন লঙ হার্ট। তারপর বললেন, ‘উল্টোপাল্টা দেখে নাকি? অতীত-ভবিষ্যৎ দেখে?’

‘বর্তমানও দেখে,’ কিশোর অবাক। ‘কিন্তু আপনি জানলেন কি করে?’

‘ইনডিয়ানরা এ ধরনের নানা রকম অলৌকিক ক্ষমতায় বিশ্বাসী,’ গম্ভীর কণ্ঠে জবাব দিলেন লঙ হার্ট। ‘বাস্তবতা আছে বলেই হয়তো।’

ওঅর্ক-টেবিলটার কাছে এগিয়ে গেল কিশোর। টেবিলের ওপাশের দেয়ালে

জবরদখল

খোপ খোপ করে তার মধ্যে সাজিয়ে রাখা হয়েছে নানা রকমের পাথর, নুড়ি, অস্ত্র, ভাঙা পাত্র, তীরের মাথা, এ সব জিনিস। 'এখানে কেউ প্রত্নতাত্ত্বিক গবেষণা চালায় মনে হচ্ছে?'

'এটা আমার হবি,' নির্বিকার কণ্ঠে জবাব দিলেন লঙ হার্ট।

'শুধুই হবি?' কম্পিউটারটার দিকে তাকাল কিশোর।

হাসলেন লঙ হার্ট। 'নাহ, তুমি নাছোড়বান্দা ছেলে। না জেনে আর ছাড়লে না। সত্যি কথাটা হলো, প্রফেসরগিরি ছেড়ে পালিয়েছি আমি। ইউনিভার্সিটিতে আর টিকতে পারছিলাম না, দম আটকে আসছিল আমার। চলে এলাম এখানে। আমার গোত্রকে সহায়তা করার জন্যে। নিজেদের দাবি আদায় করতে গিয়ে জড়িয়ে পড়লাম এখানকার পলিটিক্সে।'

নতুন দৃষ্টিতে তাকাল কিশোর লম্বা কালো চুলওয়ালা বিশালদেহী মানুষটার দিকে। 'আপনার রাজনীতির কথা শোনার জন্যে সাংঘাতিক কৌতূহল হচ্ছে আমার।'

চওড়া, পেশীবহুল কাঁধটায় ঝাঁকি দিলেন লঙ হার্ট। 'বলার খুব বেশি কিছু নেই। গোত্রের কয়েকজন সক্রিয় রাজনৈতিক কর্মী আর আইনজ্ঞের সঙ্গে হাত মিলিয়ে কাজ করছি আমি কয়েক বছর হলো। আমাদের ভূমি আমরা ফেরত পাব কিনা, নিশ্চিত নই। তবে তোলপাড় করে ছাড়ব। অর্থ বরাদ্দের ক্ষেত্রেও আমাদের ঠকাচ্ছে সরকার। আমাদের দাবি ইন্ডিয়ানদের জন্যে ভাল স্কুল, ভাল হাসপাতাল, ভাল থাকার প্রতিশ্রুতি।'

'তারমানে আন্দোলন। কিন্তু সহিংসতা ছাড়া কি সেটা সম্ভব?'

'দেখো, আমি সহিংসতায় বিশ্বাসী নই। আমি চাই শান্তি। জনমত তৈরি করে চাপ দিয়ে সরকারকে বাধ্য করতে চাই আমাদের জমি যাতে ফিরিয়ে দেয়।'

একটা ব্যাকে ধনুক দেখতে পেল রবিন। গাছ থেকে নামার সময় যে রকম ধনুক ছিল লঙ হার্টের হাতে, সে-রকম আরও তিনটে ধনুক রয়েছে এখানে। ফাইবার গ্লাসে তৈরি দণ্ড আর ইস্পাতের তারে তৈরি ছিলগুলোকে দুই মাথায় লাগানো পুলিশ ভেতর দিয়ে টেনে আনা হয়েছে। এতে নিখুঁত নিশানা সহ প্রচণ্ড শক্তিতে তীর ছুঁড়ে দেয়ার ক্ষমতা তৈরি হয়েছে ধনুকগুলোর। রাইফেলের গুলির চেয়ে কম মারাত্মক নয়। কোন কোন ক্ষেত্রে বরং বেশি। সহিংসতায় বিশ্বাসী নন, তাহলে এত অস্ত্র দিয়ে কি করেন তিনি?

ঘুরে বেড়াচ্ছে রবিনের চোখ। ওঅর্কবেঞ্চের এক ধারে রাখা কিছু কাজ করার যন্ত্রপাতি, কাছেই রাখা নতুন তৈরি কিছু অতি আধুনিক তীর, কোন কোনটা বানানো শেষ হয়নি এখনও। দেয়ালে বসানো কোট রাখার ব্যাকটা তৈরি হয়েছে এল্ক হরিণের শিং দিয়ে। মেঝের মাদুরটাও পশুর চামড়ায় তৈরি।

'বোঝা যায়, বাড়ির মালিক শিকারী,' সন্দেহের কথাটা ঘুরিয়ে বলল রবিন।

'আর কি বোঝা যায়?' ভুরু নাচালেন লঙ হার্ট।

'সেটাই তো জানতে চাইছি আমরা,' রবিনের জবাবের দেরি দেখে বলে উঠল কিশোর। 'একটা তীর তুলে নিয়ে মাথাটায় সাবধানে আঙুল ছুঁয়ে ধার পরীক্ষা করল সে। 'এ সব অস্ত্র দিয়ে কি করেন আপনি?'

‘ওই যে রবিন বলল, শিকার,’ জবাব দিলেন লঙ হার্ট। ‘জন্তু-জানোয়ারকে যতই ভালবাসি আমি, বেঁচে থাকার জন্যে খাবার খেতে হয় আমাকে। তবে মাংসের জন্যে যতটুকু দরকার ঠিক ততটুকুই শিকার করি আমি, তারচেয়ে এক ছটাকও বেশি নয়—আমার পূর্ব-পুরুষরা যা করতেন। তাদের মত তীর-ধনুকই ব্যবহার করি, কোন রকম আগ্নেয়াস্ত্র নেই আমার কাছে।’

‘কিন্তু এত আধুনিক ধনুক নিশ্চয় ছিল না তাদের,’ কিশোর বলল। ‘তা ছাড়া এখানে কোন বন্দুক দেখতে পাচ্ছি না বলেই যে আগ্নেয়াস্ত্র নেই আপনার কাছে, তাই বা কি করে বিশ্বাস করব?’

‘না, নেই,’ জোর দিয়ে বললেন লঙ হার্ট। রান্নাঘরের জন্যে বরাদ্দ ছোট্ট জায়গাটায় গিয়ে দাঁড়ালেন তিনি। স্টোভের ওপরে দেয়ালে লাগানো একটা ছোট আলমারির দরজা খুললেন। ‘আজ রাতে ক্যানড বীন দিয়েই খাওয়া সারতে হবে তোমাদের। হরিণই পেতে, গাছে উঠে বসেছিলাম; কিন্তু শেরিফের গাড়ি আর তোমাদের আনাগোনার কারণে পালাল ওটা। কি আর করা। তোমাদেরই পিছু নিলাম। তোমরা কে, কেন এসেছ জানার জন্যে।’

‘ক্যানড বীনেই চলবে আমাদের,’ কিশোর বলল।

দুই হাত ছড়িয়ে হাই তুলল রবিন। ‘খাওয়ার চেয়ে শোয়ার দরকার বেশি আমার। আগুনের ধারে এই চেয়ারেই মনে হচ্ছে ঘুমিয়ে পড়ব।’

‘সেটাই করতে হবে তোমাদের,’ লঙ হার্ট বললেন। ‘চেয়ারেই রাত কাটাতে হবে। কারণ তিনজনকে দেয়ার মত বিছানা আমার নেই। আর, সকালের আগে বেরোতেও পারবে না।’

তার শেষ কথাগুলো বোধহয় কানে ঢোকেনি রবিনের। চোখ বোজা। ভারী নিঃশ্বাস। ঘুমিয়ে পড়েছে।

বারো

সূর্য ওঠার খানিক আগে দরজা বাড়ি খাওয়ার শব্দে ঘুম ভেঙে গেল কিশোরের। খোলা দরজা দিয়ে ছড়মুড় করে ঢুকছে বরফের মত শীতল বাতাস। লঙ হার্টকে দেখল না। টেবিলের ওপর একটা নোট চাপা দেয়া। জানিয়ে গেছেন, তিনি শিকারে বেরিয়েছেন। ফিরতে দেরি হবে। আরও লিখেছেন, ট্রেইল ধরে এগোলে গাড়ির কাছে পৌছতে কোন অসুবিধে হবে না ওদের। মেসেজটা পরিষ্কার: আমি ফিরে এসে আর তোমাদের দেখতে চাই না।

থাকার ইচ্ছে কিশোরেরও নেই। যত তাড়াতাড়ি সম্ভব শহরে ফিরে যেতে চায়। ডক্টর কুপারের কোন উন্নতি হয়েছে কিনা জানার জন্যে অস্থির। কিন্তু বাইরে এখনও অন্ধকার। ট্রেইল দেখতে পাবে না। আলো ফোটার অপেক্ষা করতেই হবে।

দরজাটা আবার লাগিয়ে দিতে গিয়ে কি ভেবে বারান্দায় বেরিয়ে এল কিশোর। পর্বত থেকে আসা বাতাসের ঝাপটায় থরথর করে কেঁপে উঠল সে। নাহ, দাঁড়ানো যাবে না। ঘরে ঢুকে আবার দরজা লাগাতে যাবে, ঠিক এই সময় তীক্ষ্ণ শব্দে ভেঙে

গেল দরজার কাঠ। তীক্ষ্ণ ব্যথা ছড়িয়ে গেল মাথায়। চোখে অন্ধকার দেখতে শুরু করল।

গরমকালে সৈকতে ঘুরে বেড়ানোর স্বপ্ন দেখছিল মুসা। স্বপ্নে বজ্রপাত হতে দেখল। শব্দ শুনে চমকে জেগে গেল সে।

কার যেন চিৎকার কানে এল, 'লেগেছে! লেগেছে!'

আরেকটা চিৎকার শোনা গেল, 'আরে করলে কি! মেরে ফেলেছ নাকি?'

চিৎকার শুনে ধীরে ধীরে চোখ মেলল রবিনও। মাথার মধ্যে ঘোলাটে ভাব। সব কিছু ঘুমের ঘোরে দেখছে বলে মনে হলো তার। দরজার কাছে পড়ে থাকতে দেখল একটা দেহ।

'কিশোর!' চিৎকার করে লাফ দিয়ে উঠে দাঁড়াতে গেল সে। বোঁ করে চক্কর দিয়ে উঠল মাথার মধ্যে। ধপ করে বসে পড়ল আবার।

তবে মুসা রওনা হয়ে গেছে ততক্ষণে। হাঁটু গেড়ে বসল কিশোরের পাশে। মাথা থেকে রক্ত বেরোতে দেখল। মানুষের কথা কানে আসছে। তিনজন লোককে বেরিয়ে আসতে দেখল গাছের আড়াল থেকে।

হ্যাট দিয়ে একজন ডেপুটির হাতে বাড়ি মারলেন শেরিফ হ্যামিলটন। 'সরাও ওটা!' গর্জে উঠলেন তিনি। 'আবার টিপ দিয়ে বসবে তো।'

আহত দৃষ্টিতে বসের দিকে তাকাল মারটিন। 'আপনিই তো বললেন ও বিপজ্জনক। সাথে বন্দুক থাকতে পারে।'

হ্যাটের চাঁদিতে লাগা তুষার মুহূর্তে মুহূর্তে শেরিফ বললেন, 'ছেলেটার সাইজ দেখেও কি মাথায় কিছু ঢোকেনি? ওকে লঙ হার্টের মত মনে হচ্ছে? ওদের কাছে অস্ত্র আসবে কোথেকে?'

গুণ্ডিয়ে উঠে চোখ মেলল কিশোর। 'কি হয়েছে?'

'গুলিতে কাঠের চলটা উঠে এসে তোমার মাথায় লেগেছে,' মুসা জানাল।

'ট্রিগারে টিপ দিয়ে ফেলেছিল এই গাধাটা,' মারটিনকে দেখালেন শেরিফ। কিশোরকে কথা বলতে শুনে স্বস্তি বোধ করছেন তিনি।

কিশোরকে উঠে বসতে সাহায্য করল মুসা।

'গতকাল এসেছিলেন লঙ হার্টের সঙ্গে কথা বলতে,' কিশোর বলল। 'আজ এসেছেন গুলি করতে। ঘটনাটা কি? ব্যালিস্টিক রিপোর্ট কি নিশ্চিত করেছে তাঁর রাইফেল দিয়েই গুলি করা হয়েছিল ডক্টর কুপারকে?'

'উহু, এখনও অমীমাংসিত রয়েছে ব্যাপারটা,' শেরিফ জানালেন।

'রাইফেলটা কার নামে রেজিস্ট্রি করা, চেক করেছেন?'

'করেছি। লঙ হার্টের নামে কোন আগ্নেয়াস্ত্র রেজিস্ট্রি করা নেই। রাইফেলের গা থেকে সিরিয়াল নম্বরটাও রেন্দা দিয়ে ঘষে ভুলে ফেলা হয়েছে। কাজেই কার নামে রেজিস্ট্রি করা হয়েছিল ওটা, তা-ও আর জানা সম্ভব না। অতি চমৎকার একটা অস্ত্র-আনকোরা নতুন বোল্ট-অ্যাকশন উইনচেস্টার, জার্মান টেলিস্কোপ লাগানো।'

'একটা কথার সরাসরি জবাব দেবেন?' কিশোর বলল, 'কার রাইফেল জানেন না। ওটা দিয়ে আদৌ গুলি করা হয়েছে কিনা নিশ্চিত নন। তাহলে দল বেঁধে লঙ

জবরদখল

হাটের পেছনে লেগেছেন কেন?’

‘একজন সাক্ষী আছে আমাদের,’ জবাব দিলেন শেরিফ।

‘সেই উড়ো টেলিফোনওয়ালা? নাকি আরও কাউকে খুঁজে পেয়েছেন, যে লঙ হাটকে গুলি করতে দেখেছে?’

‘গুলি করতে দেখিনি,’ শেরিফ জানালেন, ‘তবে সেদিন সকালে ওই এলাকায় দেখা গেছে লঙ হাটকে। ওখান থেকে তিন মাইল উত্তরে ক্যাম্প করেছিল একটা শিকারী দল। ওদের গাইড এলক স্প্রিঙের লোক, নাম টেরি জনসন। ও বলেছে।’

‘টেরি জনসন যে মিছে কথা বলেনি, কি করে জানছেন? সে-ও তো গুলি করে থাকতে পারে। নিজে বাঁচার জন্যে এখন অন্যের ঘাড়ে দোষ চাপাচ্ছে।’

‘সে-কথা ভাবিনি মনে করেছি?’ শেরিফ বললেন। ‘টেরির কথা শোনার পর গিয়ে-শিকারী দলটার সঙ্গে দেখা করেছি। একই কথা বলেছে সব ক’জন-দলছুট হয়নি সেদিন সকালে কেউ ওরা। একা সরে গিয়ে যে গুলি করে আসবে কেউ সে-সম্ভাবনা নেই। তা ছাড়া একজনও সেদিন সকালে একটা গুলি ছোঁড়েনি।’

‘কিন্তু ঝড় ছিল তখন,’ যুক্তি দেখাল কিশোর। ‘ঝড়ের মধ্যে লঙ হাটকে দেখল কি ভাবে? দশটার আগে তো ঝড় থামেইনি।’

‘থেমেছিল একবার, সামান্য সময়ের জন্যে, ন’টার সময়,’ মনে করিয়ে দিল মুসা।

‘হুঁ!’ শেরিফের দিকে তাকাল কিশোর। ‘কি শিকার করতে বেরিয়েছিল ওরা, বলেছে কিছু?’

কাশি দিয়ে গলা পরিষ্কার করে নিলেন শেরিফ। ‘কুগার।’ কিশোরকে পাশ কাটিয়ে ঘরের মাঝখানে চলে গেলেন তিনি। চারপাশে তাকাতে তাকাতে জিজ্ঞেস করলেন, ‘তোমরা এখানে কি করছ?’

‘লঙ হাটের বাড়ি দেখতে এসেছি,’ হালকা স্বরে জবাব দিল কিশোর। ‘বেআইনী কিছু করেছি?’

ঘুরে দাঁড়িয়ে শীতল দৃষ্টিতে কিশোরের দিকে তাকালেন শেরিফ। ‘অন্যের ঘরে বেআইনী ভাবে ঢোকার অপরাধে আমি তোমাদের আ্যারেস্ট করতে পারি।’

আন্তে করে উঠে দাঁড়াল কিশোর। মাথার কেটে যাওয়া জায়গাটায় আঙুল চেপে ধরে জবাব দিল, ‘আমি আপনাদের বিরুদ্ধে আমাকে গুলি করার অভিযোগ করে কেস করতে পারি।’ লঙ হাটই যে ওদের নিয়ে এসেছে, সেটা চেপে গুল শেরিফের কাছে।

একটা মুহূর্তের জন্যে থমকে গেলেন শেরিফ। হ্যাটের কানা ধরে ঠেলে সামান্য পেছনে সরিয়ে দিলেন। হাসিটা ফিরে এল আবার মুখে। ‘অকারণেই কথা বাড়ানি আমরা। চলো, গাড়িতে করে বড় রাস্তায় পৌঁছে দিই তোমাদের।’ রবিনের দিকে তাকালেন তিনি। ‘ওর কি হয়েছে?’

‘শরীর খারাপ,’ জবাব দিল মুসা।

দীর্ঘ একটা মুহূর্ত রবিনের দিকে তাকিয়ে থেকে জিজ্ঞেস করলেন শেরিফ, ‘কি হয়েছে?’

‘মগ্জের অসুখ,’ কিশোর জানাল। ‘হাওয়া বদল করতে পরামর্শ দিয়েছিলেন

ডাক্তার, সে-জন্যেই এল্‌ক স্প্রিঙে এসেছিলাম আমরা।’

‘ও। তাহলে তো তোমাদের পৌছে দেয়াটা আরও জরুরী।’ কিশোরের দিকে তাকিয়ে হাসলেন, ‘তোমার জখমটা কি খুব ব্যথা করছে?’

‘না,’ মাথা নাড়ল কিশোর। ‘চামড়া কেটেছে সামান্য। তবে কাঠের চলটার ধাক্কাটাও কম ছিল না। বেহঁশ হয়ে-গিয়েছিলাম।’

তেরো

শেরিফের গাড়ি থেকে নেমে নিজেদের গাড়িতে চড়ল তিন গোয়েন্দা। শহরে ঢুকে সোজা হাসপাতালে চলল ডক্টর কুপারকে দেখতে। ঢোকার মুখে ফ্র্যাঙ্ক হ্যানকে বেরিয়ে আসতে দেখল।

ওদের দেখে দাঁড়াল হ্যান।

‘ডক্টর কুপার কেমন আছেন?’ জিজ্ঞেস করল কিশোর।

‘জ্ঞান ফেরেনি এখনও,’ জবাব দিল হ্যান। ‘তবে অবনতিও আর হয়নি। আচ্ছন্নতার মধ্যে আছে।’

‘তারমানে ভাল হয়ে যাবেন,’ আশা করল কিশোর। ‘অবনতি যেহেতু আর হয়নি।’

‘আমি শুনেছি,’ রবিন বলল, ‘আচ্ছন্নতার মধ্যে রোগীর সামনে বসে তাকে নিয়ে কথা বললে, আলোচনা করলে দ্রুত উন্নতি হয়।’

কথাটা পছন্দ হলো না হ্যানের। বলল, ‘সামনে বসে কথা বলা তো দূরের কথা, তাকে এক পলক দেখতেও দেবে কিনা সন্দেহ। মারিসার আঙ্কেল আর আন্টি এসেছিল, তাদেরকেই দেখতে দেয়া হয়নি। তোমরা তো আত্মীয়ও নও। পরিচয়ও অতি সামান্য। আমি যেতে পেরেছি কেবল ইনটেনসিভ কেয়ার ইউনিটের একজন নার্সের সঙ্গে আমার খাতির আছে বলে।’

‘তাহলে তাকে বলে আমাদের ঢোকার ব্যবস্থা করে দিন না,’ অনুরোধ করল কিশোর।

ঘড়ি দেখল হ্যান। ‘সরি। সময় নেই। আমাকে এক্ষুণি দোকানে ফিরে যেতে হবে। জরুরী কাজ আছে।’

‘ওহ্‌হো, আপনার যে একটা দোকান আছে ভুলেই গিয়েছিলাম,’ কিশোর বলল। ‘বেশি দূরে?’

হাসল হ্যান। ‘এল্‌ক স্প্রিঙে কোন কিছুই কোনখান থেকে বেশি দূরে নয়। এখান থেকে দুই ব্লক দূরে আমার দোকান।’

‘ও, তাই নাকি। নতুন একটা স্লীপিং ব্যাগ দরকার আমার, বেশি গরম। আপনার সঙ্গে আসি?’

‘আসো, অসুবিধে নেই,’ হ্যান বলল। ‘দামও কমিয়ে রাখব। একটা অন্তত ভাল স্মৃতি নিয়ে এ শহর থেকে যেতে পারবে।’

‘শহরটা কিন্তু আমার ভালই লাগছে,’ রাস্তা ধরে হাঁটতে হাঁটতে বলল কিশোর।

‘দোকানপাটগুলোকে দেখে মনে হচ্ছে সেই আদিকাল থেকে আছে এখানে, থাকবে চিরকাল।’

‘খাবারের দোকানও তো দেখছি না,’ মুসা বলল, ‘ফাস্ট ফুড।’

রবিন নেই ওদের সঙ্গে। হাঁটতে গেলে মাথা ঘুরে যদি আবার পড়ে যায়, এই ভয়ে ওর অনিচ্ছাসত্ত্বেও ওকে বসিয়ে রেখে এসেছে গাড়িতে।

একটা দোকানের সামনে এসে থামল হ্যান। দরজার কপালে কাঠের সাইনবোর্ড। তাতে খোঁদাই করে দোকানের নাম লেখা। দরজা ঠেলে খুলতে খুলতে বলল, ‘এল্ক স্প্রিঙে আরও ট্যুরিস্ট আসা দরকার। নতুন রাস্তাটা হয়ে গেলে অবশ্য এখনকার অবস্থা থাকবে না।’

‘আসা সহজ হলে তো অ্যাসপেনের মত হয়ে যাবে,’ মুসা বলল। ‘আরেকটা রিজর্ট টাউন।’

হেসে বলল হ্যান, ‘আমার কোন অসুবিধে নেই তাতে। বাস করতে পারব। আমার দরকার ব্যবসা।’

স্তুপ করে রাখা ডে-প্যাক, ডাফলু ব্যাগ, ক্যানটিন আর কুক স্টোভের মাঝের সরু গলি ধরে এগিয়ে গেল কিশোর। বৃষ্টিতে পরার উপযোগী নানা রকম পোশাক ঠেলে সরিয়ে রাখা হয়েছে ক্যামোফ্লেজ পোশাকগুলোর দিকে। ওগুলোর কাছেই রাখা হয়েছে তাঁবু আর ব্যাকপ্যাক। কাঁচের একটা তাল্লা দেয়া কেসের মধ্যে রাখা শটগানের নানা রকম রঙিন কার্তুজ, হরিণ মারার গুলি আর হাই-ক্যালিবার রাইফেলের বুলেট।

‘আপনার খদ্দেররা মনে হচ্ছে বেশির ভাগই শিকারী?’ জিজ্ঞেস করল কিশোর।

মাথা ঝাঁকাল হ্যান। ‘হ্যাঁ। শিকারীরাই আমার ভরসা। শিকারের বিরুদ্ধে কেন এত আন্দোলন, মাথায় ঢোকে না আমার। রোজ রোজ কোটি কোটি গরু-ছাগল মাছ-মুরগী মেরে মেরে খাচ্ছে, সেগুলো নিয়ে তো কারও মাথাব্যথা নেই। একটিবার উচ্চারণও করে না। যত আপত্তি কেবল অন্য প্রাণী মারার বেলায়। তবে, আমি অবশ্য শিকার-টিকার করি না।’

কাউন্টারের পেছনে বড় একটা ছবি। তাতে স্কি’র পোশাক পরা একজন মানুষ। কাঁধে ঝোলানো রাইফেল। সেটা দেখিয়ে মুসা বলল, ‘আপনার ছবিই তো মনে হচ্ছে। শিকারে যদি আগ্রহই না থাকে, এটা কিসের?’

‘বিয়্যাথলন কমপিটিশন,’ হ্যান জানাল। ‘ক্রস-কান্ট্রি স্কিইং আর সেই সঙ্গে টার্গেট শুটিং প্র্যাকটিসের মিশ্রণ। আমি যে রাইফেল ব্যবহার করি, দেখে সবাই হাসে-টোয়েন্টি টু বোর। নিশানা হয় সাংঘাতিক, কিন্তু কাঠবিড়ালী ছাড়া আর কিছু পড়ে না।’

‘অলিম্পিকেও তো বিয়্যাথলন প্রতিযোগিতা হয়, তাই না?’

‘হ্যাঁ,’ জবাব দিল হ্যান। ‘অলিম্পিক টীমেই ছিলাম আমি। তবে বাড়তি হিসেবে। খেলা চলার সময় কেউ হঠাৎ করে অসুস্থ হয়ে পড়লে, কিংবা পা ভেঙে গেলে তার জায়গায় ঢুকতে পারতাম আমি। আমার কপাল খারাপ, তেমন কিছু ঘটেনি একবারও। ফলে সোনা জেতার সুযোগও আর পাইনি কখনও।’

‘এখনকার গাইডদের নিশ্চয় চেনেন আপনি?’ আগের প্রশ্নে ফিরে আসতে

চাইল কিশোর।

‘তা তো চিনিই,’ ছবিটার দিকে তাকিয়ে থেকে জবাব দিল হ্যান।

‘টেরি জনসনকে চেনেন?’

ফিরে তাকাল হ্যান। ‘কোথায় শুনেছ ওর নাম?’

‘শেরিফ বলেছেন। গিরিখাতের যেখানে গুলি খেয়েছেন ডক্টর কুপার, সেখানে নাকি লঙ হার্টকে দেখেছে টেরি।’

‘ওকে অত বিশ্বাস করার কোন কারণ নেই,’ হ্যান বলল। ‘আগে গেম ওয়ার্ডেন ছিল। ঘুষ খেয়ে বেআইনী ভাবে শিকার করতে দেয়ার অপরাধে তার চাকরি যায়। এখন নিজেই একটা অফিস খুলে বসেছে। গাইডের কাজ করে। শিকারে সাহায্য করে।’

‘আপনার কি মনে হয় শেরিফের কাছে মিথ্যে বলেছে টেরি?’

শ্রাগ করল হ্যান। ‘বলা কঠিন। ওকে দিয়ে অনেক কিছুই সম্ভব।’ চোখের পাতা সরু হয়ে এল তার। ‘ডক্টর কুপারকে সে-ই গুলি করেছে ভাবছ না তো আবার?’

‘ভাবতে তো আর দোষ নেই, কি বলেন?’ মুসার দিকে তাকাল কিশোর। ‘টেরি জনসনের সঙ্গে দেখা করে তাকেই তো জিজ্ঞেস করতে পারি কথাটা, কি বলো?’

টেরি জনসন কোথায় থাকে বলে দিল হ্যান। শহরের বাইরে। রবিনকে আর নিল না সেখানে কিশোর। তাকে হোটেলে বিশ্রাম করতে রেখে এসে মুসাকে নিয়ে রওনা দিল।

পুরানো ফার্মহাউসটার কাছে সব পৌছেছে ওরা, দেখল নীল রঙের একটা পুরানো পিকআপ ট্রাক পেছনে লাগানো একটা ট্রেলারকে টেনে নিয়ে বেরিয়ে আসছে ড্রাইভওয়ে দিয়ে। তিনজন লোক বসা গাড়িতে। ট্রাকের পেছনে কয়েকটা বাস রাখা। ট্রেলারে রাখা হয়েছে দুটো কালো রঙের স্লোমোবাইল।

গতি কমাল মুসা। পিকআপটাকে এগিয়ে যেতে দিল।

‘মনে হচ্ছে শিকার শেখাতে নিয়ে যাচ্ছে,’ কিশোর বলল। ‘পিছু নিলে মন্দ হয় না, কি বলো? বিনে পয়সায় দু’চারটে উপায় আমরাও শিখে ছিঁতে পারি।’

দাঁত বের করে হাসল মুসা। ‘তা তো পারিই। চোখ-কান খোলা রাখলে হয়তো আরও অনেক কিছুই শেখা যাবে।’

ট্রেলারের পিছু নিল মুসা। বেশ খানিকটা দূরত্ব রেখে একই গতিতে এগিয়ে চলল।

‘খুব বেশি এগোতে দিলে কিন্তু হারিয়ে যাবে,’ সাবধান করল কিশোর।

‘বেশি কাছে গেলেও দেখে ফেলবে,’ মুসা বলল। ‘এত বেশি ফাঁকা, চোখে না পড়লেই বরং অবাক হব।’

বরফে ঢাকা রাস্তা। তার ওপর তুষার ছাওয়া। আঁকাবাঁকা সেই পাহাড়ী পথ ধরে ধীরে ধীরে এগিয়ে চলেছে ট্রেলার। থামল গিয়ে একটা ঢালের ধারে।

গাড়ি থামিয়ে দিল মুসা। দ্রুত পিছিয়ে নিয়ে এল মোড়ের আড়ালে, যাতে চোখে পড়ে না যায়। গাড়ি থেকে নেমে গিয়ে প্যাক থেকে মনোকিউলারটা বের করল

কিশোর।

বড় একটা পাথরের আড়ালে লুকিয়ে বসে শিকারী-দলটার ওপর নজর রাখতে লাগল ওরা। ভারী দেহের লাল দাড়িওয়ালা একজন লোক ট্রেলার থেকে স্লোমোবাইল দুটো নামানোর পর পিকআপের পেছনে গিয়ে উঠল।

‘ওই লোকটাই মনে হয় টেরি জনসন,’ ফিসফিস করে মুসাকে বলল কিশোর। বাস থেকে যা বেরোল দেখে ভুরু কুঁচকে গেল তার। মনোকিউলারটা মুসার হাতে দিতে দিতে বলল, ‘কুকুর!’

মুসা যন্ত্রটা চোখে লাগিয়ে ফোকাস করতে করতেই বাসের ভেতরের খাঁচা থেকে বেরিয়ে এল আধ ডজন বীগল। কোলা কানওয়ালা ছোট জাতের এই কুকুরগুলো শিকারের পিছু নিতে ওস্তাদ। লাফ দিয়ে ভূষারের ওপর নেমে এসে নাক নিচু করে গন্ধ শূঁকতে শুরু করে দিল ওগুলো। পেছন পেছন লাফ দিয়ে দাড়িওয়ালা লোকটাও নামল। ঘুরে গিয়ে দাঁড়াল গাড়ির সামনের দিকে। এমন একটা জিনিষ বের করল, আরেকটু হলেই হাত থেকে মনোকিউলার ফেলে দিচ্ছিল মুসা।

‘খাইছে!’ বলে যন্ত্রটা ধরিয়ে দিল কিশোরের হাতে। ‘দেখো!’

শুরুতে দেখতে পেল না কিশোর। এদিকে পেছন করে দাঁড়িয়েছে টেরি জনসন। ধীরে ধীরে ঘুরতে শুরু করল আবার। কোন কিছুর খোঁজ করছে যেন।

মুসার মতই চমকে গেল কিশোরও। টেরির এক হাতে একটা নীলচে বাস। তার বেরিয়ে গিয়ে ঢুকেছে লোকটার হাতের অন্য জিনিসটার মধ্যে। গিরিখাতের ঢালের দিকে জিনিসটা তাক করে রেখেছে টেরি। একটা অ্যান্টেনা। মারিসা কুপারের কাছে যে জিনিস দেখেছিল, অবিকল সেই জিনিস। পার্বত্য সিংহকে খুঁজে বের করার যন্ত্র।

মুসার চোখে চোখে তাকাল কিশোর। ‘আমি যা ভাবছি তুমিও কি তাই ভাবছ?’

রাগত স্বরে মুসা বলল। ‘এ কি কোন শিকার হলো!’

‘হুঁ,’ মাথা ঝাঁকাল কিশোর, ‘ঠিক এই কথাটাই ভাবছি আমিও।’

আবার মনোকিউলার চোখে লাগাল সে। ধমকের সুরে কুকুরগুলোকে কি যেন বলল দাড়িওয়ালা লোকটা। ঢাল বেয়ে দৌড়ে নামতে শুরু করল ওগুলো। একটা স্লোমোবাইলের পেছনে একটা কেস সহ রাইফেল আটকে নিল লোকটা। কিছু জিনিসপত্র তুলল। বাকি মোবাইলটাতে নিজেদের রাইফেল রাখতে ব্যস্ত অন্য দুজন লোক। দ্রুত কি যেন আলোচনা করে নিল তিনজনে। দাড়িওয়ালা লোকটা অ্যান্টেনা উঁচু করে ধরে স্থির দৃষ্টিতে তাকিয়ে রইল নীল বাসটার দিকে। আবার কথা বলল অন্য দুজনের সঙ্গে। হাত তুলে দূরে একদিকে নির্দেশ করল। তারপর তিনজনেই দুটো স্লোমোবাইলে উঠে রওনা হয়ে গেল।

লাফিয়ে উঠে দাঁড়াল মুসা। চিৎকার করে বলল, ‘চলে যাচ্ছে তো!’

হাত ধরে হ্যাঁচকা টানে তাকে বসিয়ে দিল কিশোর। ‘গাড়ি রেখে গেছে, ফিরে আসতেই হবে। ওদের ফেরার আগেই তাড়াতাড়ি গিয়ে শেরিফকে নিয়ে আসতে পারলে কাজ হয়।’

‘কিন্তু তাতে কুগার মারা বন্ধ করতে পারব না,’ রেগে আগুন হয়ে গেছে মুসা।

‘শিওর ডক্টর কুপারের সিংহগুলোকে মারতে গেছে। গলায় রেডিও লাগানো জানোয়ারগুলোকে অ্যান্টেনার সাহায্যে সহজেই খুঁজে বের করে ফেলবে। কোথাও লুকিয়ে বাঁচতে পারবে না ওগুলো। এরচেয়ে চিড়িয়াখানায় ঢুকে কুগার মারলেই তো পারে!’

ঘুরে দাঁড়িয়ে ভারী পায়ে গাড়ির দিকে এগিয়ে গেল সে।

পেছনে দৌড়ে গেল কিশোর। ‘ইচ্ছেটা কি তোমার? কি করতে চাও?’ মুসার মুখ দেখেই বুঝে ফেলেছে, সাংঘাতিক কিছু করতে যাচ্ছে সে। বিপজ্জনক কিছু।

‘জানি না কি করব, তবে কিছু একটা করতেই হবে,’ চাপা কঠিন কণ্ঠে জবাব দিল মুসা। গাড়ির ছাত থেকে টান দিয়ে খুলে নিল তার স্কি দুটো। গাড়ির ট্রাংক খুলে বের করল স্কি বুট।

‘মুসা,’ বোঝানোর চেষ্টা করল কিশোর। ‘ওরা গেছে স্লোমোবাইলে করে। তা ছাড়া রাইফেল আছে ওদের কাছে। কোনমতেই ঠেকাতে পারব না। প্রথমে গুলি করে মারবে। তারপর গিয়ে রিপোর্ট করবে, ওদের রাইফেলের সামনে চলে গিয়েছিলাম আমরা, দুর্ঘটনায় মরেছি।’

বুটের মধ্যে পা ঢুকিয়ে দিল মুসা। গোয়ারের মত বলল, ‘কোন যুক্তিই কানে ঢুকবে না এখন আমার। আমি ওই প্রাণীগুলোর পাশে গিয়ে দাঁড়াবই।’

হ্যাঁচকা টানে দস্তানা টেনে দিল কজির ওপর। শক্ত করে চেপে ধরল স্কি পোল। ‘আমি যাচ্ছি।’

ফোঁস করে নিঃশ্বাস ফেলল কিশোর। ‘দাঁড়াও, আমিও আসছি। বেঁচে গিয়ে তোমার মৃত্যুর খবরটা তোমার মা-বাবার কাছে জানানোর সাহস আমার হবে না।’

চোদ্দ

ঢাল বেয়ে তীব্র গতিতে নেমে চলল দুজনে। স্পষ্ট দাগ রেখে গেছে স্লোমোবাইল। সহজেই অনুসরণ করা যাচ্ছে।

ইঞ্জিনের শব্দও কানে আসছে মৃদু ভাবে। নিজের ওপর আস্থা তাতে বেড়ে গেল আরও মুসার। ‘ওই যে। ধরতে পারব।’

সঙ্গে সঙ্গে জবাব দিল না কিশোর। স্কি থেকে মনোযোগ সরেছে না। ঢালের যা অবস্থা, একটু এদিক ওদিক হলে ডিগবাজি খেয়ে ছিটকে পড়তে হবে। তাতে ঘাড় ভেঙে মরাটাও অস্বাভাবিক নয়। ধীরে ধীরে গতিটা স্বাভাবিক করে আনল। নিঃশ্বাসের ফাঁকে ফাঁকে বলল, ‘কাছে আছে বলেই যে শব্দ শোনা যাচ্ছে তা না-ও হতে পারে। পাহাড়ের ঢালে প্রতিধ্বনিত হয়েও শব্দ শোনা যায়।’

কিন্তু মুসা গতি কমাল না। পোল দিয়ে খোঁচা মেরে বিপজ্জনক গতিতে এগিয়ে চলল। ‘বলা যায় না, পরের মোড়টাতেই দেখা হয়ে যেতে পারে ওদের সঙ্গে।’

তার সঙ্গে তাল রেখে চলতে হিমশিম খেয়ে যাচ্ছে কিশোর। শেষে আর কোনদিকে না তাকিয়ে শুধু মুসার মাথাটা নজরে রেখে পোল ঠেলে এগিয়ে চলল।

কানের কাছে বাতাসের শী-শী শব্দ। ইঞ্জিনের শব্দ কমতে কমতে মিলিয়ে

গেল দূরে। নিজের নিঃশ্বাসের শব্দ ছাড়া আর কিছুই এখন শুনতে পাচ্ছে না মুসা।

নিচে নেমে আবার ওপাশ থেকে খাড়া উঠে গেছে পাহাড়ের দেয়াল। দুটো উপত্যকা যেখানে মিলিত হয়েছে কোনাকুনি ভাবে, সেটা ধরে কিছুক্ষণ এগোল ওরা। তারপর বেরিয়ে এল চওড়া সমতল জায়গায়। বরফে গভীর দাগ কেটে চলে গেছে স্নোমোবাইল। জায়গাটা প্রায় গোলাকার। আধ মাইল মত হবে চওড়া। কিনারে গা ঘেঁষাঘেঁষি করে দাঁড়িয়ে আছে লম্বা লম্বা ফার, পাইন আর পপলার। কোন কিছু নড়তে দেখা গেল না তার মধ্যে।

সমভূমিটা কোন প্রান্তর নয়, বুঝতে পারল কিশোর। জমাট বরফে ঢাকা পার্বত্য হ্রদ। ভেঙে পড়ার কোন সম্ভাবনা নেই। আরোহী সহ দুটো স্নোমোবাইলের ওজন যদি সহ্য করতে পারে, দুজন মানুষের ওজনে ভাঙবে না বরফ। মসৃণ বরফের ওপর দিয়ে সহজেই পিছলে চলল ওরা।

দুই পাহাড়ের মাঝখানের আঁকাবাঁকা যে কোনাকুনি জায়গাটা পেরিয়ে এসেছে ওরা, ওটা কি বুঝতে পারল এতক্ষণে। নালা। গরমকালে ওটা দিয়েই পানি গড়িয়ে এসে এই লেকের সৃষ্টি হয়েছে। চারপাশ ঘিরে গাছপালা ক্রমশ উঠে গেছে ঢাল বেয়ে।

গাছের জটলার মাঝে এক জায়গায় ফাঁক দেখা যাচ্ছে। সেদিকেই গেছে স্নোমোবাইলের দাগ। তীক্ষ্ণ দৃষ্টিতে সেদিকেই তাকিয়ে আছে মুসা।

জঙ্গলের মধ্যে ঢুকে পড়ল দুজনে। দাগ এখানেও স্পষ্ট। কিছুদূর গিয়ে ডানে মোড় নিয়েছে। তারপর একেবেকে এগিয়েছে গাছপালার ফাঁক-ফোকর দিয়ে। লেকের কিনার থেকে প্রায় শ'খানেক ফুট ওপরে একটা সরু রাস্তা চোখে পড়ল মুসার। দমে গেল সে। পোল ঠেলতে ঠেলতে হাত ব্যথা হয়ে গেছে। পা দুটো প্রায় অবশ। নিচে নামা এক কথা, আর ক্লি করে ঢাল বেয়ে ওপরে ওঠা সম্পূর্ণ ভিন্ন জিনিস। কয়েক মিনিট বিশ্রাম না নিলে আর দু'গজও এগোতে পারবে না। তার পরেও শেষ পর্যন্ত শিকারীদের ধরা সম্ভব হবে কিনা সন্দেহ আছে, কারণ ওদের কাছে আছে স্নোমোবাইল।

বিচিত্র একটা শব্দ কানে এল হঠাৎ। পর্বতের ঢালে প্রতিধ্বনিত হয়ে এসেছে বলে প্রথমে বুঝতে পারল না। রোঝার পর চকচক করে উঠল মুসার চোখ। কিশোরের দিকে তাকাল সে। 'কুকুর!'

ওপরের দিকে কাছেই কোথাও রয়েছে টেরি জনসনের হাউন্ডগুলো।

নতুন শক্তি এসে ভর করল মুসার শরীরে। দ্রুত ছুটতে শুরু করল আবার। এতটা শক্তি যে অবশিষ্ট ছিল তার দেহে, দেখে নিজেই অবাক হয়ে গেল।

দেহের অবশিষ্ট শক্তিটুকু খরচ করে ওপরে উঠে এল দুজনে। খরচটা নিরর্থক হলো না। লেক বেসিনের অন্যপাশে আরেকটা উপত্যকা মত জায়গায়, বড় জোর শ'খানেক গজ দূরে খাড়া হয়ে আছে একটা পাথরের টিলা। ওটার চারপাশ ঘিরে নাচানাচি করছে কুকুরগুলো। ওদের কাছ থেকে সামান্য দূরে স্নোমোবাইল থামিয়ে অপেক্ষা করছে তিন শিকারী।

চাঙড়ের চ্যান্টা মাথায় অস্থির ভাবে পায়চারি করছে একটা কুগার। থেকে থেকে পর্জন করে উঠছে। ওর রাগ, ভয় আর অসহায়ত্ব এখান থেকেও অনুভব

করতে পারছে মুসা। দু'একটা কুকুরকে কাবু করতে কোন অসুবিধে হবে না কুগারটার। কিন্তু বাকিগুলোর সঙ্গে পারবে না। পালানোর পথ নেই। ফাঁদে পড়ে গেছে বেচারী।

গোয়েন্দাদের দিকে নজর নেই শিকারীদের। নিজেদের মধ্যে আলোচনায় ব্যস্ত। বাতাসে ভেসে আসছে ওদের টুকরো টুকরো কথা।

'আমি আগে দেখেছি,' বলে উঠল এক শিকারী। 'কাজেই প্রথম গুলিটা আমি করব!'

'দেখেছ তো কি হয়েছে?' ধমকে উঠল দ্বিতীয় জন। শক্ত হাতে রাইফেল চেপে ধরল সে। 'যে আগে গুলি লাগাবে ওটা তার। সরো।'

ঠেলাঠেলি শুরু করে দিল দু'জনে। মাঝখানে টেরি এসে না দাঁড়ালে মারামারিই বেধে যেত।

'ঝগড়া না করে টস করো না কেন?' পরামর্শ দিল সে।

কিশোরের দিকে তাকাল মুসা। চোখে নীরব জিজ্ঞাসা, 'কি করব?'

তবে জবাবের অপেক্ষা করল না সে। কিশোর বাধা দেবার আগেই ছুটে গুরু করল। নিচের দিকে নামছে। দ্রুত পৌঁছে যাবে শিকারীদের কাছে।

চরকির মত পাক খেয়ে ঘুরে দাঁড়াল লাল দাড়িওয়ালা। মস্ত রিডলভারটা যেন লাফ দিয়ে হাতে উঠে এল তার। কিশোরের কাছে মনে হলো কামানের নল। মুসার দিকে তাক করল টেরি।

পরোয়াই করল না মুসা। দাঁতে দাঁত চেপে ছুটে যাচ্ছে শিকারীদের দিকে। হাঁটু ভাঁজ করে, পিঠ বেকিয়ে ঝুঁকে রয়েছে স্কি'র ওপর। নিশানা হিসেবে নিজেকে যতটা সম্ভব ছোট করে তুলতে চাইছে। কিন্তু তাতে কোন লাভ হবে বলে মনে হলো না কিশোরের।

দ্বিধায় পড়ে গেছে টেরি। গুলি করতে দেরি করে ফেলল। শেষ মুহূর্তে লাফ দিয়ে সরে যেতে চাইল মুসার আগমন-পথ থেকে। গিয়ে পড়ল একজন শিকারীর গায়ে। দু'জনেই পড়ে গেল মাটিতে।

পাক খেয়ে ঘুরে দাঁড়াল দ্বিতীয় শিকারী। হাতে রাইফেল। তার গায়ের ওপর গিয়ে পড়ল মুসা। কাঁধ বাঁকা করে একপাশ দিয়ে ধাক্কা মারল শিকারীর গায়ে। রাইফেলটা আলাগা ভাবে ধরেছিল বোধহয় শিকারী, পড়ে গেল হাত থেকে। ঢাল বেয়ে গড়াতে গড়াতে গিয়ে ঠেকল পাথরের গায়ে। চাপ লেগে গেল ট্রিগারে। বিকট শব্দে গুলি ফুটল। কারও গায়ে লাগল না বুলেট। ঠং করে উঠল ধাতব জিনিসে লেগে।

আচমকা এই হট্টগোলে দ্বিধায় পড়ে গেল কুকুরগুলো। ভড়কে গিয়ে ছুটাছুটি শুরু করল এদিক ওদিক। কুগারটার ওপর থেকে দৃষ্টি সরে গেল।

সুযোগটা কাজে লাগাল কুগার। শেষবারের মত গর্জন করে উঠে বিরাট এক লাফ মারল। পাথরের ওপর থেকে, প্রায় উড়ে নেমে মুহূর্তে অদৃশ্য হয়ে গেল গাছপালার আড়ালে।

পনেরো

উঠে দাঁড়াল জনসন। রিডলভারটা খাপে ভরে রেখে গটগট করে এসে দাঁড়াল মুসার কাছে। মুসাও পড়ে গেছে।

কলার ধরে টেনে তুলল তাকে জনসন। 'পাগল, না মগজ নষ্ট তোমার!' রাগে নিজের দাড়ির মতই লাল হয়ে গেছে মুখ। 'আরেকটু হলেই তো গুলি খেতে!'

মুসাকে ছেড়ে দিয়ে বলল, 'গুলি করাই উচিত ছিল। যদি বুঝতাম, সব ভজকট করে দেবে তুমি, আমার নতুন স্নোমোবাইলটাতে গুলি লাগাবে, তাহলে আর দ্বিধা করতাম না।'

স্নোমোবাইল দুটোর দিকে ফিরে তাকাল মুসা। বিশ্রী ভাবে রঙ চটে গেছে একটার। 'কই,' গুঁকিয়ে কণ্ঠস্বর খসখসে হয়ে গেছে তার। 'ফুটো তো হয়নি। ঘষা লেগে রঙ উঠেছে শুধু।'

'আর শিকারের যে ক্ষতিটা করলে?' গর্জে উঠল জনসন। 'এই দুই ভদ্রলোক কুগার শিকারের জন্যে টাকা দিয়েছেন আমাকে। তার কি হবে?'

শীতল দৃষ্টিতে জনসনের দিকে তাকাল মুসা। 'একে শিকার বলে?'

'তাহলে কি বলে!' চাবুকের মত শপাং করে উঠল জনসনের কণ্ঠ।

'খুন,' জবাব এল কিশোরের কাছ থেকে।

ফিরে তাকাল মুসা। মাটিতে পড়ে যাওয়া অ্যান্টেনাটা তুলে নিয়েছে কিশোর।

'আপনারা যা করতে যাচ্ছিলেন,' আবার বলল কিশোর, 'সেটা খুন।'

'শিকার মানেই তো খুন,' জনসন বলল।

'শিকার মানে হত্যা, ঠিক, তবে তাতে প্রতিপক্ষেরও লড়াইয়ের সুযোগ থাকে। তা ছাড়া, শিকারকে আত্মগোপন করে থাকার সুযোগটাও আপনারা দেননি।' অ্যান্টেনাটার দিকে নির্দেশ করে বলল কিশোর, 'ডক্টর কুপারের কলারে লাগানো রেডিও কুগার খুঁজে বের করা সহজ করে দিয়েছে আপনাদের জন্যে। কর্তৃপক্ষের কানে গেলে ওরা বেআইনী বলতে বাধ্য হবে। অ্যান্টেনা দিয়ে গবেষণার নিয়ম আছে, শিকারের নেই।'

'অ্যান্টেনা দিয়ে কুগার খুঁজে বের করি কে বলল তোমাদের?' হাত তুলে একটা কুকুরকে দেখাল জনসন। 'ওই দেখো, ওটার গলায় কলার। তাতে রেডিও আছে। কুকুরগুলো দূরে চলে গেলে অ্যান্টেনার সাহায্যে খুঁজে বের করি আমি। কুগার শিকারে কুকুর ব্যবহার করা এখানে বেআইনী নয়। সব গাইডেরাই তাই করে।'

'কুকুরের গলায় রেডিও লাগিয়ে রাখাটাও আপনার একটা ভাঁওতাবাজি,' জবাব দিল মুসা। 'কেউ চ্যালেঞ্জ করলে যাতে ফাঁকি দিতে পারেন।'

ভুরু নাচাল জনসন। 'কি করে বলছ এ কথা? কুগারটার গলায় কলার দেখেছ?'

কিশোর ছিল অনেক দূরে। কুগারের গলায় কলার ছিল কিনা দেখার কথা নয় তার। তাড়াহুড়ায় মুসাও লক্ষ্য করেনি। দ্বিধায় পড়ে গেল সে। জিজ্ঞেস করল, 'এত তাড়াহুড়ো তাহলে খুঁজে পেলেন কি করে কুগারটাকে? আপনারা যে বেরিয়েছেন,

এক ঘণ্টাও তো হয়নি।’

চওড়া কাঁধটায় ঝাঁকি দিল জনসন। ‘স্রেফ ভাগ্য। ভাগ্যবলে তাড়াতাড়ি খুঁজে বের করার বিরুদ্ধে নিশ্চয় কোন আইন তৈরি হয়নি, নাকি?’

জবাব খুঁজে বেড়াচ্ছে মুসা আর কিশোর, হঠাৎ ঝিলিক দিয়ে চলে গেল কি যেন। ঠং করে ধাতব শব্দ হলো। লাফ দিয়ে পেছনে সরে গেল জনসন, যেন বোলতায় হল ফুটিয়েছে। অবাক হয়ে তাকিয়ে আছে মাটির দিকে। কালো পাতলা একটা তীর বিধে আছে তার রেডিওটায়।

গাছের আড়াল থেকে বেরিয়ে এলেন লঙ হার্ট। হাতে ধনুক। আরেকটা তীর পরিয়ে ফেলেছেন তাতে। জনসনের দিকে উদ্যত। ‘ভাগ্যবলের বিরুদ্ধে কোন আইন নেই, জনসন, ঠিক; কিন্তু কারও ব্যক্তিগত জায়গায় শিকার করার বিরুদ্ধে আছে। বিনা অনুমতিতে প্রবেশ করা গুরুতর অপরাধ।’ জনসনের মুখের দিকে তাকিয়ে তার প্রতিক্রিয়া লক্ষ করলেন লঙ হার্ট। ‘কেন শুধু শুধু মিছে কথা বলছ, জনসন? ভাগ্যবলের ওপর নির্ভর করে শিকার যে তুমি করছ না, সেটা তুমিও জানো। তোমার এ সব শয়তানির গল্প অনেক দিন আগেই কানে এসেছে আমার। সুযোগের অপেক্ষায় ছিলাম। তাকে তাকে ছিলাম হাতেনাতে ধরার জন্যে।’

কিশোরের দিকে একবার তাকিয়ে আবার জনসনের দিকে ঘুরে গেল তাঁর দৃষ্টি। ‘বেশ কিছুদিন ধরে তোমাকে অনুসরণ করে বেড়াছি আমি, জনসন। পর পর তিনটে হান্টিং পার্টিকে নিয়ে শিকারে বেরিয়েছিলে তুমি, তিনটে কুগার খুন করেছ। দুটোর গলায় রেডিও কলার পরানো ছিল।’

‘এতক্ষণে বুঝলাম!’ বলে উঠল কিশোর, ‘ডক্টর কুপারের ব্যাটারি নষ্ট ছিল না। কুগারগুলোকে মেরে রেডিও নষ্ট করে দেয়াতেই আর কোন সাড়াশব্দ পাননি তিনি। ধরে নিয়েছেন, ব্যাটারি খারাপ হয়ে যাওয়াতে রেডিওগুলো সিগন্যাল দিচ্ছে না।’

‘শুধু শুধু ওকে দোষারোপ করছেন আপনারা,’ জনসনের পক্ষে সাফাই গাইতে এগিয়ে এল একজন শিকারী। ‘কুকুরগুলোর জন্যেই রেডিও ব্যবহার করেছে সে।’

‘ঠিক,’ সুর মেলাল অন্যজন। ‘রাস্তার ধারে কুগারের পায়ের ছাপ দেখে পিছু নিয়েছিলাম আমরা। রেডিওর সাহায্যে নয়।’

হেসে উঠলেন লঙ হার্ট। ‘সব শিয়ালের এক রা! ছাগল পেয়েছ আমাকে? মনে করেছে কিছু জানি না। ওই ছাপগুলো নকল ছাপ। জনসন করে রেখেছিল। ধরা পড়লে যাতে এ ধরনের কৈফিয়ত দিতে পারে, এখন যা দিচ্ছে। কাল ওর স্নোমোবাইলের চিহ্ন দেখে পিছু নিয়ে এসে লুকিয়ে থেকে ছাপ বসাতে দেখে গেছি ওকে। কুগারটার বাসা আগেই আবিষ্কার করে ফেলেছিল সে।’

কড়া গলায় বলল জনসন, ‘তোমার এ সব প্রলাপ শোনার ধৈর্য আমার নেই! কুগার শিকারে আইনত বাধা দিতে পারবে না আমাকে।’

‘কে তোমাকে আটকে রেখেছে?’ তুম্বিল্যোর ভঙ্গিতে হাত নাড়লেন লঙ হার্ট। ‘যাও না।’

‘চলো চলো,’ জনসনকে তাগাদা দিল এক শিকারী। ‘কুগারটার পায়ের ছাপ এখনও তাজা। পিছু নিলে আবার ওটাকে বের করে ফেলা যাবে।’

‘চলো,’ নড়ে উঠল জনসন।

‘ধীরে, বন্ধু ধীরে,’ ধনুক সহ তীরের মাথাটা নাচালেন লঙ হাট, ‘আগেই বলেছি, কারও এলাকায় বিনা অনুমতিতে প্রবেশ করাটা শাস্তিযোগ্য অপরাধ।’

‘সেটা আমি মালিকের সঙ্গে বুঝব,’ জেদ দেখিয়ে বলল জনসন। ‘তুমি মালিক নও, তোমার সঙ্গে কথা নেই।’

হাসি ফুটল লঙ হাটের মুখে। ‘মালিকের সঙ্গে বুঝতে গেলে আরও বিপদে পড়বে। কি মনে হয়, মারিসা কুপার তোমাকে অনুমতি দেবে? এ জায়গাটা যে তার সম্পত্তি, ভুলে গেছ? নাকি ভেবেছ, আমি সেটা জানি না?’

নীরব, পাথুরে দৃষ্টিতে লঙ হাটের দিকে তাকিয়ে রইল জনসন। পারলে চোখের আঙনে তাকে ভষ্ম করে ফেলে। আচমকা ঝটকা দিয়ে ঘুরে দাঁড়িয়ে গটগট করে হেঁটে গেল স্নোমোবাইলের কাছে। কুকুরগুলোকে ফিরে আসার জন্যে ডাক দিল। স্নোমোবাইল স্টার্ট দিয়ে রওনা হয়ে গেল। পেছনে চলল কুকুরগুলো। ধাপ্পাবাজিতে কাজ হবে না বুঝে স্নোমোবাইলে উঠে দুই শিকারীও চলে গেল তার পেছনে।

‘দারুণ দেখালেন,’ হেসে বলল মুসা।

ধনুক থেকে তীরটা খুলে নিয়ে ধনুকের এক মাথায় ঝোলানো ছোট একটা তুণীরে রেখে দিলেন লঙ হাট।

‘জনসন কোন ভাবে মারিসা কুপারের রেডিও ফ্রিকোয়েন্সি আবিষ্কার করে ফেলেছে,’ কিশোর বলল।

‘এ ধরনের মানুষগুলোকে বুঝতে পারি না আমি,’ লঙ হাট বললেন। ‘গাইডের পেশায় সহজেই যেখানে সৎ থেকে সম্মানজনক কাজ করতে পারে, এরা সেখানে খালি ধাপ্পাবাজি আর মিথ্যার মধ্যে যায়। গিয়ে গিয়ে ফাঁসে।’

তীক্ষ্ণ দৃষ্টিতে তাঁর দিকে তাকাল কিশোর। ‘ডক্টর কুপার যেদিন গুলি খেলেন, সেদিন সে-জায়গায় আপনাকে দেখা গেছে, এ কথাটাও নিশ্চয় মিথ্যে বলেনি জনসন?’

জবাব দিলেন না লঙ হাট।

‘একটু আগে আপনি বললেন,’ আবার বলল কিশোর, ‘গত তিন হপ্তা টেরি জনসনের পিছে লেগে থেকেছেন আপনি। তারমানে সেদিন সেই গিরিখাতে অবশ্যই গিয়েছেন আপনি।’

মাথা ঝাঁকালেন লঙ হাট। ‘গিয়েছি।’

‘তাহলে আমাদের সঙ্গে শহরে চলুন,’ অনুরোধ করল কিশোর। ‘শেরিফকে বলবেন।’

এক মুহূর্ত দ্বিধা করে জবাব দিলেন লঙ হাট, ‘আমি পরে যাব। এখন আমার অনেক কাজ। আমার এখানেই থাকতে হবে, এই পর্বতের আশেপাশে। তোমরাই গিয়ে শেরিফকে জানাও।’

‘গুডবাই’ বললেন না তিনি। স্রেফ ঘুরে হেঁটে চলে গেলেন।

ষোলো

শহরে ফিরতে ফিরতে সন্ধ্যা হয়ে গেল। খিদে পেয়েছে। ক্লান্তও খুব। তবু আগে শেরিফের সঙ্গে দেখা করাটা জরুরী মনে করল কিশোর। এল্‌ক্‌ স্প্রিং শহরের একটা মাত্র রাস্তার দুই ধারে সারি দিয়ে গড়ে উঠেছে ছোট ছোট দোকানপাট আর রেষ্টুরেন্ট। শেষ মাথায় একটা একতলা ইটের বাড়ি। দরজার ওপরে একটা মাত্র শব্দ লেখা: পুলিশ।

গাড়ি থেকে নামছে কিশোর আর মুসা, এই সময় দরজা খুলে বেরিয়ে এলেন শেরিফ। 'তোমরা? এইমাত্র তোমাদের কথাই হচ্ছিল।'

'খারাপ না ভাল?' হেসে জিজ্ঞেস করল কিশোর।

শেরিফও হাসলেন। 'ভাল ভাল, খুব ভাল। তোমাদের সম্পর্কে খুব উঁচু ধারণা মারিসা কুপারের।'

উত্তেজনা দেখা দিল কিশোরের চেহারায়। 'জ্ঞান ফিরেছে নাকি তাঁর? আর কি কি বললেন? কে গুলি করেছে, দেখেছেন? তিনি ভাল আছেন এখন? আমরা গেলে দেখা করতে পারব?'

'আরে, ধীরে, ধীরে,' হাত তুললেন শেরিফ। 'একটা করে প্রশ্ন করো। হ্যাঁ, জ্ঞান ফিরেছিল। ভালমত কথা বলার অবস্থায় ছিল না।'

'কে গুলি করেছে?'

'তা বলেনি।' দূরে দৃষ্টি নিক্ষেপ করলেন শেরিফ। 'ভাবছেন কিছু।' 'তোমাদের কাছে হয়তো বলতে পারে। কাল পর্যন্ত যদি থাকে শহরে, দেখা করতে পারবে।'

'অবশ্যই থাকব,' জবাব দিতে একটা মুহূর্ত দেরি করল না কিশোর।

পরদিন সকাল ন'টায় হাসপাতালে ডক্টর কুপারের সঙ্গে দেখা করতে গেল তিন গোয়েন্দা। রবিনের শরীর পুরোপুরি ঠিক হয়নি, তবু আজ আর তাকে শরীর খারাপের দোহাই দিয়ে হোটেলে ফেলে আসা সম্ভব হয়নি। জোর করেই চলে এসেছে রবিন।

একটা 'নো পার্কিং' লেখা জায়গায় শেরিফের গাড়িটা দেখতে পেল কিশোর। শঙ্কিত হলো সে। বোঝা যাচ্ছে, তাড়াহুড়া করে গাড়ি রেখে ভেতরে ঢুকেছেন তিনি। কিছু ঘটল নাকি!

লবিতে পাওয়া গেল তাঁকে। প্রায় ফিসফিস করে কথা বলছেন একজন ডাক্তার আর একজন নার্সের সঙ্গে।

তিন গোয়েন্দাকে দেখে এগিয়ে এলেন ওদের দিকে। 'মারিসার অবস্থা ভাল না।'

দুরুদুরু করে উঠল কিশোরের বুক। তার সন্দেহ ঠিক। 'কি হয়েছে?'

গোঁফ চুলকালেন শেরিফ। 'নিজে নিজে স্বাভাবিক শ্বাস নিতে পারছিল না বলে গুলিটা বের করার পর থেকে রেসপির্যাটর লাগিয়ে রাখা হয়েছিল।'

'এখন কি হয়েছে?' অধৈর্য হয়ে উঠল কিশোর।

‘বলছি,’ হ্যাটের কানায় ঠেলা দিয়ে খানিকটা পেছনে সরিয়ে দিলেন শেরিফ। গৌফ চুলকালেন আবার। ‘কাল রাতে যন্ত্রটায় কোন একটা সমস্যা দেখা দিয়েছে। নার্স যখন আবিষ্কার করল র‍্যাপারটা, ঠিকমত শ্বাস নিতে না পেয়ে ততক্ষণে আবার “কোমা”র মধ্যে চলে গেছে মারিসা।’

‘শেরিফের উচিত ছিল এখানে পাহারা রাখা,’ হাসপাতাল থেকে বেরিয়ে বলল রবিন।

‘আছেই তো মাত্র তাঁর দুজন ডেপুটি,’ মনে করিয়ে দিল কিশোর। ‘আর যন্ত্রটাও আপনাআপনি নষ্ট হয়েছে কিনা, না কেউ শয়তানি করে রেখেছে ডক্টর কুপারকে খুন করার জন্যে, সেটাও শিওর হয়ে বলা যাচ্ছে না।’

কিশোরের দিকে তাকিয়ে রইল রবিন। ‘আপনাআপনি নষ্ট হয়েছে, এটা নিশ্চয়, বিশ্বাস করো না তুমি, তাই না?’

দ্বিধা করল কিশোর। ‘না, সত্যি করি না।’

‘তারমানে কেউ নষ্ট করে দিয়েছে। কি করব তাহলে আমরা এখন?’

‘আপাতত কিছুই না।’ জ্যাকেটের কলার উঁচু করে দিল কিশোর, ঠাণ্ডা হাওয়া থেকে বাঁচার জন্যে। গাড়ির দিকে হাঁটছে ওরা। ‘শেরিফ যথেষ্ট বুদ্ধিমান লোক। আমাদের সাহায্য ছাড়াই এ পরিস্থিতি সামাল দিতে পারবেন।’

‘আমাদের তাহলে এখন কি কাজ? হোটেল গিয়ে হাত-পা গুটিয়ে বসে থাকতে পারব না,’ গাড়ির কাছে পৌঁছে একটানে দরজা খুলে ড্রাইভিং সীটে উঠে বসল মুসা।

‘সেটা করতে পারলেই ভাল হত,’ তার পাশে বসে বলল কিশোর। রবিন উঠল পেছনে।

জানালা দিয়ে পরিষ্কার আকাশের দিকে তাকাল কিশোর। বলল, ‘তবে আবহাওয়াটা চমৎকার। গাড়ি চালানোরই দিন আজ।’

ইগনিশনে চাবি ঢুকিয়ে জোরে এক মোচড় মারল মুসা। প্রতিবাদ জানাল ইঞ্জিন। অতিরিক্ত ঠাণ্ডা হয়ে গেছে। কিন্তু স্টার্ট নিল অবশেষে। স্টিয়ারিংটা দুই হাতে চেপে ধরে কিশোরকে জিজ্ঞেস করল সে, ‘কোথায় যাব?’

অনিশ্চিত ভঙ্গিতে জবাব দিল কিশোর, ‘এল্‌ক্‌ স্প্রিং শহরটা ঘুরে দেখা যেতে পারে।’

‘দেখতে পাঁচ মিনিটের বেশি লাগবে না,’ মুসা বলল।

রহস্যময় হাসি ফুটল কিশোরের চোটে। ‘ভালই তো। ঝামেলা কম।’

আড়চোখে কিশোরের দিকে তাকাল মুসা। ‘তোমার মনের ওই কম্পিউটারটার ছবি স্ক্রীনে আনো না দয়া করে।’

পেছনে তাকাল কিশোর। ‘রবিন, নজর রাখো, এমন কোন বাড়ি চোখে পড়ে কিনা যেটাকে লাইব্রেরি বলে মনে হয়।’

ছোট পাবলিক লাইব্রেরিটা খুঁজে বের করতে মোটেও সময় লাগল না। ভেতরে হাসিখুশি একজন মোটাসোটা মহিলা দাঁড়িয়ে আছেন চেক-আউট কাউন্টারের পাশে।

‘কোন সাহায্য করতে পারি তোমাদের?’ আন্তরিক কণ্ঠে জিজ্ঞেস করলেন তিনি।

জায়গাটা নির্জন। আর একজন লোককেও চোখে পড়ল না কিশোরের। খুশিই হলো তাতে। সে যে উদ্দেশ্যে এসেছে সেটা করার সুবিধে হবে ওদের।

‘সাহায্য তো অবশ্যই করতে পারেন,’ হাসিমুখে জবাব দিল কিশোর। ‘একটা জিনিস খুঁজতে এসেছি।’

‘কি বই?’

‘হিস্টরিক্যাল ল্যান্ড-ইউজ প্যাটার্ন নিয়ে গবেষণা করছি আমরা,’ কাউন্টারে কনুই রেখে সামনে ঝুঁকে যেন কত না গোপন কথা জানিয়ে দিচ্ছে এ রকম ভঙ্গিতে বলল কিশোর। ‘ভাল খেঁজ না পেলে স্কলারশিপ হারাব।’

দ্বিধাগ্রস্ত মনে হলো মহিলাকে। ‘কিন্তু কাউন্টির ল্যান্ড ম্যাপ ছাড়া তো আর কিছু নেই আমাদের কাছে।’ ঘরের পেছন দিকে একটা টেবিলের কাছে ওদের নিয়ে গেলেন লাইব্রেরিয়ান। ‘পঞ্চাশ বছরের পুরানো। এগুলোতে কেবল তখনকার ভূমি-মালিকদের নাম আছে। কি কাজে ব্যবহৃত হত জায়গাগুলো, সে-সব কিছু লেখা নেই। দেখো, এতে কিছু পাও কিনা।’

হতাশ মনে হলো কিশোরকে। ‘দেখি। পেলে তো ভালই।’

মনে মনে এতটা পুলকিত হয়েছে সে, নিজের সৌভাগ্যকে বিশ্বাস করতে পারছে না। ঠিক এ জিনিস খুঁজতেই এসেছিল সে। বিরাট ম্যাপটায় মূল্যবান সব তথ্য রয়েছে: মালিকের নাম, জায়গার সীমানা, বাড়ি-ঘরের অবস্থান, এমনকি গোলাঘর আর গ্যারেজগুলো কোথায় কোথায় ছিল, তা-ও দেখানো রয়েছে।

‘কি খুঁজছ?’ লাইব্রেরিয়ান তাঁর ডেস্কে ফিরে গেলে নিচু গলায় জিজ্ঞেস করল রবিন।

‘ডক্টর কুপার আর লঙ হার্টের মধ্যে কোন্ কোন্ ব্যাপারে মিল।’

ম্যাপের ওপর ঝুঁকে দাঁড়াল তিনজনে। মুসার কোন আগ্রহ নেই। সে শুধু তাকিয়ে আছে। যা দেখার দেখছে রবিন আর কিশোর।

‘দুজনেই এখানে জমির মালিক ছিলেন,’ অবশেষে ঘোষণা করার মত করে বলল কিশোর। ‘প্রচুর জমি। যদি ম্যাপে কোন ভুল না থেকে থাকে।’

জ্রুটি করল রবিন। ‘সেটা জেনে লাভটা কি আমাদের?’

‘ফ্র্যাঙ্ক হ্যান বলেছে,’ নিচের ঠোঁটে চিমটি কাটল কিশোর, ‘নতুন হাইওয়ে হলে শহরের আয় বাড়বে। ব্যবসা-বাণিজ্যের উন্নতি হবে। কেউ যদি-ধরা যাক তার নাম এক্স-খুব অল্প সময়ে এখানে কোটিপতি হয়ে যেতে চায়, তাহলে মহাসড়কটা হওয়ার আগেই খুব অল্প দামে প্রচুর জমি কিনে অথবা অন্য যে কোন ভাবেই হোক জমিয়ে রাখতে চাইবে। মহাসড়ক হয়ে গেলে লাফ দিয়ে বহুগুণ বেড়ে যাবে জমির দাম।’

‘হুঁ,’ মাথা দোলাল রবিন, বুঝে গেছে। ‘তাহলে ডক্টর কুপার আর লঙ হার্টই হবেন সেই এক্স লোকটার পথের কাঁটা।’

হাঁ করে তাকিয়ে আছে মুসা। রবিন আর কিশোরের কথাবার্তা ঠিক বুঝতে পারছে না।

মাথা ঝাঁকাল কিশোর। 'ঠিক। তাঁরা দুজনে যদি বেচতে রাজি না হন, তাহলে কি করবে এরা?'

বিষণ্ণ হাসি হাসল রবিন। 'পথের কাঁটা সরিয়ে দিতে চাইবে। এমন করে কেস সাজাবে, যাতে মনে হয় লণ্ড হার্ট খুন করেছেন ডক্টর কুপারকে। একজন মরে যাবেন, দ্বিতীয়জন খুনের অপরাধে জেলে যাবেন। এত্বের পথ তখন খোলা, আর কোন বাধা রইল না। তখন নামমাত্র মূল্যে তাঁদের জমিগুলো কিনে নিতে পারবে।'

গম্ভীর হয়ে গেল কিশোর। 'তবে সবই আমার অনুমান। ডক্টর কুপার রয়েছেন বেহঁশ হয়ে, লণ্ড হার্ট পালিয়ে বেড়াচ্ছেন-তাঁদের সঙ্গে কথা বলার অবস্থা নেই এখন, শিগুর হতে পারছি না, সত্যি সত্যি কেউ কিনে নিতে আগ্রহী কিনা। জানি না, কিনতে যদি চায় কেউ, সেই লোকটা কে?' দুই সহকারীর দিকে তাকিয়ে ভুরু নাচাল কিশোর। 'কি মনে হয়? কে?'

'আমি কি জানি!' হাত উল্টে জবাব দিল মুসা।

মাথা নাড়ল রবিন, 'জানি না।'

'পরিস্থিতি বিবেচনা করে,' কিশোর বলল, 'যেটুকু অনুমান করতে পারা যায়-তাতে একজন লোকের নামই মনে আসে। পথের কাঁটা দূর হয়ে গেলে কার লাভ? কার জমির সীমানা শেষ হয়েছে ডক্টর কুপার আর লণ্ড হার্টের সীমানায় গিয়ে?'

রবিন তাকিয়ে আছে ম্যাপের দিকে। মুসা কিশোরের মুখের দিকে। একসঙ্গে জবাব দিল দুজনে, 'জেরাল্ড থার্সটন!'

সতেরো

'শেরিফকে জানালে হত,' গাড়ি চালাতে চালাতে বলল মুসা।

'পুরোটাই আমার অনুমান,' সামনের দিকে তাকিয়ে থেকে বলল কিশোর। 'কোন প্রমাণ নেই হাতে। কাজেই এখনি শেরিফকে জানিয়ে লাভ হবে না।'

মুসার পাশে বসেছে সে। রবিনকে রেখে এসেছে লাইব্রেরিতে। থার্সটনের ব্যাঞ্চে চলেছে ওরা। সেদিনকার মত কোন অস্টন যদি ঘটে যায় আজও, অসুস্থ শরীর নিয়ে সামাল দিতে পারবে না রবিন, সে-জন্যেই রেখে আসা হয়েছে তাকে। একমাত্র লাইব্রেরিতে থাকলেই একা একা বিরক্ত লাগবে না রবিনের। আরামসে বই পড়ে কাটিয়ে দিতে পারবে।

'থার্সটনের মুখ থেকে কথা আদায় করবে কি ভাবে?' ব্যাঞ্চের মেন গেটের কাছে এসে গাড়ি থামাল মুসা।

কোলের ওপর ফেলে রাখা বড় ম্যানিলা খামটায় চাপড় দিল কিশোর। বড় ম্যাপটার ফটোকপি করে নিয়ে এসেছে। এ জন্যে নগদ দুটো ডলার খরচ করতে হয়েছে তাকে, আর এতবড় জিনিসকে ফটোকপি করার জন্যে প্রচুর কসরত এবং কায়দা-কৌশল। জানালার কাঁচ নামিয়ে কাউবয়-গেটরক্ষককে বিমল হাসি উপহার দিল সে। খামটা দেখিয়ে বলল, 'মিস্টার থার্সটনের জন্যে কিছু অতি জরুরী কাগজপত্র নিয়ে এসেছি।'

হাসিতে গলল না প্রহরী। চোখের পাতা সরু করে ফেলল। খামটার দিকে তাকিয়ে নীরস স্বরে প্রশ্ন করল, 'কি কাগজ?'

'আমি কি করে জানব?' পাল্টা প্রশ্ন করল কিশোর। 'আমাদের পারিশ্রমিক দেয়া হয়েছে পৌছে দেয়ার জন্যে। খামের গায়ে "জরুরী" লেখা আছে দেখেছি, ব্যস।' লোকটার প্রায় নাকের নিচে খামটা ঠেকিয়ে দিল সে। 'এই যে, দেখুন।'

ঝটকা দিয়ে নাক সরিয়ে নিল প্রহরী। লাল কালিতে হাতে লেখা শব্দটার দিকে তাকিয়ে রইল। 'অফিশিয়াল বলে তো মনে হচ্ছে না,' সন্দেহ যাচ্ছে না তার।

'কেন, জরুরী শব্দটা দেখেও কিছু বুঝতে পারছেন না? এত তাড়াহুড়োর মধ্যে আর কত অফিশিয়াল বানাবে?'

'বেশ,' হাত বাড়াল প্রহরী, 'দাও। আমি পৌছে দেব।'

'উহ,' খামটা সরিয়ে নিল কিশোর। 'হাতে হাতে দিতে বলে দেয়া হয়েছে আমাকে।'

'কিন্তু নির্দেশ ছাড়া আমি তোমাদের যেতে দিতে পারি না।'

হাসল কিশোর। 'ঠিক আছে, অনুমতি নিয়েই দিন। আমরা অপেক্ষা করছি। দেরি করানোর জন্যে হয়তো পুরস্কারও দিয়ে বসতে পারেন আপনাকে মিস্টার থার্সটন। যান, দাঁড়িয়ে আছেন কেন?'

বিপদে পড়ে গেল প্রহরী। ছেড়ে দেবে, না আটকে রাখবে-রাখলে আবার কোন বিপদ হয়, বুঝতে পারছে না সে। বিড়বিড় করতে লাগল, 'আমার কি? গেট পাহারা দিতে বলা হয়েছে আমাকে, অফিশিয়াল কাগজপত্র নয়।' দ্বিধা করতে করতে গিয়ে ঢুকল ছোট গার্ড-হাউসটায়। কয়েক সেকেন্ড পরই বিরাট লোহার গেটটা খুলে গেল। নিশ্চয় সুইচ-টুইচ টিপেছে সে, ইলেকট্রনিক পদ্ধতিতে খোলে গেট।

মূল বাড়িটার সামনে এনে গাড়ি রাখল মুসা। সিঁড়ি বেয়ে বারান্দায় উঠছে দুজনে, হুড়মুড় করে ঘর থেকে বেরিয়ে এলেন থার্সটন। 'কি যে করছে সব...' রাগত স্বরে বিড়বিড় করতে গিয়ে দুই গোয়েন্দাকে দেখে থেমে গেলেন। 'আবার এসেছ? কি চাও?'

'কেবল আপনার কয়েকটা মিনিট সময়,' নিরীহ ভঙ্গিতে জবাব দিল কিশোর। 'আর কিছু না।'

সিঁড়ির মাথার কাছে এসে দাঁড়ালেন থার্সটন। কঠোর দৃষ্টিতে ওদের দিকে তাকিয়ে থেকে বললেন, 'বলো। আমি শুনছি।'

'এখানে দাঁড়িয়ে?' শীতে কঁপে উঠল কিশোর। কোটের পকেটে হাত ঢুকিয়ে রেখেছে।

মাথা ঝাঁকালেন থার্সটন। 'হ্যাঁ।' গায়ে কোট নেই তাঁর। কিন্তু প্রচণ্ড ঠাণ্ডা যেন টেরই পাচ্ছেন না।

'আপনার উদ্বেজনার কারণ বোধহয় অনুমান করতে পারছি,' কিশোর বলল। 'এমন জিনিস খুঁজে বের করেছি আমরা, আমার মনে হয়েছিল জানতে আগ্রহী হবেন আপনি।'

মুহূর্তে সজাগ হয়ে গেলেন থার্সটন। কিন্তু কিছু বললেন না।

ভারী দম নিল কিশোর। পা ঠকে শীত তাড়ানোর চেষ্টা করল। 'আমাদের

বিশ্বাস, ডক্টর কুপারকে গুলি করেননি লও হার্ট। তাঁকে ফাঁসানো হয়েছে।

কিশোরের হাতের খামটার দিকে নজর গেল থার্সটনের। 'কি আছে ওতে? তথ্য-প্রমাণ?'

'তা আছে,' জবাব দিল কিশোর। 'দুজনকেই কিভাবে রাস্তা থেকে সরিয়ে দেয়া যায়, সে-সব তথ্য।'

'হঁ।' ভুরু কঁচকে ফেললেন থার্সটন। 'কে রাস্তা থেকে সরাতে চাচ্ছে?'

'সেটা আপনিই ভাল জানেন, তাই না?' থার্সটনের চোখের দিকে তাকিয়ে থেকে বলল কিশোর। 'ওই দুজনের জায়গা দখল করে নিতে পারলে মহাসড়ক হওয়ার পর নতুন আসা মানুষের কাছে বিক্রি করে বিরাট বড়লোক হয়ে যাবেন। এখনকার চেয়ে বহুগুণ ধনী।'

ভোঁতা হাসি ফুটল থার্সটনের ঠোঁটে। 'ওদের সম্পত্তিতে এক বিন্দু আগ্রহ নেই আমার। নতুনদের প্রতি আগ্রহ আরও কম। বরং আসার ব্যাপারে আপত্তি আছে। রাস্তা যাতে না হয়, সে-জন্যে বহুত দেন-দরবার আর টাকা খরচ করেছি।'

'কেন?' অবাক হলো কিশোর। 'এলাকার উন্নতি আপনি চান না?'

'না, চাই না,' শাস্তকণ্ঠে জবাব দিলেন থার্সটন। 'আমি করি ক্যাটল র‍্যাঙ্কের ব্যবসা। খুব ভাল ব্যবসা এটা। জায়গার দাম বেড়ে গেলে, ট্যাক্সও বেড়ে যাবে প্রচুর। ট্যাক্স যা আসতে থাকবে তাতে লাভের গুড় পিপড়েয় খেয়ে ফেলবে আমার। র‍্যাঙ্কের ব্যবসায় লাল বাতি জ্বলবে। হয় নতুনদের সঙ্গে পাল্লা দিয়ে হোটেলের ব্যবসা শুরু করতে হবে আমাকেও, নয়তো পাততাড়ি গুটাতে হবে। বেঁচে থাকতে আমি সেটা চাইব না। হোটেলের ব্যবসাটাও পচা ব্যবসা মনে হয় আমার কাছে।'

কজিতে বাঁধা দামী সোনার ঘড়িটার দিকে তাকালেন তিনি। 'নাও, তোমাদের কয়েক মিনিট শেষ হয়েছে। ভাল চাও তো কেটে পড়ো। নইলে এবার আর ছাড়াছাড়ি নেই। বিনা অনুমতিতে ঢোকার দায়ে অ্যারেস্ট করাবই।'

'ধূর, খামোকাই এলাম!' বড় গেটটা পার হওয়ার সময় বিরক্ত কণ্ঠে বলল মুসা। 'কোন লাভ হলো না।' রাগ দেখানোর জন্যে আচমকা এক মোচড় মারল স্টিয়ারিংয়ে। লাফ দিয়ে রাস্তায় উঠে এল গাড়ি।

জানালা দিয়ে গরুর পালের দিকে তাকিয়ে আছে কিশোর। ছড়িয়ে ছিটিয়ে থাকা খড়ের গাদাগুলোকে দূর থেকে লাগছে সাদা তুষারের মধ্যে বিন্দুর মত। 'লাভ হয়নি তা নয়,' জবাব দিল সে। 'দেখলাম, মুখ ফসকে কিছু বলে ফেলেন কিনা।'

'গভীর জলের মাছ,' জবাব দিল মুসা। 'অত সহজে কি আর ফসকায়।'

জানালায় পাশ দিয়ে সরে গেল একটা সাইনপোস্ট। গরুগুলোর দিকে তাকিয়ে থাকতে থাকতে হঠাৎ ঝটকা দিয়ে সোজা হয়ে বসল কিশোর। তীক্ষ্ণ কণ্ঠে চৈঁচিয়ে উঠল, 'থামাও থামাও, গাড়ি থামাও!'

ফিরে তাকাল মুসা, 'মানে?'

'আহ, থামাও না। ব্যাক করো।'

কিছুই না বুঝে ঘ্যাচ করে ব্রেক কষল মুসা। পিছাতে শুরু করল গাড়ি।

সাইনপোস্টটার কাছে এসে আবার থামতে বলল কিশোর। আঙুল তুলে সাইনটা

দেখিয়ে জিজ্ঞেস করল, 'বলো তো, গুগলটা কোথায়?'

'ওয়েলকাম টু গানিসন ন্যাশনাল ফরেস্ট,' জোরে জোরে পড়ল মুসা। 'কই, গোলমাল তো দেখছি না। বানান-টানান সব ঠিক আছে।'

কাঁধের ওপর দিয়ে বুড়ো আঙুল তুলে দেখাল, 'থার্সটনের র‍্যাঙ্ক আর ন্যাশনাল ফরেস্টের সীমারেখা এটা।'

শূন্য দৃষ্টিতে কিশোরের দিকে তাকাল মুসা। 'তাতেই বা গোলমালটা কি হলো?'

সামনের পাহাড়ের ঢালে চরতে থাকা গরুগুলো দেখাল কিশোর। 'ন্যাশনাল ফরেস্টের সীমানার মধ্যে চরছে ওগুলো। সেই ফরেস্ট, যেটাকে বুনো জানোয়ারের অভয়ারণ্য বানানোর জন্যে মরিয়া হয়ে উঠেছেন ডক্টর কুপার।'

কিশোরের কথা মানে তারপরেও বুঝতে পারল না মুসা। 'তাতেই বা কি? গরুরা তো আর পড়তে জানে না যে সাইনবোর্ড দেখে আপন-পর বিবেচনা করবে।'

গরুগুলোর দিক থেকে চোখ ফেরাচ্ছে না কিশোর।

তাকে কথা বলতে না দেখে আবার বলল মুসা, 'সরকারের গার্ডরা কি করছে? সরাচ্ছে না কেন গরুগুলোকে?'

'সরাবে না, যদি লীজ দেয়ার কথা থাকে,' অবশেষে বলল কিশোর।

দুই হাত উল্টে হাল ছেড়ে দেয়ার ভঙ্গি করল মুসা। 'মাথা গুলিয়ে যাচ্ছে আমার। দোহাই তোমার, খোলসা করবে?'

'ন্যাশনাল ফরেস্টের কিছু অংশ লীজ দেয়া সম্ভব,' বুঝিয়ে বলল কিশোর। 'সরকারের দখলে থাকে না সেটা তখন আর। তেল আর কাঠ কোম্পানিগুলো হরদম এ ভাবে লীজ নেয়।'

'তারমানে, ক্যাটল র‍্যাঙ্কাররাও নিতে পারে,' মুসা বলল। 'ঘাসে ভরা জমিগুলো লীজ নিতে পারেন থার্সটন; তারও লাভ-কম দামে গরুর খাবার জোগাড় হয়ে গেল, সরকারেরও লাভ-পতিত জায়গা থেকে নগদ কিছু টাকা এল।'

'কিন্তু সেই লাভটা থেকে থার্সটনকে বঞ্চিত করতে চাইছেন ডক্টর কুপার। অন্য পরিকল্পনা নিয়ে হাজির হয়েছেন তিনি,' নিচের ঠোটে চিমটি কাটল একবার কিশোর।

মাথা ঝাঁকাল মুসা। 'বুঝলাম। গরুকে বন্য প্রাণী ধরা হবে না। ওয়াইল্ড লাইফ রিজার্ভে জায়গা হবে না ওদের। সরকার ডক্টর কুপারের প্ল্যানকে প্রাধান্য দিলে থার্সটনের মস্ত ক্ষতি হয়ে যাবে।'

'আর যদি লঙ হার্টের লোকেরা পেয়ে যায়,' কিশোর বলল, 'তাহলেও থার্সটনের ক্ষতি। তবে ডক্টর কুপার আর লঙ হার্টকে সরাতে পারলে আপাতত তাঁর সমস্যার সমাধান হয়ে যাচ্ছে।'

'হুঁ! কিন্তু ডক্টর কুপার যখন গুলি খেয়েছেন, থার্সটন তখন শহরে ছিলেন না,' মনে করিয়ে দিল মুসা।

'টাকা খাইয়ে অন্যকে দিয়ে খুন করানোর চেষ্টা করে থাকতে পারেন। তবে সেটা প্রমাণ করা কঠিন।' ড্যাশবোর্ডে টাকা দিয়ে টাট্টু বাজানো শুরু করল কিশোর। 'খুনির সঙ্গে তাঁর সম্পর্কটা জানা গেলে সুবিধে হত,' অন্যমনস্ক ভঙ্গিতে বলল সে।

‘থার্সটনের ওপর নজর রাখা দরকার। জানা দরকার কাকে দিয়ে কাজটা করাতে চেয়েছেন তিনি।’

‘খাইছে!’ ওড়িয়ে উঠল মুসা। ‘সেটা কি ভাবে সম্ভব? আবার ঢুকতে চাও থার্সটনের বাড়িতে?’

‘না,’ মাথা নাড়ল কিশোর। ‘থার্সটনের ব্যাঙ্কের মেইন গেট থেকে পঞ্চাশ গজ দূরে একটা সাইড রোড আছে। ওখানে থাকলে কে আসছে, কে যাচ্ছে, সব দেখতে পাব আমরা।’

‘দেখো, না খেঁয়ে আমি আর কোন কিছু করতে পারব না,’ প্রবল আপত্তি জানাল মুসা। ‘আগে চলো শহরে গিয়ে কিছু খেয়ে নিই, তারপর এসে নাইট বসে থাকা যাবে। ততক্ষণে অন্ধকারও হয়ে যাবে। চোখে পড়ার ভয় থাকবে না আমাদের। হেডলাইট নিভিয়ে বসে থাকব।’

মাথা নাড়ল কিশোর। ‘উহু। যেতে-আসতে অনেক সময়। ততক্ষণে মিস হয়ে যেতে পারে।’

ফোঁস করে নিঃশ্বাস ফেলল মুসা। ‘অ! তা কতক্ষণ পাহারা দিতে চাও?’

কাঁধ ঝাঁকাল কিশোর। ‘দেখব মাঝরাত পর্যন্ত। তারপরও যদি কিছু না ঘটে, কি আর করা, ফেরতই যাব।’

আঠারো

তবে মাঝরাত পর্যন্ত অপেক্ষা করতে হলো না ওদের। দাঁত বের করা পর্বত-চূড়ার ওপাশে সবে অস্ত যেতে বসেছে সূর্য, এমন সময় খুলে গেল গেট। একটা গাড়ি বেরিয়ে এল। ড্রাইভারের চেহারা দেখার মত তখনও যথেষ্ট আলো আছে আকাশে। থার্সটন যাচ্ছেন।

আন্তে করে মুসার গায়ে কনুই দিয়ে গুঁতো দিল কিশোর। ‘স্টার্ট দাও। যদি কোন রেট্রুর্নেটে ঢোকেন, আমরাও ঢুকব। খাবারের অর্ডার দেব।’

‘যদি আমাদের খাওয়া শেষ হওয়ার আগেই বেরিয়ে যান?’ মুসার প্রশ্ন।

‘তাহলে আর কি?’ হাসল কিশোর। ‘বাকি খাবার রেখেই উঠে পড়তে হবে তোমাকে।’

‘পকেটে নিয়ে নিতে পারি। তাতে নিশ্চয় কোন অসুবিধে নেই?’

‘তা নেই, যদি ঝোল না থাকে।’

খানিক দূর যাওয়ার পর বলে উঠল কিশোর, ‘কিন্তু এলেক্স স্প্রিঙ তো ওদিকে নয়। উল্টো দিকে যাচ্ছেন। পর্বতের দিকের রাস্তা ধরেছেন। খুব ভাল।’ খুশি হয়ে উঠল সে।

‘কেন, ভালটা কি হলো?’ গাড়ি চালাতে চালাতে জুঁকুটি করল মুসা।

‘ভালটা হলো এই,’ কিশোর বলল, ‘আমার বিশ্বাস সেই লোকটার সঙ্গেই দেখা করতে চলেছেন থার্সটন—যাকে টাকা দিয়েছেন ডক্টর কুপারকে গুলি, আর লঙ হার্টকে ফাঁসানোর জন্যে। সবার সামনে তার সঙ্গে দেখা করতে চান না তিনি। তাই গোপন

জায়গা বেছে নিয়েছেন।’

হেডলাইট জ্বালতে যাচ্ছিল মুসা, তাড়াতাড়ি বাধা দিল কিশোর। ‘উহ, দেখে ফেলবেন তো! আমরা পিছু নিয়েছি বুঝলেই যেখানে যাচ্ছিলেন সেখানে আর যাবেন না।’

গুরু দিকে রাস্তাটা ভালই। তারপর গুরু হলো মারাত্মক খাড়াই, তীক্ষ্ণ বাঁক, রাস্তার পাশে গভীর খাত-আলোর মধ্যে চালানোও বিপজ্জনক, আর অন্ধকারে তো আত্মহত্যার সামিল। মনে মনে খোদাকে ডাকতে ডাকতে চলল মুসা। কোনভাবে যদি বরফের মধ্যে ঢাকা পিছলে যায়, সামনের ঢাকা সরে যায় খাতের পাশে... ভাবতে চাইল না আর। সামনের হেডলাইটের আলো লক্ষ্য করে চালাতে থাকল। মাঝে মাঝে তীক্ষ্ণ বাঁকের ওপাশে যখন পুরোপুরি অদৃশ্য হয়ে যায় আলো, গভীর অন্ধকারে ঢেকে যায়, তখন বাধ্য হয়ে হেডলাইট জ্বেলে দেখে নিতে হয় সামনের রাস্তা। আলো জ্বালানোটাও মস্ত ঝুঁকি। দেখে ফেলতে পারেন থার্সটন। এত কষ্ট তাহলে নিরর্থক হবে।

কিশোরের দৃষ্টি সামনের দিকে স্থির। আরও খাড়া হয়ে গেছে রাস্তা। বাঁক নিয়ে অন্যপাশে চলে গেছে থার্সটনের গাড়ি। কিন্তু তারপরেও আলো দেখা যাচ্ছে। ক্রমশ উঠে যাচ্ছে আরও ওপরের দিকে।

আরেকটা তীক্ষ্ণ মোড়ের কাছে চলে গেছে গাড়িটা। এতক্ষণ পেরিয়ে আসা অন্য মোড়গুলোর সঙ্গে এটার তফাৎ আছে। ঠেলে বেরোনো চওড়া একটা কাঁধ রয়েছে এটার, কাঁধের কিনারে কাঠের রেলিঙ। পাহাড়ের একটা তাকের মত শিরা ওটা। তাতে বেঞ্চও বসানো রয়েছে। নিশ্চয় ওখানে বসে পর্বতের দৃশ্য দেখার জন্যেই বানানো হয়েছে।

‘মনে হয় এসে গেছি,’ নিচুস্বরে বলল কিশোর।

গাড়ি থামিয়ে ইঞ্জিন বন্ধ করে দিল মুসা।

থার্সটনের গাড়ির হেডলাইটের আলোয় বাঁকের কাঁধের ওপরে আরেকটা পুরানো নীল পিকআপ ট্রাক দেখা গেল। ওটার কাছে গিয়ে গাড়ি রাখলেন থার্সটন। মনোভিলাস বের করে চোখে লাগাল কিশোর। ট্রাক থেকে বেরিয়ে এল একজন মোটাসোটা মানুষ। লাল দাড়িওয়ালা টেরি জনসনকে দেখে অবাক হলো না কিশোর। এ রকমই কাউকে আশা করছিল সে।

প্যাসেঞ্জার-সাইডের দরজা খুলে দিলেন থার্সটন। এক মুহূর্ত দ্বিধা করে উঠে বসল জনসন।

‘হচ্ছেটা কি?’ মুসার প্রশ্ন। ‘কি করছে ওরা?’

‘গাড়ির ভেতরটা দেখা যাচ্ছে না,’ কিশোর বলল। ‘অন্ধকার। কোথাও যাবে না, বোঝা যাচ্ছে। তারমানে জরুরী আলোচনা করছে দুজনে।’

ঘোং-ঘোং করে উঠল মুসা। ‘তারমানে আরেকটা শিকারের পরিকল্পনা করছে দুজনে। সেটা মানুষ শিকারও হতে পারে।’

‘আমরা ওদের শিকার হতে না চাইলে এখনি কেটে পড়া উচিত।’

ঘাড় ঘুরিয়ে পেছনে তাকাল মুসা। গাড়ি ঘোরানোর জায়গা নেই। স্টার্ট দেয়াটাও এখন ঝুঁকির ব্যাপার। থার্সটন আর জনসন যদি শুনে ফেলে, বিপদ হয়ে যাবে।

একটাই উপায়। ভারী দম নিয়ে ইমার্জেন্সি ব্রেক ছেড়ে দিল সে। নিঃশব্দে ধীরে ধীরে পেছনে নামতে শুরু করল গাড়ি। চাঁদের মুখ মেঘে ঢাকা ছিল এতক্ষণ, সেটা সরে যাওয়াতে আলো ছাড়াই পেছনের বাঁকটা অস্পষ্ট ভাবে চোখে পড়ছে। বাঁকের কাছে এসে ব্রেক কমল সে। চাবিতে মোচড় দিল। শুক্ক নীরবতার মাঝে শব্দটা যেন বোমা ফাটল কানে। সরু জায়গাতে যত দ্রুত সম্ভব গাড়ি ঘুরিয়ে ফেলল। তিরিশ সেকেন্ড একটানা ছোট্টার পর নিজের বৃকে হুৎপিও লাফানোর শব্দ শোনার অবকাশ পেল।

জানালা দিয়ে তাকিয়ে থেকে কিশোর বলল, 'কোন ধরনের সাইড রোড দেখলেই ঢুকে পড়বে।'

'ওই যে, সামনেই মনে হয় আছে একটা,' কিশোরের মনে কি আছে, বুঝতে পারছে মুসা। সরু, অন্ধকার একটা গলিপথ দেখে গতি কমাল সে। গিছিয়ে এসে গাড়ি ঢুকিয়ে দিল তার মধ্যে। বিশ ফুট মত এগিয়ে গিয়ে বন্ধ করে দিল ইঞ্জিন। আলো নিভিয়ে লুকিয়ে থেকে অপেক্ষা করতে লাগল।

পনেরো মিনিট পর চলে গেল থার্সটনের গাড়ি।

স্টার্ট দিতে গেল মুসা। ওর বাহুতে হাত রাখল কিশোর। 'দাঁড়াও। আরও দেখি।'

পাঁচ মিনিট পর তীব্র গতিতে চলে গেল নীল পিকআপটা।

মৃদু শিস দিয়ে উঠল মুসা। 'পঞ্চাশের কম না। এমন রাস্তায় এ গতিতে চালানোর মানে কোথাও যাবার তাড়া আছে তার।'

'চলো, কোথায় যায় দেখি,' কিশোর বলল।

গাড়ি পিছিয়ে এনে পিকআপের পিছু নিল মুসা। ভয়ানক বুঁকি নিচ্ছে। সামনের গাড়িটা পঞ্চাশ মাইল গতিতে ছুটছে, ওটাকে ধরার জন্যে তাকে আরও বেশি গতিতে ছোটাতে হচ্ছে। আলাপা বরফের সামান্য একটা টুকরোও যদি চাকার নিচে পড়ে, উড়িয়ে নিয়ে গিয়ে ফেলবে হাজার ফুট গভীর অন্ধকার খাদে। এত চিন্তা করলে এ ভাবে চালাতে পারবে না। মগজটাকে শূন্য করে দিয়ে পিছু লেগে রইল ওটার। স্টিয়ারিঙ হুইলে যেন আঠা দিয়ে লাগিয়ে দেয়া হয়েছে তার হাত দুটো। পা দুটো যন্ত্রের মত ওঠা-নামা করছে ব্রেক পেডাল আর গ্যাস পেডালের ওপর। বাঁক এলে ব্রেক কমতে হচ্ছে, পেরিয়ে এলেই আবার গতি বাড়ানো।

কিশোরের চোখ পিকআপটার ওপর। বাঁক পেরোনোর সময় তুষার আর খোয়া ছিটাল ওটার পেছনের চাকা। ওদের খসানোর জন্যে মরিয়া হয়ে উঠেছে মনে হচ্ছে।

স্পীডোমিটারের দিকে তাকাল সে। ঘাটের ঘর ছুঁই ছুঁই করছে। সন্দেহ হ'লো তার। 'উহ, আমাদের খসানোর জন্যেও এত গতিবেগে চালানোর রিস্ক নেবে না। তারমানে বিপদে পড়েছে। গাড়িটাকে কন্ট্রোল করতে পারছে না সে।'

'তারমানে আমাদের সাহায্য লাগবে ওর,' দাঁতে দাঁত চেপে গ্যাস পেডালে চাপ আরও বাড়ানো শুরু করল মুসা। 'সামনে চলে যেতে হবে, যাতে ওর সামনের বাম্পার আমাদেরটার পেছনে ঠেকে যায়। আমি ব্রেক কমলে তখন ওর গাড়িটাও দাঁড়িয়ে যাবে।'

পরের মোড়টায় এসে ব্রেক পেডালে পা স্পর্শ করল না মুসার। ভয়ঙ্কর গতিতে

মোড় ঘোরানো শুরু করল। আর্তনাদ করে উঠল চাকা। মাছের লেজের মত এপাশ ওপাশ দোল খেতে শুরু করল পেছনের চাকা। কোনমতে রাস্তার ওপর গাড়িটাকে টিকিয়ে রাখতে পারল সে। গতিও বাড়ছে ক্রমশ, পিকআপের চেয়ে বেশি। তবে অগ্রগতি খুব সামান্য। গ্যাস পেডালে পায়ের চাপ আরও বাড়িয়ে দিল।

সামনে কিছুদূর একেবারে সোজা এগিয়েছে রাস্তা। সুযোগটার সদ্ব্যবহার করল মুসা। চলে এল পিকআপের পেছনে। লাইসেন্স প্লেটের নম্বর পড়তে পারছে। আচমকা পাশে কেটে পুরো চেপে ধরল গ্যাস পেডাল, এরচেয়ে আর বাড়ানোর উপায় নেই।

গতি উঠে গেল সত্তরে। তারপরেও দেখা গেল, পিকআপ আর ওদের মাঝের অগ্রগতি বড় ধীর। বাঁকা কালো তীর আঁকা একটা হলুদ সাইনবোর্ড বিদ্যুৎ ঝলকের মত চলে গেল পাশ দিয়ে। সামনে তীক্ষ্ণ বাঁক। পিকআপের পাশ কাটানোর সময় জনসনের আতঙ্কিত চেহারা দেখতে পেল কিশোর।

পিকআপের সামনে এসেই ব্রেক কমল মুসা। বাঁকের কাছে পৌঁছানোর আগেই ঠেকাতে হবে। এই গতিতে বিপদ এড়িয়ে ওই বাঁক পেরোতে পারবে না কোন গাড়ি।

এক ব্রেক দিয়ে দুটো গাড়িকে ঠেকাতে গিয়ে মরিয়া হয়ে যেন আর্তনাদ করে উঠল চাকা। পিকআপের সামনের বাম্পার এসে আঘাত হানল সিডানের পেছনের বাম্পারে। এত জোরে পেছনে ঝটকা খেল কিশোরের মাথা, মনে হলো ঘাড় ভেঙে যাবে। দৃষ্টি স্থির হয়ে আছে হেডলাইটের আলোয় আলোকিত সামনের রাস্তায়।

একপাশে পাহাড়ের দেয়াল। রাস্তায় বরফের পাতলা আস্তর কুৎসিত ভাবে চকচক করছে হেডলাইটের হলুদ আলোয়। তার ওপাশে কিছুই নেই। শুধুই শূন্যতা। খাদের কালো অন্ধকার যেন হাঁ করে রয়েছে গিলে খাবার জন্যে।

আর্মরেস্টে চেপে বসেছে কিশোরের আঙুল। পেছন থেকে ঠেলছে ভারী ট্রাকটা। নিয়ে যাচ্ছে খাদের কিনারে।

‘পারবে না!’ চিৎকার করে মুসাকে বলল সে। ‘খাদে পড়ে যাচ্ছি আমরা!’

উনিশ

ধাতব গোঙানি। ধোঁয়া উঠছে রবারের। ক্রমেই গাড়িটাকে খাদের আরও কিনারে নিয়ে যাচ্ছে ট্রাক। গায়ের শক্তি দিয়ে ব্রেক পেডাল চেপে ধরেছে মুসা। কিন্তু কোন ভাবেই পদার্থবিদ্যার সূত্রকে ফাঁকি দিতে পারছে না। ট্রাকটার ওজন অনেক বেশি। অতিরিক্ত ভরবেগ। সামনের অপেক্ষাকৃত কম ওজনের গাড়িটাকে ঠেলে ফেলে দেবে। ঠেকাতে হলে জলদি কোন-উপায় বের করতে হবে।

হ্যাঁচকা টানে যতটা পারল স্টিয়ারিং ঘুরিয়ে দিল রাস্তার দিকে। বড় করে ঢোক গিলল। ব্রেক থেকে পা তুলে এনে ঠেসে ধরল গ্যাস পেডাল। লাফ দিয়ে আগে বাড়ল গাড়িটা। ট্রাকের ঠেলা থেকে মুক্ত করে নিল নিজেকে। ঘুরে গেল বড়ির পেছনের অংশ। বরফে পিছলে যাচ্ছে পেছনের চাকা। সামনের চাকা কামড় বসাল

বরফের মধ্যে। ঘুরতে শুরু করেছে গাড়ি। গাড়ির নাক সরে যাচ্ছে খাদের অন্ধকার থেকে।

ফিরে তাকাল কিশোর। মরিয়া হয়ে ওদের অনুসরণের চেষ্টা করছে পিকআপটা। নাক ঘুরে গেল অর্ধেকটা। সোজা না এগিয়ে পাশ থেকে পিছলে সরে যাচ্ছে খাদের দিকে। চলে গেল একেবারে কিনারে। একটা সেকেন্ড ঝুলে রইল। তারপর হারিয়ে গেল কালো অন্ধকারের মধ্যে।

ঘ্যাচ করে ব্রেক কষল মুসা। প্রায় একসঙ্গে লাফিয়ে নেমে পড়ল দুজনে। দৌড়ে এল ট্রাকটা যেখান থেকে পড়ে গেছে সেখানে। গভীর অন্ধকারে খুব বেশি কিছু দেখার আশা করল না কিশোর। তবু ষাট ফুট নিচে হেডলাইটের আলো চমকে দিল ওকে। তাকের মত বেরিয়ে থাকা একটা শৈলশিরা থেকে দুটো পাইন গাছ বেরিয়ে আছে। একপাশে পাথরের দেয়াল আর অন্য পাশে দুটো গাছের মাঝখানে আটকে রয়েছে ট্রাকটা।

‘শুনছেন?’ চিৎকার করে ডাকল কিশোর। ‘শুনতে পাচ্ছেন?’

সাদা এল না। কোন রকম নড়াচড়াও নেই।

মুসার দিকে তাকাল কিশোর। ‘গাড়িতে দড়ি আছে না?’

‘আছে। তবে ওখান পর্যন্ত পৌঁছবে কিনা জানি না,’ জবাব দিল মুসা। দাঁড়াল না আর। দড়ি নিয়ে এল। সেই সঙ্গে গাড়িটাও।

দড়ির এক প্রান্ত গাড়ির সামনের বাম্পারে বেঁধে ফেলল সে। ততক্ষণে আরেক প্রান্ত নিজের বুকে পেঁচিয়ে ফেলেছে কিশোর।

দুজনেই তৈরি হলো। খাদের কিনার বেয়ে নামতে শুরু করল কিশোর। দড়ি ধরে একটু একটু করে ছাড়তে লাগল মুসা।

বড় বড় পাথর বেরিয়ে আছে পাহাড়ের গা থেকে। ছোট ছোট আলগা নুড়ি চাপ লেগে খসে পড়ছে নিচে। কোন কোনটা ট্রাকের ছাতে পড়ে ঠং-ঠং শব্দ তুলছে। ট্রাকের পেছনে মাল রাখার খোলা জায়গাটা কিশোরের লক্ষ্য। গাছ দুটো মড়মড় শব্দ তুলছে। নড়ে উঠছে খানিক পর পরই। সেই সঙ্গে দুলে উঠছে ট্রাকটাও।

ট্রাকের ওপর নামল কিশোর। গাড়ির ভেতর জনসনকে দেখতে পাচ্ছে। স্টিয়ারিং হুইলে কপাল ঠেকানো। মারা গেল নাকি? না বেইশ? ক্রিকেট বলের সমান একটা পাথর খসিয়ে নিয়ে ঠুকতে শুরু করল পেছনের জানালার কাঁচে। হাতে দস্তানা পরা আছে। ফ্রেমে আটকে থাকা ভাঙা কাঁচগুলো সরতে গিয়ে তাই আঙুল কাটা গেল না।

কাত হয়ে ঝুঁকে হাত বাড়িয়ে জনসনের কোটের কাঁধ চেপে ধরল। নড়াচড়ায় অদ্ভুত শব্দ করে প্রায় জীবন্ত প্রাণীর মত ওড়িয়ে উঠল ট্রাকটা। নাক নিচু করে নেমে গেল বেশ অনেকখানি। টেনেটুনে অনেক কষ্টে অজ্ঞান দেহটাকে বের করে আনল সে। আরও খানিকটা নেমে গেল ট্রাক।

‘কিশোর, কোন সমস্যা হচ্ছে?’ ওপর থেকে চিৎকার করে জিজ্ঞেস করল মুসা।

‘না, এখনও হচ্ছে না!’ জবাব দিল কিশোর। ‘তবে যে কোন মুহূর্তে উল্টে পড়ে যাবে ট্রাকটা। দুজনকে টেনে তুলতে হবে তোমাকে। বাপরে বাপ, কি ভারী

লোকটা! দুশো পঞ্চাশের কম হবে না।’

‘দাও, বেঁধে দাও। কোন সমস্যা নেই,’ হাসি হাসি গলায় জবাব দিল মুসা।
‘দু’হাজার পাউন্ড ওজনের একজন বন্ধু আছে আমার এখানে।’

গাড়ির কাছে দৌড়ে গেল মুসা। দরজা খুলে মেঝেতে বিছানো একটা ম্যাট তুলে নিল। দেয়ালের ধারাল কিনারে ঘষা লেগে লেগে দড়িটা কেটে যাবে। নিচে ম্যাট দিয়ে দিলে ঘষাটা যাবে তার ওপর দিয়ে, সহজে ছিড়বে না।

ম্যাটটা দড়ির নিচে রেখে গাড়িতে এসে উঠল সে। ইঞ্জিন স্টার্ট দিয়ে ধীরে ধীরে পিছাতে শুরু করল। দ্রুত সামনে-পেছনে করছে নিজের মুখ, মাথাটা ঘুরছে যেন যন্ত্রের মত—একবার সামনে তাকাচ্ছে দড়ির দিকে, আবার পেছনে; এক সঙ্গে দু’দিকে লক্ষ রাখতে হচ্ছে তাকে।

কিশোরের মাথাটা দেয়ালের কিনারে দেখা যেতেই ইঞ্জিন বন্ধ করে দিয়ে দৌড়ে গেল সে, ওপরে উঠতে সাহায্য করার জন্যে।

তুলে আনল দুজনকেই। এখনও বেঁচে রয়েছে জনসন। কপালের একটা পাশ ফুলে রয়েছে গোল আলুর মত। ঠাণ্ডা হয়ে গেছে শরীর। তবে শ্বাস-প্রশ্বাসে কোন ব্যাঘাত নেই।

পেছনের সীটে তাকে তুলে নিয়ে শহরে রওনা হলো ওরা।

এল্‌ক্‌ স্প্রিঙ হাসপাতালে যখন স্ট্রেচারে করে ইমার্জেন্সির দিকে নিয়ে যাওয়া হচ্ছে জনসনকে, তখনও তার জ্ঞান ফেরেনি। তাকে ডাক্তার আর নার্সের হাতে সমর্পণ করে বেরিয়ে আসতে যাবে দুই গোয়েন্দা, এই সময় হুড়মুড় করে এসে ঢুকলেন শেরিফ।

‘খবর সাংঘাতিক দ্রুত ছড়ায় এ শহরে,’ কিশোর বলল। ‘আপনাকে’ ফোন করতে যাচ্ছিলাম আমরা।’

‘গেটে গুনলাম, আরেকটা অজ্ঞান দেহ তুলে নিয়ে এসেছ তোমরা,’ জবাব দিলেন শেরিফ। ‘ভাবছি, তোমরা যতক্ষণ আছ, হাসপাতালের মধ্যেই অফিসটা সরিয়ে নিয়ে আসব কিনা। তাতে সময় আর ঝামেলা দুটোই বাঁচবে আমার।’

‘অফিসের কাজে এসেছেন?’ জানতে চাইল কিশোর। ‘নাকি কাউকে দেখতে?’ হাসলেন শেরিফ। ‘দুটোই। মারিসা কুপারের সঙ্গে কথা বলতে।’

‘হুঁশ ফিরেছে!’ প্রায় চোঁচিয়ে উঠল মুসা। ‘দেখা করা যাবে?’

‘যাবে। ভিজিটিং আওয়ার নয় এখন, তবু ব্যবস্থা করতে পারব। টেরি জনসনকে এর মধ্যে ঢোকালে কি ভাবে, খুলে বলবে?’

কি ঘটেছে, সব জানাল তাঁকে কিশোর আর মুসা। শান্ত ভঙ্গিতে চুপ করে গুনলেন শেরিফ। দু’একবার মাথা ঝাঁকালেন। ওদের কথা শেষ হলে বললেন, ‘ঘটনাগুলোর কোন ব্যাখ্যা আছে তোমাদের কাছে?’

‘অবস্থাদুটো মনে হচ্ছে, ডক্টর কুপারকে খুন করার জন্যে জনসনকে ভাড়া করেছিলেন থার্সটন,’ কিশোর বলল। ‘ডক্টর কুপার ওয়াইল্ডলাইফ রিজার্ভ প্রতিষ্ঠা করে ফেললে শিকারী পেশার ইতি ঘটবে ডেবে এ কাজ করতে রাজি হবে জনসন, ধরেই নিয়েছিলেন থার্সটন। তারপর নিশ্চয় জনসনকেও সরিয়ে দিতে চেয়েছিলেন তিনি।’

‘এ কাজ কেন করতে যাবে?’ মোলায়েম স্বরে জিজ্ঞেস করলেন শেরিফ।

‘হয়তো ঘাবড়ে গিয়েছিলেন। সাক্ষী রাখতে চাননি। কিংবা আরও বেশি টাকা চাইতে গিয়েছিল জনসন, ব্যাকমেল। সুতরাং ওকে খুন করার সিদ্ধান্ত নিলেন থার্সটন। নিয়ে গিয়েছিলেন ওই নির্জন পার্বত্য এলাকায়। গাড়ির ব্রেক লাইন কেটে দেয়ার ব্যবস্থা করেছিলেন।’

‘থার্সটন আর জনসনের কথাবার্তা শুনেছ?’

মাথা নাড়ল কিশোর। ‘না।’

‘তোমার ধারণা থার্সটনের লোক ব্রেক নষ্ট করেছে?’

মাথা ঝাঁকাল কিশোর।

‘কাউকে জনসনের গাড়ির নিচে ঢুকতে দেখেছ?’

‘আকাশে মেঘ ছিল,’ কিশোর জানাল। ‘চাঁদ ঢাকা পড়েছিল। অন্ধকারে দেখা যাচ্ছিল না তেমন। তা ছাড়া দূর থেকে ছোট টেলিস্কোপ দিয়ে দেখেছি আমরা।’

‘কিন্তু জনসনের লোকটাকে চোখে পড়ার কথা,’ কিশোরের যুক্তি মেনে নিতে পারছেন না। ‘তা ছাড়া ওই তৃতীয় লোকটা এল কোনখান থেকে?’

‘থার্সটন যদি জনসনকে ওখানে দেখা করতে বলে থাকেন, তাহলে জনসন আসার আগেই লোকটাকে ওখানে পাঠিয়ে দিয়েছেন তিনি। গাড়ি লুকানোর জায়গার অভাব নেই ওখানে। কোথাও সেটা রেখে পায়ে হেঁটে এসে লুকিয়ে ছিল যেখানে দেখা করার কথা সেখানে।’

এক মুহূর্ত থামল কিশোর। নিচের ঠোট টেনে ধরে ছেড়ে দিল স্পিণ্ডার মত। ‘ব্রেক কেটে দিয়ে অ্যান্ড্রিডেন্টের ব্যবস্থা করা হয়েছিল কিনা, সেটা সহজেই প্রমাণ করা যাবে। গাড়ির ব্রেক লাইন চেক করলেই বুঝতে পারবেন।’

‘হঁ!’ ঘড়ি দেখলেন শেরিফ। ‘দেখব চেষ্টা করে।’

বিশ

ডক্টর কুপারের ঘরটা দুই গোয়েন্দাকে দেখিয়ে দিল হাসপাতালের একজন কর্মচারী। বালিশে পিঠ দিয়ে আধশোয়া হয়ে আছেন তিনি। পরীক্ষার জন্যে তাঁর বাহু থেকে রক্ত নিচ্ছে একজন নার্স। মুখটা রক্তশূন্য, ফ্যাকাসে। গোয়েন্দাদের দেখে দুর্বল হাসি ফুটল মুখে।

‘এই না হলে হাসপাতাল,’ নার্স চলে গেলে হেসে বলল মুসা। ‘রক্ত নিতে নিতেই মেরে ফেলে মানুষকে।’

মুদু শব্দ করে হাসলেন ডক্টর কুপার। ‘তুমি বলতে চাইছ এ ভাবে রক্ত না নিলে আরও আগেই এখান থেকে বেরিয়ে যেতে পারতাম আমি? একটা কথা ঠিক, সেদিন সময়মত তোমরা গিয়ে না পৌঁছলে আমার কাছ থেকে এখন আর কিছুই নেয়ার থাকত না ওদের। অন্তত ওরা আমাকে সে-রকমই জানিয়েছে।’

‘সেদিন সকাল বেলা ঘুম ভাঙার কথা মনে আছে আপনার?’ কিশোর জিজ্ঞেস করল। ‘নাস্তা করেছিলেন?’

‘করেছিলাম,’ জবাব দিলেন ডক্টর কুপার। ‘তাবু তুলে নিয়ে গিরিখাতে ফিরে এসেছিলাম। তারপর সব অন্ধকার। আর কিছু মনে নেই।’

‘গিরিখাতে ফিরেছিলেন মানে? ওখানে ক্যাম্প করেননি আপনি?’

মাথা নাড়লেন ডক্টর কুপার। ‘না। ক্যাম্প করেছিলাম ওখান থেকে কয়েক মাইল দূরে, পাহাড়ের ওপরে। সকাল বেলা রেডিওতে একটা নতুন সিগন্যাল পেয়ে দেখতে গিয়েছিলাম গিরিখাতে।’ থামলেন তিনি। ক্রকুটি করলেন। ‘মিটার বলছিল সিগন্যালটা আসছে দশ ফুট দূর থেকে। কিন্তু গিরিখাতের কোথাও নতুন কুগারটাকে দেখলাম না। তখন তুষারপাত বন্ধ ছিল। না দেখার কথা নয়।’

‘ক’টা বেজেছে তখন?’

‘এই সোয়া ন’টা মতন। মনে আছে, তার কারণ, সময়টা লগ বুকে লিখে রেখেছিলাম।’

‘কিন্তু আপনার ভাঙা ঘড়িতে তো সময় আটকে ছিল দশটা ছেচলিশে,’ মুসা বলল। ‘প্রায় দেড় ঘণ্টার ফারাক।’

আবার ক্রকুটি করলেন ডক্টর কুপার। ‘জানি। জানানো হয়েছে আমাকে। কিন্তু কিছুতেই মনে করতে পারছি না ওই সময়টা কি করেছি আমি।’

সামান্য উত্তেজনাতেই হাঁপাতে শুরু করলেন তিনি। এখন আর কিছু জিজ্ঞেস করা নিরাপদ নয় ভেবে উঠে দাঁড়াল কিশোর। ‘ঠিক আছে, আপনি বিশ্রাম নিন। আমরা কাল আসব।’

জোরে নিঃশ্বাস ফেললেন ডক্টর কুপার। ‘হ্যাঁ, বিশ্রাম নেয়াই উচিত। ডাক্তার উত্তেজিত হতে মানা করে দিয়েছেন।’ চোখ বুজলেন তিনি। ‘কাল এসো কিন্তু।’

‘আসব।’

দরজার দিকে এগোল কিশোর। অন্যপাশে এসে অবাক হয়ে দেখল, দরজার বাইরে দেয়ালে হেলান দিয়ে দাঁড়িয়ে আছেন শেরিফ। কোন সন্দেহ নেই, ভেতরের কথাবার্তা শুনছিলেন।

‘এ ভাবে আড়ি পেতেই কেসের সমাধান করেন নাকি আপনি?’ শীতল কণ্ঠে জিজ্ঞেস করল কিশোর।

‘অনেক কেসের করেছি,’ অস্বীকার করলেন না শেরিফ। ‘তোমাদের অবগতির জন্যে জানাচ্ছি, আমার একজন লোককে পাঠিয়েছিলাম জনসনের গাড়িটা যেখানে পড়ে গেছে সেখানে। রেডিওতে আমাকে জানিয়েছে, জায়গাটা ভাল না, যখন তখন পাথরের ধস নামে। দড়িতে ঝুলে একা একা ওখানে নামার চেষ্টা করলে প্রাণ হারানোর ভয় আছে। কাউকে আত্মহত্যার আদেশ দিতে পারি না আমি। স্বৈচ্ছায় নামতে চাওয়ার মত কাউকে পেলাম না। সুতরাং ট্রাকের ব্রেক সিস্টেম কাটা হয়েছে কিনা পরীক্ষাটাও সম্ভব না।’

পরদিন সকালে ডক্টর কুপারের বন্ধ দরজায় টোকা দিল কিশোর। পেছনে দাঁড়ানো মুসা আর রবিন। বিশ্রাম নিয়ে-টিয়ে অনেকটা সুস্থ বোধ করছে আজ রবিন, যদিও মগজের মধ্যে থেকে থেকেই কেমন করে উঠছে। দৈব-দর্শনের ক্ষমতাকে কাজে লাগিয়ে তথ্য জোগাড়ের বহু চেষ্টা করেছে সে। ডক্টর কুপারকে কে গুলি করেছে

জানতে চেয়েছে। পারেনি। হয়তো তেমন কোন সূত্র হাতে পায়নি বলে, যেটার সাহায্যে উস্কে দেয়া যায় ক্ষমতাটাকে।

খুলে গেল দরজা। ফ্র্যাঙ্ক হ্যানকে মুখোমুখি দাঁড়িয়ে থাকতে দেখল কিশোর।
'ও, হাই,' বিব্রত বোধ করল কিশোর। 'সরি। জানতাম না আপনি এখানে আছেন।'

তিন গোয়েন্দাকে ভেতরে ঢুকতে ইশারা করল হ্যান। 'এসো। আমি বেরোচ্ছিলাম। তোমাদের সঙ্গে ভালই লাগবে মারিসার।'

'তা লাগবে,' বিছানা থেকে জবাব দিলেন ডক্টর কুপার। 'বিরক্তিকর জায়গা এটা।'

ঘড়ি দেখল হ্যান। 'বাপরে! ক্লার্ককে বলে এসেছি দশটার মধ্যে ফিরব, কিন্তু দুপুর যে হয়ে গেল। আমি আর একটা সেকেন্ডও থাকতে পারছি না।'

'আগে বললেই হত,' ডক্টর কুপার বললেন। 'ওধু ওধু আমার কাছে বসে থেকে দেরিটা করলে।'

তার দিকে তাকিয়ে হাসল হ্যান। 'এ জায়গা যদি তোমার বিরক্তিকর মনে হয়, তাহলে আমার দোকানটাকে কি বলবে? সব সময় খালি তালে থাকি কখন ফাঁকি দেব। আজ সকালে তোমার কাছে না এলে কি করতাম জানো? ক্লার্কের ওপর দোকানের ভার দিয়ে সোজা বেরিয়ে পড়তাম। কি করতে চলে যেতাম। সারাটা দিনেও আর ফিরতাম না। বেচাকেনা না থাকলে ঝড়-তুফানেও আটকাতে পারে না আমাকে। কি করতে বেরিয়ে পড়ি। ঝড়ের মধ্যে কি করার মজাই আলাদা।'

ঝড়-তুফান! ঝট করে হ্যানের দিকে ঘুরে গেল কিশোরের দৃষ্টি। মগজে যেন ঝিলিক হেনে গেল বিদ্যুৎ শিখা। জিজ্ঞেস করল, 'সেদিন সকালেও কি কি করতে বেরিয়েছিলেন? ডক্টর কুপার যেদিন গুলি খেয়েছেন?'

ঠাঞ্জ নীল চোখের পাতা সরু হয়ে গেল হ্যানের। মুহূর্তে উধাও হয়ে গেছে হাসি হাসি ভঙ্গিটা। সতর্ক হয়ে গেছে। 'জানার কোন দরকার আছে তোমার?'

কি প্রশ্নের কি জবাব! তাকিয়ে রয়েছে কিশোর। হ্যানের এই প্রতিক্রিয়া সন্দেহ বাড়িয়ে দিল তার। 'না, তেমন কোন দরকার নেই। ভাবলাম, গিয়ে থাকলে এমন কিছু হয়তো চোখে পড়ে থাকতে পারে আপনার, যেটা এ কেসের সমাধানে সাহায্য করবে।'

টিল হয়ে এল হ্যানের পেশি। আবার হাসি ফুটল মুখে। 'ও, তাই বলো। দুঃখিত, আমি কোন সাহায্য করতে পারছি না। সেদিন সকালে ঠিক এগারোটার দোকানে ঢুকেছি আমি। মালের একটা বড় চালান এসেছিল। দেখেওনে সেগুলো তুলে রাখার ব্যাপার ছিল। একা পারত না ক্লার্ক।'

দরজার দিকে এগিয়ে গেল হ্যান। ফিরে তাকিয়ে বলল, 'মারিসা, রাতে পারলে আবার দেখে যাব তোমাকে।' বেরিয়ে গেল সে।

ঘন ঘন নিচের ঠোঁটে চিমটি কাটল কয়েকবার কিশোর। 'এরকম বন্ধু খুব কমই থাকে মানুষের!'

অবাক হলেন ডক্টর কুপার। 'তার মানে?'

'উ!' বাস্তবে ফিরে এল যেন কিশোর। ডক্টর কুপারের দিকে তাকাল। 'না, কিছু

না। সময় পেলেই আপনার কাছে এসে বসে থাকেন মিষ্টার হ্যান। আপনি যখন বেইশ ছিলেন, তখনও এসেছেন। ঘনিষ্ঠতা খুব বেশি আপনাদের মধ্যে, তাই না?

‘ধীরে ধীরে মাথা নাড়লেন ডক্টর কুপার। ‘ঘনিষ্ঠতার চেয়েও জানাশোনা বেশি। বহুদিন ধরে চিনি ওকে। মজার ব্যাপার হলো, গত দু’বছর তার সঙ্গে দেখা বলতে গেলে প্রায় হয়ইনি। বন্ধুত্বটা টিকে আছে এখনও। তবে ঘনিষ্ঠতা বলতে যা বোঝাতে চাইছি তুমি, তা কখনোই ছিল না।’

সারা ঘরে দ্রুত খেলে গেল কিশোরের চঞ্চল দৃষ্টি। উত্তেজিত হয়ে পড়েছে সে, বোঝা যায়। রবিন আর মুসাও সেটা লক্ষ করল।

‘আপনার জিনিসপত্র সব সেদিনই নিয়ে এসেছি আমরা,’ কিশোর জানাল। ‘ব্যাকপ্যাকটা এখন কোথায় আছে, জানেন?’

‘জানি,’ ঘরের কোণের একটা আলমারি দেখালেন ডক্টর কুপার। ‘ওটার মধ্যে। সব ঠিকঠাক আছে কিনা কে জানে। দেখার সুযোগ পাইনি।’ হাতে লাগানো আই-ভি টিউবটা দেখালেন তিনি। হেসে বললেন, ‘দেখো না, কেমন বেঁধে রেখেছে।’

‘আমি দেখব?’

‘দেখো।’

আলমারি থেকে ব্যাকপ্যাকটা বের করে আনল কিশোর। খাটো অ্যাটেনা লগানো খাতব সিলিভারের মত জিনিসটা বের করল। ‘আপনি যে জায়গাটাতে গুলি খেয়ে পড়েছিলেন, তার কাছেই পেয়েছি এটা। আপনার ব্যাগে রেখে দিয়েছিলাম। এটা আপনার রেডিও ট্রান্সমিটার?’

জিনিসটার দিকে তাকিয়ে আছেন ডক্টর কুপার। চোখ বড় হয়ে যাচ্ছে। ‘হু-সাত বছর আগে এ ধরনের জিনিসই ব্যবহার করতাম আমি। কিন্তু এটা আমার নয়।’

ভুরু নাচাল কিশোর। ‘তাহলে কার? দেখে তো হাতে বানানো জিনিস মনে হচ্ছে।’

একটা চেয়ার টেনে ডক্টর কুপারের একেবারে কাছে নিয়ে এল কিশোর। ‘ভাল করে দেখুন, কিছু মনে করতে পারেন কিনা। মিষ্টার হ্যানের দোকানে এ জিনিস বিক্রি করতে দেখেছেন কখনও?’

‘দেখেছি মানে? ও-ই তো বিক্রি করে এ জিনিস, ওর নিজের বানানো,’ ডক্টর কুপার বললেন। ‘ও যে কত কাজ জানে, তুমি কল্পনা করতে পারবে না। স্কি-এর গুস্তাদ, রাইফেল-বন্দুকে দুর্দান্ত নিশানা, ইলেকট্রনিকের জাদুকর...’

‘বাস বাস, আর বলতে হবে না!’ লাফ দিয়ে উঠে দাঁড়াল কিশোর। রবিনকে বলল, ‘তুমি এখানে বসে থাকো, যতক্ষণ না আমরা ফিরে আসছি। মুসা, এসো আমার সঙ্গে।’

‘কোথায় যাচ্ছ তোমরা?’ জানতে চাইল রবিন।

‘শেরিফের অফিসে,’ কোন দিকে আর না তাকিয়ে ঝড়ের গতিতে বেরিয়ে গেল কিশোর।

‘তাহলে তুমি বলতে চাইছ ফ্র্যাঙ্ক হ্যানই এ কাজ করেছে?’ চিন্তিত ভঙ্গিতে কিশোরের দিকে তাকিয়ে আছেন শেরিফ।

‘কোন সন্দেহ নেই আর আমার তাতে,’ দৃঢ়কণ্ঠে জবাব দিল কিশোর। ‘সব প্রশ্নের জবাব পেয়ে গেছি আমি। একটা বাদে।’

‘কি?’

‘কেন এ কাজ করল হ্যান?’

‘তোমার কি মনে হয়?’

‘এ সব ক্ষেত্রে একটা কারণই মূল উদ্দেশ্য হয়ে থাকে, টাকা।’

ধীরে ধীরে মাথা ঝাঁকালেন শেরিফ। ‘মনে হচ্ছে তোমার এই অনুমানটাও ঠিক। প্রচুর ধারদেনা ছিল হ্যানের, কিছুদিন আগেও। হঠাৎ করেই একদিন সব শোধ করে দিল সে। অবাক হয়েছিলাম। রাতারাতি এত টাকা কোথায় পেল সে? কথায় কথায় জিজ্ঞেসও করেছিলাম। হেসে জানিয়েছে, তার এক বুড়ো ধনী চাচা নাকি মারা গেছে। মরার সময় টাকা-পয়সা সব হ্যানের নামে উইল করে দিয়ে গেছে। এখন বুঝতে পারছি, সব বানোয়াট। কারও কাছ থেকে টাকাটা নিয়েছে সে। কিংবা বলা যায়, কোন কাজের জন্যে টাকাটা দিয়েছে তাকে কেউ।’

‘ঠিক ধরেছেন,’ তুড়ি বাজাল কিশোর। ‘শেষ প্রশ্নটার জবাবও পেয়ে গেলাম।’

‘তোমার ধারণা,’ বিশ্বাস করতে পারছে না মুসা, ‘টাকার জন্যে বন্ধুর বুকে গুলি চালিয়েছে সে? খুন করতে চেয়েছে?’

‘তা ছাড়া আর কি?’

‘কে তাকে টাকা দি়া?’

‘কার অত টাকা আছে এখানে?’ ভুরু নাচিয়ে পাল্টা প্রশ্ন করল কিশোর। ‘মানুষ খুন করানোর জন্যে রাতারাতি এত খরচ করে ফেলতে পারে?’

‘জেরাল্ড থার্সটন!’

‘হ্যাঁ,’ মাথা ঝাঁকাল কিশোর। ‘জেরাল্ড থার্সটন। সব কিছুর পেছনে ওই র‍্যাঙ্গার। তার অদৃশ্য হাতের ইস্তিহাই সব কিছু ঘটেছে।’ শেরিফের দিকে তাকাল সে। ‘ডক্টর কুপারকে জনসন গুলি করেনি, শেরিফ, হ্যান করেছে। কিন্তু যোগাযোগটা হলো কি করে দুজনের? গোপনে এ ধরনের কোন কাজ করানোর জন্যে যথেষ্ট চেনাজানা আর আন্তরিকতা থাকা দরকার।’

‘আন্তরিকতা আছে কিনা জানি না,’ জবাব দিলেন শেরিফ, ‘তবে চেনাজানা হতে কোন অসুবিধে নেই। এল্‌ক্‌ স্প্রিঙের বেশির ভাগ বাড়ির মালিক থার্সটন। যে বাড়িতে দোকান দিয়েছে হ্যান, সেটারও।’ গোঁফে টাকা দিলেন তিনি। ‘কিছুদিন আগেও ভাড়া নিয়ে গোলমাল ছিল হ্যানের সঙ্গে থার্সটনের। আমার কাছে নালিশ করে গেছে থার্সটন। হ্যানের চাচার মৃত্যুর পর সেটা মিটে গেছে, কারণ টাকা দিয়ে দিয়েছে হ্যান...’

‘চাচাফাচা সব ভুয়া কথা,’ বাধা দিয়ে বলল কিশোর। ‘থার্সটনের কথামত কাজ করতে রাজি হয়ে যাওয়ায় বকেয়া টাকা সব মাপ করে দিয়েছে থার্সটন। এর আর অন্য কোন ব্যাখ্যা নেই। ডক্টর কুপারকে সরিয়ে দিতে পারলে তার বিরাট লাভ, সে-জন্যে হ্যানকে টাকা খাইয়ে খুন করতে চেয়েছে তাঁকে।’

নীরবে মাথা ঝাঁকালেন শেরিফ।

‘বাজি রেখে বলতে পারি,’ কথার নেশায় পেয়েছে যেন কিশোরকে, বলেই যাচ্ছে, ‘লঙ্ক হার্ট যে গ্যারেজে ট্রাক রাখেন, সেটার মালিকও থার্সটন। তাই না?’

‘বাজিটা জিতে গেলে তুমি,’ গম্ভীর ভঙ্গিতে জবাব দিলেন শেরিফ।

‘তাহলে আর বসে আছেন কেন? ধরুন না গিয়ে ওকে।’

‘পারলে কি আর বসে থাকতাম,’ আবার গোঁফে টোকা দিলেন শেরিফ। ‘ভাল করেই জানো, ও বড় শক্ত ঠাই। কিছু করার আগে প্রমাণ দরকার। হ্যানই যে গুলি করেছে, সেটাও প্রমাণ করা যাচ্ছে না। ভেবো না, হ্যানকে আমি সন্দেহ করিনি। সকাল বেলা হাসপাতালে গিয়েছিলাম জনসনের সঙ্গে কথা বলার জন্যে। একটা ঘণ্টা নষ্ট করে এসেছি। কোন কথারই জবাব দেয়নি সে। সাফ বলে দিয়েছে, উকিলকে সামনে না রেখে কোন কথা বলবে না।’

‘তা তো বলবেই না,’ মাথা দোলাল কিশোর। ‘হয় বলতে ভয় পাচ্ছে, নয়তো তথ্য গোপন করে রেখে ভবিষ্যতে থার্সটনকে ব্র্যাকমেল করার ফন্দি এটেছে।’ নিচের ঠোট কামড়ে ধরে ছেড়ে দিল সে। ‘তবে মুখ খোলানোর বুদ্ধি একটা আছে। ফ্র্যাঙ্ক হ্যানকে হাতেনাতে ধরে ফেলা।’

ভুরু কুঁচকে কিশোরের দিকে তাকালেন শেরিফ।

মুচকি হাসল মুসা। ‘গ্রীক ভাষা’ বলা শুরু হয়ে গেছে কিশোরের।

কিন্তু বেশিক্ষণ শেরিফকে ভোগাল না কিশোর। খুলে বলল তার পরিকল্পনার কথা।

মুসা আর কিশোর যখন ঢুকল, হ্যান তখন দোকানে একা। হাসিমুখে ওদের স্বাগত জানাল সে। ‘বন্ধ করতে যাচ্ছিলাম। ভাবলাম, ডিনারের আগে মারিসার সঙ্গে দেখা করে যাই। তা তোমরা কি মনে করে?’

‘ও, আপনি তাহলে খবরটা শোনেননি,’ কিশোর বলল।

হাসি মিলিয়ে গেল হ্যানের। ‘কিসের খবর?’

‘আমরা বসে থাকতে থাকতেই একজন নার্স ঢুকল। রক্ত পরীক্ষা করে কি জানি পেয়েছে, একটা ইঞ্জেকশন দিল সে, সম্ভবত অ্যালার্জির ইঞ্জেকশন। মুহূর্তে খারাপ হয়ে গেল ডক্টরের অবস্থা। বেইশ হয়ে গেলেন তিনি। ছোট্টাছুটি করে এলেন ডাক্তার আর নার্সরা। আমাদের বের করে দিলেন ঘর থেকে।’ বিরক্তির ভঙ্গি করল কিশোর। ‘ইস, ইঞ্জেকশন দিতে আসার আর সময় পেল না! আরেকটু থাকলেই সেদিন সকালে কি ঘটেছিল, সব আমাদের বলতে পারতেন ডক্টর কুপার।’

কিশোরের চোখে দৃষ্টি যেন আটকে গেল হ্যানের। ‘কি বলেছে সে?’ আচমকা নরকশ হয়ে উঠল তার কণ্ঠ। ‘কাউকে দেখেছে?’

‘না, অতখানি এগোতে পারেনি আলোচনা।’ ঘড়ি দেখল কিশোর। ‘অনেক

দেবি করিয়ে দিলেন শেরিফ। তাঁর অফিস থেকেই এলাম। মুসা, তোমার খিদে পায়নি?

মাথা ঝাকাল মুসা। 'পেয়েছে।'

'চলো।'

ঝটকা দিয়ে দিয়ে একবার মুসা, আবার কিশোরের ওপর সরে যাচ্ছে হ্যানের দৃষ্টি। 'শেরিফের ওখানে গিয়েছিলে কেন?'

'তিনি আমাদের যেতে বলেছিলেন,' জবাব দিল কিশোর। 'ঠিক কোন সময়ে ওলিটা খেয়েছেন ডক্টর কুপার, সেটা নিয়ে আলোচনার জন্যে।' মুসার হাত ধরে টান দিল সে। 'চলো চলো, আমার আর সহ্য হচ্ছে না।' হ্যানের দিকে তাকিয়ে হাসল কিশোর। 'এদিক দিয়েই যাচ্ছিলাম। দোকানের দরজা খোলা দেখে মনে হলো, ডক্টর কুপারের খবরটা আপনি জেনে না থাকলে আপনাকে জানিয়েই যাই।'

'ভাল করেছে!'

হাসল কিশোর। 'আবার দেখা হবে, মিস্টার হ্যান। চলি। ওড-বাই।'

গাড়িতে উঠে হাসল কিশোর।

ইঞ্জিন স্টার্ট দিতে দিতে মুসা বলল, 'ফাঁদ তো পাতা হলো। এখন ধরা দিলেই হয়।'

'দেবে। আমি শিওর।'

বাইশ

লুমিনাস ডায়াল লাগানো ঘড়ির দিকে তাকিয়ে বুঝতে পারল কিশোর, ঘুমিয়ে পড়েছিল সে। এর আগের বার যখন ঘড়ি দেখেছিল, তখন বারোটোর কিছু বেশি। এখন একটা পনেরো। আলমারির ভেতরের বন্ধ, বেকায়দা পরিবেশে বসে ঘুমাতে পারল কি করে! সতর্ক থাকতে হবে, দ্বিতীয়বার যাতে আর এ ঘটনা না ঘটে। বলা যায় না, সারা রাতই জেগে থাকতে হতে পারে ওকে।

সামান্য ফাঁক করে রেখেছে আলমারির দরজা। যাতে ঘরের দরজা আর ডক্টর কুপারের বিছানার দিকে নজর রাখতে পারে। কয়েক মিনিট অন্ধকারের দিকে তাকিয়ে থাকতে থাকতে আবার বুকে আসতে লাগল তার চোখ।

ঝটকা দিয়ে খুলে গেল হঠাৎ। হলওয়ে থেকে পাতলা এক ফালি আলো এসে পড়েছে ঘরে। নিঃশব্দে ঘরে প্রবেশ করল একটা ছায়া মূর্তি। বিছানার দিকে এগিয়ে গেল। একটা মুহূর্ত দাঁড়িয়ে রইল চুপচাপ। তারপর একটা বালিশ তুলে নিয়ে চেপে ধরল বিছানায় শোয়া রোগীর নাকে-মুখে।

ছটফট শুরু করল বিছানায় শোয়া মানুষটা। আরও জোরে বালিশ চেপে ধরল ছায়ামূর্তি। ধীরে ধীরে কমে এল রোগীর ছটফটানি, থেমে গেল একেবারে।

বিছানা ঘেঁষে দাঁড়িয়ে নিখর হয়ে যাওয়া মানুষটার ওপর ঝুঁকে রইল ছায়ামূর্তি। লাক দিয়ে আলমারি থেকে বেরিয়ে এল কিশোর। সুইচ টিপে দিল কেউ। উজ্জ্বল আলোর ভরে গেল ঘর।

পাক খেয়ে ঘুরে গেল ছায়ামূর্তি-ফ্র্যাঙ্ক হ্যান। হাতে বালিশটা ধরা রয়েছে এখনও। কিশোরের দিকে ছুঁড়ে দিয়ে একটানে ছুরি বের করল পকেট থেকে। পাগলের মত ঝোঁচা মারতে এল। তীব্র আলোর ঝলকানিতে দেখতে পাচ্ছে না ঠিকমত। লাফ দিয়ে সরে গেল কিশোর। তার বুকের কয়েক ইঞ্চি দূর দিয়ে চলে গেল ফলাটা। আবার মারার জন্যে মাথার ওপর তুলে ধরল হ্যান।

লাফ দিয়ে উঠে বসল বিছানায় শোয়া মানুষটা। রবিন। দুই হাতে চেপে ধরল হ্যানের ছুরি ধরা হাত। রাগে বিকৃত হয়ে গেল হ্যানের মুখ। ঝাড়া দিয়ে হাত দুটো ছাড়ানোর চেষ্টা করল সে। পারল না।

আচমকা তার কজিতে এক মোচড় মারল রবিন। ছুরিটা হ্যানের হাত থেকে পড়ে গেল। হাত ছাড়ল না রবিন। ঘুরে দাঁড়াচ্ছে হ্যান। বেশিক্ষণ তাকে ধরে রাখতে পারবে না রবিন।

পেছন থেকে গায়ের ওপর এসে পড়ল কিশোর। বিছানার নিচ থেকে বেরিয়ে এল দুটো কালো রঙের হাত। হ্যানের পা খামচে ধরে হ্যাঁচকা টান মারল। তিনদিকের মিলিত আক্রমণ হ্যানের পক্ষে একা সামলানো কঠিন হয়ে পড়ল। পা নাড়াতে পারছে না। তার দুই হাত মুচড়ে পিঠের ওপর নিয়ে এল কিশোর আর রবিন ঝিলে। কাবু হয়ে গেল হ্যান।

রবিনের দিকে তাকিয়ে হাসল কিশোর। 'দম আটকে মরে যাওয়ার অভিনয়টা চমৎকার হয়েছে।'

হাসিটা ফিরিয়ে দিল রবিন। 'আর কয়েক সেকেন্ড বালিশ চেপে ধরে রাখলে সত্যি সত্যি মরে যেতাম।'

বিছানার নিচ থেকে বেরিয়ে এসেছে মুসা।

ফিরে তাকাল কিশোর। সুইচ বোর্ডের কাছে কাত হয়ে দেয়ালে হেলান দিয়ে দাঁড়িয়ে আছেন শেরিফ। ভুরু নাচিয়ে জিজ্ঞেস করল কিশোর, 'শেরিফ, আর কোন প্রমাণের দরকার হবে?'

সোজা হলেন শেরিফ। কাউবয় হ্যাটের কানায় আঙুল ঠেকিয়ে ঠেলে সামান্য সরিয়ে দিলেন পেছন দিকে। মাথা নাড়লেন, 'না। হাতেনাতে ধরা গেছে।'

খসখসে কণ্ঠে বলে উঠল হ্যান, 'ভুল করছেন আপনারা!'

'তা তো বটেই,' কঠিন স্বরে জবাব দিলেন শেরিফ, 'তবে ভুলটা আমরা নই, তুমি করেছ। কিন্তু একটা কথা বুঝতে পারছি না, হ্যান। তোমার দোকানের উল্টো দিকের রেস্তোরাঁটার ওয়েইট্রেসের সঙ্গে কথা বলেছি। মারিসা কুপার যে সকালে গুলি খেয়েছে, সেদিন সকাল এগারোটায় তোমাকে দোকানের ডিসপেন্সে বদল করতে দেখেছে সে। কি করে সেটা সম্ভব?'

'তার কারণ আপনি ঘড়ির ব্যাপারটা বিশ্বাস করেছেন,' হ্যানকে চুপ করে থাকতে দেখে জবাব দিল কিশোর। 'ডক্টর কুপারের ঘড়ির কাঁটা দশটা ছেচল্লিশ মিনিট দেখাচ্ছিল, যাতে সবাই মনে করে ওই সময় গুলি খেয়েছেন তিনি। কিন্তু এর আগের আধঘণ্টা কি করেছিলেন কিছু মনে করতে পারেন না ডক্টর কুপার।'

'তাতে কিছু প্রমাণ হয় না,' হ্যান বলে উঠল। 'ডাক্তার বলেছেন...'

'তুমি চুপ থাকো,' ধমক দিলেন শেরিফ। 'প্রথমবার খুনের চেষ্টা যদি প্রমাণ

করতে না-ও পারি, দ্বিতীয়বারেরটাও না পারি-মেশিন নষ্ট করে দিয়ে যেটা করতে চেয়েছিলে তুমি, তৃতীয়বারেরটা তো পারব। স্বচক্ষে দেখেছি। শুধু আমি একা নই, আরও তিনজন। এতজনের সাক্ষী না মেনে পারবেন না বিচারক।' কিশোরের দিকে তাকালেন তিনি। 'আমার কৌতূহল এখনও মেটেনি।'

'খুব সহজ,' কিশোর বলল। 'ন'টা থেকে ন'টা পনেরোর মধ্যে ডক্টর কুপারকে গুলি করেছে হ্যান। ওই সময়টায় ঝড় থেমেছিল। তাতে নিশানা করতে অসুবিধে হয়নি ওর। ডক্টর কুপার পড়ে যাওয়ার পর কাছে গিয়ে ঘড়িটা ভেঙে কাঁটা ঘুরিয়ে রেখেছিল দশটা ছেচল্লিশে। ন'টা পনেরো থেকে এগারোটা। প্রচুর সময়, ফ্র্যাঙ্ক হ্যানের মত ওস্তাদ ক্রিয়ারের জন্যে। আর কেউ-আমরা হলে এত তাড়াতাড়ি স্কি করে শহরে ফিরে আসতে পারতাম না। তা ছাড়া পাহাড়ী পথে কোন শর্টকাটও নিশ্চয় চেনা আছে তার, যেদিক দিয়ে এলে সময়ও কম লাগে। ন'টা পনেরো থেকে দশটা পর্যন্ত তুষারপাত চলছিল। তাতে ঢেকে যায় তার স্কি-এর দাগ। এ কারণেই ফাঁকিতে পড়ে গিয়েছিলাম প্রথমে। আরও একটা ব্যাপারে খটকা লেগেছে, ডক্টর কুপারের দেহ তুষারে ঢেকে গিয়েছিল। দশটা ছেচল্লিশে গুলি খেলে গায়ে তুষার জমার কথা নয়। তুষারপাত বন্ধ হয়ে গেছে এর অনেক আগেই।'

'এক মিনিট, এক মিনিট,' হাত তুললেন শেরিফ। 'ঘড়ির ব্যাপারটা বুঝলাম। কিন্তু হ্যান কি বোঝেনি মারিসা কুপার বেঁচে আছে? ওকে একেবারে শেষ না করে দিয়ে গিরিখাত থেকে চলে এল কেন সে?'

'এ ছাড়া আর কোন উপায় ছিল না তার,' জবাব দিল কিশোর। 'ঘটনাক্রমে দুর্ঘটনা হিসেবে দেখাতে চেয়েছিল সে। শিকারের সময় ভুলে যদি গুলি লাগে, একটা গুলি লাগতে পারে বড়জোর-দুটো গুলি বিধে আছে দেখলে কেউ আর অ্যান্ড্রিডেন্টের কথা বিশ্বাস করবে না। ও ভেবেছিল, মরে যাবেন ডক্টর কুপার। যেতেনও, আমরা গিয়ে না পৌঁছলে। হ্যান কল্পনাই করেনি, ওই তুষারঝড়ের মধ্যে কেউ তাঁকে উদ্ধার করতে যাবে। যাই হোক, আপনাকে উড়ো টেলিফোন করা আর লঙ হার্টের রাইফেল রেখে দিয়ে ফাঁসানোর অপচেষ্টাটাও অবশ্যই হ্যানের।'

'ঘড়িটা যে ইচ্ছে করে বাড়ি মেরে ভাঙা হয়েছে, বুঝলে কি করে?' জিজ্ঞেস করলেন শেরিফ।

'শুরুতেই যে কেন বুঝলাম না, সেটাই অবাক লাগছে আমার,' কিশোর বলল। 'ঘড়িটা ছিল মোটা দস্তানার নিচে আড়াল করা। ডক্টর কুপার পড়েছেন নতুন জামা নরম তুষারের স্তূপের ওপর। তাতে হাজার বাড়ি লাগলেও ঘড়ি ভাঙার কথা নয়। ভালমত ভাবার পর বুঝলাম ঘড়িটা হাত থেকে খুলে নিয়ে গিয়ে পাথরে বাড়ি মেরে ভেঙে এনে আবার পরিয়ে দেয়া হয়েছে।'

'খাইছে!' ফোঁস করে একটা নিঃশ্বাস ফেলল মুসা। 'জীবনে যদি আর কোনদিন কাঁটা লাগানো ঘড়ি পাবি আমি! ডিজিটাল অনেক ভাল। এ সব শয়তানি করে রাখা সম্ভব না।'

পরদিন সকালে বাড়ি ফেরার আগে হাসপাতালে ডক্টর কুপারের সঙ্গে দেখা করল তিন গোয়েন্দা।

‘তারমানে আবার আমার প্রাণ বাঁচালে তোমরা,’ ডক্টর কুপার বললেন। ‘ফ্র্যাঙ্ক আমাকে খুন করতে চেয়েছে, এখনও বিশ্বাস হচ্ছে না আমার। এই হলো মানব-চরিত্র! সে-জন্যেই মানুষের চেয়ে জন্তু-জানোয়ারের প্রতি আমার বেশি আগ্রহ।...যাকগে, একটা কথা বলবে, এর মধ্যে টেরি জনসন ঢুকল কিভাবে?’

‘কাকতালীয় ভাবে,’ জানাল কিশোর। ‘সেদিন সকালে কুগারের চিহ্ন অনুসরণ করতে করতে গিরিখাতের কাছে দু’জন মানুষকে দেখেছিল জনসন। লঙ হার্ট আর ফ্র্যাঙ্ক হ্যান। হ্যানকে সন্দেহ করেছিল সে। ব্ল্যাকমেল করতে চেয়েছিল। হ্যান বলে দিয়েছিল থার্সটনকে। থার্সটন তখন জনসনকে সরিয়ে দেয়ার চেষ্টা করেন।

‘পর্বতে ডেকে নিয়ে যান ওকে থার্সটন। নিশ্চয় টাকাটুকি দেয়ার কথা বলেই। পিকআপের কাছ থেকে সরিয়ে নিয়ে যান ওকে। আগে থেকেই লুকিয়ে ছিল ওখানে হ্যান। সুযোগ বুঝে বেরিয়ে এসে চুপি চুপি কেটে রেখে যায় জনসনের ব্রেক সিসটেম।’

দ্বিধা যাচ্ছে না ডক্টর কুপারের। ‘এখনও বুঝতে পারছি না, রেডিও সিগন্যালের ব্যাপারটা!’

হাসল কিশোর। ‘এটা হলো হ্যানের চালাকির সবচেয়ে ইনটারেস্টিং অংশ। আপনি ঠিক কোনখানে রয়েছেন জানা ছিল না হ্যানের। মোটামুটি একটা ধারণা ছিল কেবল। রেডিও সিগন্যাল পাঠিয়ে তখন আপনাকে তার কাছে টেনে নিয়ে গিয়েছিল সে। ও জানত, সিগন্যাল পেলে আপনি ভাববেন আপনার কলার পরানো কোন কুপার। আপনাকে গুলি করার পর ট্রান্সমিটারটা নষ্ট করে দেয়ার ইচ্ছে হ্যানের ছিল নিশ্চয়। কিন্তু পরে হয় সেটা তুষারের মধ্যে আর খুঁজে পায়নি, কিংবা ওটার কথা ভুলে গিয়েছিল। আপনাকে বেঁচে থাকতে দেখে প্রচণ্ড নাড়া খেয়েছিল সে, যার ফলে ছোটখাট দু’একটা ভুল করে ফেলা সম্ভব। স্বল-ক্যালিবারের রাইফেল দিয়ে স্থির টার্গেট প্র্যাকটিস করতে অভ্যস্ত সে। ভারী রাইফেল দিয়ে সচল জানোয়ার শিকারের অভিজ্ঞতা তার নেই বলেই বেঁচে গেছেন আপনি।’

‘পুরো ব্যাপারটাই বড় জটিল,’ ডক্টর কুপার বললেন। ‘সব কিছুর পেছনে জেরাল্ড থার্সটন রয়েছে, কি করে প্রমাণ করবে?’

‘মোটোও কঠিন হবে না সেটা,’ মুখ না খুলে আর পারল না মুসা। ‘হাজতে ভরার পর থেকে মুখে খই ফোটা শুরু হয়ে গেছে ফ্র্যাঙ্ক হ্যানের। চড়ুই পাখির মত একনাগাড়ে কিচির-মিচির করে চলেছে সে...’

‘মনে হয় এ যাত্রা তোমার বন-বিড়ালগুলো বেঁচে গেল, মারিসা।’
নতুন একটা কণ্ঠ শুনে দরজার দিকে ঘুরে গেল চার জোড়া চোখ। হাম্মিমুখে দাঁড়িয়ে আছেন লঙ হার্ট।

ঘরে ঢুকলেন তিনি।

হেসে জবাব দিলেন ডক্টর কুপার, 'ওগুলো শুধু আমার বিড়াল নয়, লঙ। ওরা সবার। ওরা মুক্ত, ওরা স্বাধীন, ওরা বন্য। এ ভাবেই দেখা উচিত ওদের।'

'আমারও কুগারের জীবনই পছন্দ,' ঘোষণা করলেন লঙ হার্ট।

গলায় ঝোলানো ক্যামেরাটা খুলে নিল রবিন। 'দয়া করে একটু পোজ দিয়ে দাঁড়াবেন?'

'কেন?' ভুরু কুঁচকে জানতে চাইলেন লঙ হার্ট।

'একটা ছবি তুলব,' রবিন বলল। 'আমার সংগ্রহে রাখার জন্যে।'

'তারচেয়ে বরং বুনো কোন কুগারের ছবি তুলে নাওগে,' হেসে বললেন ডক্টর কুপার। 'পার্বত্য সিংহের মুখে ইনডিয়ান নেতার চেহারা দেখতে পাবে পরিষ্কার।'

'শুধু শুধু ওই প্রাণীগুলোকে ছোট করছ, মারিসা,' অস্বস্তি ভরা কণ্ঠে প্রতিবাদ জানালেন লঙ হার্ট। রবিনের দিকে ফিরলেন, 'রবিন, আমি রেডি।'

তীব্র আলো ঝিলিক দিয়ে উঠল ক্যামেরার ফ্যাশ লাইট থেকে।
